



ԿԱՐԵՆ ՄԱԹԵՎՈՍՅԱՆ

ԱՆԻ - ՀԻՐԱԿԻ

ՊԱՏՄՈՒԹՅԱՆ ԷԶԵՐ

Ի ՀԱՅՐԱՊԵՏՈՒԹՅԱՆ
Ն. Ս. Օ. Տ. Տ. ԳԱՐԵԳԻՆ ԵՐԿՐՈՐԴ
ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ

ՀՐԱՄԱՆԱԿ
ՇԻՐԱԿԻ ԹԵՄԻ ԱՌԱՋՆՈՐԴ
Տ. ՄԻՔԱՅԵԼ ԵՊՍ. ԱԶԱՊԱՀՅԱՆԻ

ԿԱՐԵՆ ՄԱԹԵՎՈՍՅԱՆ

ԱՆԻ-ՇԻՐԱԿԻ
ՊԱՏՄՈՒԹՅԱՆ ԷՋԵՐ
(հոդվածների ժողովածու)

Երևան
Հեղինակային հրատարակություն
2010

ՀՏԴ 941 (479. 25)
ԳՄԴ 63.3 (23)

*Գիրքը հրատարակության է երաշխավորել
Մեսրոպ Մաշտոցի անվան Մատենադարանի
գիտական խորհուրդը*

*Մ151 Անի-Շիրակի պատմության էջեր: Հոդվածների ժողովածու
Կարեն Մաթևոսյան. - Եր.:
Հեղինակային հրատարակություն, 2010.- 294 էջ:*

Karen Matevosyan

PAGES FROM THE HISTORY OF ANI-SHIRAK
(Collection of Articles)

Ժողովածուն ընդգրկում է Անիի պատմությանը եւ Անիի Բագրատունյաց թագավորության կազմում եղած մի շարք վանքերի (Հռոռոնոս, Բագնայր, Հառիճ, Կեչառիս) եւ բնակավայրերի (Մաղասբերդ, Թալին, Արուճ) պատմության տարբեր հարցերին վերաբերող, ինչպես նաեւ մի քանի պատմական գործիչների նվիրված հոդվածներ եւ նյութեր:

Նախատեսված է պատմաբանների եւ Հայոց պատմությամբ հետաքրքրվող ընթերցող լայն հասարակայնության համար:

ՀՏԴ 941 (479. 25)
ԳՄԴ 63.3 (23)

© Կարեն Մաթևոսյան, 2010 թ.

ISBN 978-9939-53-819-8

Մայր Աթոռ Սուրբ Էջմիածնի տպարան, 2010:

ԵՐԿՈՒ ԽՈՍՔ

Միջնադարյան Հայաստանի պատմության մեջ Անին բացառիկ դեր է կատարել ոչ միայն որպես երկրի քաղաքական ու հոգեւոր կենտրոն՝ թագավորանիստ եւ կաթողիկոսանիստ, այլեւ քաղաքային կյանքի, տնտեսության ու մշակույթի զարգացման առաջնակարգ վայր: Պատահական չէ, որ այս քաղաքի պատմության եւ ընդհանուր մշակութային ժառանգության ուսումնասիրությունը հայագիտության մեջ առանձին անունով անհագիտություն է կոչվում:

2010-ին լրացավ Անիի մերձակա վանքերից մեկի՝ Բագնայրի հիմնադրման 1000-ամյակը: Հռոմոսի, Բագնայրի, Արջո Առիճի վանքերը Անիի մերձակա հոգեւոր կենտրոններն էին, մի փոքր ավելի հեռու՝ հարավ-արեւմուտքում գտնվող Խծկոնքը, Տեկորը, Սրենը, հյուսիս-արեւելքում գտնվող Մարմաշենն ու Հառիճը եւ մի քանի այլ վանքեր ու բնակավայրեր անմիջականորեն ընդգրկված էին անհական մշակութային միջավայրում ինչպես Բագրատունյաց ժամանակաշրջանում, այնպես էլ հետագայում՝ ընդհուպ մինչեւ 14-րդ դարի կեսերը: Հատկանշական է, օրինակ, որ Անի քաղաքի փողոցների եւ այլ քաղաքամասերի անուններ ավելի շատ պահպանվել են Հռոմոսի եւ Բագնայրի վիմագրերում, քան բուն քաղաքի արձանագրություններում: Իսկ Անիի մշակութային, գրական կապերը շատ ավելի հեռուներն են գնում: Հետեւաբար անհագիտական ուսումնասիրությունները թե՛ տարածական եւ թե՛ խորքային առունով ավելի լայն ընդգրկում պետք է ունենան:

1997-ին մենք հրատարակել ենք «Անի. եկեղեցական կյանքը եւ ձեռագրական ժառանգությունը» աշխատությունը, որի առաջին մասում անդրադարձել ենք քաղաքի հոգեւոր-եկեղեցական կյանքին, Անիի կաթողիկոսական եւ եպիսկոպոսական աթոռներին, քաղաքի եկեղեցիներին ու հոգեւորականությանը, այլադավան համայնքներին, իսկ երկրորդ մասում՝ անհական ձեռագրական ժառանգությանը, գրչատներին, գրիչներին ու ծաղկողներին:

Նախընթաց տասնամյակում, զբաղվել ենք 12-րդ դարի հեղինակ Սամվել Անեցու ժամանակագրության ձեռագրերի ուսումնասիրությամբ¹, որի ընթացքում երեւան եկան Անիի պատմությանն առնչվող զանազան նոր նյութեր: Նույն տարիներին նաեւ այլ ուսումնասիրողների ջանքերով ի հայտ են եկել պատմական նոր տվյալներ, որոնք անհազիտության տարբեր հարցերում ճշտումներ ու լրացումներ կատարելու հնարավորություն են տալիս: Այս ամենն արտացոլված է սույն ժողովածուի մեջ ընդգրկված հոդվածներում:

Ժողովածուն պարունակում է Անիի պատմությանը, քաղաքի հետ կապված մի քանի վանքերի (Յոռոնոս, Բագնայր, Հառիճ) եւ բնակավայրերի (Մաղասբերդ, Թալին, Արուճ) պատմության տարբեր հարցերին վերաբերող, ինչպես նաեւ որոշ ազնվականական տոհմերի եւ առանձին գործիչների նվիրված հոդվածներ ու նյութեր, որոնց հիմնական մասը վերջին տարիներին հրատարակել ենք գիտական պարբերականներում² (այստեղ ներկայացվում են մասամբ լրամշակված): Վերջում գետեղել ենք Աբրահամ Կրետացու «Պատմութիւն Անի քաղաքին» փոքրածավալ երկի մեր

¹ Կ. Մաթեոսյան, Սամվել Անեցու ժամանակագրության ձեռագրերը եւ նորահայտ լրացումները, Երեւան, 2009:

² Հառիճի վանքը ԺԳ դարի սկզբին (գոչության կենտրոնը եւ հարակից հարցեր), «Էջմիածին», 1998, Ա, էջ 115-124, Հազարամյա Կեչառիսի հիմնադրման պատմությունից, «Էջմիածին», 2004, Ա, էջ 77-91 (ներկայացված է Գրիգոր Մագիստրոսի արձանագրության հատվածը), Հովհաննես Սարկավագի գործունեությունն Անիում, «Էջմիածին», 2005, Է-Ը, էջ 59-72, Գրիգոր Ապիրատ Մագիստրոսը եւ նրա տոհմը 11-րդ դարում, «Բանբեր Մատենադարանի», թիվ 18, Երեւան, 2008, էջ 67-93, Արուճի եւ Թալինի պատմության էջեր, «Էջմիածին», 2009, Ա, էջ 50-62, Անի քաղաքը եւ Ծառաբար-Մաղասբերդը 11-14-րդ դդ., «Հուշարձան» տարեգիրք, Դ-Ե, Երեւան, 2008, էջ 236-247, Անին մայրաքաղաք եւ կաթողիկոսանիստ, «Պատմա-բանասիրական հանդես», 2008, N 3, էջ 3-30, Յոռոնոսի վանահայրերի զավագանագիրքը, «Էջմիածին», 2009, Ե, էջ 60-64, Բագնայրի վանքի հազարամյակը, «Էջմիածին», 2010, Բ, էջ 53-76:

կատարած աշխարհաբար փոխադրությունը, որը գրաբարով տպագրվել է 1870 թ.:

Ժողովածուն նվիրվում է Անիի պատմական եպիսկոպոսական աթոռի հաջորդ՝ Շիրակի թեմի հաստատման 90-ամյակին եւ Բագնայրի վանքի 1000-ամյակին, որի պատմությունը ներկայացված է ընդարձակ հոդվածով: Բագնայրի վանքի հին եւ նոր լուսանկարների տրամադրման համար շնորհակալություն ենք հայտնում Հայկական Ճարտարապետությունն ուսումնասիրող կազմակերպությանը (RAA): Խորին շնորհակալություն ենք հայտնում Հայ Առաքելական Ս. Եկեղեցու Շիրակի թեմի առաջնորդ Տ. Միքայել եպիսկոպոս Աջապահյանին գրքի տպագրության համար:

ԱՆԻՆ ՄԱՅՐԱՔԱՂԱՔ ԵՒ ԿԱԹՈՂԻԿՈՍԱՆԻՍ

Պատմիչ Վարդան Արեւելցիւն գրելով Անիի Բագրատունյաց թագավորության անկման մասին, նշում է, որ բյուզանդացիները վերացրեցին Անիի երկու պսակները, կաթողիկոսական եւ թագավորական գահերը. «Յոյնք... **վերացուցին ի նմանէ (Անիից – Կ. Ս.) զերկուսին պսակն՝ զգահ հայրապետութեան եւ զթագաւորութեան...**»¹: Բանն այն է, որ Բագրատունյաց թագավորության մայրաքաղաքը նաեւ կաթողիկոսանիստ լինելով, շատ ավելի մեծ՝ համահայկական նշանակւթյուն ուներ, եւ բյուզանդացիների կատարածը Անիի հենց այդ՝ Հայոց աշխարհիկ եւ կրօնական կենտրոնի դերի վերացումն էր:

Անին հետազոտվել է որպէս հնավայր, հայկական ճարտարապետության բացառիկ կենտրոն, բազմակողմանիորեն ուսումնասիրվել են նաեւ քաղաքի հարուստ պատմութիւնը, մշակութային ընդհանուր ժառանգութիւնը, ստեղծվել է անհագիտական պատկառելի գրականութիւն: Միեւնույն ժամանակ Անիի պատմության տարբեր հարցերի վերաբերյալ վերջին տարիներին երեւան են եկել պատմական որոշ նոր տվյալներ, կատարվել են տարբեր հարցերի վերաբերող նոր թվագրումներ: Դրանց մի մասը նկատի ունենալով՝ ստորեւ կներկայացնենք Անին որպէս մայրաքաղաք եւ կաթողիկոսական աթոռանիստ, հատկապէս անդրադառնալով վերջին իրութեանը:

Նախ տեսնենք, թե ինչպէս Անին դարձավ մայրաքաղաք եւ կաթողիկոսանիստ: 885 թ. Բագրատունիների գլխավորությամբ վերականգնված Հայոց թագավորության առաջին չորս գահակալները հաջորդաբար գահանիստ դարձրեցին Բագարանը, Երազավորսը (Շիրակավան) եւ Կարսը: Այս կացութիւնը, որը գալիս էր դեռեւս

¹ Վարդան Արեւելցի, Տիեզերական պատմութիւն (գրաբար տեքստը ըստ Վենետիկի 1862 թ. տպագրության), աշխարհաբար թարգմանութիւնը Գ. Բ. Թոսունյանի, Երեւան, 2001, էջ 104 (այսուհետեւ՝ Վարդան Արեւելցի): Այս եւ հաջորդ մեջբերումներում ընդգծումները մերն են – Կ. Ս.:

Հայոց իշխանների տիրապետության շրջանից (7-րդ դ.), երբ ամեն մի ընտրված իշխանի նստավայր, նրա իշխանության օրոք դառնում էր երկրի վարչական կենտրոն, արմատապես փոխվեց, երբ Աբաս Բագրատունու (929-953) որդին՝ Աշոտ Գ Ողորմածը (953-977) Կարսից փոխադրվեց Անի եւ այստեղ 961 թ. Անանիա Ա Մոկացի (946-968) կաթողիկոսի ձեռքով թագադրվեց՝ քաղաքը հռչակելով երկրի մշտական մայրաքաղաք։ Աշոտը, որ մտահոգված էր անփոփոխ մայրաքաղաք ունենալու խնդրով, մինչ այդ փորձել էր գրավել Հայոց նախկին մայրաքաղաք Դվինը, բայց ռազմական անհաջողություն կրելով՝ նոր որոշում էր կայացրել՝ ընտրելով թագավորության կենտրոնական մասում գտնվող Անին։

Այս դեպքերի մասին առավել հանգամանորեն պատմող Մատթեոս Ուռհայեցին Աշոտ Ողորմածին կոչում է Աշոտ-Գագիկ երկանունով կամ պարզապես Գագիկ²։ Ն. Ադոնցը Մատթեոս Ուռհայեցու հայտնածը համարել է «խառնակ» տեղեկություն³։ Սակայն Մատենադարանի երկու ձեռագրերում, որոնք պարունակում են Սամվել Անեցու ժամանակագրության լրացումները, պահպանվել է հետևյալ տեղեկությունը՝ «Հայոց ՆԺԱ (962). **Գագիկ թագաւոր օծաւ Հայոց, որ է նոյն Աշոտ որդի Աբասայ**»⁴։ Սա հաստատում է Ուռհայեցու հաղորդածն այն մասին, որ Աշոտ Ողորմածը «Աշոտ-Գագիկ» երկանունն է ունեցել։ Վերջինս միայն Գագիկ անունով է հիշվում նաեւ մանր ժամանակագրություններից մեկում⁵։

² Մատթեոս Ուռհայեցի, ժամանակագրություն (աշխարհաբար թարգմանությունը եւ ծանոթագրությունները Հ. Բարթիկյանի), (գրաբար տեքստը ըստ ժամանակագրության Վաղարշապատի 1898 թ. հրատարակության), Երեւան, 1991, էջ 8-9, 484 (այսուհետեւ՝ Մատթեոս Ուռհայեցի)։

³ Ն. Ադոնց, Երկեր, հ. Ա, Երեւան, 2006, էջ 521։

⁴ Մատենադարան, ձեռ. թիվ 7261, էջ 52բ, ձեռ. թիվ 10202, էջ 56 բ։

⁵ «Գագիկ օծաւ թագաւոր 411 (962) ի թուին Հայոց» (Մանր ժամանակագրություններ, 13-18-րդ դդ., հ. 1, կազմեց՝ Վ. Հակոբյան, Երեւան, 1951, էջ 337)։ Այս տեղեկությունը ծանոթագրելով Վ. Հակոբյանը կարծել է, թե ժամանակագիրը շփոթմամբ նշել է ավելի ուշ՝ 989-ից թագավորած Գագիկ Ա-ին (նույն տեղում, էջ 347)։

Աշոտ Ողորմածի ժամանակ Անին դեռեւս քաղաքի տեսք չուներ, եւ պատահական չէ, որ Մխիթար Անեցին նրա մասին գրում է. «Աշոտ Ողորմածն, որդի Աբասայ, թագաւորէ յԱնի՝ ամս Իե (25) եւ շինէ **զՓոքր քաղաքն**»⁶: Իսկ Վարդան Արեւելցին գրում է, որ Աշոտը պարիսպ կառուցեց եւ պարսպաբուրգերի մեջ եկեղեցիներ հիմնեց՝ «...զամենայն բրգունս եկեղեցիս յօրինեաց»⁷, որոնց գոյությունը հաստատվել է պեղումների ժամանակ:

Հայտնի է, որ Աշոտ Ողորմածին նախորդած եւ հաջորդած Բագրատունի թագավորներն իրենց նստավայրերում եկեղեցիներ են կառուցել (Սմբատ Ա-ը՝ Շիրակավանում, Աբասը՝ Կարսում, Աշոտ Ողորմածի որդիներ Սմբատ Բ-ը եւ Գագիկ Ա-ը՝ Անիում), մինչդեռ նա այդպես չի վարվել: Այս հարցի պատասխանը տալիս է Մատենադարանում պահվող՝ Ստեփանոս Տարոնեցի Ասողիկի Պատմության հնագույն ընդօրինակությունը պարունակող ձեռագիրը (թիվ 2865): Այն հատվածում, ուր Ասողիկը պատմում է, որ Աբաս Բագրատունի թագավորը կառուցել է Կարսի եկեղեցին, ձեռագրի գրիչ, Անիի շրջանում ապրած Հոհանը լուսանցքում ավելացրել է հետեւյալը. «Սա շինէ եւ **զՓոքր Կաթողիկէն Անույ**»⁸: Անիի պատմության համար այս վկայությունը չափազանց կարեւոր է, քանի որ այդ եկեղեցին՝ Փոքր Կաթողիկեն, փաստորեն, կառուցվել է մինչեւ Անիի մայրաքաղաք հռչակվելը: Երբ Աշոտ Ողորմածն Անիում թագադրվեց

⁶ Մխիթար Անեցի, Մատեան աշխարհավէպ հանդիսարանաց, աշխատասիրությամբ Հ. Գ. Մարգարյանի, Երեւան, 1983, էջ 67:

⁷ Վարդան Արեւելցի, էջ 95:

⁸ Մատենադարան, ձեռ. թիվ 2865, էջ 196բ: Այս տեղեկությունը եղել է նաեւ Հոհանի ձեռագրից ընդօրինակված մատյաններում եւ զետեղվել Ասողիկի պատմության հրատարակության տողատակում (Ստեփանոսի Տարոնեցու Պատմութիւն տիեզերական, աշխատասիրութեամբ Ստ. Մալխասեանցի, Սանկտ Պետերբուրգ, 1885, էջ 172, այսուհետեւ՝ Ասողիկ): Հոհան գրիչը Շիրակի եւ Անիի վերաբերյալ կարճ հավելումներ է կատարել ինչպես Ասողիկի, այնպես էլ նույն ձեռագրում ընդգրկված Արիստակես Լաստիվերցու պատմության մեջ (Կ. Մաթեւոսյան, Հոհան գրչի ընդօրինակած պատմական ժողովածուն եւ կատարած հավելումները, «Էջմիածին», 2008, ե, էջ 102-112):

(մի արարողություն, որը կատարվում էր կաթողիկոսի ձեռքով՝ եկեղեցում), այս նորահռչակ նստավայրում եկեղեցի չկառուցեց, քանի որ իր հոր հիմնած եկեղեցին՝ Փոքր Կաթողիկեն, արդեն կանգուն էր, եւ ինքն էլ այդտեղ էր թագադրվել⁹: Դա հավանաբար Աշոտի պարիսպներից մերս գտնվող այն հին եկեղեցին է, որն ուսումնասիրողները կոչում են «Աշոտի քաղաքի եկեղեցի» կամ պարզապես՝ «Աշոտի եկեղեցի»¹⁰: Այն, որ հենց այս եկեղեցին է Անիի Փոքր Կաթողիկեն, ըստ Ա. Ղուլյանի, «հաստատվում է նաեւ ճարտարապետական դիտարկմամբ»¹¹:

Աշոտ Ողորմածի ժամանակ Աղթամարից Բագրատունիների տիրույթներ փոխադրված կաթողիկոս Անանիա Մոկացին հանգրվանել էր Շիրակի Արգինա ավանում: Ինչպես երեւում է, թագավորի նպատակը Անին ոչ միայն թագավորանիստ, այլեւ կաթողիկոսանիստ դարձնելն էր, եւ այդ ուղղությամբ նա որոշ քայլեր ձեռնարկեց: Անանիա Մոկացու մահից հետո Շիրակավանում գումարված եկեղեցական ժողովում նոր կաթողիկոս ընտրվեց Վահան Ա Սյունեցին (968-969): Սակայն վերջինիս աթոռակալությունը շատ կարճ տևեց, քանի որ նա քաղկեդոնականների՝ մասնավորապես վրացիների հետ մերձեցման փորձեր կատարեց, ինչը հայ ավանդապահ հոգեւորականությունը չհանդուրժեց: Վահանի գործերը քննելու եւ նրան պարսավելու համար **969 թ. եկեղեցական ժողով գումարվեց նորահաստատ Անի մայրաքաղաքում**: Այս մասին հանգամանորեն պատմում է դեպքերին ժամանակակից պատմիչ Ստեփանոս Տարոնեցի Ասողիկը, ըստ որի ժողովում Վահանը աթոռանկ է հայտա-

⁹ Կ. Մաթեոսյան, Անի. եկեղեցական կյանքը եւ ձեռագրական ժառանգությունը, Ս. Էջմիածին, 1997, էջ 155-158: Հատկանշական է, որ Աշոտ Ողորմածի որդու՝ Սմբատ Բ-ի Անիում կառուցած Մայր տաճարը աղբյուրներում սովորաբար կոչվում է Մեծ Կաթողիկե:

¹⁰ G. Uluhogian, Les églises d'Ani d'opres le temoignage des inscriptions, "Revue des études Arméniennes", Tome XXIII, Paris 1992, p. 406, 413.

¹¹ Ա. Ղուլյան, Անիի Մայր տաճարի հազարամյա խորհուրդը, «Հուշարձան» տարեգիրք 9, Երեւան, 2005, էջ 36:

րարվում, որից հետո հեռանում է Վասպուրական: Նույն ժողովը կաթողիկոս է ընտրում Սեւանի վանահայր Ստեփանոսին՝ «...ժողովն, կամակցութեամբ Աշոտոյ Շահնշահի կաթողիկոս հաստատեաց Յայոց զՍտեփանոս վանական Սեւանայ»¹²:

Փաստորեն, **Ստեփանոս Գ Սեւանցի** (969-972), **կաթողիկոս է ընտրվել ու ձեռնադրվել Անիում**: Բայց նրա կարճատեւ աթոռակալությունը մեծ մասամբ անցել է Վասպուրականի Աբուսահլ թագավորի հովանավորությունը ստացած Վահան Սյունեցու դեմ մղված պայքարում: Վերջինս մտադիր չէր հրաժարվել կաթողիկոսությունից, որի պատճառով, փաստորեն, իշխում էին երկու կաթողիկոս, ինչպես Ստեփանոս Օրբելյանն է գրում՝ «**Ստեփանոս՝ յԱնի եւ Վահան՝ ի Վասպուրական**»¹³: Այս իրավիճակը Ստեփանոսին ստիպում է գումարել **Անիի երկրորդ եկեղեցական ժողովը**: Մաղաքիա Օրմանյանը գրում է. «Ստեփանոս փութաց երկրորդ ժողով մը գումարել կնճռոտ խնդիրը լուծելու համար, որ անշուշտ Անիի մեջ հաւաքուեցաւ...: Ժողովին... իբր հետեւանք կը ցուցուի բանակցութեան մը պէտքը, զայն անձամբ կատարել յանձն կառնու նոյնիսկ Ստեփանոս կաթողիկոս»¹⁴:

Անիի երկրորդ եկեղեցական ժողովն, ըստ Մ. Օրմանյանի, տեղի է ունեցել 971 թ., որից հետո Ստեփանոսը մեկնել է Վասպուրական: Հեղինակի կարծիքով, այդ ընթացքում կաթողիկոսն աթոռակալել է Անիում:

Այսպիսով, կարելի է ասել, որ Աշոտ Ողորմածը կարողացավ մի կարճ ժամանակաշրջանում (969-971 թթ.) հասնել իր հեռագնա նպատակին՝ երկրի քաղաքական եւ հոգեւոր իշխանությունը կենտրոնացնել Անիում, իրողություն, որը պատմագրության մեջ գրեթե անտեսվել է:

¹² Ասողիկ, էջ 181:

¹³ Ստեփանոս Օրբելյան, Պատմութիւն նահանգին Սիսական, Թիֆլիս, 1910, էջ 290:

¹⁴ Մ. Օրմանյան, Ազգապատում, Ս. Էջմիածին, 2001, հ. Ա, էջ 1307:

Սակայն հետագա դեպքերը իրավիճակի որոշ փոփոխության բերեցին: Արծրունի թագավորը եւ Վահան կաթողիկոսը, առանց իսկ ունկնդրելու բանակցության մեկնած Ստեփանոսին ու նրա երկու ուղեկից վարդապետներին, կալանեցին նրանց եւ արգելափակեցին Աղթամարում: Քիչ անց Ստեփանոսի երկու ընկերակիցներին ազատ արձակեցին, իսկ նրան փոխադրեցին այլ վայր, ուր եւ մեկ տարի անց մահացավ: Նույն 972 թ. մահացավ նաեւ Վահան Սյունեցին:

Դրանից հետո կաթողիկոս ձեռնադրվեց Անանիա Մոկացու քրոջ որդին՝ Արշարունիքի եպիսկոպոս Խաչիկ Ա-ը (972-990), որը մինչ այդ էլ նշանակալից դեր ուներ Անիի թագավորության մեջ: Ասողիկի բնորոշմամբ նա **«միապետեալ խաղաղեցոյց զաշխարհի Հայոց»** եւ, որպես խոհեմ գործիչ, մեղմեց Բագրատունիների ու Արծրունիների միջեւ առկա հակամարտությունը: Թվում է, որ հենց այս նպատակով նա չմնաց Անիում, այլ, Մոկացու օրինակով, հաստատվեց Արգինայում: Ինչպես Ասողիկն է գրում. «Կաթողիկոս Հայոց տէր Խաչիկ... **նորոգեաց զտուն կաթողիկոսարանին ի Շիրակ գաւառի ի գիւղաքաղաքին Արգինայ...** Եւ ի նմին գեօղ շինեաց զսուրբ Կաթողիկէ եկեղեցին...»¹⁵: Խաչիկ Ա-ն Արգինան նորոգելու եւ այստեղ աթոռակալելու համար նվազագույնը երկու կարելուր պատճառ ուներ. առաջինը վասպուրականցիներին հանդարտեցնելու ցանկությունն էր, երկրորդը՝ կաթողիկոսությունը քաղաքական իշխանության ազդեցությունից հեռու, ուստի հնարավորինս ինքնուրույն պահելու ձգտումը:

Այսու Ողորմածին հաջորդեց նրա ավագ որդին՝ Սմբատ Բ-ը (977-989), որը նախ կառուցեց Անիի մեծ պարիսպը, ապա քաղաքի կենտրոնական մասում սկսեց մեծ Կաթողիկէ եկեղեցու կամ Մայր տաճարի կառուցումը Տրդատ ճարտարապետի ձեռամբ, որը Արգինայի Կաթողիկէ եկեղեցու կառուցողն էր: Սա ակներեւորեն արվում

¹⁵ Ասողիկ, էջ 184-185:

էր կաթողիկոսարանը Անի փոխադրելու նպատակով: Սմբատը, սակայն, կյանքից անժամանակ հեռանալով, չտեսավ իր ձեռնարկի ավարտը: Մահացած արքային փոխարինեց նրա եղբայր Գագիկ Ա Բագրատունին (989-1017), որի կինը՝ Կատրամիդե թագուհին ստանձնեց Կաթողիկէի շինարարության հովանավորությունը:

Խաչիկ Արշարունու մահից հետո (990 թ.)¹⁶ հաջորդ կաթողիկոսի ընտրությունը, անհայտ պատճառով, որոշ ժամանակով հետաձգվեց (ըստ Ասողիկի եւ Սամվել Անեցու՝ 2 տարի)¹⁷, մինչեւ որ Գագիկ Ա թագավորը կաթողիկոսության կոչեց իր վաղեմի ծանոթ եւ հովանավորյալ հոգեւորական, Սեւանի վանքի առաջնորդ Սարգսին: Դեպքերի ժամանակակից պատմիչ Ստեփանոս Տարոնեցիին գրում է. «Ի ՆԽԱ (992) թուականին՝ Գագիկ արքայ Յայոց կացոյց կաթողիկոս Յայոց զՏէր Սարգիս», նաեւ ավելացնում, որ դա տեղի է ունեցել «առանց կաշառոյ եւ այլ երկնաւոր շողոքորթութեանց»¹⁸: Յայտնի չէ, թե ինչու է նոր կաթողիկոսի ընտրությունը հետաձգվել, սակայն Սարգիս Ա Սեւանցին (992-1019) արդեն իր աթոռակալության սկզբում Արգինայից փոխադրվեց Անի՝ մայրաքաղաքը դարձնելով նաեւ կաթողիկոսական աթոռանիստ¹⁹: Դրանով իրագործվեց դեռեւս Աշոտ Ողորմածի ժամանակ նախանշված ծրագիրը, եւ **Հայաստանի քրիստոնեական առաջին մայրաքաղաքներ Վաղարշապատի ու Դվինի օրինակով Անին եւս դարձավ կաթողիկոսանիստ**:

¹⁶ Ասողիկ, էջ 258:

¹⁷ Ասողիկ, էջ 258, Սամուելի քահանայի Անեցոյ Յաւաքմունք ի գրոց պատմագրաց՝ յաղագս գիւտի ժամանակաց անցելոց մինչեւ ի ներկայս ծայրաքաղ արարեալ, յառաջաբանով, համեմատութեամբ, յաւելուածներով եւ ծանօթութիւններով Արշակ Տէր-Միքելեանի, Վաղարշապատ, 1893, էջ 103 (այսուհետեւ՝ Անեցի):

¹⁸ Ասողիկ, էջ 258-259:

¹⁹ «Սարգիս կրցած է ընտրութենէ եւ օծումէն ետքը այլեւս Արգինա չդառնալ եւ մնալ Անի, Գագիկի մօտ, որ կանուխէն ալ մասնաւոր սէր ունեցած էր Սարգսի վրայ եւ անոր կաթողիկոսութիւնն ալ յաջողոցւած էր» (Մ. Օրմանյան, Ազգապատում, էջ 1358): Տե՛ս նաեւ Կ. Մաթեւոսյան, Անի, էջ 26-27, Ա. Ղուկաս, մշվ. աշխ., էջ 29:



Անիի աշխարհիկ եւ հոգեւոր մայրաքաղաք լինելու իրողութիւնն ուշագրավ արտացոլում է գտել քաղաքի զինանշանում: Անիի ավագ դուռը զարդարող այս զինանշանին անդրադարձողները հիմնականում ուշադրութիւն են դարձրել հովազի (կամ առյուծի) քանդակին, մինչդեռ զինանշանի ամբողջական կառուցվածքը ներկայացնում է շեղադիր քարերից կազմված վերասլաց խաչ, որի ներքեւում երեք մուգ քարով պատկերված հիմքն է (ստիլբատ), վրան՝ հովազապատկերը ներառող շրջանակը, իսկ դրանից վեր՝ շեղադիր քարերով բուն հավասարաթեւ խաչը: Ենթադրելի է, որ հովազը եւ խաչը համապատասխանաբար խորհրդանշում են հայոց աշխարհիկ եւ հոգեւոր իշխանութիւնները, որոնք կենտրոնացած էին Անիում:

ՍԱՐԳԻՍ Ա ՍԵԲԱՆՑՈՒ ԱԹՈՈՎԱԿԱԼՈՒԹՅՈՒՆՆ ԱՆԻՈՒՄ

Գագիկ Ա-ի տիրապետութիւնը համարվում է Անիի Բագրատունյաց թագավորության առավելագույն վերելքի շրջանը: Նրա ժամանակ երկրի գորության եւ միասնության ապահովման գործում կարեւորագույն դեր ուներ նաեւ Հայոց կաթողիկոսութիւնը: Սար-

գիս Սեւանցին թեւ ըստ Ասողիկի «անապատասէր կենաց» սիրահար էր, բայց 27-ամյա աթոռակալութեան ընթացքում կարողացաւ հմտորեն կազմակերպել Հայոց եկեղեցական կյանքը, կաթողիկոսարանի բազմաճյուղ գործունեությունը:

Մի շարք վկայություններ կան այն մասին, որ թագավորն ու կաթողիկոսը հանդես էին գալիս միասնաբար: Հայտնի է, որ 1001թ. Տաշիրի թագավոր Դավիթ Անհողիցի անհնազանդության պատճառով Գագիկ Ա-ը պատժիչ արշավանք է կազմակերպել նրա դէմ: Առճակատումը հարթվել է «միջնորդութեամբ հայրապետին՝ Տեառն Սարգսի»²⁰, եւ Դավիթը հնազանդության է եկել: 1006 թ. Գագիկի կնոջ՝ Կատրամիդե թագուհու հոր՝ Սյունիքի Վասակ թագավորի խնդրանքով եւ հենց Գագիկ թագավորի միջնորդութեամբ Սարգիս Սեւանցին Անիում Սյունյաց եպիսկոպոս է ձեռնադրում Հովհաննեսին: Միաժամանակ Սյունիքի աթոռին են վերադարձվում Անանիա Մոկացու ժամանակ՝ Սյունյաց Հակոբ եպիսկոպոսի խռովության պատճառով նրանից խլված մետրոպոլիտության պատիվն ու արտոնությունները, ինչպէս նաեւ Անիի կաթողիկոսարանի «սրբարանի սենեակում» պահվող սրբությունները՝ «Սիւնեաց սեփական խաչը, ոսկերիզ խաչվառը, թանկարժէք գաւազանը եւ պատուական գահաւորակը»²¹: Կաթողիկոսի սույն ձեռնարկն ամրացնում է հայ եկեղեցու ներքին միասնությունը, միաժամանակ Սյունիքի թագավորությունն ավելի սերտորեն կապում Անիի թագավորության հետ:

²⁰ Ասողիկ. էջ 280:

²¹ Ստեփանոս Օրբելեան, Պատմութիւն..., էջ 304: Ուշագրավ է նաեւ Ստ. Օրբելյանի հայտնած տեղեկությունն այն մասին, որ թագավորն ու թագուհին Հովհաննես եպիսկոպոսին են նվիրել Տերունական Խաչի՝ ոսկու մեջ ագուցված մի մասունք, որը նրանց էր ուղարկել Վասիլ կայսրը (Ստեփանոս Օրբելեան, նույն տեղում): Կայսեր՝ Գագիկ թագավորին տված մեկ այլ սրբության մասին է հայտնում 14-րդ դարի կեսերի հեղինակ Նաթանայել Հավուցթառեցին (տես Կ. Մաթեւոսյան, Սամվել Անեցու ժամանակագրության ձեռագրերը եւ նորահայտ լրացումները, Երեւան, 2009, էջ 133-134, 141):

Սարգիս Ա-ի աթոռակալության ժամանակ շարունակվում են բյուզանդական եկեղեցու հետ եղած դավանաբանական հակադրությունները, որը հատկապես ընդգծվեց 1007 թ. ծաղատիկի հետեւանքով²²։ Իսկ երկրի ներսում գլուխ էր բարձրացրել թոնդրակեցիների աղանդը, եւ կաթողիկոսն անհրաժեշտ պայքար էր մղում նրանց դեմ²³։

Պատմիչ Արիստակես Լաստիվերցին նշում է Սարգիս Ա-ի ժամանակ Ամիի կաթողիկոսարանում գտնվող երեք նշանավոր վարդապետներին՝ գրելով. «Եւ էին յայն ժամանակի վարդապետք՝ **Սարգիս եւ Տիրանուն եւ Յենովք, որ կաթողիկոսարանին էին վարդապետք**»²⁴։ Կաթողիկոսն իր գործակիցներով զբաղվում էր հիմնարար խնդիրներով։ Հայտնի է, որ նրա օրոք համակարգվել ու «ժամանակագրական հաջորդականությամբ դասավորելու մղումով» դասակարգվել են Հայոց եկեղեցական իրավունքի եւ ընդհանրապես հոգեւոր-եկեղեցական կյանքը կարգավորող գլխավոր վավերագրի՝ Հայոց Կանոնագրքի (Կանոնագիրք Հայոց) նյութերը՝ 40 կանոնախմբերով, իսկ նրանց վերջում ավելացվել է Հայոց կաթողիկոսների գավազանագիրքը (անվանացանկը), որի վերջին նշումը վերաբերում է հենց Սարգիս Սեւանցու ձեռնադրությանը²⁵։ Սարգիս կաթողիկոսի պատվերով է իր «Տիեզերական պատմությունը» գրել Ստեփանոս Տարոնեցի Ասողիկը (ավարտել է 1004 թ.), որը կաթողիկոսարանի սպասավորներից մեկն էր²⁶։

²² Մ. Օրմանյան, Ազգապատում, էջ 1362-1363։

²³ Պատմութիւն Արիստակիսի Լաստիվերտցոյ, աշխատասիրությամբ Կ. Յուզբաշյանի, Երեւան, 1963, էջ 124 (այսուհետեւ՝ Արիստակես Լաստիվերցի)։

²⁴ Նույն տեղում, էջ 126։

²⁵ Կանոնագիրք Հայոց (աշխատասիրությամբ Վ. Հակոբյանի), հ. Բ, Երեւան, 1971, էջ XXIII-XXV։

²⁶ Պատմագրքի հիշատակարանում, դիմելով պատվիրատու կաթողիկոսին, նա գրում է. «...յարածուկի շրջանք եւ **հանապազորդեան հոգք եկեղեցւոյ, որ ըստ հրամանի Չեր,** ոչ թողացուցանէին մտաց իմոց գետեղել ի պատշաճ յօրինուած բանիս» (Ասողիկ, էջ 285)։

Այս նույն շրջանում Անին կառուցապատվում էր, զարդարվում հրաշագեղ եկեղեցիներով: Ինչպես ականատես պատմիչն է գրում, Քրիստոսի ծննդյան 1000-ամյակին՝ «Յայնմ ժամանակի, յորում լնոյր լրութեամբ ամն Ռ (1000) մարմնանալոյ կամ մարդանալոյ Տեառն մերոյ»²⁷, Գագիկ Ա թագավորը Անիում կառուցել է Ս. Գրիգոր (Գագկաշեն) եկեղեցին, որը 7-րդ դարում կառուցված Զվարթնոցի (Ս. Գրիգոր) կրկնօրինակությունն էր, կառուցված **«նոյնաձեւ չափով եւ յօրինուածով»**²⁸: Սամուել Անեցին էլ իր հերթին ավելացնում է, թե Գագիկը եկեղեցին շինել տվեց **«գաղափար առեալ զլուսազարդ գիրաշալի Սուրբ Գրիգորն՝ զշինեալն ի Ներսիսէ հայրապետէ»**²⁹:

Նույն շրջանում Կատրամիդե թագուհին Անիում ավարտին էր հասցնում Սմբատ Բ թագավորի հիմնադրած Կաթողիկե եկեղեցին, որը դառնում է կաթողիկոսարանի եկեղեցին³⁰: Իսկ Սարգիս Սեւանցի կաթողիկոսն Անիում ձեռնարկում է Ս. Ջոիփսիմյանց կույսերին նվիրված եկեղեցու հիմնումը: Շինարարության ավարտից հետո կաթողիկոսը մեծ շուքով Վաղարշապատի վկայարաններից այստեղ է փոխադրում Ջոիփսիմյան կույսերի մասունքների մի մասը: Վարդան Արեւելցին այդ մասին գրում է. «Տէր Սարգիս ... **շինեաց վկայարան Սրբոց Ջոիփսիմեանցն, առննթեր կաթուղիկէին Անույ եւ**

²⁷ Ասողիկ, էջ 282:

²⁸ Ասողիկ, էջ 282:

²⁹ Անեցի, էջ 104: Ստեփանոս Ասողիկի Պատմության հնագույն ընդօրինակությունը պարունակող ձեռագրում, համապատասխան հատվածի վերնագիրը՝ «Յաղագս շինելոյն Գագկայ արքային ի քաղաքն Անույ զեկեղեցին մեծ անուամբ սրբոյն Գրիգորի», Անիի շրջանում աշխատած Դոհան գրիչը լրացրել է՝ «Տրդատ վարդպետ եկեղեցոյն» (Մատենադարան, ձեռ. թիվ 2865, թերթ 241ա): Սա Տրդատի՝ Գագկաշեն Ս. Գրիգոր եկեղեցու ճարտարապետը լինելու վերաբերյալ պահպանված միակ վկայությունն է:

³⁰ Հավանաբար այդ ժամանակ է կառուցվել նաեւ կաթողիկոսարանի շենքը: Ենթադրաբար դա Ախուրյանի ծորահայաց այն կառույցն է, որը հետագայում՝ 11-րդ դարի 70-ական թվականներին, մասամբ ձեւափոխելով եւ միմարե կցելով մզկիթի է վերածել Սամուէլ ամիրան:

անդ փոխեաց զնշխարս նոցա՝ բերեալ մեծաւ հանդիսիւ, եւ կարգեաց զօրն տօն մեծ»³¹: Այս արժեքավոր վկայությունը ցույց է տալիս կաթողիկոսի՝ Անին ոչ միայն կաթողիկոսարանի ներկայությամբ հաստատված եկեղեցական կենտրոն տեսնելու, այլև Չայոց եկեղեցու նվիրական սրբություններն ամփոփող սրբավայր դարձնելու ձգտումը: Փաստորեն, ինչպես որ Չայոց եկեղեցու բնօրրան Վաղարշապատում է Մայր տաճարը (Ս. Աստվածածին) գտնվում՝ Չոփսիսիմյանց կույսերի վկայարանների հարեւանությամբ, այնպես էլ կաթողիկոսն Անիի Մայր տաճարի (Ս. Աստվածածին) մոտ կառուցում է Չոփսիսիմյանց կույսերի վկայարան, սրբերի մասունքները տեղափոխելով այստեղ ու «մեծ տոն» սահմանում՝ «...Վաղարշապատի Կաթողիկեին հին սովորութեան հետեւողութեամբ», ինչպես նկատում է Մաղաքիա Օրմանյանը³²:

Ավելացնենք, որ 11-րդ դարի սկզբին թագավորին, թագուհուն ու կաթողիկոսին հետեւելով եկեղեցիներ ու վանքեր են հիմնում Բագրատունյաց Անիի նշանավոր իշխանները. Վահրամ Պաիկավունին կառուցում է Մարմաշենի վանքը (ըստ շինարարական արձանագրության կառուցվել է 988-1029 թթ.), Գրիգոր Ապիրատ Մագիստրոսը՝ Կեչառիսի վանքը (1003 թ.), նրա եղբայր՝ Քեղի ամրոցի տեր Գեւորգ իշխանը՝ Չավուց Թառի Կաթողիկեն (1002 թ.)³³, Սմբատ Մագիստրոսը՝ Բագնայրի վանքը (1010 թ.) եւ այլն:

Այսպիսով, Սարգիս Սեւանցու աթոռակալության տարիներին Չայոց եկեղեցին վերելք է ապրում, ամրապնդվում է Անիի աթոռը: Բնութագրական են Արիստակես Լաստիվերցու խոսքերը՝ «...պայծառացան կարգք եկեղեցւոյ... քանզի ունէր զաթոռ հայրապետութեան Տէր Սարգիս, սնեալ սրբութեամբ ի ծոց եկեղեցւոյ... զոր շնոր-

³¹ Վարդան Արեւելցի, էջ 96:

³² Մ. Օրմանյան, Ազգապատում, էջ 1376:

³³ Կ. Մաթեոսյան, Չավուց թառի վանքի եւ Ապիրատյան տոհմի պատմության նորահայտ տվյալներ, «Բանբեր Մատենադարանի», 17, Երեւան, 2006, էջ 147-167:

հիւն Աստուծոյ կոչեն ըստ արժանաւորութեան եւ նստուցանեն յաթոռ մերոյ Լուսաւորչին, որ նորին կարգօքն քաղաքավարեալ ի մարմնի, բարի հանդիսիւք աւարտեաց զկեանս իւր»³⁴:

Յավոք, Հայոց եկեղեցու համար այս բարենպաստ կացութիւնը հիմնովին փոխվում է Սարգիս Սեւանցու հաջորդի՝ Պետրոս Ա-ի (հետագայում «Գետադարձ» մականվանված) օրոք³⁵:

ԳԱԳԻԿ Ա ԲԱԳՐԱՏՈՒՆՈՒ ՄԱՅԸ ԵՒ ՊԵՏՐՈՍ Ա ԿԱԹՈՂԻԿՈՍԻ ԱԹՈՌԱԿԱԼՈՒԹՅՈՒՆԸ

Պետրոս Ա-ի կաթողիկոսական ձեռնադրութիւնը տեղի է ունեցել 1019 թ., աննախադեպ պայմաններում, նախորդ հայրապետի կենդանւոյան ժամանակ եւ հենց նրա ձեռքով: Բուն հանդեսի մասին ժամանակով ավելի մոտ պատմիչները լռում են, միայն Վարդան Ա-րեւելցին (13-րդ դ.) գրում է, որ Պետրոսին «Տէր Սարգիս ի կենդանութեան իւրում օծեալ էր իւրով ձեռօք յԱմի, մեծ հանդիսիւ»³⁶:

Գրիգոր Լուսավորչի օրոք կաթողիկոս դարձած նրա որդի Արիստակեսից հետո այս երկրորդ դեպքն էր, երբ կաթողիկոսի կենդանւոյան ժամանակ, նրա համաձայնութեամբ ձեռնադրվում էր իր հաջորդը: Պատմիչները չեն հայտնում Սարգսի հրաժարվելու պատճառը: Ենթադրվել է, որ նա ծերութեան հետեւանքով է այդ քայլին դիմել³⁷: Սա, իհարկե, համոզիչ բացատրություն չէ, քանի որ Սարգսի նախորդ բոլոր կաթողիկոսներն էլ (բացառյալ մի քանի նահատակները) կյանքից հեռացել են բնական մահով, խորը ծե-

³⁴ Արիստակես Լաստիվերցի, էջ 25-26:

³⁵ Պետրոսի ծագման մասին ուշագրավ մանրամասն է պահպանվել 1404 թ. ճառընտիրում. «...էր նա ի գաւառէն Շիրակայ, յազատ տանէ..., ի մեծաց եւ պատւաւորաց ի Կամրջաձորոյ, որ է ի յերկիրն Անույ...» (Մատենադարան, ձեռ. թիվ. 1520, թերթ 30բ):

³⁶ Վարդան Արեւելցի, էջ 98:

³⁷ Մ. Օրմանյան, Ազգապատում, էջ 1377, Գ. Մագսուտեան, Ընտրեալ յԱստուծոյ, Ամենայն Հայոց կաթողիկոսի ընտրութիւնը, Երեւան, 1995, էջ 68:

րության մեջ: Բացի այդ, կաթողիկոսների ցմահ աթոռակալությունը ոչ թե որեւէ մեկի ցանկության, այլ եկեղեցական ավանդությանն ու կանոնին համապատասխանող հարց էր:

Ընդունված է այն կարծիքը, որ Պետրոսը կաթողիկոս դարձավ Գազիկ Ա-ի ժամանակ: Մ. Օրմանյանն այս մասին գրում է. «Պետրոս եղավ այն անձը, որուն վրայ Սարգիս կաթողիկոս եւ Գազիկ թագաւոր իրենց մտադրութիւնը հաստատեցին, հայրապետական աթոռին արժանավոր յաջորդ մը տալու համար»³⁸: Բանն այն է, որ գրականության մեջ համարվում է, որ Գազիկ Ա-ը մահացել է 1020 թ.: Իսկ Պետրոսը, Արիստակես Լաստիվերցու համաձայն՝ կաթողիկոս է դարձել 1019-ին: Սակայն պարզվում է, որ Գազիկ Ա-ն ավելի վաղ է մահացել: Երկու հիմնավոր փաստ մշելով այս տեսակետն առաջ է քաշել Կ. Յուզբաշյանը: Նա գրում է, որ Գազիկը մահացել է մոտ 1017 թվականին եւ ծանոթագրում, որ այդ հարցում պատմիչները հստակ վկայություն չունեն, ուստի օգնության են գալիս վիճաբերը: Մաստարայի 1015 թ. արձանագրության մեջ հիշվում է Գազիկը, բայց արդեն Տեկորի 1018 թ.՝ ոմն Թաթուլի արձանագրության մեջ, հիշվում է Հովհաննես (Հովհաննես Սմբատ) թագավորը: Իր հերթին Արիստակես Լաստիվերցին գրելով Գազիկին հաջորդած նրա որդիների՝ Հովհաննես Սմբատի եւ Աշոտի հակամարտության, վերջինիս Կոստանդնուպոլիս գնալու մասին, մշում է, որ դա տեղի է ունեցել մինչեւ 1018 թվականը: Այդ փաստերը նկատի ունենալով Կ. Յուզբաշյանը եզրակացնում է. «Գազիկի մահը մենք թվագրում ենք 1017 թ., թեւ չի բացառվում նաեւ 1016 թ.»³⁹:

³⁸ Մ. Օրմանյան, Ազգապատում, էջ 1389:

³⁹ К. Юзбабян, Армянские государства эпохи Багратидов и Византия IX-XI вв., Москва, 1988, с.156-157. Տե՛ս նաեւ Ն. Սարգիսեան, Տեղագրութիւնք ի Փոքր եւ ի Մեծ Հայս, Վենետիկ, 1864, էջ 207, Արիստակես Լաստիվերցի, էջ 28:

Կ. Յուզբաշյանի վկայակոչած փաստերն իրոք ծանրակշիռ են, իսկ տեսակետն՝ ընդունելի, մանավանդ որ Գագիկի մահվան 1020 թվականը վկայող ոչ մի որոշակի վկայություն չկա⁴⁰: Իսկ 1017 թվականի օգոստին է խոստում նաեւ Սամվել Անեցու մոտ պահպանված տվյալը: Բագրատունի թագավորների իշխանության թվականները նա քաղել է Ասողիկից, սկսելով Աշոտ Ա-ից⁴¹: Նրանք երկուսն էլ թագավորներին միեւնոյն քանակի տարիներ են տալիս (Աշոտ Ա՝ 5 տարի, Սմբատ Ա՝ 24, Աշոտ Բ՝ 8, Աբաս Ա՝ 24, Աշոտ Գ Ողորմած՝ Ասողիկի մոտ՝ 25, Սամվել Անեցու մոտ՝ 27, որը Ե (5) եւ Է (7) տառերի շփոթության հետեւանք է, Սմբատ Բ՝ 13): Գագիկ Ա-ի իշխանությունն ըստ Ասողիկի սկսվել է 989 թ., իսկ տարիների քանակն ամբողջական չէ, քանի որ նա իր պատմությունն ավարտել է 1004 թվականին, ինչպես հիշատակարանում է նշում՝ Գագիկի 15-րդ տարում⁴²: Բայց Սամվել Անեցու մոտ Գագիկ Ա-ի համար նշվում է 29 տարի⁴³: Ըստ այդմ՝ 989-ը համարելով Գագիկի թագավորության առաջին տարին («Ձկնի Սմբատայ, ի նոյն օր՝ թագաւորեաց Գագիկ եղբայր նորա ի ՆԼԸ (989) թուականին, յաւուրս ծներայնոյ») ⁴⁴, նրա 29-րդ տարին (մահը) համընկնում է 1017 թվականին:

Այն, որ Սարգիս Սեւանցին աթոռից հրաժարվել է Գագիկի մահից հետո, նաեւ տրամաբանական է, քանի որ վերջինս այս կաթողիկոսի հովանավորն էր: Միաժամանակ այդ հրաժարականի պատճառը բացահայտում է դեպքերի քննությունը, որոնց ժամանակով

⁴⁰ Գագիկ Ա-ի մահվան թվականի հարցում Մատթեոս Ուռհայեցու եւ Վարդան Արեւելցու մոտ ակներեւ անախրոնիզմ կա (համապատասխանաբար՝ 972 եւ 995 թ.), տես Մատթեոս Ուռհայեցի, էջ 12-13, 485, Վարդան Արեւելցի, էջ 97: Ըստ Հայ ժողովրդի պատմության ակադեմիական բազմահատորյակի հեղինակների Գագիկ Ա-ի թագավորության վերջին շրջանը «համարյա մնում է մթության մեջ» (Հայ ժողովրդի պատմություն, հ. 3, ՀԱՍՏ ԳԱ հրատ., Երեւան, 1976, էջ 134-140):

⁴¹ Ասողիկ, էջ 401:

⁴² Ասողիկ, էջ 285:

⁴³ Անեցի, էջ 104: Նույնը կրկնում է Մ. Անեցին (Մխիթար Անեցի, էջ 67):

⁴⁴ Ասողիկ, էջ 255:

ամենամոտ հեղինակը Արիստակես Լաստիվերցին է, ուստի տեսնենք թե նա ինչ է հայտնում կատարվածի մասին:

Գագիկ Ա-ի մահից հետո իշխանությունը ժառանգում են նրա որդիները՝ «մարմնով հաստի եւ յայժ թանձր», բայց խելացի Յովհաննես Սմբատը եւ «քաջասիրտ» Աշոտը: Սրանց մեջ ժառանգության հարցում հակառակություն է ծագում եւ դատի պահանջ է առաջանում («Սոքա ընդ միմեանս անկեալք հակառակութեամբ վասն բաժնից երկրին՝ կարօտացան իրաւանց եւ դատաստանի»)⁴⁵: Նկատենք, որ նման դեպքում կարող էր եղբայրների հաշտեցման միջնորդ լինել նաեւ կաթողիկոսը, բայց այդ մասին աղբյուրներում չի վկայված:

Պատմիչը շարունակելով, գրում է, որ վեճը հարթելու համար կանչում են Վրաց Գեորգի Ա (1014-1027) թագավորին, որը հաշտեցնում է եղբայրներին, որոշում Յովհաննես Սմբատին ավագության համար տալ Անին եւ նրա շրջակա գավառները, իսկ Աշոտին՝ «զներքին կողմն աշխարհին, որ հայի ի վերայ Պարսից եւ Վրաց»⁴⁶: Բանակցության ավարտից հետո, երբ Յովհաննես Սմբատը Անի էր ճանապարհվել, Աշոտի իշխաններից մեկը Գեորգիին բողոքում է, որ Յովհաննես Սմբատը զավթել է իրեն պատկանող Շատիկ բերդը: Գեորգին զայրանալով ուղարկում է իր զինվորներին, որոնք իջեւանատանը բռնում ու իրենց թագավորի մոտ են բերում Յովհաննես Սմբատին, նրան ուղեկցողներին էլ ջարդում են, քշում մինչեւ Անի, ուր Հայ եկեղեցու նկատմամբ իրենց սանձարձակ են պահում: Գեորգին Յովհաննես Սմբատին փակի տակ է պահում, ապա նրանից երեք բերդ առնելով՝ բաց թողնում:

Ըստ պատմիչի, Աշոտը, որն իր բաժին տարածքներին ամբողջովին տիրելու խնդիր ուներ, ուղեւորվում է Կոստանդնուպոլիս, արժանանում կայսեր բարեհաճությանը, նրանից օգնական զորք ստանում եւ վերադառնալով տիրում իր գավառներին ու բերդերին

⁴⁵ Արիստակես Լաստիվերցի, էջ 27:

⁴⁶ Նույն տեղում:

եւ մեծապես զորանում: Այս նշելուց հետո Լաստիվերցին գրում է. «Մինչ ցայս վայր պատմութիւնս մեզ հեշտալի է»⁴⁷:

Ապա թեման փոխելով պատմիչը գրում է, որ 1018 թվականին կայսրը նիկոմեդացի մի իշխան է ուղարկում, որը գալիս եւ սկսում է Թեոդոսուպոլսի վերաշինումը:

Այնուհետեւ պատմիչը գրում է, որ 1019 թ. «ձեռնադրի Տէր Պետրոս ի կաթողիկոսութիւն առ կենօք Տէր Սարգսի»⁴⁸: Անմիջապէս շարունակելով Լաստիվերցին նշում է, որ 1021 թ. կայսրը մեծ զորքով Արեւելք է գալիս եւ իջեւանում Կարնո դաշտում⁴⁹:

Ինչպէս տեսնում ենք, Արիստակէս Լաստիվերցին Պետրոսի ձեռնադրութիւնը նշում է Գագիկի մահից ու նրա որդիների միջեւ ծագած առաջին հակամարտության մասին պատմելուց, նաեւ 1018 թ. տեղի ունեցած մի դէպքի մասին գրելուց հետո: Միաժամանակ պարզ է դառնում, թե երկրում որքան լարված վիճակ է եղել Գագիկ Ա-ի մահվանը հաջորդած շրջանում:

Այժմ վերադառնանք Սարգիս Սեւանցու հրաժարականի խնդրին: Ակներեւ է, որ արքայազուն եղբայրների հակամարտության ժամանակ նա ի վիճակի չի եղել միջնորդի, հաշտեցնողի դեր ստանձնել: Բարեբախտաբար պահպանվել է մի սկզբնաղբյուր՝ «Պատմութիւն սրբոց հարցն մերոց որք առ Քրիստոս փոխեցան», որը 2007-ին որպէս իր գրքի հավելված հրատարակել Լ. Տեր-Պետրոսյանը եւ որտեղ միանգամայն հստակ նշվում է Սարգիս Սեւանցու հրաժարականի պատճառը: 13-րդ դարի կեսերին վերագրվող այդ երկի մեզ հետաքրքրող հատվածում նշվում է. «Ա՛ռ կաթողիկոսութիւն եկեղեցականն Կաթողիկէյին, այն որ Սարգիս անուն, այր հեզ եւ առայքինի, **եւ ապա ձանձրացաւ ի ծփանաց աշխարհիս**, ընտրեն զՏէր Պետրոս, ազատ ազգէ, երեւելի շնորհօք եւ հասա-

⁴⁷ Նույն տեղում, էջ 28:

⁴⁸ Նույն տեղում:

⁴⁹ Նույն տեղում:

կալ»⁵⁰: Ձանձրանալ նշանակում է նաեւ նեղվել⁵¹, «ծփանաց» (ծեռագրում՝ «ծպանց»)՝ ծուփ արմատից, նշանակում է ոչ միայն ալեկոծում, տատանում, այլեւ «խնդիր, յուզումն խնդրոց, քննութիւն», խռովահույզ⁵²: Փաստորեն նորահայտ սկզբնաղբյուրը վկայում է, որ հեզ եւ առաքինի Սարգիսը ձանձրացավ կամ նեղվեց երկրի խռովահույզ, ալեկոծ վիճակից, ուստի նրա փոխարեն ընտրեցին ազատ տոհմից սերող Պետրոսին:

Հասկանալի է, որ Սարգիս Սեւանցին ձանձրանալով «ի ծփանաց աշխարհիս», չէր կարող աթոռից հրաժարվել Գագիկ Ա-ի ժամանակ: Դա տեղի ունեցավ Հովհաննես Սմբատի գահակալության սկզբում⁵³, հայտնի պատճառների դրդմամբ: Առաջ անցնելով ասեմք, որ ինչպես երեւում է, Սարգսի հրաժարվելու եւ Պետրոսի ընտրության հարցում եկեղեցական ավանդությունը մեկ անգամ խախտած թագավորն այդ արարքը համարել է հաջողված նախադեպ: Այլապես անհասկանալի էր մնում, թե ինչպես, սովորաբար որպես երկչոտ կերպար ներկայացվող Հովհաննես Սմբատը տարիներ անց համարձակվեց աթոռից հեռացնել Պետրոսին եւ նրա կենդանության օրոք այլ կաթողիկոս հաստատել: Ճիշտ է, նրա այդ փորձը միայն կարճատեւ հաջողություն ունեցավ (որովհետեւ Պետ-

⁵⁰ Լ. Տեր-Պետրոսյան, Խաչակիրները եւ հայերը, հ. Բ, Երեւան, 2007, էջ 510:

⁵¹ Նոր բառգիրք հայկազեան լեզուի, հ. Բ, Վենետիկ, 1837 (նմանահանություն, Երեւան, 1981), էջ 148:

⁵² Նոր բառգիրք հայկազեան լեզուի, հ. Ա, Վենետիկ, 1836 (նմանահանություն, Երեւան, 1979), էջ 1028-1029:

⁵³ Մատթեոս Ուռհայեցին, հավանաբար Հակոբ Սանահնեցուց օգտվելով, նշում է Վասիլ Բ կայսեր Հայաստան ուղարկած եկեղեցատոնական խնդրի վերաբերող մի մամակի մասին, որի հասցեատերը Հովհաննես Սմբատ թագավորն ու Սարգիս կաթողիկոսն էին («...թագաւորն Վասիլ յուղարկեալ ի Հայք առ Յովհաննէս շահնշահն եւ առ Տէր Սարգիս կաթողիկոսն Հայոց...», Մատթեոս Ուռհայեցի, էջ 50): Եթե Հովհաննես Սմբատը հորը հաջորդած լիներ 1020-ին, ապա նա չէր կարող համարվել 1019 թվականին աթոռից հրաժարված Սարգսի կաթողիկոսության ժամանակի թագավոր:

րոսը Սարգիս չէր), սակայն ենթադրելի է, որ Հովհաննես Սմբատին այդ քայլը կատարելու վստահություն էր տվել ժամանակին Սարգսի՝ աթոռից հրաժարվելու նախադեպը:

Վերադառնալով 1019 թվականի դեպքերին՝ նկատենք, որ Սարգիս Սեւանցու հրաժարականը⁵⁴ թերեւս ոչ այնքան նրան էր պետք, որքան Հովհաննես Սմբատին: Վերջինս գիտակցում էր, որ Աշոտի հետ խնդիրները չեն ավարտվել, իսկ նոր հակամարտության դեպքում նա այլեւս չէր ցանկանա Գեորգիի նման «հաշտարար» ունենալ: Չի բացառվում, որ այս իրավիճակում Հովհաննես Սմբատին իր ծառայությունը հենց ազնվական ծագում ունեցող Պետրոսն է առաջարկել, վստահեցնելով, որ կաթողիկոս դառնալու դեպքում նոր առճակատման ժամանակ կկարողանա զսպել Աշոտին: Հետաքրքիրն այն է, որ որոշ ժամանակ անց հենց այդպես էլ եղավ: Իր իշխանության ներսում հարցերը կարգավորելուց հետո Աշոտը 1021 թ. մեծ զորքով շարժվեց Անիի վրա: Քաղաքի պարիսպների մոտ տեղի ունեցած ճակատամարտում անեցիները ծանր պարտություն ու կորուստներ կրեցին, եւ այդ ժամանակ հաշտարար առաքելությամբ հանդես եկավ Պետրոս կաթողիկոսը: Ինչպես պատմիչ Մատթեոս Ուռհայեցին է գրում. «Հայրապետն Պետրոս եւ իշխանքն ամենայն ելին առ զԱշոտ եւ մեծաւ երդմամբ նստուցին զԱշոտ Դրուց աշխարհին՝ թագաւոր ամենայն Տանն Հայոց, եւ Յովհաննէս նստցի թագաւոր ի քաղաքն Անի. եւ եթէ մեռցի Յովհաննէս, Աշոտ լիցի թագաւոր ամենայն Տանն Հայոց»⁵⁵:

Աշոտի այս գործողությունները խրախուսում էր Բյուզանդական կայսրությունը: Հ. Բարթիկյանը հայկական եւ բյուզանդական աղբյուրների մանրամասն քննությամբ բացահայտում է այս շրջանում կայսրության վարած քաղաքականությունը, որի նպատակը Անիի

⁵⁴ Սարգիսը դրանից հետո տեղափոխվում է Անիի մերձակա Հռոմոսի վանք, ապրում եւս երեք տարի, 1022 թ. մահանում ու թաղվում այդտեղ (Արիստակես Լաստիվերցի, էջ 32):

⁵⁵ Մատթեոս Ուռհայեցի, էջ 14:

Բագրատունյաց թագավորության պառակտումը, թուլացումն ու զավթումն էր: 1021 թ. ռազմական ընդհարումից ու հաշտությունից հետո Աշոտը փաստորեն դարձավ թագավորության տարածքի մեծ մասի՝ «Դրուց աշխարհի» թագավորը եւ նրան վստահեցվեց, որ Զովհաննես Սմբատի մահից հետո կդառնա «թագաւոր ամենայն Տանն Զայոց»: Աշոտին առաջնության արժանացրին բյուզանդացիները՝ նրան հորջորջելով «Մեծ Զայքի էքսուսիարխ»⁵⁶:

Սակայն վերջինիս՝ Անիին տիրանալու մտասելեռման հասնող ձգտումը նույն 1021 թվականին նրան դրդեց արդեն Զովհաննես Սմբատի հետ «մեծաւ երդմամբ» կայացած հաշտությունից հետո խաբեությամբ նրան ծուղակը գցել: Վարդան Արեւելցին տեղեկությունը Մխիթար Անեցու այժմ կորած պատմությունից քաղելով, նշում է, որ Աշոտը Թալինի մոտ գտնվող իր զորակայանում մահամերձ հիվանդ ձեւանալով իր մոտ է կանչում Զովհաննես Սմբատին եւ ձերբակալում: Ապա նա Զովհաննես Սմբատին տալիս է մեծ իշխան Ապիրատի (Գրիգոր Ապիրատ Մագիստրոս) ձեռքը, որ սպանի, իսկ վերջինս հոժարական նրան տանում է Անի եւ բաց թողնում, ասելով. «Ինչո՞ւ ձեռք բարձրացնեմ Աստծո օծյալի վրա եւ նրա տեղը մի խալազարի դնեմ» («Զիա՞րդ ձգեցից զձեռս իմ յօծեալ Տեառն, եւ խելազար մի եղից ի տեղուջ սորա»)⁵⁷: Այս խոսքերը, որոնցով իշխանն արդարացնում է իր արարքը, նաեւ որոշ պատկերացում են տալիս Աշոտի ստորականների՝ նրա նկատմամբ ունեցած

⁵⁶ Զ. Բարթիկյան, Զայ-բյուզանդական հետազոտություններ, հ. Ա, Երեւան, 2002, էջ 671-672:

⁵⁷ Վարդան Արեւելցի, էջ 102-103: Այդ դեպքից հետո Զասանի որդի Գրիգոր Ապիրատ Մագիստրոսը Աշոտի վրեժխնդրությունից խուսափելու համար ընտանիքով եւ զորքով անցնում է Դվինի ամիրայի մոտ, որը սկզբում նրան լավ ընդունելով, հետո դավադրաբար սպանում է: Գրիգոր Ապիրատի Սարի զորավարը նրա ընտանիքը բերում է Անի, որտեղ Զովհաննես Սմբատը, ողբալով իշխանի մահը, նրա զավակներին առնում է իր հովանավորության տակ:

վերաբերմունքի մասին, որոնք արդեն ձանձրացել էին իրենց գերակայի անհավասարակշիռ եւ ուխտադրուծ գործողություններից:

Այսպիսով, Պետրոս Ա-ի աթոռակալությունը սկսվեց կաթողիկոսների հաջորդականության ավանդական կարգի խախտմամբ, նախորդ կաթողիկոսի կենդանության օրոք, Հովհաննես Սմբատի միջամտությամբ եւ քաղաքական լարված պայմաններում:

ԱՆԻԻ ԱԹՈՐԸ 1020-30-ԱԿԱՆ ԹՎԱԿԱՆՆԵՐԻՆ

Անիի կաթողիկոսական աթոռը գործունեության ընդարձակ ուղիքով եւ մեծ հնարավորություններ ունեցող հաստատություն էր: Մատթեոս Ուռհայեցին, որի համար Անիի շրջանի պատմության կարեւոր սկզբնաղբյուր է ծառայել Հակոբ Սանահինեցի պատմիչի (մահացել է 1085 թ.) մեզ չհասած երկը, հավանաբար հենց վերջինից օգտվելով հետեւյալ կերպ է ներկայացնում Հայոց կաթողիկոսությունը Պետրոսի ժամանակ. «Յորժամ էր Տէր Պետրոս յաթոռ հայրապետութեանն եւ ի Հայաստան աշխարհին, ունէր կազմութիւն հայրենեաց՝ տուեալ ի թագաւորացն Հայոց՝ հինգ հարիւր գեղ անուանի եւ մեծանիստ եւ շահաւէտ ընտիր ընտիր, նոյնպէս եւ եպիսկոպոսս հինգ հարիւր փառաւորք եւ գաւառատեսուչս ի վերայ եօթն հարիւր թեմի հանապազ. երկոտասան եպիսկոպոս եւ չորս վարդապետք ի տանն հայրապետին եւ վաթսուն երեք ի կրօնաւորաց՝ եւ յաշխարհականաց՝ հինգ հարիւր. եւ **չէր նուաստ աթոռ հայրապետութեանն, քան զթագաւորութեանն Հայոց:** Նաեւ զարդարանք եկեղեցեացն եւ տան հայրապետութեանն բազում եւ անհամար եւ հրաշալի մեծութեամբ լցեալ, զոր յառաջին թագաւորացն տուեալ հաստատութեամբ առաջին հայրապետացն, որ գայր հասանէր մինչեւ ի տէր Պետրոս...»⁵⁸:

Եթե այս նկարագրության մեջ անգամ որոշ չափազանցություն կա, ապա այն չի փոխում ընդհանուր պատկերը: Բազրատունյաց

⁵⁸ Մատթեոս Ուռհայեցի, էջ 166:

վերջին շրջանում Հայոց կաթողիկոսությունն իրոք փառավոր կացության մեջ էր, ուներ հսկայական միջոցներ ու հնարավորություններ: Ուղեւորությունների ժամանակ Պետրոս կաթողիկոսին ուղեկցում էին իր «տանեցի ազատները», հարյուրավոր հոգեւորականներ ու աշխարհականներ, նաեւ 300 հեծյալներից կազմված թիկնազոր⁵⁹:

Բագրատունյաց թագավորության վերջին շրջանում, երկրի մասնատվածության ու թուլացման պայմաններում, ունենալով համահայկական նշանակություն եւ ազդեցության մեծ ոլորտ, կաթողիկոսական աթոռը հանդիսանում էր հայ ժողովրդին համախմբող կենտրոնն ու նրա միասնականության խորհրդանիշը: Բնականաբար այն չէր կարող դուրս մնալ բյուզանդական դիվանագիտության ուշադրությունից, որն իրականացվում էր այն ժամանակների համար հազվադեպ հատուկ եւ արհեստավարժ գերատեսչության միջոցով⁶⁰: Բյուզանդացիները ծրագրված կերպով ինքնուրույնությունից զրկելով եւ զավթելով հայկական իշխանություններն ու թագավորությունները (Տարոն, Տայք, Վասպուրական), հերթական թիրախ դարձնելով Անին, չէին կարող աչքաթող անել Հայոց կաթողիկո-

⁵⁹ Հակոբ Սանահնեցին 1021 թ. վերջին Պետրոս կաթողիկոսի Տրապիզոն մեկնումը նկարագրելիս նշում է, որ նրա հետ էին 12 եպիսկոպոս, 80 կրոնավոր եւ երկու վարդապետ՝ «Յովսէփ Ընծուց եւ Կոզեռն Յոհաննէս եւ այլ ԳԵ (300) ձիաւորս ընդ մմա ի փառաւորացն»: Նույն տեղեկությունը, փոքր տարբերություններով կրկնվում է Հովհաննէս Կոզեռնի տեսիլքին վերաբերող տեքստում. (...երեք հարիւր ձիաւորաւք ի փառաւորացն եւ յանուանի արանց»: (Լ. Խաչիկյան, Աշխատություններ, հ. Ա (Հակոբ Սանահնեցի՝ ժամանակագիր 11-րդ դարի), Երեւան, 1995, էջ 148): Մատթեոս Ուռհայեցին Պետրոսի վերջին մեկնումը Անիից 1047 թ. հունվարին հետեւյալ կերպ է նկարագրում. «Տէր Պետրոսն... իւր տանեցի ազատօքն, փառաւոր արամբք երեք հարիւր՝ վառեալ զինուք, եւ վարդապետս եւ եպիսկոպոսունս եւ երաժիշտս եւ կրօնաւոր քահանայս հարիւր եւ քսան հեծեալս ի ջորոց, հետեւակ պաշտօնեայս՝ երկերիւրս» (Մատթեոս Ուռհայեցի, էջ 114-115, հմմտ. Պատմութիւն Մատթեոսի Ուռհայեցւոյ, յերուսաղէմ, 1869, էջ 123):

⁶⁰ Շարլ Դիլ, Բյուզանդիայի պատմության հիմնախնդիրները, Երեւան, 2005, էջ 122-135:

սուրբունը: Գուցե հենց դրանով է բացատրվում այն, որ Անիի թագավորության ճակատագրին վերաբերող հայ-բյուզանդական բանակ-ցությունների մեջ ներգրավվում է հենց կաթողիկոսը:

Դեպքերը զարգանում են հետեւյալ կերպ. 1021 թ. Վասիլ Բ (976-1025) կայսրը արշավանք է սկսում ըմբոստացած Վրաց Գեորգի Ա թագավորի դեմ, ավերածություններ գործում Տայքում եւ հարակից վրացական տարածքներում, ապա ձմեռելու համար գնում Սեւ ծովի ափ՝ Տրապիզոն: Հովհաննես Սկիլիցեսը գրում է, որ Հովհաննես Սմբատը «զինակցություն» է ցուցաբերել Վրաց թագավորին⁶¹, մինչդեռ հայկական աղբյուրները նման տեղեկություն չունեն: Ըստ Հակոբ Սանահնեցու. «Ի թուականութեանս Հայոց ՆՅ (1021) ելանէր Վասիլ թագաւորն յԱրեւելս անթիւ բազմութեամբ զաւրօք խուժադուժ ազգաւ եւ **խնդրեաց զԱնի եւ զամենայն Տունն Շիրակայ ի Յոհանիսէ՝ որդւոյ Գագկայ**: Իսկ նա յաղագս թուլութեան եւ տկարութեան մարմնոյ խոստացաւ տալ զԱնի ի Հռոմոս զկնի մահուան իւրոյ»⁶²: Եւս երեք հայ պատմիչներ, Արիստակես Լաստիվերցին, Մատթեոս Ուռհայեցին եւ Վարդան Արեւելցին, որ անդրադարձել են այս պատմությանը, կայսեր կողմից Անին պահանջելու պատճառը չեն նշում: Իսկ Հովհաննես Սմբատի՝ Անին բյուզանդացիներին կտակելու պատճառը նրանք համապատասխանաբար համարում են՝ թագավորի անժառանգ լինելը (Արիստակես Լաստիվերցի), «թուլասիրտ» լինելը (Մատթեոս Ուռհայեցի), վախը՝ Վրաց թագավորից (Վարդան Արեւելցի)⁶³: Ստացվում է, որ հայերը չեն էլ իմացել, թե կոնկրետ ինչ հիմնավորմամբ է կայսրը Անին պահանջել: Խնդրի իրավական կողմն ավելի շատ բյուզանդացիներին էր հետաքրքրում, եւ նրանք յուրովի «գտել են» ոչ միայն Հովհաննես Սմբատի արարքի «պատճառը», այլեւ հնարել Բագրատունի թա-

⁶¹ Հովհաննես Սկիլիցես, թարգմանություն բնագրից, առաջաբան եւ ծանոթագրություններ Հ. Բարթիկյանի, Երեւան, 1979, էջ 146-147:

⁶² Լ. Խաչիկյան, Աշխատություններ, հ. Ա, էջ 146:

⁶³ Այս հարցի վերաբերյալ նշված աղբյուրների քննությունը տե՛ս Հ. Մանանդյան, Երկեր, հ. Գ, Երեւան, 1977, էջ 22-24:

գավորի՝ կայսեր մոտ անձամբ մեկնելու, Անիի բանալիները նրան հանձնելու, հպատակություն ընդունելու եւ հենց տեղում Անին կայսրությանը կտակելու փաստաթուղթը գրելու պատմությունը⁶⁴:

Մինչդեռ հայկական բազմաթիվ աղբյուրները ոչ մի կասկած չեն թողնում, որ Վասիլ կայսեր հետ հանդիպել է ոչ թե Յովհաննես Սմբատը, այլ Պետրոս կաթողիկոսը: Վերջինս մեկ տարվա մեջ արդեն երկրորդ անգամ դառնում էր Յովհաննես Սմբատի բանագնացը: Հակոբ Սանահնեցին գրում է, որ կաթողիկոսը կայսեր մոտ էր գնացել «յաղագս սիրոյ»: Արիստակես Լաստիվերցին գրում է, որ կաթողիկոսը կայսեր հետեւից գնալով նրան է հասնում եւ հանդիպում Աստվածահայտնության տոնի օրը (այսինքն՝ 1022 թ. հունվարի 6-ին): Կայսրը հրամայում է, որ կաթողիկոսը հայ հոգեւորականների հետ կատարի ջրօրհները հայկական կանոնով, իսկ այդտեղ գտնվող հույն հոգեւորականները՝ իրենց կանոնով: Ըստ հայ պատմիչների, Հայոց կաթողիկոսի կատարած արարողությունը շատ տպավորիչ է լինում, մեռնող ջրի մեջ լցնելիս լույսի ճառագայթներ են ցլարձակում, իսկ ծեսից հետո կայսրը մեծարում է հայրապետին⁶⁵ (այս դեպքի չափազանցված արձագանքները հետագայում ծնունդ են տալիս կաթողիկոսի «Գետադարձ» մականվանը)⁶⁶: Հավանաբար հաջորդ օրը տեղի է ունենում նոր հանդիպում, որի մասին Արիստակես Լաստիվերցին գրում է. «Յովհաննես պատուէր տուեալ էր հայրապետին, եթէ գրէ գիր եւ տուր կտակ թագաւորին զի

⁶⁴ Յովհաննես Սկիլիցես, էջ 146:

⁶⁵ Արիստակես Լաստիվերցի, էջ 31-32:

⁶⁶ Ջրօրհների ծեսը կատարող հայ հոգեւորականները կաթողիկոսի գլխավորությամբ կանգնած էին գետի հոսանքի վերին մասում, իսկ հույն հոգեւորականները՝ ստորին, որպէսզի, ըստ կազմակերպիչների մտահղացման, վերստին օրհնեն հայերի օրհնած ջուրը: Այս է պատճառը, որ դրանից քիչ անց, հույների հետ բորբոքված դավանաբանական վեճերի ու անթաքույց թշնամության մթնոլորտում ծնունդ առավ այն ավանդությունը, թե Պետրոսի կատարած ջրօրհներից հետո գետի հոսանքը կանգ է առել, ապա ետ դարձել, այստեղից էլ՝ «Գետադարձ» մականունը (Մ. Օրմանյան, Ազգապատում, էջ 1405-1407):

յետ իմոյ վախճանին՝ զիմ քաղաքս եւ գերկիրս նմա տաց ի ժառանգութիւն»⁶⁷։ Կայսեր պահանջն, այսպիսով, բավարարվում է։ Հ. Բարթիկյանը գրում է, որ «այն ժամանակ Բյուզանդիային եւ ոչ մի հարեւան պետություն չէր կարող ընդդիմակայել։ Հովհաննես-Սմբատը այդ ձեւով փորձեց երկարածգել իր երկրի անկախությունը, հույս ունենալով, որ Վասիլ Բ-ին հաջորդածը Հայաստանի նկատմամբ այլ քաղաքականություն կորդեգրեր»⁶⁸։ Հիշենք, որ մինչեւ Անին կայսրությանը կտակելը 1021-ին Հովհաննես Սմբատը արդեն մի պայմանագիր էլ եղբոր՝ Աշոտի հետ էր կնքել, որի համաձայն իր մահից հետո թագավորությունը նրան էր անցնելու։

Ջրօրհնեքի հայտնի ծեսի մասին գրելուց հետո Կիրակոս Գանձակեցին նշում է, որ «հրամայեաց կայսրն հայրապետին դնել զաթոռ իւր ի Սեբաստիա եւ անտի հովուել զհօտ իւր», որից ենթադրվել է, թե Տրապիզոնի պայմանագրից հետո կաթողիկոսը խուսափել է Անի գալուց, սակայն պատմիչի հիշյալ տեղեկությանն անմիջապես հաջորդող բառերը՝ «Եւ անդ եկաց հայրապետն մինչեւ ցվախճան իւր»⁶⁹, վկայում են, որ նա չփոթել է Պետրոս Ա-ի Սեբաստիայում հաստատվելու ժամանակը, որը տեղի է ունեցել շատ ավելի ուշ։ Իսկ Տրապիզոնից Պետրոսը, ինչպես Արիստակես Լաստիվերցին է գրում, վերադարձել է «ի տուն իւր»⁷⁰, այսինքն՝ Անի։

Կարելի է ենթադրել, որ տրապիզոնյան հանդիպումները, կայսերական հյուրընկալության ճոխությունը խորը տպավորություն են թողել կաթողիկոսի վրա եւ կանխորոշել նրա հետագա քաղաքական կողմնորոշումը։ Ազնվական տնից սերող Պետրոսը, որն այդ ժամանակ միջին տարիքի տղամարդ պետք է լիներ եւ ընդամենը երկու տարի առաջ էր կաթողիկոսական գահին բազմել, ընդունվել

⁶⁷ Արիստակես Լաստիվերցի, էջ 32։

⁶⁸ Հ. Բարթիկյան, Հայ-բյուզանդական հետազոտություններ, հ. Ա, էջ 671։

⁶⁹ Կիրակոս Գանձակեցի, Պատմություն Հայոց, աշխատասիրությամբ Կ. Մելիք Օհանջանյանի, Երեւան, 1961, էջ 95։

⁷⁰ Արիստակես Լաստիվերցի, էջ 32։

ու դրվատանքի էր արժանացել ժամանակի հզորագույն պետության կայսեր կողմից:

Անի վերադառնալով, անկախ Հովհաննես Սմբատի կտակի գոյությունից, որի պատասխանատուն թագավորն ինքն էր, կաթողիկոսը կարող էր ավելի ինքնավստահ զգալ եւ բավարարել իր հետաքրքրությունները: Իսկ դրանք, պարզվում է, միշտ չէ, որ հոգեւոր ոլորտից էին: Արիստակես Լաստիվերցին գրում է. «յոյժ գանձուց սիրող էր Պետրոս, որ եւ բազումք վասն այնր եպերէին զնա»⁷¹: Կաթողիկոսի նվիրատուներից մեկը, Գրիգոր Պահլավունին (1045-ից հետո՝ Մագիստրոս) իր ընծայած թանկագին խաչագարդ գավազանի հետ նաեւ մի մեծարական բանաստեղծություն է ձոնել հայրապետին⁷²:

1033 թ., Քրիստոսի խաչելության 1000-ամյակին, տեղի է ունենում արեւի խավարում (ստույգ՝ հունիսի 29-ին)⁷³, որը մեծ տպավորություն է թողնում ժամանակակիցների վրա: Թագավորն ու կաթողիկոսը Անիից հատուկ պատվիրակություն են ուղարկում Սեւանի վանք՝ Հովհաննես Կոզեռն վարդապետի մոտ՝ կատարվածի մեկնաբանությունն իմանալու համար: Վերջինս կանխատեսում է մոտալուտ բազում դժբախտություններ, որպես հետեւանք բարքերի համընդհանուր անկման ու անբարեպաշտության՝ քննադատելով անգամ եկեղեցու առաջնորդին⁷⁴:

Նույն թվականին Պետրոս կաթողիկոսը, անհայտ պատճառով ընդհարվելով Հովհաննես Սմբատի հետ, ծածուկ թողնում է Անիի իր

⁷¹ Արիստակես Լաստիվերցի, էջ 82:

⁷² Գրիգոր Մագիստրոսի թղթերը (աշխատասիրությամբ՝ Կ. Կոստանեանցի), Ալեքսանդրապոլ, 1910, էջ 31-32:

⁷³ Բ. Թումանյան, Հայ աստղագիտության պատմություն, Երեւան, 1968, էջ 138-139:

⁷⁴ «Եւ ահա յայսմ հետէ բազում հերձուածք մտանեն յեկեղեցի Աստուծոյ ի ծուլութենէ հայրապետաց, վասն զի թուլամորթին եւ տկարանան եւ հաւատոյ քննութիւն ոչ առնեն եւ կան յիմարեալք: Յաղագս արծաթոյն թողուն ի բաց զհաւատն...» (Մատթեոս Ուռհայեցի, էջ 78):

աթոռը եւ տեղափոխվում կայսրության տիրապետության տակ անցած Վասպուրականի Ձորավանք՝ այստեղ մնալով ավելի քան երեք տարի⁷⁵: Այն փաստը, որ Պետրոսը Յովհաննես Սմբատից կամ անեցիներից դժգոհելով⁷⁶ չի գնում, ասենք, Աշոտ Դ-ի կամ հայ մյուս գահակալների մոտ, այլ ապավինում է կայսերական կուսակալին, վկայում է բավական խորը հակասության մասին:

Թագավորն ու ավագանին վերադարձի պահանջով բազմիցս դիմում են կաթողիկոսին, բայց ապարդյուն: Միայն 1036 թ., Վասպուրականի բյուզանդական կուսակալի միջամտությամբ, Պետրոսը վերադառնում է Անի, բայց քաղաք գալուց հետո, կարճ ժամանակ անց, թագավորի հրամանով ձերբակալվում ու արգելափակվում է Բջնիում: Նույն տարվա վերջերին մայրաքաղաքում գումարվում է եկեղեցական ժողով, որը Պետրոսին համարում է աթոռանկ եւ կաթողիկոս է ձեռնադրում Սանահինի վանքի առաջնորդ Դեոսկորոսին: Նման որոշման կայացման համար Պետրոսի դեմ արված մեղադրանքները պետք է որ զորավոր եղած լինեն (թեւս ստույգ հայտնի չէ, թե որոնք էին այդ մեղադրանքները), բայց վճռորոշ էր նաեւ Յովհաննես Սմբատի դիրքորոշումը:

Դեոսկորոսը, որի մասին պատմիչները հիմնականում դրվատանքով են խոսում, Անիում նոր եպիսկոպոսներ է ձեռնադրում, առաջ քաշում Պետրոսի կողմից մերժվածներին: Սակայն հայ ավանդապահ հոգեւորականությունը ըմբոստանում է Անիում կայացված որոշման դեմ, ինչպես Մատթեոս Ուռհայեցին է գրում՝ «եպիսկոպոսքն եւ վարդապետքն Հայոց աշխարհին՝ նզովիւք փակեցին զթագաւորն եւ զամենայն նախարարսն Հայոց՝ վասն հակառակութեանն, որ եղել ի մէջ եկեղեցւոյ»⁷⁷: Արքունիքը ստիպված է լինում

⁷⁵ Այս դեպքերը համգամադրենք են Մ. Օրմանյանը (Մ. Օրմանյան, Ազգապատում, էջ 1413-1417):

⁷⁶ Հնարավոր է, որ հենց այդ ժամանակ է տեղի ունեցել անեցիների այն ընդվզումը Պետրոսի դեմ, որի մասին վկայում է Գրիգոր Մագիստրոսն իր մի քանի թղթերում (Գրիգոր Մագիստրոսի թղթերը, էջ 5-7, 34-36):

⁷⁷ Մատթեոս Ուռհայեցի, էջ 86:

տեղի տալ: Մեկ տարի եւ երկու ամիս գահակալելուց հետո Ղեոսկորոսն աթոռանկ է արվում, վերադարձվում Սանահին եւ կաթողիկոսական աթոռին 1038 թ. վերջերին վերականգնվում է Պետրոսը:

ԱՆԻԻ ԶՐԿՎԵԼԸ ԹԱԳԱՎՈՐԱԿԱՆ ԵՒ ԿԱԹՈՂԻԿՈՍԱԿԱՆ ԳԱՅԵՐԻՑ

1040-41 թթ. մահանում են անհաշտ եղբայրները՝ նախ՝ Աշոտը, ապա՝ Յովհաննես Սմբատը, եւ երկրում տիրում է անհաստատ կացություն: Անգավակ Յովհաննես Սմբատի կյանքի վերջին տարիներին նրա արքունիքում առաջնակարգ դեր էր ստացել գրականության մեջ հիմնականում Վեստ Սարգիս անունով հիշատակվող գործիչը, որն Արիստակես Լաստիվերցու վկայությամբ թագավորի մահվան ժամանակ նրա հոգաբարձուն էր⁷⁸ եւ փորձել է թագավորել Անիում: Սակայն, ինչպես Մատթեոս Ուռհայեցին է գրում, «ոչ ընդունեցին զնա ազգն Բագրատունյաց, վասն զի Յայկազն էր»⁷⁹: Այս գործիչն մեր պատմիչները, բացառությամբ Սամվել Անեցու, հիմնականում խիստ պարսավանքի են ենթարկում, մեղադրելով ինչպես իշխանությունը բռնազավթելու, այնպես էլ հետագայում բյուզանդասեր ընթացք որդեգրելու համար:

Որոշ քաղաքական պայքարից հետո սպարապետ Վահրամ Պահլավունու ավագությամբ հանդես եկող Պահլավունիների զորեղ տան ջանքերով 1042 թ. Անիում Բագրատունյաց գահին է նստում Աշոտի 18-ամյա որդին Գագիկ Բ-ը (1042-1045): Օծումը կատարվում է Անիի Մայր տաճարում, Պետրոս կաթողիկոսի ձեռքով: Գագիկ Բ-ի թագադրությունը կարելու էր առաջին հերթին այն պատճառով, որ դրանով թագավորության երկու մասերը միավորվեցին: Մատթեոս Ուռհայեցին գրում է. «Ժողովեցան ամենայն նախարարքն Յայոց առ հայրապետն Տէր Պետրոս եւ օծին զԳագիկ

⁷⁸ Արիստակես Լաստիվերցի, էջ 57:

⁷⁹ Մատթեոս Ուռհայեցի, էջ 94-95:

թագաւոր ի վերայ ամենայն Տանն Հայոց, շնորհօք Հոգւոյն Սրբոյ եւ հրամանաւ մեծի իշխանին, որ էր ազգաւ հայկազնեան եւ հայրենեօք Պահլաւունի, որոյ անուն ըստ նախնոյն իւրոյ Գրիգոր ճանաչի, եւ էր յազգէն սրբոյն Գրիգորի»⁸⁰: Ուշագրաւ է, որ 2004 թ. Մարմաշենի մոտ հայտնաբերված մի արձանագրության մեջ Գրիգոր Պահլավունու հայրը՝ Վասակը կոչվում է «Հայոց ասպետ»⁸¹: Թեւեւ պատմիչներն այդ մասին ոչինչ չեն գրում, բայց չի բացառվում, որ Անիի թագավորության վերջին շրջանում այստեղ վերականգնվել է թագադիր ասպետի ինստիտուտը եւ հանձնվել Պահլավունիներին (Արշակունիների ժամանակ թագադիր ասպետները Բագրատունիներն էին): Հենց այս համատեքստում պետք է հասկանալ Մատթեոս Ուռհայեցու վերոնշյալ հաղորդումը, թե Գագիկը օծվել է «հրամանաւ» մեծ իշխան Գրիգոր Պահլավունու: Առաջ անցնելով ասեմք, որ Գագիկը գահին բազմելուց քիչ անց ընդհարվում է նույն Գրիգոր

⁸⁰ Մատթեոս Ուռհայեցի, էջ 96-97: Ուռհայեցու ժամանակագրության այս հատվածում «հրամանաւ մեծի իշխանին» բառերից հետո հետագայում ընդմիջարկություն է արվել՝ «որով եւ օծեաց զնա սրբակեացն մեծն Մարցեն»: Այս հարցին հանգամանորեն անդրադարձել է Հ. Բարթիկյանը, նախ ապացուցելով, որ սա ընդմիջարկություն է, ապա՝ որ «Մարցեն» սխալ արտագրություն է, սկզբնապես եղել է «Մարցին», եւ այն վերաբերում է Գրիգոր Վկայասերին, որը որոշ ժամանակ եգիպտոսում (Մար) աթոռակալելով կարող էր մեծ Մարցի կոչվել: Իսկ ընդմիջարկության իմաստն այն է, որ Գագիկ Բ-ն, իր հերթին, հետագայում օծել տվեց Գրիգոր Վկայասերին (Հ. Բարթիկյան, Ուռհայեցու երկուն հանդիպող «Մարցե» անվան մասին, «Պատմաբանասիրական հանդես», 1973, N 2, էջ 163-167): Այս ենթադրության օգտին է խոսում Սիմեոն Երեւանցու Ջամբուռն եղած մի հատված, որը թեւ խառն ու սխալ տեղեկություններ է պարունակում, սակայն այստեղ Գրիգոր Վկայասերը համարվում է «Մարում» աթոռակալած կաթողիկոս. «Նստին ներհակ իրերացն, Պետրոս ի յԱնի, Գրիգոր Վկայասերն ի Մար...» (Ջամբու գիրք, որ կոչի յիշատակարան արձանագրուցիչ հայելի եւ պարունակող բնաւից որպիսութեանց Ս. Աթոռոյս, շարագրեցեալ Սիմեոնէ կաթողիկոսէ, Վաղարշապատ, 1873, էջ 7):

⁸¹ Ա. Մանուչարյան, Նորահայտ հիշատակություն՝ «Հայոց ասպետ» վիմագրությամբ, ԵՊՀ աստվածաբանության ֆակուլտետ, Տարեգիրք Բ, Երեւան, 2007, էջ 157-158:

Պահլավունու հետ, եւ վերջինս իր բարեկամ Սարգիս վարդապետ Անեցուն գրած մի նամակում դժգոհում է, որ Գագիկը հետ է կանգնում Աստծու առաջ տված երդումից⁸² (թերեւս նկատի ունի թագադրության ժամանակ տված երդումը):

Հնարավոր է, որ Գրիգոր Պահլավունու՝ թագավորի նկատմամբ ունեցած որոշակի հանձնառությամբ, կամ «թագադիր ասպետի» հանգամանքով էր պայմանավորված նաեւ այն, որ չնայած գծովածությանը, երբ 1044-ին Գագիկը Կոստանդնուպոլիս մեկնելով բյուզանդացիների լարած ծուղակն ընկավ, նրան հետ բերելու հույսով կայսրության մայրաքաղաք գնաց ոչ այլ ոք, քան Գրիգոր Պահլավունի⁸³:

Բայց մինչ այդ Անիում ծավալվում են դրամատիկ իրադարձություններ: Անիի փոքր թագավորության դեմ դուրս է գալիս բյուզանդական դիվանագիտության հզոր մեքենան, որը, Հովհաննես Սմբատի կտակը որպէս հաղթաթուղթ ունենալով, ի վերջո հասնում է իր նպատակին: Անիի պատմության այս շրջանի քաղաքական անցքերը հանգամանորեն ուսումնասիրված են, ուստի այստեղ դրանց չենք անդրադառնում: Սակայն շատ հետաքրքիր է հետեւել Պետրոսի գործունեությանը, որն այս շրջանում կատարեց Հայ եկեղեցու ավանդական կարգերից շեղվող եւս մի քայլ: Մրենի արձանագրություններից մեկը, որը Գագիկ Բ-ի կողմից՝ վանքի որոշ հարկերը թողնելու մասին է, սկսվում է հետեւյալ կերպ. «ՆՂ (1041) թուակա՝ նութեանս Հայոց **ի հայրապետութեան Տէր Պետրոսի եւ Խաչկա**

⁸² Գրիգոր Մագիստրոսի թղթերը, էջ 63: Գրիգոր Պահլավունին Պետրոս կաթողիկոսին հասցեագրած նամակում Գագիկից ու արքունիքից դժգոհում է, նշելով, որ իր արած բարիքի դիմաց իրեն չարով են հատուցում (նույն տեղում, էջ 11):

⁸³ Կոստանդնուպոլսում համոզվելով, որ Գագիկն այլեւս չի վերադառնալու եւ բյուզանդական իշխանության հաստատումն անխուսափելի է, Գրիգոր Պահլավունին կայսրին է հանձնում իր կալվածք Բջնին, դրա փոխարեն ստանում հողեր Մեսոպոտամիա (Միջագետք Հայոց) բանակաթեմում, միաժամանակ ստանում է մագիստրոսության պատիվ ու կուսակալի պաշտոն:

Հայոց կաթողիկոսաց այս իմ հրամանք են Գագկա Շահանշահի որոյ Աշոտո, ազատեալ են զՄրենոյ զհարկն...»⁸⁴:

Ընդունված է եղել այն կարծիքը, որ Պետրոսն իր քրոջ որդուն՝ Խաչիկին (Խաչիկ Բ Անեցի) տեղապահ է նշանակել այն ժամանակ, երբ բյուզանդացիները իրեն դուրս են բերել Անիից (ըստ Լաստիվերցու՝ Արծն ուղարկելով, ըստ Ուռհայեցու՝ Կոստանդնուպոլիս կանչելով), եւ ինքն էլ մտածել է, թե գուցե հույներն այլեւս իրեն չեն թողնի Անի վերադառնալ⁸⁵: Բայց ինչպես տեսնում ենք, արդեն Գագիկ Բ-ի գահակալության սկզբում Խաչիկը հիշատակվում է որպես Պետրոսի աթոռակից կաթողիկոս: Արձանագրության մեջ նշված Հայոց ՆՂ թվականն ընդգրկում է 1041 թ. մարտի 11-ից 1042 թ. մարտի 10-ն ընկած ժամանակաշրջանը: Նույն ՆՂ թվականի մի հիշատակարան թույլ է տալիս ասելու, որ Պետրոսն իր քրոջորդուն աթոռակից է դարձրել Հովհաննես Սմբատի մահից հետո⁸⁶:

Այսպիսով, Պետրոս Ա-ն օգտվել է հենց իր աթոռակալությամբ առաջացած նախադեպից եւ իր կենդանության օրոք որոշել հաջորդ կաթողիկոսին: Բայց, ինչպես Մաղաթիա Օրմանյանն է նկատում, «Պետրոսի այդ ըրածը հիմնովին կը տարբերէր Սարգիս կաթողիկոսի իրեն համար ըրածէն: Սարգիս պաշտօնապէս գործէ քաշուելով ամենայն ինչ Պետրոսի կը թողուր, մինչ Պետրոս աստիճանն ու գործը իրեն վրայ պահելով, իրեն լիազօր տեղակալ եւ փո-

⁸⁴ Ն. Սարգիսեան, Տեղագրութիւնք ի Փոքր եւ ի Մեծ Հայս, Վենետիկ, 1864, էջ 197:

⁸⁵ Մ. Օրմանյան, Ազգապատում, էջ 1443:

⁸⁶ «...ի թուականութեանն Հայոց ի ՆՂ (1041) եւ ի կաթողիկոսութեանն Տեառն Պետրոսի Հայոց կաթողիկոսի եւ վերադիտողի, յորժամ Յաւանես Հայոց թագաւորն վախճանեցաւ ի Քրիստոս եւ ետ զթագաւորութիւնն իւր՝ որդւոյ եղբաւր իւրոյ, որ կոչի Գագիկ» (Հայերեն ձեռագրերի հիշատակարաններ, Ե-ԺԲ դդ., աշխատասիրությամբ Ա. Մաթեւոսյանի, Երեւան, 1988, էջ 87): Ինչպես տեսնում ենք, հիշատակարանը գրվել է Հայոց ՆՂ թվականին, երբ մահացել էր Հովհաննես Սմբատը, իշխանությունը անցել էր Գագիկ Բ-ին, եւ կաթողիկոսն էր Պետրոսը:

խանորդ կամ աթոռակից մը կը հաստատէր»⁸⁷: Պետրոսի կատարածը տարբերվում էր նաեւ նրանով, որ իր հաջորդին որոշելիս նա ոչ պատահականորեն կանգ էր առել հարազատ քրոջ որդու թեկնածության վրա: Դա հավանաբար արվել էր նախորդ ժամանակաշրջանի խռովահույզ իրադարձությունների կրկնությունից ապահովագրվելու եւ վստահելի գործակից ունենալու համար: Դիտելի է նաեւ, որ Պետրոսը փայլուն կերպով էր ընտրել այդ գործի իրականացման պահը. մահացել էր Հովհաննես Սմբատը, գահի շուրջը ստեղծվել էր անորոշ վիճակ, որի հաղթահարումը տեղի ունեցավ պատանի Գագիկի թագադրությամբ: Կարելի է ասել, որ այս իրավիճակում Պետրոսն իր աթոռակցին ու հաջորդին որոշել ու կաթողիկոսական օծման է արժանացրել ժամանակի քաղաքական թույլ իշխանությունից միանգամայն անկախ, իր իսկ հայեցողությամբ:

Գագիկ Բ-ի իշխանությունը չճանաչող Բյուզանդիան մեծացնում է ճնշումը Անիի Բագրատունյաց թագավորության դեմ, սեփական ուժերի հետ մեկտեղ նրա դեմ դուրս բերելով Դվինի ամիրային եւ Դավիթ Անհողիներին: Ի վերջո կայսր Կոստանդին Թ Մոնոմախը (1042-1054) իշխանության գալուց անմիջապես հետո, հաշտություն կնքելու եւ բարեկամություն հաստատելու պատրվակով Գագիկին իրավիրում է Կոստանդնուպոլիս (1044), բայց տեղ հասնելուն պես նրան արգելափակում եւ այլեւս թույլ չի տալիս հայրենիք վերադառնալ, պահանջում է Անին փոխանակել կայսրության այլ քաղաքի հետ: Առանց գահակալի մնացած Անին փորձում է դիմադրություն ցույց տալ: Իրավիճակն այստեղ տնօրինում են «քաղաքի գլխավորքն»⁸⁸: Հույների արարքից վիրավորված անեցիների շրջանում առաջ են գալիս տարբեր խմբակցություններ, որոնք մտածում են քաղաքը հանձնել Դավիթ Անհողիներին կամ Վրաց Բագրատ թա-

⁸⁷ Մ. Օրմանյան, Ազգապատում, էջ 1443:

⁸⁸ Արիստակես Լաստիվերցի, էջ 62:

զավորին, անգամ Դիվինի Աբուլասվար ամիրային, որի կինը Գագիկ Բ-ի քույրն էր⁸⁹: Այդ ժամանակ տեսնելով անեցիների տրամադրությունները, վճռական քայլերի է դիմում Պետրոս կաթողիկոսը. «Իբրեւ ետես հայրապետն Պետրոս զայսպիսի խորհուրդ, թէ ո՛ւմ եւ իցէ՛ ի գնալ է քաղաքս, առաքէ առ այն (բյուզանդական կուսակալը – Կ. Մ.), որ ունէր զիշխանութիւն արեւելից կողմանն, որ նստէր ի քաղաքն Սամուսատ... եւ գրէ, թէ՛ Ծանո՛թագաւորին, թէ մեզ զինչ հատուցանէ փոխարենս, եւ ես տաց զքաղաքս եւ զայլ ամուրս որ յաշխարհիս են: Իսկ նա, իբրեւ լուաւ, փութապէս ծանոյց թագաւորին. եւ լուեալ թագաւորին, գանձիւք եւ իշխանութեամբ հաճեալ զկամս նորա, եւ այսու տիրեցին Անույ եւ ամենայն աշխարհին»⁹⁰: Պատմիչի խոսքերը մեկնաբանության կարիք չունեն, միայն նկատենք, որ Պետրոսն Անին բյուզանդացիներին հանձնելու միանձնյա որոշողը չէր, այստեղ իրոք կար բավական ուժեղ հունասեր խմբակցություն, որն էլ կատարեց կայսրության ցանկությունը:

Անի եկած բյուզանդական առաջին կուսակալ Իասիտեսը (Լաստիվերցին նրան կոչում է Ասիտ) «եկեալ անչափ պատուով մեծարե՛զ հայրապետն Պետրոս»⁹¹: Սակայն Պետրոս կաթողիկոսի այդ մեծարական վիճակը շատ կարճ տևեց: Իասիտեսի՝ Դիվինի ամիրայի դեմ ձեռնարկած անհաջող արշավանքից հետո (1046-ի աշուն) նրան փոխարինեց Կատակալոն Կեկավմենոսը, որը բացահայտեց բյուզանդական քաղաքականության իրական դեմքը: Քրիստոնյա հզոր հարեւանի հովանու տակ ապահովաբար ապրելու մասին որոշ հայ գործիչների՝ այդ թվում Պետրոս Ա-ի հույսերը խաբկանք դուրս եկան: Կատակալոն Կեկավմենոսը քաղաքից հեռացրեց կաթողիկոսին՝ հայտնելով, թե կայսրը հրամայել է, որ նա հաստատվի

⁸⁹ Արիստակես Լաստիվերցի, էջ 62, К. Юзбашян, Армянские государства эпохи Багратидов, с. 167-168.

⁹⁰ Արիստակես Լաստիվերցի, էջ 62-63:

⁹¹ Նույն տեղում, էջ 63:

Արծն քաղաքում. «...խաբանօք հանէ զնա (Պետրոսին) ի քաղաքէն, ասելով եթէ հրամայեալ է քեզ թագաւորն տեղի բնակութեան ի Կարին գաւառի յԱրծին աւանի»⁹²: Փաստորեն Գագիկ Բ-ին գահից զրկելուց եւ Անին զավթելուց հետո բյուզանդացիները ձեռնարկեցին Յայոց կաթողիկոսությունը կազմալուծելու գործը, որի առաջին քայլը կաթողիկոսին աթոռանիստ վայրից հեռացնելն էր:

Պետրոսը կանխազգուժում է, որ կարող է այլեւս իրեն չքույլատրվի Անի վերադառնալ եւ որոշ նախապատրաստություն է տեսնում, կաթողիկոսական օծում ստացած Խաչիկին թողնում է քաղաքում, գաղտնի մեռն օրինում եւ թաքցնում, որ բյուզանդացիների ձեռքը չընկնի⁹³: Այս ամենից հետո է, որ Պետրոսը հանդիսավոր շքախմբով, կաթողիկոսարանի կարեւոր պաշտոնյաների եւ մեծաթիվ հոգեւորականների ուղեկցությամբ թողնում է Անին եւ ուղեւորվում Արծն: Սակայն արդեն մայրաքաղաքից հեռացած կաթողիկոսի հետ հույները վարվում են առանց այլեւայլությունների: Ըստ Լաստիվերցու՝ Արծնում Աստվածահայտնության տոնի օրը (1047 թ. հունվ. 6) «հասին կալանաւորք» եւ Պետրոսին տարան Կարինի բերդերից մեկը, իսկ նրա քրոջ որդի Խաչիկին Անիից բերեցին Սեւ քար կոչվող բերդը եւ նրանց արգելափակված պահեցին մինչեւ Ջատիկ (1047 թ. ապրիլի կեսեր), որից հետո տարան Կոստանդնուպոլիս:

Կայսրության մայրաքաղաքում Պետրոսին պատշաճ ընդունելության են արժանացնում: Նա այստեղ մնում է երեք տարի, ինչպես Արիստակես Լաստիվերցին է վկայում՝ կայսրը «բազում պատուով եւ մեծարանօք ընկալաւ եւ առատ ռոճկօք հրամայեաց պաշտել զնա. բայց առ իւր պահեաց զնա ամս երիս, քանզի **կասկածէր թողուլ ի Յայս՝ թէ երթեալ ապստամբեցուցանէ զԱնի**»⁹⁴: Պատմիչի վերջին խոսքերը հաստատում են, որ երբեմնի հունասեր հայրապետն արդեն վտանգ էր ներկայացնում հենց հույների համար:

⁹² Նույն տեղում:

⁹³ Մատթեոս Ուռհայեցի, էջ 114:

⁹⁴ Արիստակես Լաստիվերցի, էջ 82:

Ի վերջո, Ատոմ Արծրունու միջնորդությամբ, Պետրոսը իրավունք է ստանում հեռանալ Կոստանդնուպոլսից եւ նրան թույլատրվում է հաստատվել Սեբաստիայում: Ըստ էության բյուզանդացիները Հայոց կաթողիկոսի հետ վարվում են այնպես, ինչպես մինչ այդ վարվել էին հայկական մեծ ու փոքր թագավորությունների տիրակալների հետ, նրանց հեռացնելով սեփական կալվածքներից ու բուն երկրից: Ինչպես երեւում է, Սեբաստիայում հաստատված կաթողիկոսը զգալի չափով մեկուսացման մեջ է եղել, քանի որ անգամ նրա մահվան թվականի մասին տեղեկությունները բավական տարբեր են: Գրականության մեջ ընդունված է Պետրոսի մահվան տարեթիվ համարել 1058 թ., որը գալիս է Մաղաքիա Օրմանյանից: Նա տատանվելով տարբեր աղբյուրների հաղորդած 1053 կամ 1054 եւ 1058 թվականների միջեւ, ընտրել է վերջինը⁹⁵: Ռ. Վարդանյանը Արիստակես Լաստիվերցու եւ Մատթեոս Ուռհայեցու հայտնած տվյալները համադրելով Պետրոսի մահվան թվական է առաջարկում 1053 թ.⁹⁶: Սամվել Անեցու Ժամանակագրության հնագույն օրինակում (1176 թ.) Պետրոսի տարիները հասնում են մինչեւ Հայոց ՇԳ (1054) թվականը (Մատենադարան, ձեռ. 5619, էջ 97ա): 1057 թ. գրված մի հիշատակարանում, ուր առաջին անգամ հիշվում է Խաչիկ Անեցին որպես միանձնյա աթոռակալ, նշվում է. «Ի կաթողիկոսութեանն տեառն Խաչկա, յորժամ ի Թաւրւորի վանսն էր»⁹⁷: Հայտնի է, որ Պետրոսի մահից անմիջապես հետո Խաչիկին տարել են Կոստանդնուպոլիս եւ պահել երեք տարի, որից հետո նրան թույլատրել են հաստատվել Թավրւորում: Այսինքն, հիշատակարանից դատելով, Պետրոսը մահացել է 1057 թվականից առնվազն երեք տարի առաջ: Ա. Մաթեոսյանը Պետրոս Ա-ի տարեթիվը է նշել 1019-1054 թթ.⁹⁸: Կարծում ենք, որ Սամվել Անեցու հնագույն ընդօրինա-

⁹⁵ Մ. Օրմանյան, Ազգապատում, էջ 1460:

⁹⁶ Ռ. Վարդանյան, Հայոց տոնացույցը, Երեւան, 1999, էջ 563:

⁹⁷ Հայերեն ձեռագրերի հիշատակարաններ, Ե-ԺԲ դդ., էջ 100:

⁹⁸ Նույն տեղում, էջ 102:

կությունը եւ 1057 թ. հիշատակարանը նկատի ունենալով պետք է հենց այս թվագրումն ընդունել եւ Պետրոսի մահվան թվական համարել 1054-ը:

Ինչ վերաբերում է Պետրոս Ա-ի գործունեության գնահատակահին, ապա իրողությունն այն է, որ նա կաթողիկոսական աթոռին բազմեց մի բարդ ժամանակաշրջանում, երբ կաթողիկոսը, ով էլ որ լիներ, դժվար թէ կարողանար խուսափել քաղաքական հարցերի մեջ ներքաշվելուց: Պարզապես Պետրոսն այն անձն էր, որ քաղաքականության մեջ մտավ հոժարությամբ եւ ոչ առանց անձնական շահադիտության: Դրանով հանդերձ նրա բյուզանդասիրությունը երբեք դուրս չեկավ քաղաքական ոլորտից, եւ նա Հայոց եկեղեցու դավանանքն անսակարկելի պահեց: Համեմայն դեպս ո՛չ Արիստակես Լաստիվերցին, որը կաթողիկոսի համարձակ քննադատն է, ո՛չ էլ մեկ այլ միջնադարյան հեղինակ, ակնարկ անգամ չունեն, որ Պետրոս Ա-ը բյուզանդացիների հետ առնչված լինի եկեղեցական, դավանաբանական հարցերով:

Պետրոսի մահից հետո միանձնյա աթոռակալ դարձած Խաչիկին, որ «Անեցի» մականունն ունեցող առաջին կաթողիկոսն է, բյուզանդացիներն այդպես էլ թույլ չեն տալիս այլեւս ոտք դնել հայրենի քաղաք եւ անցնում են բացահայտ հալածանքների: Մատթեոս Ուռհայեցին այս կապակցությամբ գրում է. «...**յորժամ մեռաւ տէր Պետրոսն, յայնժամ յարեան Հռոմնք ի վերայ սուրբ աթոռոյն** եւ կամեցան եղծանել զնա եւ կամեցան առ հասարակ դարձուցանել զՀայք ի հաւատն անօրէն Քաղկեդոնի»⁹⁹: Բյուզանդացիները նախ անմիջապես Սեբաստիայից Կոստանդնուպոլիս են տանում Խաչիկին, ապա կողոպտում այստեղ եւ Անիում պահված կաթողիկոսարանի զանձերը¹⁰⁰: Նրանք առանձնակի ջանադրությամբ փորձում են տիրանալ Պետրոս կաթողիկոսի զանձերին եւ դրանց տեղն իմանալու համար խոշտանգում են շատերին («արարին Հռոմնք

⁹⁹ Մատթեոս Ուռհայեցի, էջ 150:

¹⁰⁰ Արիստակես Լաստիվերցի, էջ 82:

խնդիր բազմութեան գանձուցն ոսկւոյ եւ արծաթոյ Տեառն Պետրոսի Հայոց կաթողիկոսի եւ բազումս ի խոշտանգս մատնեցին ի Սեբաստիա»¹⁰¹:

Բյուզանդական կրօնական ճնշումն արտահայտվում էր Հայ եկեղեցուն ներկայացված դավանաբանական պահանջով (Քաղկեդոնի ժողովի ընդունում)՝ Հայաստանում քաղկեդոնական եպիսկոպոսությունների հիմնադրմամբ եւ քաղկեդոնականություն ընդունած մարդկանց եւ հատկապես ազնվականներին որոշակի արտոնությունների տրամադրմամբ:

Հույներն աննախադեպ ճնշում են գործադրում Հայոց կաթողիկոսի վրա՝ «ընդ հարկիւ կամէին արկանել զնա... եւ ապա ի հարց եւ ի փորձ արկեալ, եւ սպառնալիս եւս յաւելուին՝ եթէ ոչ ելանիցես աստի, եթէ ոչ զհրամայեալսն ի մենջ յանձն առնուցուս»¹⁰²: Սակայն Խաչիկ Անեցին անդրդվելի է մնում: Հաստատական կաթողիկոսի եռամյա տառապանքներն ավարտվում են, երբ նախկին գահակալ Գագիկ Բ-ի, Կարսի թագավոր Գագիկ Աբասյանի եւ ուրիշների միջնորդությամբ հաջողվում է նրան դուրս բերել կայսրության մայրաքաղաքից եւ բնակության տեղ ապահովել Փոքր Հայքում՝ Թավրուզում: Մի քանի տարի այստեղ բնակվելուց եւ 1064 թ. Անիի՝ սելջուկյան գրավման ու ավերման կսկիծն ապրելուց հետո, Խաչիկ Անեցին վախճանվում է 1065 թ.:

Սակայն կայսրության վարած քաղաքականությունից անկախ, հայ ժողովրդի գիտակցության մեջ Անին շարունակում էր երկրի օրինական կաթողիկոսանիստ համարվել: Արիստակես Լաստիվերցին, խոսելով բյուզանդական տիրապետման մասին, գրում է. «Այժմ թագաւորն անկեալ ի պատուոյ, իբրեւ զգերի կալանաւոր նստի ի հեռաբնակ տեղիս. այսպէս եւ **հայրապետական աթոռն ամայացեալ ի բնակողն՝ ցուցանի տխուր դիմօք իբրեւ զկին նորա-**

¹⁰¹ Մատթեոս Ուռհայեցի, էջ 150:

¹⁰² Արիստակես Լաստիվերցի, էջ 83:

հարսն՝ մնացեալ ի յայրիութեան»¹⁰³: Այսինքն՝ հայրապետական աթոռանիստն Անին էր, միայն թե այնտեղ չէր աթոռակալը: Իսկ Մատթեոս Ուռհայեցու հայտնածից երեւում է, որ Անիի սելջուկյան զավթումից հետո Թավրւորում գտնվող Խաչիկ կաթողիկոսը ողբում է նույն այդ աթոռի ավերումը՝ «սուգ ունէր Տէր Խաչիկ ի սրտի իւրում եւ յիշեալ զաւերումն հայրապետական աթոռոյն Տանն Յայոց»¹⁰⁴: Պատահական չէ, որ աղբյուրները Խաչիկ Անեցուն համարում են «պանդխտության» մեջ գտնվող կաթողիկոս¹⁰⁵:

Խաչիկ Անեցու մահից հետո բյուզանդացիները դիմեցին ծայրահեղ քայլի՝ Յայոց կաթողիկոսությունն ընդհանրապես վերացնելու համար արգելեցին նոր կաթողիկոսի ընտրությունը: Մեծ ճիգերի գնով միայն հայ ազնվականությանը հաջողվեց 1066 թ. իրականացնել նոր կաթողիկոսի՝ Գրիգոր Պահլավունի Մագիստրոսի որդի Վահրամ-Գրիգորի (Վկայասեր) ընտրությունը, որը նույնպես հաստատվեց Յայաստանի սահմաններից դուրս, Ծամնդավում: Գրիգոր Բ Վկայասերը (1066-1105), սակայն, հեռու էր կաթողիկոսության վարչական գործերից եւ ամբողջովին տարված էր սուրբգրական ու վարքագրական գործերի՝ հունարենից հայերեն թարգմանելու աշխատանքով: Այս իրողությունը տարակուսանք է հարուցում այն առումով, որ պետականությունից զրկված, քաղաքականապես պառակտված եւ բյուզանդացիների հարուցած դավաճաբանական խնդիրների հանդիման գտնվող հայ ժողովրդի հոգեւոր հովիվը, փաստորեն, կաթողիկոսի հանգամանքը պահպանում է սոսկ անվանապես: Գրիգոր Վկայասերի օրոք հանդես են գալիս մի քանի

¹⁰³ Արիստակես Լաստիվերցի, էջ 60:

¹⁰⁴ Մատթեոս Ուռհայեցի, էջ 164:

¹⁰⁵ Մատթեոս Ուռհայեցի, էջ 166, Գ. Յովսեփեան, Յիշատակարանք ձեռագրաց, հ. Ա, Անթիլիաս, 1951, էջ 419: Կ. Մութաֆյանը Թավրւորը Խաչիկ Անեցու «աքսորավայրն» է համարում (Կ. Մութաֆյան, Կիլիկիան կայսրությունների խաչմերուկում, Երեւան, 2001, էջ 367):

այլ՝ չորս կամ հինգ կաթողիկոսներ (նախկինում չտեսնված մի բան), որոնց ձեռնադրւթյանը նա չի ընդդիմանում¹⁰⁶:

Անին այդ նույն ժամանակ աստիճանաբար բուժում էր սելջուկ-յան ավերումից ստացած վերքերը: Կրոնական տեսակետից անեցիկների համար ծանր հարված էր հատկապէս նվաճողների կողմից Մայր տաճարի վերածումը մզկիթի: Բայց քաղաքի երիտասարդ ամիրա Շադդադյան Մանուչեն (որի մայրը Աշոտ Դ-ի դուստրն էր) փորձում է լավ հարաբերւթյուններ հաստատել քաղաքացիների եւ սելջուկյան արշավանքից համեմատաբար քիչ տուժած Հասանյան տան՝ Գրիգոր Ապիրատ Մագիստրոսի որդի Վասակի եւ սրա որդի Գրիգորի հետ:

Ահա այս պայմաններում, 1072 թ. Անի է գալիս կաթողիկոս Գրիգոր Վկայասերը: Պետրոսի հեռանալուց 26 տարի անց Հայոց կաթողիկոսը կրկին ոտք է դնում նախկին աթոռանիստ կենտրոնի նվիրական հողին: Վկայասերի այցելւթյան շարժառիթը զուտ անձնական էր. նա եկել էր ծերացած մորը տեսւթյան: Սակայն անեցիկներն այս այցելւթյունից նշանակալի արդյունք քաղեցին, քանի որ կաթողիկոսն այստեղ եպիսկոպոս ձեռնադրեց Հասանյան Վասակի եւ իր քրոջ որդի Բարսեղին՝ նրան օժտելով «ընդարձակ իշխանութեամբ հսկողութեան Հայաստանի գաւառներու վրա իբր կաթողիկոսական փոխանորդ...»¹⁰⁷: Դրանից որոշ ժամանակ անց՝ 1081 թ. Գրիգոր Վկայասերի համաձայնւթյամբ Բարսեղը Հաղբատում հանդիսավորապէս ձեռնադրվում է Հայոց կաթողիկոս ու փառավոր երթով ուղեւորվում Անի: Բարսեղի կաթողիկոսական ձեռնադրւթյան եւ Անիում հաստատվելու մասին բավական հանգամանորեն ու ոգեշնչված պատմում է Մատթեոս Ուռհայեցին. «...ի յամի ՇԼ (1081) արքեպիսկոպոսն Շիրակայ, որ էր ի քաղաքն Անի, որոյ անուն ասէին տէր Բարսեղ, յարուցեալ գնաց յաշխարհն Հայոց ի յԱղուան

¹⁰⁶ Մ. Օրմանյան, Ազգապատում, էջ 1494-1496, 1515-1518, 1521-1525, 1532-1534:

¹⁰⁷ Մ. Օրմանյան, Ազգապատում, էջ 1507:

գաւառի՝ ի Լոռէ քաղաք առ թագաւորն Հայոց Կիւրիկէ... եւ խնդրէր Բարսեղ առնել ձեռնադրութիւն կաթողիկոսութեան Հայոց: Ջոր ժողովեալ թագաւորն Կիւրիկէ զեպիսկոպոսունս Աղուանից աշխարհին, եւ բերեալ զտէր Ստեփանոս կաթողիկոսն Աղուանից ի վանքն, որ կոչի Հաղբաթ, **ձեռնադրեցին զտէր Բարսեղ կաթողիկոս յաթոռ սրբոյն Գրիգորի՝ ի վերայ ամենայն աշխարհին Հայոց...: Յայսմ ժամանակի նորոգեալ եղեւ աթոռ սրբոյն Գրիգորի ի քաղաքն Անի... եւ ելեալ գայր Բարսեղ կաթողիկոսն Հայոց ի թագաւորաբնակ քաղաքն Անի... եւ նստուցին զտէր Բարսեղ յաթոռ տեառն Պետրոսի: Եւ եղեւ օրն այն օր մեծ եւ ուրախութիւն ամենայն Տանն Հայոց, վասն զի տեսին նորոգեալ զաթոռ հայրապետութեանն ի քաղաքն ՍԱՆԻ»¹⁰⁸:**

Այսպիսի տեւական ջանքերով անեցիներին հաջողվում է կարճ ժամանակով վերականգնել Անիի կաթողիկոսական աթոռը: Հայ եկեղեցու ընդհանուր վիճակն այդ ժամանակ անմախաղեպ էր: Պետականության անկման եւ Գրիգոր Վկայասերի թույլ կառավարման հետեւանքով առաջացել էին մի քանի հակաթոռ կաթողիկոսություններ, որոնց դեմ ոչ մի քայլ չէր ձեռնարկվում: Բարսեղ Անեցին 1090 թ. ուղեւորվում է սելջուկյան պետության սուլթան Մելիքշահի մոտ, նրանից արտոնություն ստանում հակաթոռ կաթողիկոսությունների դեմ գործելու համար, եւ հասնում է նշանակալից հաջողության:

1105 թ. Բարսեղ Անեցին գալիս է Կիլիկիայի սահմանամերձ Զեսունի հայկական իշխանություն, Կարմիր վանք, որտեղ մահամերձ Գրիգոր Վկայասերը նրան հայտնում է իր վերջին կամքը, ըստ որի Բարսեղից հետո Հայոց կաթողիկոս պետք է ձեռնադրվի իր քրոջ թոռը՝ Գրիգորը: Դրանից քիչ անց Գրիգոր Վկայասերը մահանում է, եւ 1105 թվականից Բարսեղը դառնում է միանձնյա աթոռակալ: Այդ ժամանակ նրա առաջ հարց է բարձրանում՝ վերադառնալ Անի¹⁰⁹, թե՞

¹⁰⁸ Մատթեոս Ուռհայեցի, էջ 236-238:

մնալ Քեսուճի շրջանում, ուր գտնվում էր ժամանակի Հայոց ամենագորեղ իշխանությունը՝ Գող Վասիլ իշխանի գլխավորությամբ: Հավանաբար նկատի ունենալով այն հանգամանքը, որ նախկինում Հայոց քաղաքական եւ եկեղեցական իշխանությունները գտնվել են մեկ կենտրոնում, Բարսեղը որոշում է մնալ: Այս որոշումից դժգոհում են Հայաստանի խոշոր վանքերի առաջնորդները, բնականաբար, նաեւ անեցիները:

1113 թ. մայիսին դժբախտ պատահարի զոհ է դառնում Բարսեղ Անեցին, փոխ է գալիս նորաշեն մի տուն եւ մահացու վիրավորում այդտեղ գտնվող հայրապետին: Մահամերձ կաթողիկոսը հասցնում է երիտասարդ Գրիգորին եպիսկոպոս ձեռնադրել եւ դեպքից երեք օր անց մահանում է: Գրիգորը, որը հայտնի է Գրիգոր Գ Պահլավունի անունով, այդ ժամանակ տարբեր աղբյուրների համաձայն 15 կամ 17-18 տարեկան էր: Բարսեղի մահից մի քանի օր անց նա Հայոց կաթողիկոս է ձեռնադրվում եւ աթոռակալում մինչեւ 1166 թվականը:

ԿԱԹՈՂԻԿՈՍԱԿԱՆ ԱԹՈՌՆ ԱՆԻՈՒՄ ՎԵՐԱՀԱՍՏԱՏԵԼՈՒ ՓՈՐՁԵՐԸ 12-ՐԴ ԴԱՐՈՒՄ

Գրիգոր Գ Պահլավունու՝ այդքան վաղ տարիքում կաթողիկոս ընտրվելուց դժգոհ Վասպուրականի Դավիթ եպիսկոպոսը 1114 թ. իրեն կաթողիկոս է հռչակում՝ հիմք դնելով Աղթամարի հակաթոռ կաթողիկոսությանը: Հետաքրքիր է, որ իր կաթողիկոսության լեգիտիմացման համար նա առաջին հերթին դիմում է անեցիներին, բայց մերժում ստանում¹⁰⁹: Քեսուճի Կարմիր վանքում գումարվում է եկեղեցական ժողով, որը բանադրանքի է ենթարկում Դավիթին:

¹⁰⁹ Վարդան Արեւելցին գրում է. «Դավիթ... ոչ եղեւ ընկալեալ, թէւ շատից եղեւ աշխատ ընծայիւք եւ աղաչանաւք՝ մանաւանդ ի յԱմույ գլխաւորացն» (Վարդան Արեւելցի, էջ 120):

1116-1117 թվականներին խաչակիրների հետ հակասությունների պատճառով կտրուկ փոխվում է քաղաքական իրավիճակը, մեկը մյուսի հետեւից վերանում են Կիլիկիայի սահմանամերձ գավառների հայկական իշխանությունները: Քեսունի իշխանությունն անցնում է Եդեսիայի կոմսին: Գրիգոր Գ Պահլավունին ստիպված թողնում է Կարմիր վանքն ու տեղափոխվում Տլուք գավառի Ծովք փոքրիկ ամրոց, ուր իշխում էր նրա եղբայր Վասիլը: Հայոց կաթողիկոսական աթոռը զրկվելով քաղաքական հենարանից, հայտնվում է դժվարին կացության մեջ:

Ահա նման պայմաններում Գրիգորը բանակցություններ է սկսում 1110 թ. մահացած Մանուչեի որդու, Անիի նոր ամիրա Աբուլասվարի հետ՝ աթոռը Անի փոխադրելու համար: Անիի Մայր տաճարի քահանա Սամվել Անեցին, որն իր ժամանակագրությունը գրել է հենց Գրիգոր Գ Պահլավունու պատվերով, միակ հեղինակն է, որ հայտնում է այդ մասին: Նա գրում է. «**Բայց սրբազան հայրապետն... Տէր Գրիգորիս, վասն զի ուխտ սիրոյ ունէր առ Ապլսուար՝ վասն իւր սեփական աթոռոյս, գալ այսրէն նորա յաւժար կամակցութեամբ...**»¹¹⁰: Սակայն Անիում ծավալվող քաղաքական անցքերն աւանա խափանում են այս կարեւոր ձեռնարկը:

Անիի պատմության մեջ 12-րդ դարը բնորոշվում է որպես մի շրջան, երբ Վրաց թագավորները պայքարում էին քաղաքը Շադդադյան ամիրաներից խլելու համար: Երեք անգամ՝ 1124-26, 1161-64, 1174-76 թվականներին քաղաքն անցնում է վրացիներին եւ կրկին վերադարձվում Շադդադյաններին: Ահա այս բազմամյա հակամարտության սկիզբն էր, որ ժամանակով համընկավ կաթողիկոս Գրիգոր Գ Պահլավունու՝ Անիում հաստատվելու ցանկության հետ: Աբուլասվարից դժգոհ անեցիների հրավերով Վրաց Դավիթ Դ Շինարար (1089-1125) թագավորը 1024 թ. գրավեց քաղաքը, ամիրային ընտանիքով հանդերձ գերեց, ուղարկեց Վրաստան, ուր բոլորը

¹¹⁰ Անեցի, էջ 127:

մահացան: Դրանից հետո Աբուլասվարի որդիներից մեկը՝ Փատուլունը, համախմբելով համակիր մահմեդական ուժեր, մեծ վնասներ հասցրեց Անիին եւ ի վերջո կարողացավ երկու տարի անց հետ ստանալ քաղաքը:

Այս իրադարձությունները խափանեցին Գրիգոր կաթողիկոսի եւ Շադրադյանների պայմանավորվածությունը: Սամվել Անեցին խոսելով 1124-26 թթ. դեպքերի մասին, թեւ հիմնավորապես պատճառաբանում է անեցիների վարքագիծը, բայց հետո, փաստորեն, մեղադրում է իր համաքաղաքացիներին, որոնց ընդվզման հետեւանքով երկիրը մատնվեց թշվառության, իսկ կաթողիկոսն էլ չկարողացավ Անիում հաստատվել: Ըստ պատմիչի՝ Ապուստարի դեմ անեցիների ընդվզման մասին լսելով՝ կաթողիկոսը «խիստ զայրացավ»¹¹¹:

Այսպիսով 1120-ական թվականներին Գրիգոր Գ Պահլավունու՝ Անիում հաստատվելու ծրագիրը ձախողվում է, սակայն կաթողիկոսը մշտական կապ է պահպանում քաղաքի հետ: Պատահական չէ, որ նա ժամանակագրություն է պատվիրում հենց քաղաքի Մայր տաճարի քահանա Սամվել Անեցուն:

Գրիգոր Գ Պահլավունին երկրորդ անգամ փորձում է Անի տեղափոխվել 1149-50 թվականներին, ինչի մասին տեղեկացնում է Սմբատ Սպարապետը: Պատմիչը հայտնում է, որ Իկոնիայի սուլթանի արշավանքի հետեւանքով քրիստոնյա իշխանների ձեռքին գտնվող մի շարք բերդերի գրավման պատճառով Գրիգոր կաթողիկոսը որոշում է դիմել Վրաց թագավորին եւ տեղափոխվել Անի: Ըստ պատմիչի՝ քաղաքն այդ ժամանակ Վրաց տիրապետության տակ էր, սակայն իրականում Անին պատկանում էր Շադրադյաններին, որոնք որոշ կախման մեջ էին Վրաց թագավորից:

Կաթողիկոսը Անի գնալու համար ճանապարհ է ելնում, սակայն նախ հյուրընկալվում է Թլպաշար ամրոցում, որի լատին տիրուհին տեղեկանալով նրա մտադրության մասին, խոստանում է Զայոց կա-

¹¹¹ Անեցի, էջ 127:

թողիկոսին հատկացնել Յոննկա անառիկ ամրոցը: Գրիգոր Գ-ն ու-
րախոքամբ ընդունում է այդ առաջարկը եւ կարճ ժամանակ անց
տեղափոխվում Յոննկա¹¹²: 1150 թ. Գրիգոր Գ Պաիւսպոլսին
Յոննկայում հիմք է դնում մի կայուն կաթողիկոսանիստ կենտրո-
նի¹¹³: Դրանից հետո Գրիգոր Գ. Պաիւսպոլսում եւ նրա հաջորդների՝
կաթողիկոսներ Ներսես Շնորհալու (1166-1173), Գրիգոր Տղայի
(1173-1193) եւ մյուսների համար աթոռի՝ Անի փոխադրության
հարցն օրակարգից դուրս է գալիս, բայց այդ գաղափարը շարու-
նակում է հարատեւել Անիում: Այստեղ բավական գորացել էր քա-
հանայական դասը, որը գլխավորում էր Անիի արքեպիսկոպոսը:
Վերջինս հատուկ հեղինակություն էր վայելում նաեւ համահայկա-
կան եկեղեցական գործերում: Ինչպես Մաղաքիա Օրմանյանն է
գրում. «Անույ արքեպիսկոպոսները լիազոր իշխանութեամբ գլխա-
ւորութիւնը կը պահէին բոլոր Յայաստանի մէջ **եպիսկոպոս յարե-
ւելս հիւսիսոյ** կոչմամբ եւ միայն մեծագոյն իրողութեանց մէջ յարա-
բերութիւն ունէին Յոննկայի աթոռին հետ»¹¹⁴:

Շատ կարելի էր նաեւ Անիի աթոռակալի տոհմական ծագումը:
Յիշյալ շրջանում Անիի արքեպիսկոպոսները Պաիւսպոլսիների հետ
խնամիացած Հասանյան (Ապիրատյան) իշխանական տոհմի ներ-
կայացուցիչներն էին, փաստորեն Յոննկայում գտնվող կաթողի-
կոսների հետ ազգակցական կապ ունեին եւ եթէ վերջիններս իրենց
համարում էին Գրիգոր Լուսավորչի տոհմակիցներ, ապա այդ առա-
վելությունից զուրկ չէին նաեւ անեցի աթոռակալները:

Այս պայմաններում է, որ անեցիները կաթողիկոսական աթոռը
վերադարձնելու ուղղությամբ նոր փորձ են կատարում: Շարժումը
գլխավորում է քաղաքի Բարսեղ արքեպիսկոպոսը, որը պատմութե-

¹¹² Սմբատայ Սպարապետի տարեգիրք, Վենետիկ, 1956, էջ 168-169:

¹¹³ Կաթողիկոսական աթոռը մնում է Յոննկայում մինչեւ 1292 թ., երբ
եգիպտացիները գրավում են ամրոցը, գերում կաթողիկոսին: Դրանից
հետո աթոռը տեղափոխվում է Կիլիկիայի հայկական թագավորության
մայրաքաղաք Սիս:

¹¹⁴ Մ. Օրմանյան, Ազգապատում, հ. Ա, էջ 1784:

յան մեջ հայտնի է **Բարսեղ Բ Անեցի** անունով: Այս եռանդուն գործիչը Բարսեղ Ա Անեցու եղբայր Գրիգոր իշխանի որդի Յասան մագիստրոսի որդին էր: Նա առաջին անգամ հիշվում է Անիի պարսպի բուրգերից մեկի 1160 թ. շինարարական արձանագրության մեջ:

Բարսեղ Բ Անեցին լավ հարաբերություններ էր պահպանում ինչպես Վրաց թագավորների, այնպես էլ Անիի Շադդադյան ամիրաների ու տեղի մահմեդականների հետ¹¹⁵: Հայտնի է, որ 1174 թ. Բարսեղը Վրաց թագավորի օգնությամբ գերությունից փրկագնել է եղբորը՝ իշխան Ապիրատին: Նրա օրոք Անիում ու նրա շրջակայքում վերելք է ապրում հոգեւոր եկեղեցական կյանքը, կառուցվում ու նորոգվում են բազմաթիվ եկեղեցիներ: Հավանորեն այս ժամանակ է կառուցվում Անիի եպիսկոպոսանիստ Ս. Առաքելոց եկեղեցու շքեղ գավիթը, ուր 1184 թ. իր եւ ծնողների հիշատակին նվիրված խաչքար է կանգնեցնում Բարսեղը¹¹⁶: 1186 թ. անեցիները մահմեդական ավազակները զենքի ուժով գրավում են Ծառաքարը (Մաղասբերդ), որը Բարսեղի սեփականությունն էր¹¹⁷: 1191թ. նա մահմեդականներից գնում է Լմբատավանքը («Ուխ (1191) կամաւ Աստուծոյ ես տէր Բարսեղ, որ գնեցի զվանքս յանաւրինաց...»¹¹⁸):

Իսկ ի՞նչ հարաբերությունների մեջ էր Բարսեղ Բ Անեցին Հռոմկլայի աթոռի հետ: Գրիգոր Դ Տղա կաթողիկոսի օրոք՝ 1177 թ. բյուզանդական Մանուել Ա Կոմնենոս կայսրից հույն եւ հայ եկեղեցիների միության խնդիրն արժարժող նամակ է ստացվում: Գրիգոր Տղան այս մասին ծանուցում է Հայաստանի եպիսկոպոսներին ու հոգեւորականությանը, որոնցից մերժողական պատասխան է ստանում: Այդ գրությունը ստորագրած հոգեւորականության անվանացանկը սկսվում է Բարսեղ Բ Անեցու անունով:

¹¹⁵ Ներսես Լամբրոնացին Կիլիկիայի Լեւոն Երկրորդ իշխանին գրած թղթում Բարսեղին պարսավում է Անիի մահմեդական իշխանավորների հետ ջերմ հարաբերություններ ունենալու համար:

¹¹⁶ Դիվան հայ վիմագրության, պր. Ա, էջ 31 :

¹¹⁷ Վարդան Արեւելցի, էջ 136:

¹¹⁸ Ղ. Ալիշան, Շիրակ, Վենետիկ, 1881, էջ 164:

1178 թ. ապրիլին Ջոռնկլայուն գումարվում է եկեղեցական մեծ ժողով, որի հայաստանցի մասնակիցներից առաջինը դարձյալ հիշվում է Բարսեղը՝ «**Բասիլիոս արքեպիսկոպոս քազաւորանիստ Անի քաղաքի**»: Ժողովը բավական երկար է տևում եւ ի վերջո ավարտվում է անարդյունք, քանի որ հոգեւորականության ավանդապահ մասը դավանաբանական գլխավոր հարցերում մնում է անզիջում, իսկ ժողովի արդյունքում ստորագրված փաստաթուղթն այդպես էլ չի հասնում Կոստանդնուպոլիս: Հատկանշական է, որ փաստաթղթի տակ Բարսեղի ստորագրությունը Հայոց եւ Աղվանից կաթողիկոսների ստորագրություններից հետո երրորդն է (այնուհետեւ գալիս են Անտիոքի, Երուսաղեմի, Տարսոնի, Եդեսիայի, Տփղիսի, Սյունիքի, Կեսարիայի արքեպիսկոպոսների ստորագրությունները): Այս փաստը եւս ցույց է տալիս Անիի արքեպիսկոպոսի գրաված բացառիկ դիրքը: Ժողովից հետո Բարսեղը վերադառնում է Անի, իսկ Ջոռնկլայի աթոռը հետագայում եւս շարունակում է քայլեր ձեռնարկել եկեղեցիների միավորման ուղղությամբ՝ այս անգամ արդեն կապեր ստեղծելով լատինական՝ կաթոլիկ եկեղեցու հետ:

Յյուսիսային Հայաստանի հոգեւորականության շրջանում աստիճանաբար խորանում է այն համոզումը, որ անհրաժեշտ է սեփական կաթողիկոսական աթոռ ունենալ՝ հեռու մնալով այլ ազդեցություններից ու դավանաբանական վեճերից: Այս խնդրի իրականացման համար լավագույն թեկնածու է համարվում Անիի արքեպիսկոպոսը: Երբ 1193 թ. մահանում է Գրիգոր Տղան, Հայաստանում առաջ է քաշվում Բարսեղ Անեցու թեկնածությունը, բայց այն ընդունելություն չի գտնում կիլիկեցիների մոտ: Ջոռնկլայում կաթողիկոս է ձեռնադրվում երիտասարդ եպիսկոպոս Գրիգոր Ե-ը, որը մեկ տարի անց Լեւոն Բ-ի (1198-ից՝ թագավոր) ճնշման զոհն է դառնում: Կիլիկյան զորացած արքունիքն ուղղակիորեն միջամտում է կաթողիկոսության գործերին: 1194 թ. վերջերին Սսում գումարվում է եկեղեցական ժողով, որը Լեւոն Բ-ի ցուցումով կաթողիկոս է ձեռնադրում Գրիգոր Զ Ապիրատին (1194-1203): Ընտրությունը կատար-

վում է առանց Հայաստանի հոգեւորականության կարծիքը հաշվի առնելու: Վերջիններս նախ հանդիմանական մամակ են հղում Լեւոնին՝ նշելով, որ չեն ճանաչում նոր կաթողիկոսի իշխանությունը, առաջարկում են նոր ընտրություն՝ առաջադրելով Բարսեղի թեկնածությունը եւ պահանջում արքունիքից հեռացնել Ներսես Լամբրոնացուն, որին կատարված դեպքերի գլխավոր մեղավորն են համարում: Լեւոնը միջանկյալ լուծում է գտնում, Լամբրոնացուն հեռացնում է, բայց Գրիգոր Ապիրատին թողնում է աթոռի վրա:

Դրանից հետո է, որ 1195 թ. Հայաստանի հոգեւորականության որոշմամբ Անիում կաթողիկոս է ձեռնադրվում Բարսեղ Բ Անեցին: Հռոմոսի վանահայր Պետրոսի 1195 թ. արձանագրության մեջ կարդում ենք՝ «**Ի Թ. ՈՒՆԴ (1195) յառաջին ամի կաթողիկոսութեան տեառն Բարսղի...**»¹¹⁹:

Ինչպես նշվեց, Հռոմկլայի կաթողիկոսական աթոռը գտնվում էր Կիլիկիայի հայոց իշխան եւ որոշ ժամանակ անց թագավոր դարձած Լեւոն Երկրորդի վերահսկողության ներքո, որը միանձնյա էր որոշում գահակալներին, հաշվի չառնելով տեղի հոգեւորականության, առավել եւս Հայաստանի հոգեւորականության կարծիքը: Մաղաքիա Օրմանյանի գնահատմամբ, նաեւ այդ էր պատճառը, որ Բարսեղի Բ Անեցու կաթողիկոս հռչակվելուց հետո Հռոմկլայի աթոռը նրա դեմ վճիռ չի արձակում: Պատմաբանը գրում է. «Կիլիկիոյ իշխանապետն ու կաթողիկոսը... չհամարձակեցան Բարսեղի դեմ վճիռ արձակել... եւ մտադրութիւն իսկ չդարձուցին Հայաստանի մէջ կատարուած իրողութեան: Այսպէս երկու կաթողիկոսներ, իրարու հակառակ, բայց հակառակութիւննին ծածկելով, կրցան միասին ապրիլ ու գործել...: Բարսեղ, սովորաբար Բարսեղ Բ Անեցի ճանչցուած, ոչ հակաթոռ, այլ աթոռակից մը պէտք է ըսուի, քանի որ իր տիտղոսն ու պաշտօնը կանոնապէս չմերժեցան ու չդատապարտեցան»¹²⁰:

¹¹⁹ Ն. Սարգիսեան, Տեղագրութիւնք..., էջ 150:

¹²⁰ Մ. Օրմանյան, Ազգապատում, հ. Ա, էջ 1784-1785:

Այսպիսով, Բարսեղ Ա Անեցու 1105 թ. Անիից հեռանալուց 90 տարի անց՝ 1195 թ. անեցիները մի վերջին անգամ վերականգնում են Անիի կաթողիկոսական աթոռը: Շուտով Անին վերջնականապես ազատվում է ամիրայական տիրապետությունից եւ, դատելով Ռոռոմոսում գրված մի հիշատակարանից եւ մի քանի այլ փաստերից, 1198 թ. վերջերին, առանց դիմադրության դռները բացում Ջաքարե եւ Իվանե Ջաքարյանների գլխավորած հայ-վրացական զորքերի առաջ¹²¹: Այսպիսով, Անիում վերականգնվում է թե՛ կաթողիկոսական աթոռը, թե՛ քրիստոնեական իշխանապետությունը: Սակայն Ջաքարյանները, որոնք Վրաց պետության պաշտոնյաներ էին, հավանաբար հայ-վրացական միջեկեղեցական հարաբերությունների սրումից խուսափելու համար Անիում կաթողիկոս ունենալու հարցում չահագրգռություն չեն ցուցաբերում:

Բարսեղի մահից հետո, որը տեղի է ունեցել մինչեւ 1203 թվականը, Անիում այլեւս նոր կաթողիկոս չի ձեռնադրվում, այլ միայն եպիսկոպոս՝ նույն Հասանյան տոհմից, կաթողիկոսի եղբայր Ապիրատ իշխանի որդի Սարգիսը (Սարգիս Ա):

Ամփոփելով կարող ենք ասել, որ Անին Հայոց պատմության մեջ բացառիկ դեր է ունեցել ոչ միայն Բագրատունյաց թագավորության մայրաքաղաք (961-1045 թթ.), այլեւ Հայոց կաթողիկոսության աթոռանիստ վայր լինելու շնորհիվ (992-1046 թթ.): Հայաստանը նվաճելու ձգտող Բյուզանդական կայսրությունը պայքար է մղել Բագրատունյաց թագավորության դեմ եւ հաջողության հասել

¹²¹ Կ. Մաթևոսյան, Անիում Ջաքարյանների հաստատման ժամանակն ըստ նորահայտ հիշատակարանի, «Պատմա-բանասիրական հանդես», 1997, N 1, էջ 280-283: Ա. Շահնազարյան, Ջաքարյանների ազատամարտերի առաջին փուլը, ՀՀ ԳԱԱ պատմության ինստիտուտ, Հայոց պատմության հարցեր, գիտական հոդվածների ժողովածու, թիվ 6, Երեւան, 2005, էջ 140-142:

հիմնականում դիվանագիտական ճանապարհով: Հայոց թագավորությունը վերացնելուց հետո կայսրությունը գործողությունների է դիմել կաթողիկոսին եւ կաթողիկոսական աթոռը Անիից եւ բուն Հայաստանից դուրս բերելու, նրա ազդեցությունը թուլացնելու ուղղությամբ:

Բյուզանդական տիրապետության ավարտից հետո (1064 թ.) անեցիները կարճ ժամանակով (1081-1105 թթ.) վերականգնել են Անիի կաթողիկոսական աթոռը: 12-րդ դարի ընթացքում եղել են կաթողիկոսական աթոռը Անի վերադարձնելու նոր փորձեր, որոնք հաջողության չեն հասել, թեեւ Բարսեղ Բ Անեցի եպիսկոպոսը 1195 թ. հռչակվել է կաթողիկոս եւ մինչեւ իր մահը կրել այդ կոչումը:

ՀԱՋԱՐԱՄՅԱ ԲԱԳՆԱՅՐԻ ՎԱՆՔԸ

Անհից շուրջ 7-8 կմ արեւմուտք՝ Արջո Առիճ (Ալաջա) լեռան ստորոտում է գտնվում Բագնայր (Բգներ) հնագույն բնակավայրը, որի անունը, ինչպես Բագարան, Բագավան տեղանունները, հավանաբար ծագում է բագին բառից, այսինքն՝ դեռեւս հեթանոսական ժամանակներում այս վայրը հայերի համար պաշտամունքային կենտրոն է եղել¹: Սակայն Բագնայրն ավելի շատ հայտնի է միջնադարյան վանքով, որը կառուցել է Բագրատունյաց թագավորության հեղինակավոր զինվորական գործիչ Սմբատ Մագիստրոսը:

Պատմիչ Սամվել Անեցին իր ժամանակագրության մեջ Հայոց ՆԾԹ (1010) թվականի դիմաց գրում է. «Սմբատ Մագիստրոսն շինեաց զիրեշտակաբնակ եւ զփափագատենչ վանքն՝ որ Բագնայր յորջորջիւր՝ ժողովե տղարանց աստուածայնոց»²: Սամվել Անեցու ժամանակագրության 1893 թ. վաղարշապատյան հրատարակության մեջ իրադարձությունների մեծ մասի վերաբերյալ նշված է միայն Փրկչական թվականը, որն այդ երկում երկու տարով առաջ է այժմ գործող թվականից³: Ըստ այդմ, հիշյալ հրատարակությունից օգտվողները Բագնայրի վանքի կառուցումը նշում են 1012 թվականին (այդպես է նշված Հայկական սովետական հանրագիտարա-

¹ Բնակավայրն այժմ թուրքերը Ղոզլիճա կամ Գոզլուճա են կոչում: 1970 թ. հրատարակած գրքում Հովհ. Մարգարյանը բնակավայրը կոչում է «30-40 ցած տանիքներէ բաղկացած գիւղ» (Յ. Մարգարյանեան, Բաղդատական ակնարկ մը կրօնական ճարտարապետութեան վրայ եւ հայ ճարտարապետութեան տեղը անոր մէջ, Իսթանպուլ, 1970, էջ 151):

² Սամուէլի քահանայի Անեցւոյ Հաւաքմունք ի գրոց պատմագրաց՝ յաղագս գիւտի ժամանակաց անցելոց մինչեւ ի ներկայս ծայրաքաղ արարեալ, յառաջաբանով եւ ծանօթութիւններով Արշակ Տէր-Միքելեանի, Վաղարշապատ, 1893, էջ 105, հմմտ. ժամանակագրության 1176 թ. հնագույն ընդօրինակությունը՝ Մատենադարան, ձեռ. թիվ 5619, թերթ 94ա:

³ Լ. Խաչիկյան, Վ. Հակոբյան, Ինչպես չպետք է հրատարակվեն պատմական սկզբնաղբյուրները, ՀՍՍՌ ԳԱ հասարակական բաժանմունքի Տեղեկագիր, 1949, թիվ 2, էջ 82:

նում եւ այլուր), մինչդեռ ճիշտ է փաստի արձանագրումը Հայոց թվականով, որը նույնպես նշված է Սամվել Անեցու ժամանակագրության մեջ (ձեռագրերում), եւ տվյալ դեպքում ՆԾԹ (1010) թվականն է: Այդպես են իրողությունն ընդունել նաեւ միջնադարյան հեղինակները: Սամվել Անեցուց օգտվելով՝ Սմբատ Մագիստրոսի ձեռամբ Բազնայրի վանքի կառուցման մասին հայտնում են Հովհաննես Սարկավագի ժամանակագրության շարունակողը («ՆԾԹ (1010) թուին Սմբատ Մաքրաստրոսն շինէ զԲզնայրն տուն Աստուծոյ»)⁴, նաեւ պատմիչներ Կիրակոս Գանձակեցին⁵ եւ Մխիթար Այրիվանեցին⁶: Բազնայրի վանքի առաջին հետազոտող եւ 1864 թվականին վիճագրերը հրատարակող Մխիթարյան միաբան Ներսես Սարգիսյանը, որն օգտվել է Սամվել Անեցու երկի ձեռագրերից, նույնպես վանքի հիմնադրման մասին գրում է, որ թվականը «երաշխաւորեալ է մեզ ի Սամուէլէ՝ ի ՆԾԹ (1010) թուականիս»⁷:

Բազնայրի կառուցման թվականին հանգամանորեն անդրադարձանք, որովհետեւ այդ ճշտված տվյալի հիման վրա կարող ենք արձանագրել, որ 2010 թվականին լրացավ այս նշանավոր վանքի 1000-ամյակը:

ԲԱԳՆԱՅՐԻ ՎԱՆՔԸ ԿԱՌՈՒՑՈՂ ՍՄԲԱՏ ՄԱԳԻՍՏՐՈՍԸ

Բազնայրի վանքը կառուցող իշխանը՝ Սմբատ Մագիստրոսը, առաջին անգամ հիշատակվում է 998 թ. Ծմբո գյուղի մոտ տեղի ունեցած մահմեդականների դեմ մղված հաղթական ճակատամար-

⁴ Մանր ժամանակագրություններ, 13-18-րդ դդ., հ. 1, կազմեց՝ Վ. Հակոբյան, Երեւան, 1951, էջ 25:

⁵ Կիրակոս Գանձակեցի, Պատմություն Հայոց, աշխատասիրությամբ Վ. Մելիք Օհանջանյանի, Երեւան, 1961, էջ 89:

⁶ Մխիթարայ Այրիվանեցւոյ Պատմութիւն Հայոց, Մոսկուա, 1860, էջ 57:

⁷ Ն. Սարգիսեան, Տեղագրութիւնք ի Փոքր եւ ի Մեծ Հայս, Վենետիկ, 1864, էջ 178: Նույն թվականն է գրում Սամվել Անեցու ձեռագրերից օգտված Ղ. Ալիշանը (Ղ. Ալիշան, Շիրակ, Վենետիկ, 1881, էջ 111), տես նաեւ Յ. Մարգարանեան, նշվ. աշխ., էջ 152:

տում, որտեղ հայ-վրացական միացյալ բանակի կազմում Վահրամ Պահլավունու եւ Աշոտ մարզպանի հետ գլխավորում էր Անիի թագավորության 6000-անոց զորամասը⁸։ Ո՞ր տոհմից էր սերում Սմբատ Մագիստրոսը։ Պատմագրության մեջ նա համարվում է սպարապետ Վահրամ Պահլավունու որդին։ Սակայն սկզբնաղբյուրների քննությունից պարզվում է, որ Վահրամ Պահլավունին Սմբատ անունով որդի չի ունեցել եւ Սմբատ Մագիստրոսը միանգամայն այլ իշխանական տան ներկայացուցիչ է։

1004 թվականին իր «Տիեզերական պատմությունը» ավարտած Ստեփանոս Տարոնեցի Ասողիկը գրում է այն մասին, որ Մամլան ամիրան հսկայական բանակով հարձակվել է Դավիթ Կուրապաղատի իշխանության վրա, իսկ վերջինս դիմել է Հայոց եւ Վրաց թագավորներին՝ օգնության խնդրանքով։ Գագիկ Ա Բագրատունին (989-1017) հատկացրել է վեց հազար զինվոր, որոնց գլխավորում էին երեք զորավարներ։ Ասողիկի պատմության հրատարակության մեջ կարդում ենք. «Եւ Գագկայ յամենայն զօրացն Հայոց հատեալ զգունդ ԶՌ (6000) զընտիր ընտիր վառելոցն՝ գումարէ ի ձեռն իշխանաց իշխանին Վահրամայ, որդւոյ Գրիգորոյ Պահլաւունւոյ, որ զՄարմաշէն եւ զԲրգներն շինեաց, եւ Սմբատայ մաժիստռոսի, որդւոյ Վահրամայ, եւ մարզպանին Աշոտոյ»⁹։

Այստեղ ընդմիջարկության գոյության մասին կռահել է դեռ Ն. Ա-կինյանը։ Նա գրում է. «Ինձի կը թուի թէ Ասողիկի բնագիրը ունեցած է լուսանցագրութիւններ, որոնք սխալմամբ բնագրին մէջ առնուած են. կառաջարկեն կարդալ. «...որդւոյ Գրիգորոյ Պահլաւունւոյ, որ

⁸ Ստեփանոսի Տարոնեցւոյ Պատմութիւն տիեզերական, աշխատասիրութեամբ Ստ. Մալխասեանցի, Ս. Պետերբուրգ, 1885, էջ 270, Կ. Մաթեւոսյան, Սմբատ Մագիստրոս, «Հանդէս ամսօրեայ», 2008, էջ 173-186։

⁹ Ստեփանոսի Տարոնեցւոյ Պատմութիւն, էջ 270։ Տողատակում հրատարակիչը նշում է, որ օգտագործված որոշ օրինակներում եղել է այլ տարբերակ. «...իշխանաց իշխանին Վահրամայ որդւոյ Գրիգորոյ. եւ Սմբատայ մաժիստռոսի որդւոյ Վահրամայ. եւ մարզպանին Աշոտոյ Պալիաւունւոյ, որ զՄարմաշէն շինեաց. որ զԲրգներն շինեաց» :

զՄարմաշէն շինեաց, եւ Սմբատա մաժիստռոսի որդւոյ Վահրամայ, որ զԲրգներն շինեաց, եւ մարգպանին Աշոտոյ»¹⁰:

Մատենադարանում պահվող Ասողիկի Պատմության հնագույն ձեռագիրը (թիվ 2865), որը 13-րդ դարից է, ընդօրինակված Յոհան Շիրակացի¹¹ գրչի ձեռքով, վերջնականապես պարզում է հարցը: Այնտեղ հեղինակային բնագրի հարեւանությամբ իրոք տեսնում ենք գրչի մի լուսանցագիր հավելում Մարմաշենի եւ Բագնայրի մասին, որը հաջորդ գրիչները ներմուծել են բնագրի մեջ եւ շփոթի առիթ ստեղծել: Ահավասիկ իրականում ինչ է գրել Ասողիկը. «Եւ Գագկայ յամենայն զաւրացն Հայոց հատեալ զգունդ վեցհազար զընտիր ընտիր վառելոցն, **գումարէ ի ձեռն իշխանաց իշխանին Վահրամայ որդւոյ Գրիգորոյ, եւ Սմբատայ մաժիստռոսի որդւոյ Վահրամայ, եւ մարգպանին Աշոտոյ**»¹²: Այս հատվածից աջ՝ լուսանցքում, Վահրամի անվան հավասարությամբ սկսվում է յոթ կարճ տողերից բաղկացած Յոհան գրչի մանրատառ հավելումը. «**Պալիաւունոյ որ զՄարմաշէն շինեց: Որ զԲրգներն շինեց**»¹³:

Սույն հավելմամբ Անիի շրջանում ապրած գրիչը ցանկացել է պատմիչի գրածին ավելացնել իրեն հայտնի փաստերն այն մասին, որ Վահրամ Պալիավունին Մարմաշենն է կառուցել, իսկ Սմբատ Մագիստրոսը՝ Բագնայրը, այդ պատճառով երկու տվյալն առանձնացրել է վերջակետով: Բայց հետագայի ընդօրինակողներն այդ տողերը՝ որպես միասնական միտք, ներմուծել են պատմության բնագրի մեջ, մի դեպքում՝ Վահրամի հոր անունից հետո (ինչպես Ասողիկի հրատարակության մեջ է), մյուս դեպքում՝ Աշոտ մարգպանի

¹⁰ Ն. Ակինեան, Ներսես Լամբրոնացի, Վիեննա, 1956, էջ 358:

¹¹ Կ. Մաթեոսյան, Յոհան գրչի ընդօրինակած պատմական ժողովածուն եւ կատարած հավելումները, «Էջմիածին», 2008, Զ-Է, էջ 102-112:

¹² Մատենադարան, ձեռ., թիվ 2865, էջ 236ա: Այս եւ հաջորդ մեջբերումներում կատարված ընդգծումները մերն են - Կ. Մ.:

¹³ Նույն տեղում:

անունից հետո (ինչպես հրատարակության տողատակում նշված օրինակում)¹⁴:

Այժմ տեսնենք, թե կարո՞ղ էր արդյոք Սմբատ Մագիստրոսը Վահրամ Պահլավունու որդին լինել: Ասողիկը նշում է, որ Հայոց բանակը ղեկավարել են երեք հոգի՝ Գրիգորի որդի իշխանաց իշխան Վահրամը, Վահրամի որդի Սմբատ Մագիստրոսը, Աշոտ մարգպանը: Եթե Սմբատը Վահրամ Պահլավունու որդին լիներ¹⁵, պատմիչը նրա անունը չէր կրկնի, այլ կնշեր իշխանաց իշխան Վահրամը եւ նրա որդին՝ Սմբատ Մագիստրոսը: Բայց Ասողիկը լավ էր ճանաչում իր ժամանակակիցներին: Ծմբոյի ճակատմարտի մանրամաս-

¹⁴ Ուշագրավ հանգամանք է այստեղ նաեւ այն, որ Ասողիկի բնագրում, փաստորեն, չի օգտագործված «Պահլավունի» տոհմանունը: Այն նշված է հետագայի հավելման մեջ: Գրիգոր Մագիստրոս Պահլավունուն նվիրված մենագրության մեջ Լ. Խաչերյանը, հանգամանորեն քննելով Պահլավունիների մասին վաղ հիշատակությունները եւ նրանց իսկ թողած բոլոր արձանագրությունները, հանգում է այն եզրակացության, որ նրանք բավական ուշ են որդեգրել այդ տոհմանունը: Հեղինակի համար առեղծված է մնում, թե ինչպե՞ս է որ 1004 թ. իր Պատմությունն ավարտած Ասողիկը նշել է Պահլավունի տոհմանունը, եւ ակամա դա համարում է այդ անվան ամենավաղ հիշատակությունը (Լ. Խաչերյան, Գրիգոր Պահլավունի Մագիստրոս, Լոս Անձելես, 1987, էջ 30): Ասողիկի Պատմության հնագույն ձեռագիրը պարզություն է մտցնում նաեւ Պահլավունյաց տոհմաբանությանն առնչվող այս էական հարցում՝ փաստելով, որ պատմիչն այդ տոհմանունը չի հիշատակել:

¹⁵ Վ. Վարդանյանը լիովին համոզված լինելով, որ Սմբատ Մագիստրոսը Վահրամ Պահլավունու որդին է, Ասողիկի Պատմության այդ հատվածից ընդհանրապես հանել է երկրորդ «Վահրամ» անունը եւ հատվածը թարգմանել հետևյալ կերպ. «Գագիկը Հայոց գործից առանձնացնում է (գո) վեց հազար ամենաընտիր եւ զինավառ մի զունդ, հանձնում Սարմաշենն ու Բրզնները կառուցող Գրիգոր Պահլավունու որդի իշխանաց իշխան Վահրամի եւ նրա որդի Սմբատ մագիստրոսի ձեռքը, ապա նաեւ Աշոտ մարգպանի...» (Ստեփանոս Ասողիկ Տարոնեցի, Տիեզերական պատմություն, թարգմանությունը, առաջաբանը եւ ծանոթագրությունները Վ. Վարդանյանի, Երեւան, 2000, էջ 331): Ավելացվել են բնագրում չեղած «նրա որդի» բառերը, միեւնույն ժամանակ կարծես ստացվում է, որ Սարմաշենն ու Բրզնայրը Վահրամի հայր Գրիգորն է կառուցել:

ները նկարագրելով՝ նա նշում է՝ քանի որ Հայոց եւ Վրաց զորաբանակները թագավորներ չէին գլխավորում, ամեն տոհմ մարտի էր նետվում ինքնուրույն. «Իսկ զօրն Հայոց եւ Վրաց, զի ոչ թագաւոր զոք ունէին... **իւրաքանչիւրքն ըստ տոհմից եւ աւագութեան գնդից դիմէին**, առիժաբար մռնչելով՝ յանտառացեալ բազմութիւն բանակին Պարսից»¹⁶: Սա եւս ցույց է տալիս, որ ճակատամարտի զորահրամանատարներին թվարկելիս պատմիչը տարբերակել է նրանց ըստ տոհմերի:

Վիմագիր եւ մատենագրական աղբյուրներում հիշատակվում են Վահրամ Պահլավունու երկու որդիները՝ Գրիգորը եւ Ապուղամբը: Գրիգորը, հավանաբար ավագն էր, քանի որ պապի անունն էր կրում: Հայտնի է, որ նա ծանր հիվանդություն ուներ: Ապուղամբը 1031 թ. Անիի Առաքելոց եկեղեցուն նվիրատվություն է կատարել եղբոր առողջության եւ երկարակեցության համար («վասն եղբաւր իմ Գրիգորոյ առողջութեան եւ կենաց յերկարութեան»)¹⁷: Բայց Ապուղամբը Գրիգորից ավելի վաղ է մահացել, դատելով Վահրամ Պահլավունու՝ 1031-1033 թթ. ժամանակամիջոցին գրած մի արձանագրությունից¹⁸: Ն. Ակինյանը, Սմբատին անդրադառնալով, գրում է. «Վահրամ, որ յիշած է իր արձանագրութիւններու մէջ իր եղբայրներու եւ զաւակներու անունները, խօսք չէ ըրած ամենեւին Սմբատիս մասին»¹⁹: Սակայն ավանդույթի ուժն այնքան մեծ է եղել, որ այս կարեւոր դիտարկումն անելով հանդերձ, նա Սմբատին համարել է Վահրամ Պահլավունու որդի:

¹⁶ Ստեփանոսի Տարոնեցոյ Պատմութիւն, էջ 272-273:

¹⁷ Դիվան հայ վիմագրության, պր. Ա. կազմեց Հ. Օրբելի, Երեւան, 1966, էջ 12:

¹⁸ Նույն տեղում, էջ 32, Վ. Վարդանյան, Պահլավունիները Հայոց պետականության եւ հոգեւոր անադարտության պահապաններ, Երեւան, 2008, էջ 54:

¹⁹ Ն. Ակինեան, նշվ. աշխ., էջ 358: Նկատենք, որ Սմբատ անունն ընդհանրապես չի հանդիպում Պահլավունիների տոհմում:

Ուսումնասիրողները, ցավոք, աչքաթող են արել եւս մի էական հանգամանք: Հայտնի է, որ Վահրամ Պահլավունին եւ իր որդի Գրիգորը զոհվեցին 1045 թ. աշնանը բյուզանդացիների՝ Դվինի ամիրայի դէմ կատարած արշավանքի ժամանակ: Վահրամն այդ պահին տարիքն առած մարդ էր (նրա տարիքի մասին ուղղակի վկայություններ չեն պահպանվել): Եթե ենթադրենք, թե իր մահվան ժամանակ նա ութսուն տարեկան էր, ինչպես Կ. Կոստանյանցն է գրում՝ «1047-ին պատերազմի մէջ մեռաւ... ութսունամեայ ծերունին Վահրամ»²⁰, ապա 1045-ից 80 տարի հետ գնալով կգտնենք նրա ծննդյան թվականը՝ 965, եւ պարզ կլինի, որ Ծմբոյի ճակատամարտի ժամանակ՝ 998 թվականին, նա 33 տարեկան էր: Մոտավոր ելակետ ունեցող այս հաշվարկի մեջ մեկ-երկու տարվա տեղաշարժը առաջ կամ հետ չի կարող էական նշանակություն ունենալ: Իրողությունն այն է, որ Ծմբոյի ճակատամարտի ժամանակ Վահրամ իշխանաց իշխանն այնքան երիտասարդ էր, որ չէր կարող զորավարության տարիքի, առավել եւս՝ մագիստրոսի պատվաստիճանի հասած որդի ունենալ:

Դատելով Ծմբոյի ճակատամարտի ժամանակ Սմբատի մագիստրոս²¹ լինելու հանգամանքից, կարելի է ասել, որ նա նվազագույնը Վահրամ Պահլավունու սերնդակիցն էր, կամ, հավանաբար, ավելի տարեց մարդ էր: Նրանց տարիքի հարաբերակցության մոտավոր կողմնորոշիչ կարող է լինել նաեւ այն, որ Սմբատը որպես տոհմական վանք Բագնայրը կառուցել է 1010 թվականին, իսկ

²⁰ Գրիգոր Մագիստրոսի թղթերը, բնագիրն յառաջաբանով եւ ծանոթագրութիւններով Կ. Կոստանեանցի, Ալէքսանդրապօլ, 1910, էջ 292:

²¹ Մագիստրոսը բյուզանդական արքունիքի կողմից օտարերկրացիների տրվող բարձրագույն պատվաստիճանն էր (Հ. Բարթիկյան, Հայբյուզանդական հետազոտություններ, Երեւան, 2002, էջ 669): Արգականի 1001 թ. մի արձանագրության մեջ մագիստրոս պատվաստիճանով է հիշվում Հասանի որդի Գրիգոր (Ապիրատ) իշխանը, որը մի քանի տարի անց կառուցեց Կեչառիսի վանքը:

Վահրամը՝ Մարմաշենը՝ 1029 թվականին, ինչպես տեղի շինարարական արձանագրության մեջ է նշված²²:

Արդյո՞ք Բագնայրի վանքը տեղեկություններ պահպանել է Սմբատ Մագիստրոսի տոհմակիցների վերաբերյալ: Ցավոք, վանքի ամենահին թվակիր արձանագրությունը 1042 թվականից է: Սակայն պահպանվել է ավելի վաղ գրված մի անթվական արձանագրություն: Այստեղ իշխան Վասակ Պահլավունու դուստր (Գրիգոր Մագիստրոս Պահլավունու քույր) Սեդան հայտնում է վանքին կատարած նվիրատվության մասին, որն արել է ի հիշատակ իր հոր՝ «Քրիստոսի գորական» Վասակի: Հայտնի է, որ մահմեդական հրոսակների դեմ կռվի ելած Վասակը սպանվել է 1021 թ., հետեւաբար Սեդայի արձանագրությունը գրվել է այդ կամ հաջորդ թվականին՝ հոր կորստյան անմիջական տպավորության տակ:

Տեսնենք, թե Բագնայրում ինչ «կարգավիճակով» է հանդես գալիս Վասակ Պահլավունու դուստրը: Նա գրում է. «Ես Սեդա տիկնաց տիկին... զուգակից **Վահրամայ իշխանաց իշխանի, որդւոյ Աշոտոյ իշխանաց իշխանի...**»²³: Այսինքն, նա հարս էր եկել մի իշխանական տուն, որի ավագ ներկայացուցիչը Աշոտ իշխանաց իշխանն էր, իսկ կրտսերը՝ իր ամուսին Վահրամը: Նկատենք, որ այս արձանագրությունը գրվել է վանքի հիմնադրումից ընդամենը մեկ տասնամյակ անց, եւ կարելի է ենթադրել, որ նրա մեջ հիշված անձինք Սմբատ Մագիստրոսի տոհմակիցներն են: Մասնավորապես, չի բացառվում, որ Վահրամ իշխանաց իշխանը, Աշոտ իշխանաց իշխանի ավագ որդին լինելով²⁴, ստացել է իր Վահրամ պապի անունը, որը կարող է նույնանալ Սմբատ Մագիստրոսի հոր հետ: Այլ կերպ ասած՝ հնարավոր է, որ Բագնայրի հիմնադիր Վահրամի որդի Սմբատ Մագիստրոսը եւ Աշոտ իշխանաց իշխանը եղբայրներ էին: Այդ դեպ-

²² Մարմաշեն - 1000, «Հուշարձան» տարեգիրք Բ, Երեւան, 1993, էջ 160 :

²³ Դ. Ալիշան, Շիրակ, Վեներտիկ, 1881, էջ 113:

²⁴ Վահրամի ավագության օգտին է խոսում այն, որ նրան կնության է տրվել ժամանակի ամենանշանավոր իշխաններից մեկի դուստրը: Սեդայից բացի, Վասակ Պահլավունու այլ դուստր աղբյուրներում չի հիշվում:

քում միանգամայն հասկանալի կդառնա, թե ինչու է այս տան հարսը՝ Վասակ Պահլավունու դուստրը, նվիրատվություն արել Բագնայրին: Հիշենք, որ այս շրջանում այլ իշխանական տներ նույնպես վանքեր ու եկեղեցիներ էին հիմնում եւ հետամուտ էին դրանց բարգավաճմանը: Մի բան պարզ է, որ Բագնայրի կառուցումից (1010 թ.) մինչեւ Վահրամ իշխանաց իշխանի կնոջ արձանագրության ժամանակը (1021-1022 թթ.) այնքան կարճ միջոց է, որ դժվար թե Սմբատ Մագիստրոսի տոհմի հետ կապ չունեցող մեկն այդքան տիրաբար (հանդիսավոր արձանագրությամբ) ներկայանար այս վանքում:

Յնարավոր է, որ իշխանաց իշխան Վահրամի եւ Սեդայի զավակն էր Սմբատ պատրիկը («զՍմբատ որդի Վահրամայ»), որի մասին նշված է Մատենադարանի ձեռագրերից մեկի 1077 թ. հիշատակարանում²⁵:

Սմբատ Մագիստրոսի մասին մեր խոսքն ամփոփելով՝ նկատենք, որ Բագրատունյաց Հայաստանի իշխանական տների մասին ցայժմ եղած պատկերացումները մեծ մասամբ գտնվում են ավանդական պատմագրության ազդեցության տակ, որտեղ զգալիորեն ուռճացված է Պահլավունյաց տոհմի դերը: Կասկածից վեր է, որ այդ տոհմը բացառիկ դիրք ուներ Անիի թագավորության մեջ, սակայն դա չի նշանակում, որ մյուս իշխանատոհմերը պետք է արհես-

²⁵ Ձեռագիր Ավետարանի (Մատենադարան, ձեռ. թիվ 275) 1077 թ. հիշատակարանի համաձայն՝ այն գրել է տվել Վահրամի որդի Սմբատ պատրիկը: Հիշատակարանի սկզբում Սմբատը հիշում է իր պատրոնին, որը Կարսի վերջին թագավոր Գագիկի դուստր Մարիամն էր, իսկ վերջում գրիչն ավելացնում է. «զՍմբատ որդի Վահրամայ՝ քրիստոսասեր եւ բարեյաղթող պատրիկն յիշեսցիք ի Տէր եւ զծնաւոյս իւր եւ եղբարս՝ զննջեցեալսն ի Քրիստոս» (Հայերեն ձեռագրերի հիշատակարաններ, Ե-ԺԲ դդ., աշխատասիրությամբ Ա. Մաթեւոսյանի, Երեւան, 1988, էջ 110): Այստեղից երեւում է, որ այդ ժամանակ Սմբատ պատրիկը բավական առաջացած տարիքում էր, երբ կորցրել էր ծնողներին ու եղբորը: Յնարավոր է, որ Սմբատ պատրիկի անունը ծագում է իր մեծանուն նախորդի՝ Սմբատ Մագիստրոսի անունից (Կ. Մաթեւոսյան, Սմբատ Մագիստրոս, էջ 173-186):

տականորեն կցվեն Պահլավունիներին: Ժամանակին այդպես է եղել Կեչառիսի հիմնադիր Գրիգոր Ապիրատ Մագիստրոսի պարագայում, որին մենք անդրադարձել ենք առանձին ուսումնասիրությանը²⁶: Կարծում ենք, որ Անիի Բագրատունյաց թագավորության պատմության մեջ այսուհետև իր տեղը պետք է ունենա նաև Բագմայրի հիմնադիր Սմբատ Մագիստրոսի տոհմը:

ՎԱՆՔԻ ԿԱՌՈՒՅՑՆԵՐՆ ՈՒ ՃԱՐՏԱՐԱՊԵՏՈՒԹՅՈՒՆԸ

Բագմայրն Անիին շատ մոտ գտնվելով (վանքից պարզորոշ երևում է Անիի համայնապատկերը), ժամանակին հոգեւոր-եկեղեցական եւ վարչական առումով սերտորեն կապված էր քաղաքի հետ: Վանքի հնագույն եւ գլխավոր եկեղեցին, որ կառուցել է Սմբատ Մագիստրոսը, **Սուրբ Աստվածածինն** է: Այդ անունով վանքն էլ կոչվում է Բագմայրի Սուրբ Աստվածածին, իսկ 13-րդ դարի վիճակագրերում սրան զուգահեռ կիրառվում է «Մայր Լուսո» անունը, ինչպես Ղ. Ալիշանն է գրում՝ «իբր սեփական ցմին մակդիր»²⁷: Եկեղեցին պատկանում է 7-րդ դարի հայ ճարտարապետության մեջ տարածում գտած «գմբեթավոր դահլիճ» տիպին, ունեցել է երկու մուտք՝ արեւմուտքից եւ հարավից, զլանածեւ թմբուկով բարձրադիր գմբեթ:

1909 թվականի հուլիսին Բագմայր այցելած Թորոս Թորամանյանն իր գրառումներում մասնագիտորեն նկարագրել եւ գնահատել է Բագմայրի վանքը, որն այսօր մի եզակի աղբյուր է, եթե նկատի ունենանք, որ վանքն այժմ հիմնավորապես ավերված է, իսկ դրանից առաջ, որքան մեզ հայտնի է, այլ մասնագետների ուսումնասիրությանը չի արժանացել: Թ. Թորամանյանը հենց սկզբում գրում է. «ԺԱ-րդ դարու հայ ճարտարապետության բոլոր բնորոշ

²⁶ Կարեն Մաթևոսյան, Գրիգոր Ապիրատ Մագիստրոսը եւ նրա տոհմը 11-րդ դարում, «Բանբեր Մատենադարանի», թիվ 18, Երեւան, 2008, էջ 67-93:

²⁷ Ղ. Ալիշան, Շիրակ, էջ 111:

հատկությունները իր վրա կամփոփե բուն տաճարը ս. Աստվածածին անունով»²⁸: Այնուհետև բոլորածեզ գմբեթը եւ մի քանի այլ մանրամասներ նկարագրելուց հետո ճարտարապետն անդրադառնում է Բագնայրի կառույցների մի առանձնահատկությանը. «Այստեղ ոչ միայն մայր տաճարի մեջ, այլ ամբողջ տաճարներուն գավիթներուն մեջ նկատելի է մի բան, հյուսիսային կողմերը պատուհան ամենեւին չունին երեք եկեղեցիներն ալ, իսկ հարավային կողմերն ալ թեւ ունին, սակայն դրսի կողմի բացվածքները չափազանց նեղ են (Աստվածածնի տաճարի գմբեթը միայն բացառությամբ է, դրսանց համեմատաբար լայն է), ասոր պատճառը թերեւս ձմեռվան սաստկությունն է: Արեւմտյան մեծ գավիթին պատուհաններն ալ 13-15 սմ լայնություն ունին, թեւ այստեղ հյուսիսային կողմն ալ պատուհան ունի երեք հատ՝ երեք որմնակամարներու ներքեւ»²⁹:

Անդրադառնալով գլխավոր եկեղեցու շինարարական արվեստին՝ Թ. Թորամանյանը գրում է. «Տաճարի որմնասյուները լիովին կիիշեցնեն Անիի Մայր եկեղեցվո որմնասյուները, գրեթե նույնչափ ալ մաքուր շինված: Հատակի վրա սալերը դեռ մասամբ կմնան: Արեւելյան կողմը սեղանին երկու քովերը փոքր մատուռ պահարանները երկհարկանի են. արեւելյան խորանը բոլորովին քանդված է եւ տեղացիներու ըսելով վերջին ռուս-թուրքական պատերազմի ժամանակ (1878 թիվ) թնդանոթի ռումբով է քանդված, մեջը թուրքեր ապաստանած ըլլալուն համար»³⁰:

²⁸ Թ. Թորամանյան, Նյութեր հայկական ճարտարապետության պատմության, աշխատությունների երկրորդ ժողովածու, Երևան, 1948, էջ 195:

²⁹ Նույն տեղում:

³⁰ Նույն տեղում: Մեկ այլ առիթով Թ. Թորամանյանը գրում է, որ Բագնայրի տաճարը «մի ժամանակ ծեփած եւ նկարած է եղեր գմբեթով միասին, հյուսիսային պատի վրա դեռ կան նկարներու հետքեր» (Թ. Թորամանյան, նշվ. աշխ., էջ 200): Սրանք հավանաբար ավելի ուշ շրջանում են արվել:

Եկեղեցուն արեւմուտքից կից գտնվող քառակուսի հատակագծով գավիթի (18x18 մ) կառուցման վերաբերյալ տվյալներ չկան, սակայն այստեղ եղած հնագույն նվիրատվական վիմագիրը, որ պատկանում է Դվալի որդի Մխիթարին, 1201 թվականից է³¹, ուստի կառուցվել է դրանից առաջ: Այս շինության ճարտարապետությունն ու հարդարանքը արժանացել են Թ. Թորամանյանի հիացմունքին: Նա գրում է. «Բագնայրի շինությանց այս կտորի մեջ ամենամեծ տեղը կբռնե Աստվածածին տաճարին արեւմտյան գավիթը թե՛ մեծությամբ, թե՛ ճոխությամբ: Ձեւը գրեթե քառակուսի է, չորս միջին մեծ սյուներու վրա կազմված է ստալակտիտ քանդակված գմբեթ մը, իսկ մյուս մասերը զանազան ձեւով առաստաղներ են: Անոնց ճարտարությամբ շինված է գավիթի արեւելյան կողմի տաճարի դռան առջեւի մասի առաստաղը: Մարդ պահ մը չուզե աչքերուն հավատալ, երբ կտեսնե, թե զանազան գույնի քարերով ինչպես կազմած են կամարիկներ, եւ այդ քարերուն երբեմն լայնությունը 5-10 սանտիմետրը չանցներ, երկար շերտեր քաշված եւ իրարու միացուցած են կաղապարի վրա, բայց այնպիսի ճարպիկությամբ, որ դեռ մինչեւ այսօր քարերուն գույներն միայն կորոշին անոնց տարբեր կտորներէ կազմած ըլլալը»³²: Առաստաղի մյուս հատվածներն էլ ունեն տարբեր, բազմագույն քարերով կազմված զարդարանք: Գավիթի հատակը երկու աստիճանով ցածր է եղել եկեղեցուց³³: Եռանաս գավթի կենտրոնական հատվածն ավելի լայն է՝ 5.6 մ, կողայինները՝ 3.6 մ³⁴:


Ս. Աստվածածնի հարավարեւելյան անկյունից դեպի հարավ եղել են զույգ կենտրոնագմբեթ փոքր եկեղեցի-մատուռներ, որոնց

³¹ Ն. Սարգիսեան, նշվ. աշխ., էջ 180:

³² Թ. Թորամանյան, նշվ. աշխ., էջ 196:

³³ Գավթի ներսում եղել է երկու գերեզմանաքար, որոնց մասին Թ. Թորամանյանը գրում է. «Գավթի մեջ տաճարի դռան առջեւ երկու գերեզման կա, որ այժմ եզդիներ ուխտատեղի շինած խունկ կոխեն» (Թ. Թորամանյան, նշվ. աշխ., էջ 200):

³⁴ Յ. Մարգարյանեան, նշվ. աշխ., էջ 152:




նուտքի դիմաց՝ Ս. Աստվածածնի եկեղեցու հարավային պատի հավասարությամբ, կառուցված է եղել սյունասրահ (տե՛ս հատակագիծը): Այն գավիթի դեր է կատարել երկու փոքր եկեղեցիների համար: Դրանցից առաջինի անունը եւ կառուցողն անհայտ են, բայց հավանաբար կառուցվել է 1010-1021 թթ. ժամանակամիջոցում, քանի որ նրա պատի վրա է Սեդա Պահլավունու արձանագրությունը:

Մյուս փոքր եկեղեցին կոչվել է **Ս. Գրիգոր**: Այն կառուցել է Ազիզ անունով մի կին, ի հիշատակ իր որդի Գրիգորի, որի մասին է վկայում կառույցի 1145 թ. արձանագրությունը³⁵: Սա Անի-Շիրակում Շադդադյան ամիրաների տիրապետության շրջանից հայտնի ամենավաղ եկեղեցաշինական արձանագրությունն է³⁶: Երկու մատուռների արանքում պատրաստված է եղել փոքր խորան:

³⁵ Ն. Սարգիսեան, նշվ. աշխ., էջ 188, տեքստը տե՛ս ստորել:

³⁶ Անիում այս շրջանի ամենավաղ շինարարական արձանագրությունը վերաբերում է Ս. Սարգիս եկեղեցու նորոգմանը՝ 1151 թվականին (Դիվան հայ վիճագրության, պր. Ա, էջ 56):

Վանական բուն հուշարձանախմբից մոտ 200 մ հյուսիս-արևելք կառուցված են եւս երկու փոքր եկեղեցի, որոնցից մեկը՝ **Ս. Երրորդությունը** կենտրոնագմբեթ, արտաքինից եռանկյունաձև խորշերով տարանջատված վեցանիստ, բոլորաձև կառույց է եւ պահպանվել է մինչև մեր օրերը³⁷։ Մուտքի բարավորի վրա ունի 1223



թվակիր արձանագրություն³⁸։ Բագնայրից մի քանի կիլոմետր հյուսիս գտնվում է Արջո Առիճի վանքը (այժմ ավերակ)³⁹։

Բագնայրը միջնադարյան Հայաստանի առավել մեծաթիվ վիճագիր արձանագրություններ ունեցող վանքերից մեկն է։ Բագնայրի վիճագրերը տեղում կատարված ընթերցմամբ ունեցել են երկու հրատարակություն՝ Ն. Սարգիսյանի եւ Կ. Բասմաջյանի⁴⁰ կողմից։

³⁷ Կառույցի տրամագիծը 6 մ է, խորաններից յուրաքանչյուրի չափը՝ 1,6 մ, գմբեթի տրամագիծը 3,3 մ, ունի եռաստիճան գետնախարիսխ (Յ. Մարգարյան, նշվ. աշխ., էջ 154-155)։

³⁸ Կ. Բասմաջյան, նշվ. աշխ., էջ 154, Ն. Սարգիսյան, նշվ. աշխ., էջ 189։

³⁹ 19-րդ դարի կեսերին այստեղ եղած Ն. Սարգիսյանը գրում է. «Արջոյ-առիճ, ուխտս Աստուածածնի եւ Լուսաւորչի, այժմ՝ Ալաճա, կիսաժամու հեռի ի Ղօզլիճայէ (Բագնայր – Կ. Մ.) ըստ հիւսիսոյ նորա եւ ժամաւ յԱմույ յարեւմուտս...»։ Նա նաեւ ներկայացնում է վանքի պատերից արտագրած 13-րդ դարի 9 արձանագրություն (Ն. Սարգիսյան, նշվ. աշխ., էջ 190-192)։ Արջո Առիճի դպրոցի մասին են վկայում մի քանի ուշագրավ հիշատակարաններ (տես Կ. Սաթեւոսյան, Արջո Առիճի դպրոցը 13-րդ դարում, ՀՍՍՀ ԳԱ Լրաբեր հաս. գիտ., 1984, N 3, 67-70)։

⁴⁰ Ն. Սարգիսյան, նշվ. աշխ., էջ 178-189, Կ. Բասմաջյան, Հայերեն արձանագրութիւնք Ամույ, Բագնայրի եւ Մարմաշինու, Պարիս, 1931, էջ 136-191 (արձանագրությունները ներկայացված են նաեւ ֆրանսերեն թարգմանությամբ)։ Տես նաեւ Մ. Գեւորգեանց, Համառօտ տեղագրութիւն հնութեանց Մեծին Շիրակայ եւ մայրաքաղաքին Ամույ, Աղեքսանդրապօլ, 1903, էջ 97-111 (սխալաշատ հրատարակություն է)։

Իսկ գիտական հրատարակության (լուսանկարներով եւ գծանկարներով) հնարավորություն այլեւս չկա, քանի որ վանքի գլխավոր շինություններից այժմ միայն երկու կիսավեր պատ է կանգուն մնացել: Դրանց վրա եղած արձանագրությունները վերջին տարիներին լուսանկարել են Հայկական ճարտարապետությունն ուսումնասիրող կազմակերպության (RAA) անդամները:

ՎԱՆՔԻ ՊԱՏՄՈՒԹՅԱՆ ԱՐՁԱՆԱԳՐՎԱԾ ՏԱՐԵԹՎԵՐԸ

Բազմայրի վանքի պատմության վերաբերյալ հայ մատենագիրների երկերում տեղեկություններն աղքատիկ են: Հայտնի է, օրինակ, որ 1046 թ. սկզբին բյուզանդացիների հարկադրմամբ Անիից հեռացող Պետրոս Ա Գետադարձ (1019-1054) կաթողիկոսին ուղեցողների մեջ է եղել Մխիթար Բազմայրեցին⁴¹, որը վանահայրն էր կամ վանքի նշանավոր վարդապետներից մեկը:

Բազմայրի վանքի պատմության էջերին կարելի է ծանոթանալ՝ հիմնական ուղենիշ ունենալով նրա վիմագրական հարուստ ժառանգությունը: Բազմայրի վիմագիր արձանագրությունների մեծ մասը թվակիր են, կան նաեւ անթվականները, որոնցից հնագույնի մասին (Սեդա իշխանուհու արձանագրություն) խոսվեց վերելում: Մյուսների պարունակած տեղեկությունները ներկայացնում ենք ստորել ժամանակագրական կարգով ներառելով նաեւ այն անթվականները, որոնց մեջ եղած վանահայրերի անունները թույլ են տալիս որոշելու դրանց մոտավոր ժամանակը: Իսկ վերջում ներկայացնում ենք անթվական արձանագրությունների պարունակած տեղեկությունները:

⁴¹ Մատթեոս Ուռհայեցի, Ժամանակագրություն (աշխարհաբար թարգմանությունը եւ ծանոթագրությունները Հ. Բարթիկյանի), (գրքում զետեղված է Ժամանակագրության գրաբար տեքստը Վաղարշապատի 1898 թ. հրատարակությունից), Երեւան, 1991, էջ 114:

1042 թ. - եկեղեցու արեւելյան կողմում գտնվող նվիրատվական արձանագրությունը պատկանում է ոմն Գրիգորի, որը Ծաղիկ մականունն ուներ: Արձանագրության սկզբում նշում է ժամանակի կաթողիկոսին՝ Պետրոս Ա Գետադարձին եւ թագավորին՝ Գագիկ Բ - Բագրատունուն (1042-1045)⁴²: Գրիգորն իր եւ իր որդիների անունից վանքին է նվիրել Անիում գտնվող «Վասլի փնդուկի» (Վասիլի պանդուկի) դիմաց եղած իր գանձագին (զնած) կուղպականին (կրպակների շարքը)⁴³: Արձանագրության մեջ նշվում է Բագնայրի վանահայր Ստեփանոսը, որը միաբան եղբայրների հետ հանձն է առել ամեն տարի Պողոս եւ Պետրոս առաքյալների տոնի օրը բոլոր եկեղեցիներում («յամեն եկեղեցիսդ»)⁴⁴ պատարագել Գրիգորի հանգուցյալ եղբոր՝ Մուկաթլի համար, իսկ Գրիգորի մահից հետո՝ նրա համար⁴⁵:

⁴² «Ի ՆՂԱ (1042) թւ ի հայրապետութեան Տեառն Պետրոսի Հայոց կաթողիկոսի եւ ի թագաւորութեանն Գագկա Շահանշահի որդւո Աշոտոյ...» (Ն. Սարգիսեան, նշվ. աշխ., էջ 178):

⁴³ Հետաքրքիր է, որ կուղպականու տեղը նշելու համար հիշատակված պանդուկի տերը՝ Վասիլը, այդ ժամանակ ողջ էր, եւ հավանաբար Գրիգորը նրանից որոշ կախում ուներ, քանի որ արձանագրության մեջ նա, ի թիվս նվիրատվության այլ պատճառների, նշում է «վասն Վասլին արեւշատութեան...» (Ն. Սարգիսեան, նշվ. աշխ., էջ 178):

⁴⁴ Տվյալ դեպքում նկատի են առնվում եկեղեցու բոլոր խորանները: Այս շրջանում Անիում եւ այլուր ամեն մի եկեղեցու ներսում գտնվող, պատարագի սեղան ունեցող բոլոր խորանները կամ ավանդատները համարվում էին «եկեղեցի»: Այստեղից է ծագում նաեւ Անիում «հազար ու մեկ» եկեղեցու գոյության մասին ավանդությունը, որովհետեւ մեկ եկեղեցու մեջ երբեմն պատարագի սեղանով բազմաթիվ խորաններ կային (այս մասին տես Կ. Մաթեոսյան, Անի. եկեղեցական կյանքը եւ ձեռագրական ժառանգությունը, Ս. Էջմիածին, 1997, էջ 176-188):

⁴⁵ «...կամ եղեւ իմ՝ Գրիգորո Ծաղկանս եւ իմ որդեացս որ տուի զիմ գանձագին կուղպականին, որ Վասլին փնդուկին ընդդէմ է՝ ի Բգնայրին վանս՝ ի Սուրբ Աստուածածինն ի ձեռն առաջնորդի հաւր Ստեփաննոսի... եւ միաբան եղբարքս կամաւ յանձն առին, որ ամենայն ամի գՊաւղոսի եւ գՊետրոսի տաւնին աւուրն պատարագն յամեն եկեղեցիսդ իմ եղբաւրն Մուկաթլի արասցեն եւ յետ վախճանի իմոյ՝ ինձ մատուցեն...» (Ն. Սարգիսեան, նշվ. աշխ., էջ 178-179, Կ. Բասմաջեան, նշվ. աշխ., էջ 138):

Այս արձանագրության հարեւանությամբ եղել է մեկ ուրիշ նվիրատվական արձանագրություն, որի բովանդակությունը չի պահպանվել, բայց որի սկզբում նշվում են նախորդ արձանագրության մեջ հիշված կաթողիկոսի եւ թագավորի անունները, այսինքն՝ այն գրված է եղել 1042-1045 թվականների միջոցում⁴⁶:

1145 թ. - Ս. Գրիգոր մատուռի վրա. «Ի ՇՂԴ (1145) թվ. ես Ազիզս մեղուցեալ աղախին Քրիստոսի աւ(ր)հնեցի զեկեղեցիս զՍուրբ Գրիգոր ի յիշատակ որդւո իմո Գրիգորո ի ձեռն հաւր... մաւր Ա (1) եւ առաջնորդ սբ...»⁴⁷: «Օրհնեցի եկեղեցիս» ասելով Ազիզ տիկինը նկատի ունի եկեղեցին օրհնել տալը, որը կատարել է վանահայրը:

1152 թ. - Նույն մատուռի վրա պահպանվել է մեկ այլ արձանագրության միայն թվականը. «Ի ՈԱ թվ (1152)»⁴⁸:

Բազմայրի վիմագիր տարեգրությունը, 11-րդ դարի կեսերին ընդհատվելով, շարունակվում է 13-րդ դարի սկզբին, երբ Անին ու նրա շրջակայքն անցել էին Ջաքարյանների տիրապետության տակ, եւ բուռն զարգացում ապրեցին: Անիի եպիսկոպոսությունն այդ շրջանում գլխավորում էին Հասանյան (Ապիրատյան) տոհմից սերող եպիսկոպոսները, որոնցից վերջինը Ապիրատի որդի Սարգիսն էր (վերջին անգամ հիշվում է Հռոմոնոսում՝ 1215 թ. եւ Անիում՝ 1220 թ.)⁴⁹: Սակայն այս նույն շրջանում հանդես է գալիս մի տոհմ, որի ներկայացուցիչներն իրենց համարում էին սպարապետ Վահրամ Պահլավունու սերնդից (Ապուղամր Մագիստրոսի որդիներ Ղարիբ Մագիստրոս եւ Գրիգոր եպիսկոպոս) եւ նորոգում են Մար-

⁴⁶ Նույն տեղում:

⁴⁷ Ն. Սարգիսեան, նշվ. աշխ., էջ 188:

⁴⁸ Նույն տեղում:

⁴⁹ Սարգիս եպիսկոպոսի մասին հանգամանորեն տե՛ս Կ. Մաթեոսյան, Անի, էջ 73--83: Այստեղ Անիի եպիսկոպոսների գավազանագրքում (էջ 104-105) մենք չենք նշել Սարգիսի հիշատակությունը 1215 թվականին, քանի որ համապատասխան արձանագրության թվականը չկար Ն. Սարգիսյանի մոտ, սակայն այն տեսել եւ հրատարակել է Ժ-Մ. Թիերին (J-M. Thierry, Le couvent Arménien d' Horomos, Louvain-Paris, 1980, p. 54-55):

մամշենի վանքը, որը գյուղացիների բնակավայր էր դարձել⁵⁰: Նրանցից Գրիգորը, որն արդեն 1216 թ. Անիի եպիսկոպոսանիստ Ս. Առաքելոց եկեղեցու արձանագրության մեջ իր մասին գրում է «ես տէր Գրիգոր որդի Ապուղամրի ժառանգորդ սեփական հայրենի Աթոռոյս մայրաքաղաքիս Անիո, արհիեպիսկոպոս այսմ նահանգի»⁵¹, մի քանի այլ արձանագրություններում նույնպես ընդգծում է Անիի աթոռը ժառանգելու իր տոհմական իրավունքը, իսկ 1225 թ. եղբոր՝ Ղարիբ Մագիստրոսի պատերազմում զոհվելուց հետո իր անվանը կից սկսում է կրել Մագիստրոս պատվանունը, որով հիշվում է մի քանի արձանագրություններում եւ «Բագնայրի ավետարանի» հիշատակարանում (1232 թ.)⁵²: Այս ձեռներեց գործիչն առաջին անգամ հիշատակվում է 1213 թ. Արջո Առիճում, երկրորդ անգամ՝ 1215 թ. Բագնայրում, որը կոչում է իրենց ընտանիքի «սեփական ուխտը»⁵³: Սա նշանակում է, որ այս նոր տոհմը, որն իրեն հռչակել էր Վահրամ Պաիլավունու սերունդ (չի բացառվում, որ Պաիլավունիների հետ խնամիական կամ ինչ-ինչ կապեր ունեցած լինեն), իր վերելքը սկսել է՝ առաջին հերթին տեր դառնալով Արջո Առիճի եւ Բագնայրի վանքերի առաջնորդությամբ:

1201 թ. - Դվալի որդի Մխիթարը նվիրել է Անիում Ս. Առաքելոց եկեղեցու մոտի փոքր փողոցում կամ նրբանցքում («գուկակ»)՝⁵⁴

⁵⁰ Մարմաշենի արձանագրության մեջ Գրիգոր եպիսկոպոսը նշում է, որ ինքն ու եղբայրը 1225 թ. նախաձեռնել են վանքի նորոգումը. «Իսկ ի ՈՅԴ (1225)... խորհուրդ բարի ի միտ արկեալ՝ ազատել զսա (եկեղեցին - Կ. Ս.) ի (տղ)մուտ եւ ի զագիր մթնազգածութենէն, հասուցանել նախկին փառաւորութանն՝ հանեալ արտաքս զշինականսն» (Մարմաշեն - 1000, «Հուշարձան» տարեգիրք Բ, էջ 161): Վերջին բառերը ցույց են տալիս, որ Գրիգորի տոհմն այստեղ նոր է հայտնվել, այլապես տոհմական վանքի գլխավոր եկեղեցին չէր դառնա շինականների կացարան:

⁵¹ Դիվան հայ վիմագրության, պր. Ա, էջ 14:

⁵² Անիի Գրիգոր Ա (Մագիստրոս) եպիսկոպոսի գործունեության մասին հանգամանորեն տես Կ. Մաթեոսյան, Անի, էջ 76-87, 104-106:

⁵³ Նույն տեղում, էջ 104-105:

⁵⁴ Ս. Ավագյան, Վիմական արձանագրությունների բառաքնություն, Երևան, 1978, էջ 86:

գտնվող իր անշարժ գույքը (անվանումը չի պահպանվել): Ստացել է տարեկան երեք պատարագ, երկուսը՝ իր, մեկը՝ կնոջ համար⁵⁵:

1206 թ. - Գրիգորի որդի Գիշուկը վանքին նվիրել է երկու արտ⁵⁶, վանահայր Սիմեոնը («հայր Սիմեոն վարդապետ») եւ միաբանները հատկացրել են տարեկան երեք պատարագ, մեկը՝ Գիշուկին, մեկական նրա ծնողներին ու եղբայրներին:

1209 թ. - Աբրահամի որդի Խաչերես Լոռեցին նվիրել է Անիում գտնվող ութ կուղպակ, երեք տուն եւ ուշագրավ մանրամասներով նշում է դրանց գտնվելու տեղերը («...ետու զիմ զանձագին եւթն կուղպակն ի շարի, վեց ի վերեւն եւ մին՝ ի ներքեւն, մզքօին ընդդէմ եւ երեք տուն ի ներքսեւն»), նաեւ մեկ այգի Մարմետում⁵⁷, որոնց դիմաց վանահայր Սիմեոնից եւ միաբանությունից ստացել 20 պատարագ իր եւ հարազատների համար⁵⁸: Արձանագրության սկզբում օգտագործված է մի ձեւակերպում, որը հանդիպում ենք նաեւ հետագայի մի շարք արձանագրություններում, որտեղ հիշվում է Անիի արքեպիսկոպոսը՝ «ՈԾԸ (1209) ի յամս աստուածապատիւ Տեառն

⁵⁵ «ՈԾ (1201) ես Մխիթար որդի Դըւալին, ետու ի սուրբ ուխտս Բագնայր զիմ աշխատո... ի Սուրբ Առաքելոց զուկակին եւ հայր եւ այլ եղբարքս փոխարէն հատուցին ի տարին Բ (2) ար պատարագ ինձ՝ Մխիթարա եւ մին ար՝ ամուսնոյ...» (Կ. Բասմաջեան, նշվ. աշխ., էջ 141-142, Ն. Սարգիսեան, նշվ. աշխ., էջ 180):

⁵⁶ «Ա (1) արտ ի Տափիս, Ա (1)՝ ի Մաննեխուտին» (Ն. Սարգիսեան, նշվ. աշխ., էջ 181, Կ. Բասմաջեան, նշվ. աշխ., էջ 143):

⁵⁷ Մարմետը նույնացվում է Երվանդաշատի հետ (Թ. Հակոբյան, Ստ. Մելիք-Բախշյան, Հ. Բարսեղյան, Հայաստանի եւ հարակից շրջանների տեղանունների բառարան, հ. 3, Երեւան, 1991, էջ 738): Այստեղ եղած այգի է հիշվում նաեւ Բագնայրի մի անթվական արձանագրության մեջ՝ «Մարմետ ի վերա Երասխա...» (Ն. Սարգիսեան, նշվ. աշխ., էջ 182):

⁵⁸ «Ես Խաչերեսս որդի Աբրահամու Լաւռեցի ետու զիմ զանձագին եւթն կուղպակն... ի Սուրբ Աստուածածինս ի ձեռն հաւր Սիմեոնի եւ սուրբ եղբայրութեանս, եւ զայգին, որ Մարմետ եւ սոքա փոխարէն հատուցին ինձ Ի (20) ար ժամ, Ը (8)՝ ինձ, Ե (5)՝ Աբրահամու, Գ (3)՝ Դինարկանն, Բ (2)՝ Հրանուշին, Բ (2)՝ Արքայութեան...» (Կ. Բասմաջեան, նշվ. աշխ., էջ 144, Ն. Սարգիսյանի մոտ թերի է՝ նշվ. աշխ., էջ 179-180):

Սարգսի, որդոյ Ապիրատի»⁵⁹: Արձանագրությունը շարունակել է Խաչերեսի դուստր Մամ Խաթունը, որը Բագնայրին նվիրել է Անիում գտնվող իր «կուղպակն, որ ի Փողոցկտերն է, ի Բազըզնոց...»⁶⁰: Հայտնի է, որ Մամ Խաթունը մահացել է 1219 թ., անժամանակ, բայց պատգամել է, որ իր հիշատակին իր դրամով կառուցվի Անիի պարսպի բուրգերից մեկը⁶¹:

1210 թ. - Հասանի որդի Պարսիմոն⁶², որն իրեն կոչում է «ռախս մեծանուն գեաղջն Աւշականո», այսինքն՝ Օշականի գյուղապետն էր, արձանագրությունը սկսում է Անիի հոգեւոր իշխանության (Ապիրատի որդի Սարգսի) մասին նախորդ արձանագրությանը շատ մոտ ձեւակերպմամբ, որին անմիջապես հաջորդում է աշխարհիկ իշխանության հիշատակությունը. «...եւ ի պետական իշխանութեան շահընշահ Զաքարիայի»: Նվիրատվությունը Պարսիմոնի հայրեանի (սեփական) այգին է՝ «զայգին զՎարդենց Նորքն», որի դիմաց իր եւ իր հարազատների (խուրթ եւ Սեդա) համար տացել է 14 պատարագ Ղազարոսի հարության տոնի օրը: Արձանագրության մեջ վա-

⁵⁹ Ն. Սարգիսեան, նշվ. աշխ., էջ 179:

⁶⁰ Կ. Բասմաջեան, նշվ. աշխ., էջ 145, Ն. Սարգիսեան, նշվ. աշխ., էջ 180: «Փողոցկտերը» հավանաբար երկհարկանի կրպակներով փողոց է եղել եւ վերաբերել է կտուրներով անցնող փողոցին (փողոցկտուր): Իսկ «Բազըզնոցը» կամ այլ արձանագրություններում «Բազ» կամ «Բազազ» փողոց կոչվածը բազազների, գործվածքներ պատրաստողների ու վաճառողների (կերպասագործների կամ ջուլիակների) փողոց եւ թաղ է եղել (տե՛ս Գ. Գրիգորյան, Նվիրատվություններ Անիի եկեղեցիներին ու վանքերին, Ս. Էջմիածին, 2002, էջ 22, 26, 27):

⁶¹ «Ի ՈԿԸ (1219) թ... Ես Մամ Խաթունս, դուստր Խաչերեսին Լաւռեցւո, անժամ ի Քրիստոս գնացի, յիմ հաւրն ի հալալ դրամէն, որ ինձ տուեալ էր, անհիշատակ էի, շինեցի զբուրջնս յիշատակ ինձ առ Քրիստոս...» (Դիվան հայ վիմագրության, պր. Ա, էջ 3):

⁶² Արձանագրության մեջ գրում է. «Ես Պարսիմոն որդի Հասանա»: Վերջինս 1207 թ. նվիրատվություն է կատարել նաեւ Բագնայրից ոչ հեռու գտնվող Արջո Առիճի վանքին, ուր իր մասին գրում է. «Ես Պարսամաւ ծառա Քրիստոսի, որդի Հասանա»: Երկու արձանագրություններում էլ հիշվում է Պարսիմոնի եղբայր Խուրթը (Ն. Սարգիսեան, նշվ. աշխ., էջ 179-180):

նահոր անունը եղծված է, բայց հավանորեն նշված է եղել Սիմեոնը⁶³:

Պարսիմոյի արծանագրությունը շարունակել է նրա ենթականերից մեկը, որը նշում է. «Ես Մրուան միաբանեցա սրբոցս՝ հետ իմ պարոնին եւ ետուն ինձ աւր մի պատարագ անխափան», իսկ դրանից ներքեւ պահպանվել է վիմագիր գրչի անունը՝ «Ռայբիկ գրիչ»⁶⁴:

1211 ք. - նախորդ արծանագրությունից մեկ տարի անց Օշականի մեկ այլ գյուղապետ Արտաշիրը նվիրել է իր գանձագին այգին «որ Աշոտոնց կոչի» եւ ստացել ութ պատարագ, երեքը՝ իր, երկուական՝ Աբասի եւ Սոսի եւ մեկը՝ Գնտունի համար: Արծանագրությունը սկսվում է նախորդ երկու արծանագրությունների նման՝ Անիի եպիսկոպոսի՝ Ապիրատի որդի Սարգսի հիշատակմամբ, որին հաջորդում է առաջնորդ վանահոր հիշատակությունը («ի յառաջնորդութեան հայր Սիմեոնի»)⁶⁵:

1215 ք. - Ապուղամրի որդի Գրիգորը թողել է կանոնագիր արծանագրություն, որտեղ սահմանում է Բագնայրում միաբանության մահացած անդամների համար մատուցվելիք պատարագների քանակը. «ՈԿԴ (1215) կամաւ Զոգոյն Սրբոյ, ես՝ տէր Գրիգոր, վերայդիտող մայրաքաղաքին Անոյ, հաստատեցաք ի մեր սեփական ուխտս սուրբ եղբայրութեամբս հանդերձ. եթե ոք ի միաբանացս փոխի ի

⁶³ Կ. Բասմաջյանը վանահոր անունը կարդացել է Զամամոնի. «ի ձեռն բարեւեր Զամամոնի եւ սուրբ եղբայրութեան» (Կ. Բասմաջեան, նշվ. աշխ., էջ 146): Ն. Սարգիսյանը վանահոր անունը բաց է թողել (Ն. Սարգիսեան, նշվ. աշխ., էջ 180): Բագնայրի վանահայրն այդ շրջանում Սիմեոնն էր, որի անունը նախորդ եւ հաջորդ արծանագրություններում գրված է «Սիմեոն»: Բարեբախտաբար այս արծանագրությունը պահպանվել է ցայժմ եւ 2008-ին Սամվել Կարապետյանի կատարած լուսանկարից երեւում է, որ անունը դեռեւս հնում ջնջված է եղել (թերեւս դրանում եղած գրչական սխալի պատճառով): Լուսանկարից դատելով՝ առաջարկում ենք հետեւյալ վերծանությունը՝ «ԲԱՐԵՍԵՐ ԶԱԻՐ ՍՄԵՈՆԻ»:

⁶⁴ Կ. Բասմաջեան, նշվ. աշխ., էջ 147:

⁶⁵ Կ. Բասմաջեան, նշվ. աշխ., էջ 148: Ն. Սարգիսյանը գրում է, որ իր այցելության ժամանակ առաջնորդի անունը կրող ծեփված է եղել (Ն. Սարգիսեան, նշվ. աշխ., էջ 181):

Քրիստոս պատարագ մատուցեն հաւրն՝ Դ (4) և (քառասունք), երիցոյն եւ արեղին Գ (3) և (քառասունք), աշխարհական արեղին Բ (2) և (քառասունք) եւ ամենայն եղբայր ար մի պատարագ, եւ որ չկարէ՝ Ժ (10) կանոն աղաթք արասցէ, եթե ոք յայս կարգելոցս պա-կասեցուսցէ խղճին ի մեղաց պարտական է առաջի Աստուծոյ:

Տեր Աստուած ողորմեա Մարգարէին, ամեն»⁶⁶:

Վանական միաբանությունների մահացած անդամների համար մատուցվող պատարագների մասին այսօրինակ կանոնագիր ար-ծանագրություններ կան նաեւ Զոռոմոսում ու Արջո Առիճում⁶⁷:

1215 թ. Ապուղամրի որդի Գրիգորը Զոռոմյանց Կոստանդի որդի Զովհաննես քահանային վաճառել է Գայլառիճ գյուղի կեսը («գնեցի գԳայլառիճի կեսն»), որն այն նվիրել է Բագնայրի վանքին եւ ստա-ցել 40 պատարագ, 20-ը՝ իր, մնացածն իր հարազատների հա-մար⁶⁸:

1223 թ. - Ս. Երրորդություն մատուռի մուտքի բարավորի վրա պահպանվել է «Ի փառս ամենասուրբ Երրորդութեանն՝ Զաւր եւ

⁶⁶ Կ. Բասմաջեան, ԳՂՎ. աշխ., էջ 152, հմմտ. Ն. Սարգիսեան, ԳՂՎ. աշխ., էջ 183: Արծանագրության վերջում ԳՂՎ-ած է վիճագիր գրչի անունը: Զի բացառվում, որ վերջինս Անիի Բեխենց վանքում աշխատած գրիչ եւ մանրանկարիչ Մարգարեն է (նա հիշվում է Զառիճում 1209 թ. եւ Անիում 1211 թ. (տե՛ս Կ. Մաթևոսյան, Անի, էջ 354):

⁶⁷ Արջո Առիճում նախ ԳՂՎ-ում է Գրիգոր Եպիսկոպոսը՝ «որ էր ժառանգորդ սուրբ ուխտիս», ապա տեղի վանահայր Գրիգորը եւ Գերսամ վարդապետը, իսկ Զոռոմոսում նույնանման արծանագրությունը 1195 թվականից է, եւ այն գրել է վանահայր Պետրոսը (Ն. Սարգիսեան, ԳՂՎ. աշխ., էջ 150, 191): Քանի որ Բագնայրում, Գրիգորից բացի, այլ հոգեւորական չի ԳՂՎ-ում, պետք է կարծել, որ այդ ժամանակ նա նաեւ վանքի վանահայրն էր:

⁶⁸ «ՈԿԴ (1215) ի յամս աստուածապատիւ հոգեւոր տեառն Գրիգորոյ, որդոյ Ապուղամրի, եւ Յոհաննէս քահանայ որդի Կոստանդի Զոռոմեանց գնեցի գԳայլառիճի կեսն ի տէր Գրիգորոյ, որդոյ Ապուղամրի եւ ետու ի Սուրբ Աստուածածինս...»: Արծանագրության մեջ թվարկվում են պատարագ ստացող Սիրվարդը, Կոստանդը, Տիրամայրը, Խոցաղեղը, Միխելը (Միքայել) Խաչերեսը, Կատան, Տալիթիա տիկինը (Կ. Բասմաջեան, ԳՂՎ. աշխ., էջ 150, Ն. Սարգիսյանի մոտ նվիրատվության տեղա-նունը չկա, հմմտ. Ն. Սարգիսեան, ԳՂՎ. աշխ., 183-184):

Որդւոյ եւ Յոգւոյն Սրբոյ, ես մեղուցեալ եւ ան... թուին ՈՅԲ (1223)»⁶⁹ արձանագրութիւնը, որից էլ հետագայում բխեցրել են եկեղեցու անունը՝ Ս. Երրորդութիւն, թեւեւ այն պայմանական է, քանի որ այս նախաբանով արձանագրութիւն կարող էր գրվել նաեւ ուրիշ անուն ունեցող եկեղեցում:

1226 թ. - Ս. Երրորդութիւն մատուռի մոտ կանգնեցվել է մեծ խաչքար, որի վրա նշված է եղել 1226 թվականը⁷⁰: Բնակավայրից դուրս եղել է մեկ այլ մեծ խաչքար, որի կանգնեցնողն ու պատրաստողը, ըստ անթվական արձանագրութեան, Մովսէս քահանան էր⁷¹:

1229 թ. - Ջաքարե եւ Իվանե Ջաքարյանների մորեղբայր Խոռասի առաջին կնոջ՝ Խուբլու Խաթունի արձանագրութեան մեջ նշվում է, որ նա, կորցնելով երիտասարդ որդուն՝ Սասնային, նրա հիշատակի համար վանքին նվիրել է Մոգուաց գյուղի իրեն պատկանող առանձնացված մասը, նաեւ կառուցել Ս. Սիոն մատուռ-տապանատունը, որի դիմաց ստացել է տարեկան 40 պատարագ՝ 20-ը՝ իր եւ տասական Խոռասի ու Սասնայի համար⁷²:

1232 թ. - Հռոմոսում նշանավոր գրիչ Իգնատիոսի ձեռամբ գրվել է մի շքեղ ձեռագիր (Մատենադարան թիվ 1519), որը նվիրվել

⁶⁹ Կ. Բասմաջեան, նշվ. աշխ., էջ 154, Ն. Սարգիսեան, նշվ. աշխ., էջ 189: Հ. Մարգարյանը կարդացել է ՈԼԲ, քանի որ եկեղեցին համարում է 1183 թվականին կառուցված (Յ. Մարգարյանեան, նշվ. աշխ., էջ 157):

⁷⁰ «Թվիս ՈՅԵ (1226)» (Կ. Բասմաջեան, նշվ. աշխ., էջ 155):

⁷¹ «(Շն)որհին քրիստոսի եւ (Մո)ւսէս քահանա (կազ)մեցի սուրբ նշան(ս եւ կան)կնեցի սա բարեխ(աւս ա)ռ քրիստոս ինձ եւ ծնող(աց իմն)ց...» (Կ. Բասմաջեան, նշվ. աշխ., էջ 190):

⁷² «(Ես Խ)ուբլու Խաթունս (կողակից) բարեպաշտ իշխանին Խաւա(ռսայ ետու զիմ բա)ժին հայրենիքն ի Մոգուաց, որ է ի հնցէ... զատեալ եւ բաժանեալ սահմանաւքն... ի Բագնայրս, յաղագս յիշատակաց մերոց եւ անդրանկին մերոյ՝ Սասնային, որ կիսաւրեայ փոխեցաւ ի քրիստոս եւ սուգ մեծ եթող ծնողաց իւրոց, յորոյ ի յիշատակ շինեցի (զՍուրբ) Սիոն, ի վերայ տապանատանս: ...Հայր Սիմեոն եւ այլ սուրբ եղբարքս յանձն առին յամեն ամի Խ (40) աւր պատարագել զքրիստոս. Ի (20) աւր՝ Խաթունին, Ժ (10) Խաւառասին, Ժ(10) Սասնային...» (Կ. Բասմաջեան, նշվ. աշխ., էջ 156): Ն. Սարգիսյանի մոտ մատուռի անունը բացակայում է, հմմտ. Ն. Սարգիսեան, նշվ. աշխ., 179):

է Բագնայրի վանքին եւ հայագիտության մեջ հայտնի է «Բագնայրի ավետարան» անունով: Ձեռագրի հիշատակարանը ընդարձակ տեղեկություններ է տալիս ստացող Խոռասի եւ նրա ընտանիքի վերաբերյալ⁷³: Նշվում է նրա անդրանիկ որդու՝ Սասնայի մահվան մասին, որը գերեզման է դրվել «ի հանգստարանի ի հրեշտակաբնակ ուխտին Բագնայր»⁷⁴: Դրանից երկու տարի հետո մահացել է Խոռասի կինը՝ Խուբլու Խաթունը (որը քրիստոնեություն ընդունած պարսիկ էր) եւ հուղարկավորվել Բագնայրում, նույն տապանատանը («որ կայ ի տապանի հանգստարանի անդրանկին իւրոյ») ⁷⁵:

Յիշատակարանում նշվում են նաեւ Խոռասի երկրորդ կինը՝ Ջնրուխտ Խաթունը, որը նույնպես քրիստոնեություն ընդունած նախկին մահմեդական էր⁷⁶, Խոռասի մյուս որդին՝ Վասակը, հանգուցյալ Սասնայի կինը՝ Թայիկ Թագուհին, որի մասին Խոռասն ասում է. «...սիրելի դստրեկի իմոյ Թայիկ Թագուհո, ամուսնոյ անդ-

⁷³ Այստեղ նշվում է, որ Խոռասը Ջաքարե եւ Իվանե Ջաքարյանների մորեղբոր՝ Ամիր Սարգսի որդին էր, որը Ջաքարեի մահից հետո դարձել էր նրա որդի Շահնշահի որդու՝ Ջաքարիայի դաստիարակը (Հայերեն ձեռագրերի հիշատակարաններ, ԺԳ դար, կազմեց Ա. Մաթևոսյան, Երեւան, 1984, էջ 178-179): Խոռասյանների տոհմի մասին տե՛ս Հ. Սարգսյան, Մահկանաբերոցիների (Սադունեանների) իշխանական տունը ԺԲ-ԺԴ դարերում, «Հայկազեան հայագիտական հանդես», հ. ԺԸ, Պեյրուք, 1998, էջ 31-32:

⁷⁴ Հայերեն ձեռագրերի հիշատակարաններ, ԺԳ դար, էջ 179:

⁷⁵ Նույն տեղում: Խուբլու Խաթունի ծագման մասին հիշատակարանում նշվում է. «յազգէ գոլով պարսիկ, իսկ ի կոչմանէ եւ ի շնորհացն Աստուծոյ ճշմարիտ աղախին գոլով Քրիստոսի»:

⁷⁶ «...ազգաւ տաճիկ գոլով, յազնուական եւ փառաւորագոյն յազգէ ի մեծ նախարարացն Պարսից» (նույն տեղում): Ջնրուխտ Խաթունն է տվել այս մատյանի նկարագրողման համար անհրաժեշտ ոսկին, որի մասին նշվում է ձեռագրի խորաններից մեկում (նույն տեղում, էջ 180): Այս խորանները ժամանակին հանված են եղել ձեռագրից եւ Մատենադարան են մուտք գործել ավելի ուշ, այլ քվահամարով (9871), Կ. Մաթևոսյան, Չորս խորան «Բագնայրի ավետարանից», ՀՍՍՀ ԳԱ Լրաբեր հաս. գիտ., 1985, N 10, էջ 93-97:

րանկի իմոյ, որ էր զարմ եւ շառաւել թագաւորացն Հայոց»⁷⁷: Իսկ ձեռագրի՝ Բագնայրի վանքին ընծայվելու մասին հիշատակարանում Խոռասի անունից ասվում է. «Եւ աւանդեցի զսա ի սուրբ մե-
նաստանն ի Բագնայրն կոչեցեալ վանք, ի տէրութեան տեղւոյն տեառն Գրիգորայ, որ Մագիստրոսն ասի, վերայդիտող աթոռոյս Անւոյ, եւ յառաջնորդութեան հաւր Սիմեովնի եւ այլ համական եղ-
բարց սրբոց»⁷⁸: Այս մեծարժեք ձեռագիրը հետագայում գերեւարվել է, սակայն փրկագնվել եւ վերադարձվել է Բագնայրի վանք:

1233 թ. - Ծմակ գյուղի ավագերեց Սարգիսը նվիրել է Շնջանկի ներքին կողմում գտնվող իր գանձագին այգին՝ ծաղկոցով եւ հարակից հողակտորներով, եւ ստացել տարեկան ութ օր պատարագ: Արձանագրության սկզբում նշում է. «Ի տէրութեան տեղոյս Գրիգորի Մագիստրոսի, որդոյ Ապուղամրի եւ յառաջնորդութեանս հաւր Սիմեովնի...»⁷⁹:

Նույն 1233 թվականին գրված մեկ այլ արձանագրությամբ Չեչկանց տոհմից Ավետեացի որդի Մխիթարի⁸⁰ որդի Վահրամը (Վարհամ) կնոջ՝ Փառանցի հետ նվիրել է Անիում գտնվող իր գանձագին կուղպակը՝ «զին գանձագին կուղպակն, ի Փողոցկտերն, որ ի Թոռոսոնց կուղպակին վերա է», այսինքն՝ այն եղել է երկրորդ հար-

⁷⁷ Նույն տեղում, էջ 179: Թայիկի անվանը կից գրված «Թագուհին» պետք է նրա մականունը համարել: Բագնայրում պահպանվել են Թայիկ Թագուհու հոր՝ Շարափշահի, մոր՝ Թագուհու եւ հենց իր արձանագրությունները, որոնցից երեւում է, որ հավանաբար Կյուրիկյաններից սերող այս տոհմը, հիշյալ շրջանում Բագնայրի խնամակալներից էր:

⁷⁸ Նույն տեղում, էջ 179:

⁷⁹ Շարունակության մեջ՝ «Ես Սարգիս Ծմակին աւագերեց, որդի Գրիգոր քահանայի ետու զին գանձագին հայրենիք այգին զՇնջանկի զներքի դեհն, իւր ծաղկոցովն, իւր չորեսին ափներովն ի Սուրբ Մայրս Լուսոյ...», ապա ութ պատարագի մասին գրելուց հետո ավելացնում է. «Եւ այլ ետու զՔարգզեմայ տներն, զի ուր ինձ վախճան լինի, գիշերապաշտան եւ մատաղ առնեն» (Ն. Սարգիսեան, նշվ. աշխ., էջ 185, Կ. Բասմաջեան, նշվ. աշխ., էջ 157):

⁸⁰ Մխիթար Չեչկանցը Անիի երազահանի (1222 թ.) թարգմանիչներից մեկն է (Հայերեն ձեռագրերի հիշատակարաններ, ԺԳ դար, էջ 132):

կում, եւ մի տուն ու դրա վրա իր շինած կուղպակը՝ «եւ զայն տունն, որ Սեւքենց հմնակից է, եւ ի վերայն կուղպակն իմ շինած»։ Դրա դիմաց վանահայր Սիմեոնն ու միաբանները հատկացրել են ամեն տարի 12 պատարագ, ութը՝ Վահրամին, երեքը՝ Փառանցին, մեկը՝ Մամքանին⁸¹։

1234 թ. - Ապիրատի որդի Շարափշահը, որը հանդես է գալիս որպես վանքի խնամակալներից մեկը, նվիրել է Շիրակվանուն (Շիրակավան) գտնվող ջրաղացի երեք ակ, նաեւ «Խաչին մարգ» հողամասը եւ ստացել 18 պատարագ իր ու մերձավորների համար. «Ես Շարափշահ, որդի Ապիրատին ետու ի մեր սեփական եկեղեցիս ի Սուրբ Աստուածածինս Գ (3) ակն ջաղաց ի Շիրակուանին եւ զԽաչին մարգն եւ սպասաւորքս՝ հայր Սիմեոն եւ այլ միաբանքս, փոխարեն հատուցին ինձ ԺԸ (18) ակր ժամ, Ժ (10) ակր՝ ինձ, Գ (3)՝ Կուրեղին, Բ (2)՝ Կիրիկի, Ա (1)՝ Հասանա, Բ (2)՝ Ախխաթունին»⁸²։

Այս արձանագրության մոտ, նույն շրջանում պետք է գրված լինի Շարափշահի կնոջ՝ Թագուհու արձանագրությունը, որով վանքին է նվիրել Անիի Սառած փողոցի⁸³ իր կրպակը, մի մարգ, նաեւ «մեծածախ» խաչ ու Ավետարան⁸⁴։ Սրանց մոտ գրված է նաեւ Շարափշահի եւ Թագուհու դստեր արձանագրությունը, որը վերելուն

⁸¹ Ն. Սարգիսեան, նշվ. աշխ., էջ 184, Կ. Բասմաջեան, նշվ. աշխ., էջ 158։

⁸² Ն. Սարգիսեան, նշվ. աշխ., էջ 185-186, Կ. Բասմաջեան, նշվ. աշխ., էջ 161-162։

⁸³ Սառած փողոցը (արձանագրության մեջ՝ «Սառնճփողոց») համետագործների, թամբագործների փողոցն է։

⁸⁴ «Ես՝ Թագուհի, զուգակից Շարափշահին, ետու խաչ մեծածախ եւ Աւետարան, Սառնճփողոցին կողպակ՝ ի վերի, Շիրակուանին զմարգն, որ ճլուտ կոչի, փոխարեն հատուց ինձ Զ (6) ակր պատարագ, Ե (5) ինձ, Ա (1)՝ ակրն Մամուզին»։ Հրատարակություններում կուղպակի տեղը նշվում է հետեւյալ բառանջատմամբ. «Սառնճփողոցին կողպակի վեր, ի Շիրակուանին զմարգն» (Կ. Բասմաջեան, նշվ. աշխ., էջ 161-162, հմմտ. Ն. Սարգիսեան, նշվ. աշխ., էջ 186)։ Ստացվում է, որ Շիրակվանի մարգը գտնվում է Սառած փողոցի կրպակից վեր։ Մեր կարծիքով՝ նվիրատուն նշում է նախ Սառած փողոցի կուղպակը, որը եղել է վերին հարկում (ի վերի), ապա՝ Շիրակվանի մարգը։

նշված Խոռասի հարսն է՝ Սասնայի այրին՝ Թայիկ Թագուհին. «Ես Թայիկ Թագուհի դուստր Շարափշահի ետու երկու կուղպակ յիմ կուղպակնոյն, որ ի Նալպնդնոցին եւ Առաքեալ եւ հայր Սիմեոն եւ այլ միաբանքս փոխարէն հատուցին ինձ Ը (8) աւր պատարագ...»⁸⁵:

1236 թվականից հետո պիտի գրված լինի հաջորդ արձանագրությունը (անթվական է), քանի որ այստեղ Սիմեոն վանահայրը նշում է. **«դառն ժամանակի հանդիպեցաք՝ սովո եւ սրո եւ գերութեան»**, որը կարող էր տեղի ունենալ 1236 թ. մոնղոլների կողմից Անիի գրավման հետեւանքով: Արձանագրության մեջ նշվում է, որ Վարդի որդի Խաչերեսը ժամանակին վանքին է նվիրած եղել Անիի «Գաղտ դռան» մոտ գտնվող իր կառուցած տները, իսկ վերոնշյալ դժբախտությունների ժամանակ վանահայրն ու միաբանները վանքի կարիքների համար դրանք վաճառել են («ծախեցաք եւ ի սրբոցս ի պէտս անցուցաք»), ուստի փոխարենը տարեկան երեք պատարագ են հատկացնում՝ երկուսը՝ Խաչերեսի, մեկը՝ նրա կնոջ՝ Սլքերի համար⁸⁶:

1206-1236 թթ. անթվական արձանագրություններ

Ինչպես վերը տեսանք, Բագնայրի **Սիմեոն Ա** վանահայրը հիշվում է 1206-1211 թվակիր արձանագրություններում, որից հետո 1215-ին հանդես է գալիս Աբուղամրի որդի Գրիգորը՝ որպես առաջնորդ եւ վանքի պատրոն, իսկ **Սիմեոն Բ** վանահայրը հիշվում է 1229-ից մինչեւ 1236-ին հաջորդած մի քանի տարիները: Բագնայրի անթվական արձանագրությունների մի մասում նշված է Սիմեոն վանահոր անունը, եւ անհնար է որոշել՝ Սիմեոն Ա-ն է, թե՞ Սիմեոն Բ-ը, սակայն պարզ է, որ դրանք գրվել են նրանց վանահայրության

⁸⁵ Կ. Բասմաջեան, նշվ. աշխ., էջ 163, Ն. Սարգիսեան, նշվ. աշխ., էջ 186: Արձանագրության մեջ հիշված «Նալպնդնոցը» (Նալպանդնոց) Անիի պայտարների փողոցն է (Գ. Գրիգորյան, նշվ. աշխ., էջ 30, Ս. Ավագյան, նշվ. աշխ., էջ 86):

⁸⁶ Կ. Բասմաջեան, նշվ. աշխ., էջ 160-161, Ն. Սարգիսեան, նշվ. աշխ., էջ 184:

օրոք, այսինքն՝ մոտավորապես 1206-1236 թթ. ժամանակամիջոցում:

Վարդառյուծը, Աշակը (Արշակ) եւ Խորենը «ի ձեռն հաւր Սիմեոնի» նվիրել են «զՎարդենաց նորքն» եւ ստացել տարեկան 12 պատարագ, յուրաքանչյուրին՝ չորսական⁸⁷:

Պողոս երեցը «յառաջնորդութեան հաւր Սիմեոնի» նվիրել է Աշակունձ գտնվող իր այգին ու հնձանը, ստացել տասը պատարագ, որից չորսը հոր՝ Ղազարի, երկուսն իր կնոջ՝ Տիրանցի համար⁸⁸:

Գորգկանի դուստր Ավագ տիկինը նվիրել է ամուսնության ժամանակ իր ծնողներից ստացած «կէս ակն ձիթհանքն», վանահայր Սիմեոնը եւ միաբանները հատկացրել են տարեկան հինգ օր պատարագ⁸⁹:

Աստվածատուրի որդի Խաչեղբայրը եւ նրա կին Սիսմանը արձանագրության մեջ նշում են վանքի գերեզմանոցում իրենց կառուցած մի մատուռի եւ դրան արված նվիրատվությունների մասին. «...շինեցաք զգերեզմանաց մին եկեղեցին եւ տուաք զմեր տաճարն եւ զսարաւոյթն եւ ի ներքեւն տուն, ի Սուրբ Աստուածածինս եւ հայր Սիմեոն եւ այլ եղբարքս փոխարէն հատուցին յամեն ամի Զ (6) աւր ժամ, Գ (3) աւր՝ Խաչեղբաւրն, Գ (3) Սիսմամին...»⁹⁰:

Մոտավորապես 1240-50-ական թթ. արձանագրություններ

Բագնայրի անթվական արձանագրությունների մեջ կարելուրդայն առանձնանում է մեկը, որով վանահայր Քրիստափորը,

⁸⁷ Ն. Սարգիսեան, նշվ. աշխ., էջ 181, Կ. Բասմաջեան, նշվ. աշխ., էջ 149:

⁸⁸ «(Յամի) հոգեւոր տեառն Գրիգորի եւ յառաջնորդութեան հաւր Սիմեոնի եւ Պաւլոս երեց ետու իմ այգին ի ծաղկոցն, որ յԱշնակ, հնձանովն գեղին դեհս...» (Կ. Բասմաջեան, նշվ. աշխ., էջ 154, հմմտ. Ն. Սարգիսեան, նշվ. աշխ., էջ 181):

⁸⁹ «Հայր Սիմեոն, միաբանքս, փոխարէնս հատուցին մեզ յամենայն ամի հինգ աւր պատարագ. զերեք աւրն՝ Աւագ տիկնայ, եւ զմինն՝ Գորգկանն, եւ զմէկն՝ Թաճերոյն»: Վերջում նշված է վիմագիր գրչի անունը՝ «Մանասէ գրիչ» (Կ. Բասմաջեան, նշվ. աշխ., էջ 165, Ն. Սարգիսեան, նշվ. աշխ., էջ 185):

⁹⁰ Ն. Սարգիսեան, նշվ. աշխ., էջ 183, Կ. Բասմաջեան, նշվ. աշխ., էջ 164:

Գամաղիել վարդապետը եւ բոլոր միաբանները սահմանում են, որ մահացած միաբանի կտակը ոչ ոք իրավունք չունի փոխել կամ վերացնել, ո՛չ պատրոնը, ո՛չ վանահայրը ո՛չ միաբանները. «Անուամբն Աստուծոյ բնակիչք Սուրբ Ուխտիս՝ տէր Քրիստափոր եւ Գամաղիել վարդապետս, ամենայն միաբանաւքս զայս կտակ անջնջելի հաստատեցաք, եթէ ոք ի միաբանացս փոխի առ Քրիստոս, զինչ որ անդարձ առնէ, եւ իւր հոգոյն տեսող, մի՛ ոք իշխեսցէ խափանել, ո՛չ - պատրոն, ո՛չ հայր, ո՛չ միաբան, ապա եթէ լուծանեն, յերից սուրբ ժողովոցն նզովեալ եղիցին հոգւով եւ մարմնով: զՅովսէփ գրիչ Տէր յիշեալ»⁹¹:

Այս արձանագրությունը հետաքրքիր է նաեւ այն իմաստով, որ նշում է վանքում որոշումներ կայացնելու գործում ազդեցություն ունեցողներին՝ առաջին տեղում դնելով պատրոնին, որին հետեւում են վանահայրը, ապա՝ միաբանները: Կ. Բասմաջյանն արձանագրության մոտավոր ժամանակ է նշում 1235 թ.⁹², բայց այդ ժամանակ վանահայրը Սիմեոնն էր: Մենք ավելի հավանական ժամանակ ենք համարում 1240-50-ական թվականները, որը մոնղոլական արշավանքին հաջորդած համեմատաբար ամուլ, սակավ արձանագրություններով ժամանակ էր (այդ պատճառով այլ արձանագրություններում չեն հիշվում Քրիստափորն ու Գամաղիելը), սրված էր նաեւ սոցիալական իրավիճակը, որի հետեւանքով կարող էին մահացած միաբանների թողած կտակի հարցում խնդիրներ ծագել եւ այն անձեռնմխելի պահելու անհրաժեշտություն առաջանալ:

1242 թ. - Մշեցի Մանկտավազը (արձանագրության մեջ՝ «Մանգտսվասզ») համարտողի որդին, նվիրել է 100 դահեկան եւ միաբաններից (վանահոր անունը չի նշվում) ստացել տարեկան երկու պատարագ Սուրբ Սարգսի տոնին: Այս արձանագրությունը ար-

⁹¹ Կ. Բասմաջեան, նշվ. աշխ., էջ 166, Ն. Սարգիսեան, նշվ. աշխ., էջ 183:

⁹² Կ. Բասմաջեան, նշվ. աշխ., էջ 166:

ժեքավոր է այն իմաստով, որ պարզում է նշված շրջանում մեկ պատարագ ստանալու համար անհրաժեշտ վճարը՝ 50 դահեկան⁹³:

Հնարավոր է, որ վանքի համար այս դժվարին ժամանակներում է գրվել նաեւ անթվական արձանագրություններից մեկը, ըստ որի վանքին պատկանած Պիչարենց հյուրատունը վաճառվել է եւ ծնակեցի Կոստերն այն 800 արծաթե դրամով (սպիտակ) գնել ու վերադարձրել է վանքին. «...ես Կոստերս Ծնակեցի... զհիւրատունն, որ Պիչարենց կոչի, որ ծախել էին վանեցիքն, ես դարձուցի ի վանքս եւ ետու գին Պ (800) սպիտակ: Հայրս եւ վարդապետքս եւ այլ եղբարքս փոխարեն հատուցին ինձ ի տարին Բ (2) ա(ւր)...»⁹⁴:

Այս եւ նախորդ արձանագրությանը, որոնցում նշվում է մեկ պատարագի համար անհրաժեշտ գումարային հատկացման չափը, անդրադարձել է Թ. Ավդալբեկյանը: Միջնադարյան Հայաստանում պատարագ ստանալու համար անհրաժեշտ վճարի չափի որոշմանը նվիրված ուսումնասիրության մեջ նա քննության է առել 15 վանքի 12-14-րդ դարերի վիճագրեր եւ պարզել, որ մեկ պատարագի միջին արժեքը (փողով արտահայտված) կազմել է 20-25 դահեկան⁹⁵: Ուսումնասիրողի կազմած ցուցակից երեւում է, որ հիշյալ 15

⁹³ «ՈՂԱ (1242) Կամաւ անեղին Աստուծոյ ես Մանգոսվասզ, որդի Խամարտաւլին Մշեցի միայբանեցա Սուրբ Աստուածածնիս եւ ետու ընծայ ճ (100) դահեկան: Հայրս, միւս վարդապետքս եւ այլ միայբանքս փոխարեն հատուցին ինձ ի տարին Բ (2) աւր պատարագ...» (Ն. Սարգիսեան, նշվ. աշխ., էջ 186): Կ. Բասմաջյանի մոտ արձանագրության սկիզբը թերի է «Զ...», իսկ վերջում հարցականով նշված է գրչի անունը «Դաւիթ (?) գրիչ» (Կ. Բասմաջեան, նշվ. աշխ., էջ 180):

⁹⁴ Ն. Սարգիսեան, նշվ. աշխ., էջ 187:

⁹⁵ Թ. Ավդալբեկյան, Հայագիտական հետազոտություններ, Երեւան, 1969, էջ 324: 20 դահեկանն այդ ժամանակ կարող էր 88,8-ից 85 գրամ ոսկի լինել (Գ. Գրիգորյան, նշվ. աշխ., էջ 87): Սակայն ոսկու արժեքով դահեկանն այդ ժամանակ ավելի շուտ համընդ էր գալիս որպես արտարժույթ, իսկ իրական վճարումները կատարվում էին արծաթե դրամով: Դահեկանի հարաբերակցությունը դրամի հետ այն ժամանակ կազմել է 1-ը առ 10, այսինքն՝ մեկ պատարագի 20-25 դահեկան միջին արժեքը հավասար էր 200-250 արծաթե դրամի (Թ. Ավդալբեկյան, նշվ. աշխ., էջ 331):

վանքերի մեջ մեկ պատարագի համար ամենից բարձր արժեք նշված է Բագնայրի արձանագրություններում (մեկում՝ 50, մյուսում՝ 40)՝ միջին արժեքը՝ 45 դահեկան, երկրորդ տեղում Նորավանքն է՝ 36 դահեկան⁹⁶:

Իհարկե միայն այս երկու արձանագրության տվյալներն ունենալով չի կարելի ասել, որ Բագնայրում եղել է պատարագի համար սահմանված կայուն բարձր գին եւ այլ՝ գույքային նվիրատվությունների ժամանակ, այն դրանից ցածր չի եղել, սակայն որոշակի տատանումները նկատի ունենալով հանդերձ, պետք է ընդունենք, որ վաճառաչահ Անիին մոտ գտնվող եւ անեցիների շրջանում մեծ համարում ունեցող այս վանքն այլ տեղերի համեմատ պատարագի հատկացման համար, իրոք, ավելի բարձր պահանջներ է ներկայացրել իր նվիրատուներին:

1261 թ. - Գրիգոր Ա Մագիստրոսի որդի Ապուղամը գնել է հավանաբար Տիգրան Յոնենցի տոհմին պատկանած Կաղղուց գյուղի կեսը⁹⁷ («գնեցի զկես Կաղղուցն ի Տիգրանանց») եւ հանուն իր եղբայր Վահրամ իշխանի նվիրել Բագնայրին, որը կոչում է «մեր սուրբ ուխտս»⁹⁸:

1262 թ. - Նույն Ապուղամը նվիրել է Կաղղուց գյուղի երկրորդ կեսը, իր մոր՝ Մամքանի համար (որը, փաստորեն, Անիի եպիս-

⁹⁶ Թ. Ավդալբեկյան, նշվ. աշխ., էջ 324:

⁹⁷ Տիգրան Յոնենցը 1215 թ. Անիում կառուցած Ս. Գրիգոր Լուսավորչի վանքի եկեղեցուն տված բազմաթիվ նվիրատվությունների շարքում նշում է «Կաղղուց կեսն» (Դիվան հայ վիմագրության, պր. Ա, էջ 63): Եթե Յոնենցի հետնորդները 1261 թ. այն վաճառել են Ապուղամին, նշանակում է Գր. Լուսավորչի վանքի պարոններն էին եւ ազատորեն տնօրինում էին նրա ունեցվածքը:

⁹⁸ «ԶԺ (1261) Կաման Աստուծոյ ես՝ Ապուղամր, որդի Մաքիստրոսի, որ գնեցի զկես Կաղղուցն ի Տիգրանանց եւ ետու ի Սուրբ Աստուածածինս, ի մեր սուրբ ուխտս, որ զվոխարէնն մաւտ ի Քրիստոս, ի Վարհամ իշխանն՝ ի յիմ եղբայրն վճարէ: Հաստատ է մինչ ի գալուստ Որդոյն Աստուծոյ, բոլոր ամէն գեղէ: Սինեոն գրիչ» (Կ. Բասմաջեան, նշվ. աշխ., էջ 169):

կոպոս Գրիգոր Ա (Մագիստրոս) եպիսկոպոսի կինն էր), որի մասին արձանագրությունը նախորդին շատ մոտ շարադրմամբ գրել է միեւնոյն Սիմեոն վիմագիր գրիչը⁹⁹:

1262 թվականը բավական հարուստ է արձանագրություններով: Դրանցից մեկի սկզբում վերոնշյալ Ապուղամրի եղբայր, Անիի եպիսկոպոս Սարգիս Բ-ը¹⁰⁰ անվանվում է Բագնայրի տերը, այսինքն՝ պատրոնը. «ԶԺԱ (1262) Ի վերադիտողութեան մայրաքաղաքիս Անու տէր Սարգսի, տեառն տեղւոյս...»: Արձանագրության մեջ հիշվում են նաեւ Բագնայրի վանահայր Աբրահամը եւ Յովսեփ փակակալը: Արձանագրությունը տեղեկացնում է, որ Մանկիկ երեցի որդի Գարեգին (Գարեգոյն) երեցը եւ կինը՝ Մարիամը, վանքին են տվել իրենց գանձագին Նորաղբույրիկ գյուղը՝ անդաստաններով, գնված մեկ մագաղաթյա Տոնական եւ մեկ ոսկեկազմ Ավետարան («գանձագին գեղն զՆորաղբույրիկ, իւր ամենայն անդաստանաւքն, որ բնական լեալ է, մի Տանական մակաղաթ, մի Աւետարան ոսկետուփ»), որի դիմաց վանահայր Աբրահամը, Յովսեփ փակակալն ու միաբանները հատկացրել են վեց պատարագ՝ երկուական՝ Գարեգինին եւ Մարիամին, մեկական՝ «Մանկանն ու Թաճերուն»: Արձանագրությունը գրել է Սիմեոն գրիչը¹⁰¹:

Աբրահամ վանահայրը հիշվում է նույն թվականի մեկ այլ արձանագրության մեջ, որի հեղինակը մեզ արդեն ծանոթ Թալիկ Թագուհին է. «ԶԺԱ (1262) Շնորհիւն Աստուծոյ եւ Թալիկս, դուստր Շարապշահին ետու զիմ գանձագին հայրենիքն՝ զՆորաղբույրիկ գյուղն, ի Սուրբ Աստուածամայրս, ի մեր սուրբ ուխտս, որ մաւտ ի Քրիստոս՝ զփոխարենն ի յիմ մայրն վճարէ, ի Մամբան: Հաստատ է մինչ ի Քրիստոս: զՍիմեոն գրիչ յիշ(եցեք)» (Կ. Բասմաջեան, նշվ. աշխ., էջ 171):

⁹⁹ «ԶԺԱ (1262) Կամաւն Աստուծոյ եւ՝ Ապուղամր, որդի Մաքիստրոսի, թոռն Վարիամ իշխանին, վասն ի Քրիստոս յոյսոյն ետու զիմ գանձագին հայրենիքն՝ զԿաղղուց կենն, իւր հողովն եւ ջրովն, ի Սուրբ Աստուածամայրս, ի մեր սուրբ ուխտս, որ մաւտ ի Քրիստոս՝ զփոխարենն ի յիմ մայրն վճարէ, ի Մամբան: Հաստատ է մինչ ի Քրիստոս: զՍիմեոն գրիչ յիշ(եցեք)» (Կ. Բասմաջեան, նշվ. աշխ., էջ 171):

¹⁰⁰ Սարգիս Բ եպիսկոպոսի մասին հանգամանորեն տես Կ. Մաթեւոսյան, Անի, էջ 87-94, 107-108:

¹⁰¹ Ն. Սարգիսեան, նշվ. աշխ., էջ 187, Կ. Բասմաջեան, նշվ. աշխ., էջ 172-173:

ի Բագնայրս, ի Սուրբ Աստուածածինս»¹⁰²: Շարունակության մեջ նշվում է, որ վանահայրն ու միաբանները հատկացրել են տարեկան 10 օր պատարագ՝ «...Ը (8) արև ինձ առնեն՝ Թախկանս, եւ Բ (2) արևն՝ Գրիգորու»¹⁰³:

Նույն՝ 1262 թվականին, Բագնայրում ընդարձակ արձանագրությամբ հանդես է գալիս վերը նշված Խոռաս Ա-ի թոռը՝ Սասնայի եւ Թայկի որդին՝ Խոռաս Բ կրտսերը, որի անդրանիկ որդին՝ հոր անունով Սասնայ կոչված, մահացել էր կես տարեկան հասակում: Խոռասը նախ պատմում է իր պապի գնած ու «սիկելով» (վճիռ, հրաման, կնիք)¹⁰⁴ իրեն տրված Աշնակ գյուղի մասին, որ հետո անցել է Շահնշահ Ա Ջաքարյանին¹⁰⁵, իսկ ինքը, կնոջ ակնեղենը վերջինիս տալով, հետ է ստացել ու այդտեղից իր որդի Սասնայի բա-

¹⁰² Արձանագրության մեջ նշված Նորսի վերաբերյալ կարծիքներ են եղել, թե այն կարող էր նշանակել նորատունկ այգիներ, «տեղամաս, հանդամաս կամ նույնիսկ գյուղանուն» (Ս. Ավագյան, Վիմական արձանագրությունների բառաքնություն, Երևան, 1978, էջ 241-242): Արձանագրության վերջում նշված «Հաստատ է ամենայն անդաստանաքն, հողովն եւ քրովն» (Կ. Բասմաջեան, նշվ. աշխ., էջ 170) ձեւակերպումը սովորաբար օգտագործվում է նվիրաբերված գյուղի պարագայում: Բացի այդ, հանդամասի հատկացման դիմաց անհնար էր, որ նվիրատուն Բագնայրում տասը պատարագ ստանար: Ըստ այդմ, այստեղ հիշված Նորսը պետք է փոքր գյուղի անուն հասկանալ:

¹⁰³ Ն. Սարգիսեան, նշվ. աշխ., էջ 187: Արձանագրության վերջում նշվում է Սիմեոն գրիչը (Կ. Բասմաջեան, նշվ. աշխ., էջ 170): Քանի որ Թախկը նշված Գրիգորը նրա երկրորդ ամուսինն էր: Նկատենք, որ 1269 թ. Թայկը («ես Թախ Թագոհի, դուստր Շարապշահին») նվիրատվություն է կատարել Հռոմոնոսի վանքին, որտեղ հիշում է իր որդի Հագարբեկին («Հագարպէկ») (Ն. Սարգիսեան, նշվ. աշխ., էջ 158), որը հավանաբար նրա երկրորդ ամուսնությունից ծնված զավակն էր:

¹⁰⁴ Նոր բառգիրք հայկազեան լեզուի, Կ. Բ, Երևան, 1981, էջ 713:

¹⁰⁵ Շահնշահ Ա Ջաքարյանը մահացել է 1261 թ., այն բանից հետո, երբ իմացել է, թե մոնղոլներն ինչպիսի դաժանությամբ են սպանել իր ավագ որդի Ջաքարիային (Կիրակոս Գանձակեցի, էջ 393): Նշանակում է Խոռասն Աշնակը Շահնշահից հետ է ստացել դրանից առաջ (երբ դեռ իր որդին՝ Սասնայը, չէր ծնվել), բայց այդ պատմությունը հարկ է համարել արձանագրել Բագնայրում 1262 թ.:

ծինը տվել Բազմայրին. «ՉԺԱ (1262) Կաման Աստուծոյ ես Խաւ-
ռագ, մեծ Խաւռագիս թռռն, Սասնիս որդիս, իմ անդրամիկ որդին՝
Սասնայն, որ կէս տարեկան ի Քրիստոս փոխեցաւ, յիմ գանձագին՝
Յէրէնեցն յԱշնկու, որ իմ պապն գնել էր ու սիկէլով յիս տվել, ինչ իմ
պապն մեռաւ, ես Խաւռագ, իմ կնոջն զբաժինքն՝ ակն ու մարգա-
րիտ՝ իմ պարոնին տվի, Շահնշահի, ու կրկին զԱշնակ գնեցի ու զիմ
որդոյն բաժինն՝ զՍասնին՝ ի Բզնէրս տվի՝ յԱստուածածինս. Վերի է-
գին՝ իւր ընծանովն, «Բ (2) շինական՝ զՄեհրեւան ու զԽաչատուր՝
Դուլուսին փեսայն, իւրեանց հողովն ու ջրովն...»¹⁰⁶: Այնուհետեւ
նշվում են մյուս նվիրատվությունները՝ ջրաղաց Տիգնիսում, ընդար-
ձակ խոտհարք եւ արծաթե սկիհ¹⁰⁷:

Արձանագրության երկրորդ մասում վանքի պատրոն, Անիի
Սարգիս Բ եպիսկոպոսը, Բազմայրի վանահայր Աբրահամը, փակա-
կալ Հովսեփն ու միաբանները հայտնում են, որ նվիրատվություն-
ների դիմաց հատկացնում են տարեկան հնգական պատարագ
Սասնային եւ Խոռասին¹⁰⁸:

¹⁰⁶ Ն. Սարգիսեան, նշվ. աշխ., էջ 188-189, Կ. Բասմաջեան, նշվ. աշխ., էջ 174-175: Ենթադրվել է, որ Բազմայրի վանքին է տրված եղել ամբողջ Աշնակ գյուղը (Հ. Սարգսրեան, նշվ. աշխ., էջ 32): Սակայն մեզ թվում է, որ Բազմայրի վանքին ամբողջ Աշնակ գյուղը չի տրվել, այլ այնտեղից միայն մանուկ Սասնայի բաժինը («զիմ որդոյն բաժինն»), որը Խոռասն արձանագրության սկզբում կոչում է «յիմ գանձագին՝ Յէրէնեցն յԱշնկու», հետո մանրամասնում «զվերի էգին՝ իւր ընծանովն, Բ (2) շինական՝ զՄեհրեւան ու զԽաչատուր՝ Դուլուսին փեսայն, իւրեանց հողովն ու ջրովն»: Արձանագրության շարունակության մեջ նշվում են վանքին տրված մի շարք այլ նվիրատվություններ, որոնց բոլորի դիմաց ստացվել է ընդամենը 10 պատարագ, որը նույնպես վկայում է, որ վանքին ամբողջ գյուղը չի տրվել:

¹⁰⁷ «...ի Տգնիս զջաղացն, յիմ խոտահարն՝ Ծ (100) բարդ խոտի տեղ, որ վանքս ընծէ, մի սկի արծաթի...» (Ն. Սարգիսեան, նշվ. աշխ., էջ 188-189, Կ. Բասմաջեան, նշվ. աշխ., էջ 174-175):

¹⁰⁸ Արձանագրության վերջում հիշվում է գրիչը՝ «զՍիմէոն պտռող յիշեցեք, աղաչեն» (Ն. Սարգիսեան, նշվ. աշխ., էջ 189, Կ. Բասմաջեան, նշվ. աշխ., էջ 175):

1266 թ. - Խոռաս Բ-ը մեկ այլ արժեքավոր նվիրատվությամբ Բագնայրին է նվիրում իրեն պատկանող Ջրծորիկ վանքը, որի անունն այլ աղբյուրներում չի հիշատակվում, իսկ անունը հուշում է, որ այն գուցե գտնվում էր մի ձորի մեջ, ջրամերձ տեղում: Ի տարբերություն վերը նշված 1261-1262 թթ. բազմաթիվ արձանագրությունների, որոնց գրիչը Սիմեոնն էր, այս մեկը գրել է Իսրայել վիմագիր գրիչը, որն արձանագրություններ ունի նաեւ Անիում (1269) եւ Յոռոնոսում (1273)¹⁰⁹. «...Ես Խաւռաս, որդի Սասնահին, ետու ի մեր սեփական սուրբ ուխտն Բզների՝ Սուրբ Աստուածածին՝ զմեր զգանձագին զՋրծորիկ վանքն իւր սահմանաւքն՝ ջաղացովն եւ պահեզսն... եւ զԱղի աղբերն զպահեզն, որ իմ պապն գնեալ էր եւ ինձ տվեալ...»: Աբրահամ վանահայրն ու միաբանները հատկացրել են տասը պատարագ¹¹⁰:

1269 թ. - Բագնայր գյուղից դուրս մեծ խաչքարի վրա պահպանված է եղել փոքրիկ չափածո արձանագրություն¹¹¹:

1271 թ. - Աբրահամ վանահոր անվան հիշատակությամբ վերջին արձանագրությունը պատկանում է Ղազարի որդի Ալեքս վաճառականին: Նա նվիրել է Անիի Բազազ փողոցի կրպակը եւ արծաթե սկիի («...էտու նվեր ի Բազազ փողոցին կուղպակ մի, սկի մի արծաթի»), որի դիմաց Աբրահամ վանահայրը, Գորգ (Գեւորգ) վարդապետն ու միաբանները հատկացրել են 12 պատարագ¹¹²:

¹⁰⁹ Տե՛ս Ս. Բարխուդարյան, Միջնադարյան հայ ճարտարապետներ եւ քարգործ վարպետներ, Երեւան, 1963, էջ 201: Այս Իսրայելը եւ 1215 թ. Անիում Տիգրան Յոնենցի նշանավոր արձանագրությունը գրած Իսրայել գրիչը տարբեր մարդիկ են:

¹¹⁰ Ն. Սարգիսեան, նշվ. աշխ., էջ 189, Կ. Բասմաջեան, նշվ. աշխ., էջ 177-178:

¹¹¹ «Ով Սուրբ Նշան Տէրունական, Երկրպագուացս լեր պահապան, Աւուր վերջի մեծի ծագման: Թւիս ԶԺԸ (1269)» (Կ. Բասմաջեան, նշվ. աշխ., էջ 178-179):

¹¹² «...ի տարին ԺԲ (12) պատարագ. Ա (1)՝ Ղազարու, Ա (1)՝ Խոցադեղին, Ա (1)՝ Թէտեցն, Ա (1)՝ Թամամին, Ա (1)՝ Թագերոյն, Ա (1)՝ Վարդէ տիկնա, Ա (1)՝ Էրփիանոսի, Գ (3) Խոցադեղին, Ա (1)՝ Մի...» (Կ. Բասմաջեան, նշվ. աշխ., էջ 179-180):

1262-1271 թթ. ժամանակամիջոցին (Աբրահամ վանահոր ժամանակին) են վերաբերում երկու անթվական արձանագրությունները։ Խաչոտի որդի Սարգիսը տվել է «...ծիթահնաց աղցաւղի քար եւ յամեն ամի ե (5) լիտր ձէթ», ստացել տարեկան երկու պատարագ¹¹³։ Խաչոտուրը տվել է «զՄուլուքին հողն, որ Թեղենեաց այգոյն ի հետ է», ստացել երկու պատարագ, մեկական իր եւ Տիկնոջ համար¹¹⁴։

1278 թ. - Վերելուն հիշված Գեւորգ վարդապետը ստացել է Ներսես Շնորհալու՝ Մատթեոսի ավետարանի մեկնությունը՝ որպես «յետին ստացիչ» (հետագայի ստացող)։ Հիշատակարանում նա պարզաբանում է ձեռագրի ստացման նպատակը՝ «**ի վարժումն հետեւողաց բանասիրաց, յաւգուտ անծանց եւ եկեղեցւոյ**», որը մի անուղղակի վկայություն է Բագնայրի վանական դպրոցի մասին։ Հիշատակարանի վերջում Գեւորգ վարդապետը նշում է. «թվին ՉԻԷ (1278) ի հրեշտակաբնակ ուխտիս Բզնայրս գրեցի, ուր էր հանգիստ մեր, ընդ հովանեաւ Սուրբ Աստուածածնիս, զոր հաստատուն պահեսցէ Միածինն իւր, մինչ ի գալուստն իւր միւս անգամ»¹¹⁵։

1308 թ. - «Բագնայրի ավետարանի» հետագայի հիշատակարանը տեղեկացնում է, որ այդ թվականին Գեւորգ Ներսիսանցի զավակները, 600 արծաթե դրամ վճարելով, գրավից ազատել ու Բագնայրի վանք են վերադարձրել այդ նշանավոր ձեռագիրը («...թափեցաք զԱւետարանս ի յանիրաւ վաշխոյ... (վե)րստին ընծայեցաք ի Սուրբ Աստուածածնին, արձան յաւիտենից...»)¹¹⁶։ Ժամանակի հոգեւոր իշխանության եւ վանքի պատկանելության մասին հիշա-

¹¹³ Ն. Սարգիսեան, նշվ. աշխ., էջ 186, Կ. Բասմաջեան, նշվ. աշխ., էջ 167։

¹¹⁴ Ն. Սարգիսեան, նշվ. աշխ., էջ 186։

¹¹⁵ Հայերեն ձեռագրերի հիշատակարաններ, ԺԳ դար, էջ 488։

¹¹⁶ Հիշատակարանում նշվում են Գեւորգի կինը՝ Մամախաթունը, ավագ որդին՝ Մխիթարը (նրանք բոլորը մահացած են եղել), մյուս որդիները՝ Աղբերոս, Սարգիս, Պարոն։ Հիշատակարանը գրել է Գեւանի որդի Ստեփանոս գրիչը (Գ. Յովսեփեան, Յիշատակարանք ձեռագրաց, հ. Ա, Անթիլիաս, 1951, էջ 890-892)։

տակարանում ասվում է. «ի հայրապետութեան մերո նահանգիս Շիրակ գաւառիս, հեզի եւ մարդասիրի՝ տէր Յովհաննիսի, որոյդ Ապուղամրի, իշխեցող տեղոյս»¹¹⁷: Այստեղից երեւում է, որ Գրիգոր Ա-ից սկսած Անիի եպիսկոպոսական աթոռն զբաղեցնող տոհմի ներկայացուցիչները դեռեւս մնում էին Բագնայրի պատրոնները:

1317 թ. - Վանքի մոտով անցել է անուշահամ ջրի առու, որը սկիզբ է առել մոտ 1 կմ հեռու գտնվող ժայռի միջից դուրս եկող աղբյուրից¹¹⁸, եւ որին կից եղել է հետեւյալ արձանագրութիւնը. «ԶԿԶ (1317) Յովսէփ յիշեցէք ի Տէր», սրա մոտ՝ «զնկարիչ սբ նշանացս զՅովսէփ անարժանս (յ)իշեցէք ի Քրիստոս»¹¹⁹:

1340-ական թթ. - «Բագնայրի ավետարանի» թերի պահպանված հետագայի հիշատակարաններից մեկը տեղեկացնում է, որ այդ ժամանակ (հիշատակվում են Շահնշահ Գ Զաքարյանը եւ նրա եղբայր Շրվանշահը, որոնք գործել են 1340-50-ական թվականներին) ձեռագիրը գերեվարված է եղել, սակայն մի վարդապետի (անունը չի պահպանվել) միջնորդությամբ, ոմն Աղբուղա այն հավանաբար Ուրծուն փրկագնել ու վերադարձրել է Բագնայրին: Հիշատակարանում հիշյալ վարդապետը գրում է. «Արդ ես, նվաստս ի Քրիստոս... վարդապետս... ուրախութեամբ ետու ի ձեռն բարեպաշտ եւ քրիստոսայտէր պարոն Հրմտուպէկին, որ էր **տէր տեղոյն** եւ հասուցէ ի դուռն սուրբ եկեղեցոյն Աստուածածնին՝ յիշատակ անջինջ եւ բարեխաւս առ Քրիստոս՝ Աղբուղային եւ մեզ...»¹²⁰:

1350-ական թթ. - «Բագնայրի ավետարանի» մեկ այլ հետագայի հիշատակարան տեղեկացնում է, որ Բագնայրում ձեռագիրը նորոգել է տվել Գրիգոր Խուցեսի որդի Պարոնը, որը գրում է. «Արդ ես՝ մեղուցեալ Պարոն տեսի զսուրբ Աւետարանս եւ ոչ վստահացայ ի յարծաթն կամ յոսկին իմ, այլ յողորմութիւնն Աստուծոյ ապաւինե-

¹¹⁷ Նույն տեղում:

¹¹⁸ Մ. Գեւորգեանց, նշվ. աշխ., էջ 97:

¹¹⁹ Կ. Բասմաջեան, նշվ. աշխ., էջ 181:

¹²⁰ Մայր ցուցակ հայերէն ձեռագրաց Մաշտոցի անուան Մատենադարանի, Կ. Ե, կազմեց Օ. Եգանեան, Երեւան, 2009, էջ 208:

ցայ... եւ նորոգեցի զսայ ի հալալ վաստակոց իմոց, յիշատակ ինձ եւ ննջեցելոցն իմոց»¹²¹: Պարոնը հիշում է նաեւ եղբոր՝ Ասիլի անունը՝ նրան կոչելով «առաջնորդ եւ հիմն քաղաքիս Անոյ, իրաւարար եւ արդարադատ ամենայն քաղաքին»¹²²: Սարգիս գրչի այս հիշատակարանում շատ արժեքավոր է Բագնայրի Պողոս վանահոր հիշատակումը՝ «Յիշեցէք եւ զառաջնորդ սուրբ ուխտիս՝ զՊաւղոս հայրն, որ աւժանդակ եւ աւզնական եղեւ նորոգման սուրբ Աւետարանիս»¹²³: Նա, փաստորեն, Բագնայրի վերջին վանահայրն է, որի անունը բանասիրությանը նոր է հայտնի դառնում:

Բագնայրի անթվական արձանագրությունների մեծագույն մասն անկասկած պատկանում են 13-րդ դարին, բայց հնարավոր է մի քանիսն ավելի վաղ կամ ուշ գրված լինեն: Ստորեւ ներկայացնում ենք այդ արձանագրությունների պարունակած հիմնական տեղեկությունները:

Անթվական արձանագրությունների մի մասն ուշագրավ են այն առումով, որ վերաբերում են Անիում գտնված ինչքի նվիրատվությանը եւ ինչպես վերելում բերված մի քանի արձանագրությունները, երբեմն հետաքրքիր տեղագրական տվյալներ են պարունակում: Այսպես, ոմն Խաչոտը նվիրել է իր գանձագին տունը, որը գտնվում էր Անիի Աբուղամրեց Ս. Գրիգոր եկեղեցու մոտ (նաեւ մի արծաթե սկիհ), որի դիմաց ստացել է տարեկան երկու պատարագ¹²⁴: Առյուծ անունով մեկը նվիրել է իր տունը, որը գտնվել է Անիի «Քահանեց»

¹²¹ Նույն տեղում, էջ 209: Հիշատակարանում Պարոնը նշում է իր հանգուցյալ հարազատներին, որոնց գերեզմանները Բագնայրում էին:

¹²² Նույն տեղում: Ասիլը 1357 թ. Անիում ստացել եւ նորոգել է Կիլիկիայից այստեղ բերված մի արքունական Ավետարան: Նրա գործունեության մասին տե՛ս Կ. Մաթեոսյան, Անի, էջ 311-312, 364:

¹²³ Մայր ցուցակ հայերէն ձեռագրաց, հ. Ե, էջ 209: Գ. Հովսեփյանի «Յիշատակարանը ձեռագրաց»-ում հիշատակարանի այս հատվածը չկա:

¹²⁴ «Ես Խաչոտս, ծառա Քրիստոսի, ետու ի Սուրբ յԱստուածածինս զիմ զգանձագին գտունն մաւտ ի յԱպուղամրեց Սուրբ Գրիգոր եւ սկի արծաթի...» (Ն. Սարգիսեան, նշվ. աշխ., էջ 180-181):

կոչված եկեղեցու դիմաց, ստացել է մեկ պատարագ¹²⁵: Ոմն Սարկավագ նվիրել է Անիում գտնվող իր «ծիթահնաց կես ակն, որ ի Կարուց դրանն» եւ ստացել երեք պատարագ¹²⁶: Մեկ այլ արծանագրության մեջ հիշվում է Անիի «Ձորդեան» (հավանորեն Ախուրյանի կամրջով քաղաք մտնող դուռն է) մոտ գտնված այգին. «Ես Սերոբս որդի Ռատին Երեւանեցի ետու զիմ այգին որ ի Ձորդեանն է»¹²⁷: Թադեոսի որդի Յովհաննեսը տվել է Անիի մոտ գտնվող իր ջրաղացի մի մասը. «...ետու զիմ ջաղացն, որ ի Գլիծորին զծախ աղացն», ստացել հինգ պատարագ¹²⁸: Առաքելի որդի Յովհաննեսը տվել է նույն Գլիծորում գտնվող իր «կես ակն ջաղացն..., որ կոչի Յատաւրհնիկ», ստացել երկու պատարագ¹²⁹: Յավանորեն Անիում են գտնվել նաեւ անթվական արծանագրություններում նշված՝ վանքին նվիրված մի շարք տները¹³⁰:

Անթվական արծանագրություններում հաճախ են հիշատակվում այգիների եւ հողերի նվիրատվություններ, ընդ որում՝ բավական լայն աշխարհագրությամբ՝ Բագարան, Մարմետ, Օշական, Ագարակ, Թամիր (Արագածոտնում): Ոմն Բախտիարը նվիրել է իր այգին «ի Բագրանի, որ կոչի Տափկենց» եւ ստացել չորս պատարագ¹³¹: Այս արծանագրության մոտ եղել է մեկ ուրիշը, որտեղ գրողի անունը չի պահպանվել, եւ որտեղ ասվում է վանքին տրված՝ Ա-

¹²⁵ «Ես Առիւծս ետու զիմ տուն ի սուրբ ուխտս, որ ընդդէմ Քահանենց եկեղեցոյն, պատարագի ինձ Քրիստոս ար Ա (1)» (Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 187):

¹²⁶ Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 185:

¹²⁷ Նվիրատուն ստացել է տարեկան չորս պատարագ (Ն. Սարգիսեան, նշվ. աշխ., էջ 180): Կ. Բասմաջեանի մոտ՝ «Երեւանեցի» (Կ. Բասմաջեան, նշվ. աշխ., էջ 147):

¹²⁸ Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 186:

¹²⁹ Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 186-187:

¹³⁰ Գոհարիկը տվել է իր տները, ստացել երկու պատարագ (Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 185): «Թորոտնց» Մխիթարը տվել է իր տունը, ստացել երկու պատարագ (Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 186):

¹³¹ Ն. Սարգիսեան, նշվ. աշխ., էջ 181-182, Կ. Բասմաջեան, նշվ. աշխ., էջ 183:

գարակում գտնվող Շահկան հողի եւ Առիճքում գտնվող վանքի օտարված այգու վերադարձի մասին¹³²: Աշնակցի Վարդաշահը տվել է իր այգին, ստացել երկու պատարագ¹³³: Ավետիսն ու Հազարդեղը նվիրել են Թամիրում գտնվող Ուղտանատ կոչվող այգու կեսը եւ ստացել մեկական պատարագ¹³⁴: Պողոսի որդի Պետրոսը տվել է իր այգին «ի յԱւշական, մաւտ ի Վարդեանց...», ստացել տարեկան վեց պատարագ¹³⁵:

Հասան Կողբացին՝ Մխիթար ռայիսի որդին եւ Համելի թռռ գրում է. «...վասն փրկութեան հոգոց մերոց ետու զմեր գանձագին հայրենիք Ակինն զկես դանկն՝ ի սուրբ ուխտս եւ՝ լերամբքն», որի դիմաց ստացել է 10 պատարագ, ութը՝ իր եղբայր Համելի, երկուսը՝ Կատայի համար¹³⁶: Ոմն Սարգիս նվիրել է իր այգին «ի Մարմետ, ի վերա Երասխա» եւ ստացել երեք պատարագ¹³⁷: Նվիրատուներ Սիմեոն երեցի եւ նրա որդի Թաթուլի արձանագրության միայն սկզբի մասն է պահպանվել¹³⁸, իսկ իրեն Շահեր Կիրակոս անվանող նվիրատուի արձանագրությունը թերի է. «...էտու զիմ գանձագին հո-

¹³² «...զնեցի զՇահկանն զհողն, որ յԱգրկին եւ ետու ի սուրբ ուխտս յիշատակ հոգո իմո, ի յԱռիճք զսեփական այգին, որ ի բազում ժամանակաց աւտարացեալ էր, վերստին, հանդերձ միաբանաւքս, վերստին՝ ի սուրբ ուխտս» (Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 184):

¹³³ Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 185:

¹³⁴ Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 188:

¹³⁵ «...ի տարին 2 (6) ար պատարագ. Ա (1)՝ ինձ, Ա (1)՝ Ասուրաստանա, Ա (1)՝ իմ հաւրն, Ա (1)՝ Հարկեւորին, Ա (1)՝ Քոյրկանն, Ա (1)՝ Յայսնկանն» (Ն. Սարգիսեան, նշվ. աշխ., էջ 183, Կ. Բասմաջեան, նշվ. աշխ., էջ 188):

¹³⁶ Նվիրատուի անունը Ն. Սարգիսյանը գրում է «Կողբցի», բնակավայրի անունը՝ «Ակինն», Կ. Բասմաջյանը՝ «Կողբցի» եւ՝ «Ակինն»: Դանկը ամբողջն է՝ բաժանված 6 մասի: Տվյալ դեպքում կես դանկ ասելով՝ նվիրատուն նկատի ունի կամ բնակավայրի կեսը, կամ մեկ վեցերորդ մասի կեսը, որին կցել է նաեւ իրեն պատկանող լեռնամասը (Կ. Բասմաջեան, նշվ. աշխ., էջ 189, Ն. Սարգիսեան, նշվ. աշխ., էջ 185):

¹³⁷ Ն. Սարգիսեան, նշվ. աշխ., էջ 182, Կ. Բասմաջեան, նշվ. աշխ., էջ 185:

¹³⁸ Ն. Սարգիսեան, նշվ. աշխ., էջ 181, Կ. Բասմաջեան, նշվ. աշխ., էջ 182:

ղերն լեր...»¹³⁹: Երկու այլ բեկորների վրա պահպանվել են մեկում՝ ոմն Գրիգորի, մյուսում՝ Զովհաննեսի անունները¹⁴⁰:

ԲԱԳՆԱՅՐԻ ՄԻԱԲԱՆՆԵՐՆ ՈՒ ՎԱՆԱՅԱՅՐԵՐԸ

Բագնայրի վանահայրերին անդրադառնալով՝ Ղեւոնդ Ալիշանը նշում է, որ շուրջ 50 արձանագրություններում «հազիւ երեք կամ չորք վանահարք յիշին» եւ բերում այս ցանկը՝

1042 Ստեփանոս

1209-1242 Սիմեոն, որ յաճախ յիշի յարձանս, ի սորա ժամանակի երեւին եւ Տէր Քրիստափոր եւ Գամաղիէ վարդապետք...

1262-6 Աբրահամ, առ որով եւ Յովսէփ փակակալ»¹⁴¹:

Այժմ առկա նյութերն ի մի բերելով կարող ենք ներկայացնել Բագնայրի վանահայրերի հետեւյալ ցանկը.

1. Ստեփանոս 1042
2. Սիմեոն Ա 1206-1211
3. Գրիգոր 1215
4. Սիմեոն Բ 1229 - մոտ 1238 թ.
5. Քրիստափոր (մոտավորապես 1240-50-ական թթ.)
6. Աբրահամ 1262-1271
7. Պողոս 1350-ական թթ.

Բագնայրի արձանագրություններում նկատվում է մի օրինաչափություն, գրեթե ամենուր վանահոր անունից հետո նշվում է «ամենայն եղբարքս» կամ «միաբանքս», այսինքն՝ վանքի բոլոր գործերում եւ նվիրատուների առջեւ ստանձնած պարտավորությունների մեջ միաբանության բոլոր անդամներն էական մասնակցություն են ունեցել: Վանահայրերից բացի, վանքն ունեցել է հեղինակավոր հոգեւորականներ, վարդապետներ, որոնցից անվանապես հիշատակ-

¹³⁹ Կ. Բասմաջեան, նշվ. աշխ., էջ 189:

¹⁴⁰ Կ. Բասմաջեան, նշվ. աշխ., էջ 191:

¹⁴¹ Ղ. Ալիշան, Շիրակ, էջ 121:

վում են Մխիթարը (1046 թ.), Առաքելը (13-րդ դ. 20-ական թթ.), Յովսեփ փակակալը (1262 թ.), Գեորգ վարդապետը (1271-1278 թթ.):

Բագնայրը ամենից շատ վիմագիր գրիչների անուններ պահպանած վանքերից է: Ս. Բարխուդարյանը գրում է. «Ինչպես Բագրատունյան Անին էր կուլտուրայի օջախը, որտեղից այն տարածվում էր Հայաստանի այլ վայրերը, այնպես էլ գրիչների կուլտուրան ծավալվում էր այնտեղից: ...Ըստ վայրի ամենաշատ անուններ (գրիչների - Կ. Մ.) տալիս է Անին՝ 8, Հոռոմոսը՝ 7 և Բագնայրը՝ նույնպես 7...»¹⁴²: Բագնայրում հիշված վիմագիր գրիչներն են Ռայբիկը (1210 թ.), Մարգարեն (1215 թ.), Մանասեն (1206-1236 թթ.), Դավիթը (1242 թ.), Յովսեփը (մոտ. 1240-1250 թթ.), Սիմեոնը (5 մեծ արձանագրություն է գրել 1261-1262 թթ.), Իսրայելը (1266 թ.)¹⁴³: Չի բացառվում, որ նրանցից ոմանք միաբանության անդամ են եղել:

Անկասկած Բագնայրի վանքը նաեւ ձեռագրական մշակույթի կենտրոն էր: Ինչպես տեսանք, վանքին ձեռագրերի նվիրատվության մասին նշվում են մի քանի վիմագիր արձանագրություններում, իսկ 1232 թ. գրված «Բագնայրի ավետարանը» այս վանքի նշանավոր սրբությունն էր, որը գրավից ազատվել է 1308 թ., ապա որոշ ժամանակ անց գերեվարվել եւ 14-րդ դարի կեսերին փրկագնվելով վերադարձվել է Բագնայր: Այստեղ ձեռագրում հիշատակարաններ են գրել Ստեփանոս (Գելանի որդի) եւ Սարգիս գրիչները:

Ուշագրավ է նաեւ Գեորգ վարդապետի 1278 թ. հիշատակարանը, ուր նշվում է, որ Ներսես Շնորհալու գործը նա ստացել է «ի վարժունն հետեւողաց բանասիրաց, յաւգուտ անձանց եւ եկեղեցւոյ»¹⁴⁴: Այն, որ վանքում պահվել են նաեւ այլ արժեքավոր մատյաններ, երեւում է 1305 թ. մի հիշատակարանից, որտեղ խոսվում է մի

¹⁴² Ս. Բարխուդարյան, նշվ. աշխ., էջ 204:

¹⁴³ Տես Կ. Բասմաջեան, Հայոց հին գեղարուեստի վարպետները, Փարիզ, 1926, էջ 9-11: Թերեւս վիմագիր գրիչ է եղել նաեւ վանքին ջուր մատակարարող աղբյուրի մոտ 1317 թ. արձանագրություն գրած Յովսեփը:

¹⁴⁴ Հայերեն ձեռագրերի հիշատակարաններ, ԺԳ դար, էջ 488:

ծեռագրի «ստոյգ եւ ընտիր» նախօրինակի մասին, իսկ առավել հետաքրքրականն այն է, որ այդ օրինակը հատուկ անունով կոչվել է «Բագնայրեցի»¹⁴⁵:

Հայտնի չէ, թե երբ են միաբանները լքել Բագնայրի վանքը: Քանի որ այն Անհի մերձակա մյուս վանքերի՝ Արջո Առիճի եւ Հոռոմոսի նման մեծապես կապված էր քաղաքի հետ թե՛ եկեղեցական-վարչական, թե՛ տնտեսական առումով, ուստի անեցիների հարկադրական արտագաղթը, որն աղետալի չափերի հասավ 14-րդ դարի երկրորդ կեսին, պետք է նաեւ շրջակա վանքերի անկման պատճառ դառնար: Սակայն հարկ է նշել, որ ըստ որոշ հիշատակարանների տվյալների, Հոռոմոսի վանքը գործել է առաջնորդներ է ունեցել նաեւ 15-19-րդ դարերում¹⁴⁶: Ցավոք, Բագնայրի մասին նման տեղեկություններ չունենք, եւ վանքի վերաբերյալ առայժմ հայտնի վերջին տվյալը «Բագնայրի ավետարանի» նորոգումն է, որը կատարվել է այստեղ 14-րդ դարի 50-ական թվականներին եւ որին մասնակցել է վանքի հայտնի վերջին վանահայր Պողոսը:

20-րդ դարի սկզբներին կատարված լուսանկարներից երեւում է, որ չնայած կիսավեր, բայց վանքի բոլոր հիմնական կառույցները կանգուն էին: Ըստ Հայկական ճարտարապետությունն ուսումնասիրող կազմակերպության (RAA) տվյալների՝ Բագնայրի եկեղեցիները չարամտորեն քանդվել են 1950-60-ական թվականներին: Այժմ կանգուն է մնացել համալիրից հյուսիս-արեւելք գտնվող Ս. Երրորդություն փոքր եկեղեցին, իսկ գլխավոր Ս. Աստվածածին եկեղեցուն ու գավթից՝ միայն երկու կիսավեր պատ:

¹⁴⁵ Եսայու մարգարեությունն ընդօրինակած մի գրիչ իր ունեցած նախօրինակի մասին հայտնում է. «...կատարեցաւ տառս... ի ստոյգ եւ ընտիր աւրինակէ, որ կոչի Բագնայրեցի, զոր սուրբ վարդապետին Յովսէփայ գտեալ թարգմանչացն գրած ի մայրաքաղաքն Հաղբատ» (ԺԴ դարի հայերեն ծեռագրերի հիշատակարաններ, կազմեց Լ. Խաչիկյան, Երեւան, 1950, էջ 34):

¹⁴⁶ Կ. Մաթեւոսյան, Հոռոմոսի վանքի պատմության մոր էջեր (ԺԴ-ԺԹ դդ.), «Էջմիածին», 1993, Դ-Ե-Ձ, էջ 72-79:

ԳՐԻԳՈՐ ԱՊԻՐԱՏ ՄԱԳԻՍՏՐՈՍԸ

ԵՒ ՆՐԱ ՏՈՅՍԸ 11-ՐԴ ԴԱՐՈՒՄ

Բագրատունյաց ժամանակաշրջանի իշխանական տների պատմությունը դեռևս ամբողջովին չի ուսումնասիրվել: Առավել հայտնին Պահլավունիներն են: 11-12-րդ դդ. մեկ այլ իշխանական տան՝ Հասանյանների կամ Ապիրատյանների վերաբերյալ մինչև այժմ կատարված միակ ուսումնասիրությունը պատկանում է Ներսես Ալիմյանի գրչին՝ զետեղված Ներսես Լամբրոնացուն նվիրված մենագրության Գ մասում, որը վերնագրված է «Ազգաբանութիւն Պահլաւունեաց, Հասանեանց, Թռռնիկեանց եւ Հեթումեանց»¹: Չնայած այս ուսումնասիրության առկայությանը, հետագա շրջանի աշխատություններում Հասանյանները կամ Ապիրատյանները, որպես առանձին իշխանատոհմ, գրեթե անտեսվել են²: Որոշ դեպքերում նրանք նույնացվել են Պահլավունիների հետ³:

Ն. Ալիմյանը վերնագրում իշխանական տունը Հասանյան կոչելով տեքստում եւ տոհմածառում նրանց անվանում է Ապիրատյաններ, թերեւս նկատի ունենալով մեծ իշխան Գրիգոր Ապիրատ Մագիստրոսի առանձնահատուկ դերը տոհմի հաստատման գործում:

¹ Ն. Ալիմյան, Ներսես Լամբրոնացի, Վիեննա, 1956, էջ 327-457:

² Հայ ժողովրդի պատմության ակադեմիական հրատարակության մեջ այս տոհմը հիշատակվում է միայն մեկ անգամ. «Աշոտ Գ-ից սկսած հայ թագավորները սկսեցին ազատների (մանր ազնվականության) միջավայրից առաջ քաշել նոր իշխանական տներ: Ամենայն դիրք ունեցող որոշ իշխանական տներ, օրինակ, Պահլավունիներն (Աբուղամրենք) ու մասամբ Ապիրատյանները, շուտով բարձր դիրքի տիրացան» (Հայ ժողովրդի պատմություն, հ. 3, Երևան, 1976, էջ 267): Հետագա շարադրանքում, սակայն, ոչինչ չկա իշխանական տան մասին, չի հիշատակվում անգամ մեծ իշխան Գրիգոր Ապիրատի անունը:

³ Ղ. Ալիշան, Շնորհալի եւ պարագայ իւր, Վենետիկ, 1873, Լ. Խաչերեան, Գրիգոր Պահլավունի Մագիստրոս, Լոս Անճելես, 1987, էջ 20, Ռ. Մաթեոսյան, Բագրատունյաց Հայաստանի պետական կառուցվածքն ու վարչական կարգը, Երևան, 1990, էջ 175:

Սակայն բոլորովին վերջերս Գրիգոր Ապիրատի հոր եւ եղբոր մասին ի հայտ եկած մի տեղեկություն փոխում է իրավիճակը եւ թույլ է տալիս նոր մոտեցմամբ քննել ինչպես տոհմի հիմնադրման հարցը, այնպես էլ Գրիգոր Ապիրատի վերելքի մասին Մխիթար Անեցու թողած հայտնի վկայությունը:

Մխիթար Անեցու Պատմությունից (ավարտվել է 1193 թ.), ցավոք, պահպանվել է միայն սկզբնամասը⁴: 13-րդ դարում Մխիթարի երկից օգտվել են Վարդան Արեւելցին, Մխիթար Այրիվանեցին, Ստեփանոս Օրբելյանը: Հատկապես Վարդանը երբեմն առանձին հատվածներ բառացի արտագրել է Մխիթար Անեցուց եւ այս ճանապարհով մեզ հասցրել այդ հետաքրքրական պատմության առանձին բեկորներ: Մխիթար Անեցու Պատմությունից քաղված հենց այդպիսի մի հատվածում պահպանվել է եզակի վկայություն Ապիրատ մեծ իշխանի մասին: Հատվածը վերաբերում է Գագիկ Ա Բագրատունու (989-1017)⁵ մահից հետո գահը ժառանգած նրա ավագ որդու՝ Հովհաննես Սմբատի (1017-1041) եւ վերջինիս կրտսեր եղբոր՝ Աշոտի միջեւ ծագած գահակալական պայքարից հետո տեղի ունեցած մի դեպքի: 1021 թ. Պետրոս Ա կաթողիկոսի (1019-1054)⁶ եւ իշխանների միջնորդությամբ կայացած հաշտությամբ որոշվել էր, որ Հովհաննես Սմբատը պետք է թագավորի Անիում ու նրա շրջակայքում, իսկ Աշոտը՝ թագավորության մնացյալ տարածքներում, որը պատմիչները կոչում են «Դրուց աշխարհ»: Մխիթար Անեցուց օգտվելով Վարդան Արեւելցին պատմում է, որ Թալինի ստորոտում գտնվող իր զորակայանում հիվանդ ձեւանալով՝ Աշոտը խաբեությամբ կանչում ու ձերբակալում է Հովհաննես Սմբատին, նրան տալիս Ապիրատ իշխանին, որ սպանի, իսկ սա հոժարական նրան

⁴ Մխիթար Անեցի, Մատեան աշխարհավէպ հանդիսարանաց, աշխատասիրությամբ Հ. Մարգարյանի, Երեւան, 1983 (այսուհետեւ՝ Մխիթար Անեցի):

⁵ К. Юзбашьян, Армянские государства эпохи Багратидов и Византия IX-XI вв., Москва, 1988, с.156.

⁶ Կ. Մաթևոսյան, Անին մայրաքաղաք եւ կաթողիկոսանիստ «Պատմաբանասիրական հանդես», 2008, N 3, էջ 25:

տանում է Անիի իր աթոռը, ասելով, որ չի կարող Աստծո օծյալի վրա ձեռք բարձրացնել եւ նրա տեղը դնել մի խելագարի. «Նոյն այրն (իմա՝ Մխիթար Անեցին) ասէ եւ յաղագս թագաւորին Յովաննիսի, եթէ եղբայր նորա Աշոտ ի յոտս Թաւնայ կեղծաւորեալ որպէս հիւանդ մերձ ի մահ, կոչէ զթագաւորն առ ինքն, փորելով ի սնարիցն կուսէ որոգայթս. եւ այնու ըմբռնեալ՝ տայ ի ձեռս մեծ իշխանին Ապիրատն կոչեցելոյ, սպանանել զնա. եւ նա յօժար կամօք յինքն առեալ տանի դնէ յաթոռ իւր յԱնի, ասելով. Զհա՞րդ ձգեցից զձեռս իմ յօծեալ Տեառն, եւ խելագար մի եղից ի տեղւոջ սորա»⁷:

Հաջորդ նախադասութիւնը վերաբերում է Ապիրատ իշխանի զորացմանը, Կեչառիսի վանքը կառուցելուն. **«Զսմանէ (Ապիրատի մասին – Կ. Ս.) ասեն յաննշանից մեծացեալ, եւ վասն խելացի եւ առաւ ձեռացն մինչեւ լիներ տէր երկոտասան հազար հեծելոց, որ եւ շինեաց զսուրբ ուխտն Կեչառուս, որպէս Վարհամ իշխանն՝ զՄարմաշէն»⁸** (այս եւ հաջորդ մեջբերումներում ընդգծումները մերն են – Կ. Ս.): Անեցի պատմիչի՝ Ապիրատ իշխանի մասին գրած «յաննշանից մեծացեալ» խոսքերը, ուսումնասիրողները, որպէս կանոն, վերագրել են նրա տոհմական ծագմանը: Սակայն, ինչպէս ստորեւ կտեսնենք, այդ խոսքերը վերաբերում են Գրիգոր Ապիրատին ոչ որպէս տոհմապետ, այլ անհատ, որն իր հոր ավագ որդին ու նրա իշխանության ժառանգորդը չլինելով, «ոչ նշանավորներից» առաջադիմել ու հաջողության էր հասել սեփական խելքով ու առատաձեռնութեամբ:

Թշնամացած Բագրատունի եղբայրների միջեւ հայտնված մեծ իշխան Ապիրատի արարքը թանկ է նստում նրա վրա: Սակայն հետագա անցքերի մասին գրելուց առաջ տեսնենք թե ավելի վաղ շրջանի ինչ փաստեր են հայտնի նրա մասին: Այդպիսիք պահպան-

⁷ Վարդան Արեւելցի, Տիեզերական պատմություն, (գրաբար տեքստը ըստ Վենետիկի 1862 թ. տպագրության), աշխարհաբար թարգմանությունը Գ. Բ. Թոսունյանի, Երեւան, 2001, էջ 102-103 (այսուհետեւ՝ Վարդան Արեւելցի):

⁸ Վարդան Արեւելցի, էջ 102-103, աշխարհաբարը՝ էջ 139-140:

վել են վիճագիր արձանագրություններում, որտեղ իշխանն, ի տարբերություն պատմիչների երկերի, հիշատակվում է Գրիգոր անունով եւ **մագիստրոս** պատվաստիճանով: Հնագույն վկայությունը պահպանվել է Արզականի Ս. Ստեփանոս եկեղեցու կառուցող Գորգ (Գեորգ) քահանայի 1001 թ. արձանագրության մեջ, որը 2002 թ. հրատարակել է Գ. Սարգսյանը: Այստեղ Գագիկ Ա թագավորի անունից հետո հիշատակվում է Գրիգորը. «...Ի ԹԱԳԱԴՈՐՈՒԹԵԱՆ ԳԱԳԿԱ ԱՇԽԱՐՀԱԿԱԼԻ, **ԳՐԻԳՈՐԻ՝ ՀԱՅՈՑ ՄԱԳԻՍՏՈՍԻ**...»⁹:

Երկրորդ արձանագրությունը գրված է հենց Գրիգորի կողմից, Կեչառիսի վանքի Ս. Գրիգոր մեծադիր եկեղեցու 1003 թ. շինարարական արձանագրության մեջ. «...Ի ԹԱԳԱԴՈՐՈՒԹԵԱՆ ԳԱԳԿԱ ԵՒ Ի ՀԱՅՐԱՊԵՏՈՒԹԵԱՆ Տ(ԵԱՌ)Ն ՍԱՐԳՍԻ, **ԵՍ ԳՐԻԳՈՐ ՄԱԳԻՍՏՈՍ**, ՈՐԴԻ ՀԱՍԱՆԱ, ՇԻՆԵՑԻ ԶԵԿԵՂԵՑԻՍ՝ ԻՆՁ Ի ԲԱՐԵՆՈՍՈՒԹ(ԻԴ)Ն ԵՒ ԻՄ ՊԱՏՐՈՆԻՆ ԵՒ ԻՄ ՈՐԴԵԱՑՆ...»¹⁰:

Հավանաբար Կեչառիսի մոտերքում է եղել Գրիգոր Ապիրատի նստավայր ամրոցը: Վանքից ոչ հեռու, հարավարեւմտյան ուղղությամբ գտնվող «Խաչեր» անվանվող բարձունքի վրա (Կոտայքի թեմի այժմյան առաջնորդարանի շենքի մոտ) բոլորովին վերջերս բացվել են 11-12-րդ դդ. թվագրվող մի ամրոցի ավերակներ: Իսկ այդ վայրից շուրջ 2-3 կմ արեւելք, Թեղենիսի արեւմտյան բազուկներից մեկի հարթ գագաթին, որը տեղացիները կոչում են «Բերդի գլուխ», հայտնաբերվել են մեկ այլ ամրոցի ավելի ամբողջական

⁹ Գ. Սարգսյան, Գրիգոր-Ապիրատ Հասանյան. Հիմնադիր Կեչառիսի վանքի (վիճագրական նոր վկայություն), «Հին Հայաստանի մշակույթը» ժողովածու 12, Երեւան, 2002, էջ 111:

¹⁰ Ղ. Ալիշան, Այրարատ, Վեներտիկ, 1890, էջ 259, Գ. Հովսեփյան, Խաղբակեանք կամ Պռոշեանք Հայոց պատմութեան մէջ, Ամթիլիաս, 1969, էջ 159: Արձանագրության թվականի եւ Գրիգոր Մագիստրոս Պաիլափունու անունով արձանագրության քննությունը տես Կ. Մաթեոսյան, Հագարամյա Կեչառիսի հիմնադրման պատմությունից, «Էջմիածին», 2004, Ա, էջ 77-91:

պահպանված ավերակներ¹¹: Ավելացնենք, որ բուն Կեչառիսի վանքի տեղում հավանաբար եղել է հին սրբավայր, որից պահպանվել է 952 թ. արձանագրությամբ մի խաչքար¹²:

Գրիգոր իշխանին Ապիրատ անունով հիշում է նաեւ Մխիթար Այրիվանեցին, որը հավանաբար օգտվել է Մխիթար Անեցուց, բայց նաեւ մի լրացուցիչ տվյալ է հայտնում. «Ապիրատ իշխան 12 000 հեծելի (տէր). **սա շինեաց զԿեչառուս եւ եհան զառուն Երեւանայ**»¹³: Այրիվանեցին ավելացնում է իշխանի շինարարական ձեռնարկների թիվը, նշելով Երեւանի ջրանցքի շինարարությունը: Այս տեղեկության հիման վրա Երեւանը համարվել է Գրիգոր Ապիրատի տիրույթը¹⁴:

Այսպիսով՝ Գագիկ Ա-ի ժամանակ նրա ստորակա գլխավոր իշխաններից մեկն էր Հասանի որդի Գրիգորը, որը մագիստրոսական պատվաստիճան ուներ արդեն 1001 թվականին: Ըստ Յ. Բարթիկյանի, նշված ժամանակաշրջանում մագիստրոսը բյուզանդական արքունիքի կողմից օտարերկրացիներին տրվող ամենաբարձր պատվաստիճանն էր, որը կրողը նաեւ ամենամյա դրամական վարձատրություն էր ստանում¹⁵:

Ն. Ակինյանը ենթադրել է, որ Գրիգորը մագիստրոսի պատիվ ստացել է 1001 թ., երբ բյուզանդական Վասիլ Բ կայսրը (976-1025) Հայաստան է եկել¹⁶: Սա շատ հավանական է, քանի որ Դավիթ Կուրապաղատի մահից հետո (1000 թ.) երբ նրա տիրույթները ժառանգած կայսրը եկավ Հայաստանի արեւմտյան շրջաններ, շրջակայքի

¹¹ Գ. Սարգսյան, Յ. Մելքոնյան, Երկու նորահայտ ամրոց Ծաղկաձորում, «Հայ արվեստ», 2007, թիվ 3-4, էջ 32:

¹² Կանգնեցնողն է՝ «Գուրգեն որդի Վասակա» (Գ. Սարգսյան, Վիմագրական եւքիզներ, «Պատմաբանասիրական հանդես», 2008, 2, էջ 200):

¹³ Մխիթար Այրիվանեցի, Պատմութիւն Հայոց, Մոսկուա, 1860, էջ 58:

¹⁴ Թ. Հակոբյան, Երեւանի պատմությունը, Երեւան, 1969, էջ 212-213:

¹⁵ Յ. Բարթիկյան, Հայ-բյուզանդական հետազոտություններ, Երեւան, 2002, էջ 669:

¹⁶ Ն. Ակինյան, Գրիգոր Ապիրատ, որդի Հասանայ, Մագիստրոս, «Ալօս», 9, 1945, էջ 12-13:

մեծ ու փոքր իշխանավորները շտապեցին նրա մոտ եւ զանազան տիտղոսներ ու պատիվներ ստացան: Այս մասին հայտնում է դեպքերին ժամանակակից Ասողիկը, ըստ որի, կայսեր մոտ է գալիս Նփրկերտի ամիրան եւ ստանում «զմաժիստռոսութեան պատիւն», նույնը ստանում է Վրաց Գուրգեն թագավորը, բայց դժգոհ է մնում՝ «անարգանս իւր համարեալ զմաժիստռոսութեան պատիւն»: Գագիկ Ա-ը կայսեր մոտ չի գնում՝ «իբրեւ փոքրութիւն համարեալ զգնալն իւր առ նա», բայց նաեւ արգելք չի հանդիսանում, որ իր հպատակները գնան, ինչպես օրինակ իր քրոջ որդի Աբուսահլը¹⁷: Հավանական է, որ հենց այս ժամանակ է մագիստրոսության պատիվ ստացել նաեւ բազմաքանակ հեծելազոր ունեցող Գրիգորը: Բայց որպէսզի նա այդ պատվին արժանանար, պետք է ազնվատոհմ լիներ եւ որոշակի դիրք ունենար: Ն. Ակինյանն այստեղ է փնտրում Գրիգորի նաեւ Ապիրատ անվան ծագումը, գրելով. «Անունս կարելի չէ ստուգաբանել հայերէն ապիրատ բառով: Թերեւս աղաւաղուած ձեւն ըլլայ **ապիպատ** պատուանունին, արտասանուած նախ **ապիրպատ**, ապա **ապիրատ**, որուն նպաստած կարող է ըլլալ ապիրատ բառը: Բայց թէ Ապիրատ ընդունա՞ծ էր Բիւզանդիոնի արքունիքէն «ապիպատ» տիտղոսը, չէ վկայուած: ...Գրիգոր եւ Ապիրատ մէկ անձնաւորութեան կրած երկանուններն են»¹⁸:

Հայկական աղբյուրներուն Ապիրատ անունով հիշատակվող առաջին մարդը Գրիգոր իշխանն է, ուստի այդ տարօրինակ անվան ծագումը հավանաբար կապված է հենց նրա կենսագրության հետ, բայց առայժմ հիմնավոր բացատրություն չունի¹⁹: Այն կարծիքը, թե

¹⁷ Ստեփանոսի Տարոնեցոյ Պատմութիւն տիեզերական, աշխատասիրութեամբ Ստ. Մալխասեանցի, Սանկտ Պետերբուրգ, 1885, էջ 276-278:

¹⁸ Ն. Ակինյան, Ներսէս Լամբրոնացի, էջ 373:

¹⁹ Հ. Աճառյանը գրում է. «ԱՊԻՐԱՏ, արդյոք հայերէն ապիրատ «անարդար» բա՞ռն է. եւ ինչպե՞ս կարող էր այսպիսի մի հոռի ածական մարդու անուն դառնալ: Այս անունը գործածական էր մեր մեջ ԺԱ-ԺԳ դարերուն»: (Հ. Աճառյան, Հայոց անձնանունների բառարան, հ. Ա, Երեւան, 1942, էջ 193):

այդպիսի անուն եղել է նաեւ վրացիների մոտ, չի հաստատվում²⁰: Ինչպես տեսանք, Կեչառիսում նա իրեն կոչում է «Հասանի որդի Գրիգոր Մագիստոս» (1003 թ.), Գորգ քահանան նրան անվանում է «Գրիգոր՝ Հայոց Մագիստոս» (1001 թ.): Ստորեւ կտեսնենք, որ իշխանին Գրիգոր Մագիստրոս անունով է հիշատակում նաեւ նրա դուստրը՝ Տեկորի 1042 թ. արձանագրության մեջ:

Իշխանին միայն Ապիրատ անունով հիշատակող առաջին պատմիչները՝ Մատթեոս Ուռեհայեցին եւ Մխիթար Անեցին, իրենց երկերը գրել են իշխանի մահից համապատասխանաբար շուրջ 110 եւ 170 տարի անց: Հնարավոր է, որ պատմիչները նախընտրել են իրեն Գրիգոր Մագիստրոս անվանող իշխանի երկրորդ՝ Ապիրատ անունը նշել, նույնանուն Գրիգոր Մագիստրոս Պահլավունի (Բջնեցի) հանրահայտ իշխանի անվան հետ շփոթությունից խուսափելու համար:

Հետեւելով Ն. Ակինյանին, վիճաբերում Գրիգոր Մագիստրոս, իսկ պատմիչների մոտ Ապիրատ անվանվող իշխանին, սկզբնաղբյուրների ներդաշնակեցման համար նպատակահարմար ենք գտնում այսուհետեւ կոչել Գրիգոր Ապիրատ:

²⁰ Հ. Աճառյանը գրում է, որ Ապիրատ անունը հանդիպում է նաեւ «Վրաց մեջ» (Հ. Աճառյան, նույն տեղում), վկայակոչելով Վարդան Արեւելցու պատմության մի հատված, որտեղ գրված է, թե Գրիգոր Բջնեցին իր հետ վերցնում է «Վրաց Ապիրատ իշխանին» ու երկու այլ մագիստրոսների եւ կռիվ մղում սելջուկների դեմ (Վարդան Արեւելցի, էջ 142): Սակայն շարունակության մեջ «Վրաց իշխանի» անունը Լիպարիտ է: Սա հայտնի դեպք է, վկայված նաեւ այլ աղբյուրներում եւ վերաբերում է 1048 թ. Բասենի դաշտում տեղի ունեցած ճակատամարտին, որին բյուզանդական կողմից մասնակցում էին Կատակալոն, Ահարոն, Գրիգոր մագիստրոսները եւ Վրաց Լիպարիտ իշխանը (Հայ ժողովրդի պատմություն, հ. 3, էջ 449): Արեւելցու պատմության հրատարակության համար հիմք ծառայած ձեռագրերում հավանորեն գրչական սխալ է սպրդել եւ Լիպարիտը դարձել է Ապիրատ, հետեւաբար «Վրաց մեջ» Ապիրատ անուն չկա:

ԳՐԻԳՈՐ ԱՊԻՐԱՏԻ ՀԱՅՐԸ ԵՒ ԵՂԲԱՅՐԸ

Փորձենք պարզել Գրիգոր Ապիրատի տոհմական ծագումը: Ինչպես տեսանք, Կեչառիսի շինարարական արձանագրության մեջ նա հիշատակում է հորը՝ Հասանին: Մատթեոս Ուռհայեցին նույնպես նշում է նրա անունը. «Ապիրատ ոմն, որ էր մեծ իշխան Հայոց, որդի Հասանայ»²¹:

Ն. Ակինյանը գրում է. «Հասան. սա հայրն էր Ապիրատի. իր մասին անելի բան չենք գիտեր»²²: Բարեբախտաբար բոլորովին վերջերս Մատենադարանի ձեռագրերից մեկում (թիվ 3681) հայտնաբերվեց Հասանի անվան մեկ այլ հիշատակություն Հավուց թառի առաջնորդ Նաթանայելի (14-րդ դ.) Սամվել Անեցու ժամանակագրության մեջ կատարած հավելման շնորհիվ: Պարզվում է, որ Հասանի զավակն է եղել նաև Քեղի (Գեղի) ամրոցի տեր իշխան Գեւորգը, որը 1002 թ. կառուցել է Հավուց թառի Կաթողիկե եկեղեցին: Մինչևև այժմ Մխիթար Այրիվանեցու կարճ հաղորդմամբ հայտնի՝ «Շինի եւ Հաւուց թառն ի Գեորգեայ իշխանէն Քեղոյ»²³ տեղեկությունը Նաթանայելը հարստացրել է Գեւորգ իշխանի ծագման մասին չափազանց արժեքավոր վկայությամբ՝ **«Գեորգ իշխանաց իշխանն, որդի Հասանայ, եղբար Ապիրատին...»**²⁴:

Գրիգոր Ապիրատի եւ Քեղի ամրոցի տեր Գեւորգ իշխանի եղբայրներ լինելու հանգամանքի բացահայտման շնորհիվ պարզ է դառնում, որ Հասանը նույնպես իշխան էր, եւ որ Մխիթար Անեցու՝ Գրիգոր Ապիրատի վերաբերյալ ասածը՝ «յամնշանից մեծացեալ», չի վերաբերում նրա տոհմի ծագմանը: Միաժամանակ հիմնավորված են դառնում Հասանի որդիների գոյության մասին վկայու-

²¹ Մատթեոս Ուռհայեցի, ժամանակագրություն (աշխարհաբար թարգմանությունը եւ ծանոթագրությունները Հ. Բարթիկյանի), Երեւան, 1991, էջ 16 (այսուհետեւ՝ Մատթեոս Ուռհայեցի):

²² Ն. Ակինյան, Ներսէս Լամբրոնացի, էջ 373:

²³ Մխիթարայ Այրիվանեցոյ Պատմութիւն Հայոց, էջ 57:

²⁴ Մատենադարան, ձեռ. թիվ 3681, թերթ 78ա:

յունները: Մասնավորապես պատմիչների հաղորդումները, թե Գրիգոր Ապիրատը տեր էր 12 000 հեծյալի, չափազանցություն էր թվում: Մինչդեռ այժմ պարզ է դառնում, որ Հասանի որդիների իշխանությունը տարածվում էր Վարաժնունիքից (Կեչառիս) մինչև Երեւան, որտեղ ջրանցք էր կառուցել Գրիգոր Ապիրատը, հասնում Հավուց թառ ու Քեղի, որը սահմանակից էր Դվինի ամիրայությանը: Այսպիսի տարածքի վրա իշխողները կարող էին նշանակալից զինուժ ունենալ: Համեմատության համար նշենք, որ Բջնիի տեր Վասակ Պաիլավունու (Գրիգոր Մագիստրոս Պաիլավունու հոր) մասին ասվում է, որ նա իր տրամադրության տակ ուներ «...արք իբրեւ հինգ հազար»²⁵:

Գեւորգի մասին ավելացնենք, որ Նաթանայել Հավուցթառեցու հայտնածի համաձայն իշխանը ոչ միայն կառուցել է Հավուց թառի ինը խորանով Կաթողիկե եկեղեցին (այժմ՝ ավերված է), այլև վանքին զգալի նվիրատվություններ կատարել, այդ թվում Գողթ (Կոխք) գյուղը, որ նա գնել էր Գագիկ Ա թագավորից ու նրա որդուց՝ Հովհաննես Սմբատից: Նաթանայելը գրում է. **«Գեորք իշխանաց իշխանն, որդի Հասանայ, եղբար Ապիրատին վերջստին նորոգեց զնախադրական հռչակաւոր սուրբ ուխտն զՀաւուց թառ եւ շինեց զփառաւոր զիրաշալի Կաթողիկէն Թ(9) խորանաւ:** Եւ արար գանձագին զմերձակա գեղն զԿոխք ի Գագիկ շահանշահէ եւ Յովանիստ եւ ետ Հաւուց թառոյ Սուրբ Կաթողիկէին հայրենիք եւ ետ ի հայրենե(ա)ց իւր զԳետոց վանսն եւ զՀովայսն վանքագեղ եւ ժողովեաց Գճ (300) կրաւնաւոր»²⁶:

²⁵ Մատթեոս Ուռհայեցի, էջ 16:

²⁶ Մատենադարան, ձեռ. թիվ 3681, թերթ 78ա, Կ. Մաթեւոսյան, Հավուց թառի վանքի եւ Ապիրատյան տոհմի պատմության նորահայտ տվյալներ, «Բանբեր Մատենադարանի», 17, Երեւան, 2006, էջ 147-167: Գանձագին արված Գողթից բացի իշխանն իր սեփականությունից վանքին է նվիրել Կոտայքի Ովա գյուղը (Հովհաննես Դ Ովայեցի կաթողիկոսի ծննդավայրը), որպես «վանքագեղ»:

Նաթանայել եպիսկոպոսը Գեորգ իշխանի մասին վկայություն է թողել նաեւ մի հիշատակարանում, ըստ որի Հավուց թառը «նորոգեաց սպարապետն Հայոց Գորք իշխանն»²⁷:

Գեորգ իշխանի ժամանակ Հավուց թառի ծաղկման մասին նշում է նաեւ Մանուել Բջնեցին (15-րդ դ.) իր գանձում. «Ձմեժի մե-
նաստան, զոր կանգնաց արքայն եւ Գեորգ իշխան...»²⁸: Նրա մոտ
բավական խառն են տեղեկությունները վանքի նշանավոր «Ամե-
նափրկիչ» կոչվող սրբազան խաչի վերաբերյալ, որի կապակցու-
թյամբ նշում է բյուզանդական Վասիլ կայսեր եւ Գեորգ իշխանի ա-
նունները, բայց հիմնական դերը վերապահում է Գրիգոր Մագիստ-
րոս Պահլավունուն, որը հետագայում առաջացած ավանդության
արդյունք է²⁹:

Հնարավոր է, որ այդ ավանդության առաջացմանը նպաստել է
Հավուց թառում «Գրիգոր Մագիստրոսի» անունով եղած 1013 թվա-
կանի արձանագրությունը (քարը կորել է, պահպանվել է միայն
տեքստը), որը վերաբերում է «Ամենափրկիչի» նվիրատվությանը:
Որոշ ուսումնասիրողներ այն կեղծված արձանագրություն են հա-
մարել³⁰: Արձանագրության տեքստը հավանաբար հետագայում մի-
ջանտության է ենթարկվել: Սկզբում ասվում է. «ԹՈՒՒՆ ՆԿԲ (1013)
Ի ԹԱԳԱՒՈՐՈՒԹԵԱՆՆ ԳԱԳԱՅ ԵՒ Ի ՀԱՅՐԱՊԵՏՈՒԹԵԱՆՆ ՏԵԱՌՆ
ՍԱՐԳՍԻ, ԵՍ ԳՐԻԳՈՐ ՄԱԳԻՍՏՐՈՍ ՎԵՐՍՏԻՆ ՇԻՆԵՑԻ ՋԵԿԵՂԵՑԻՍ
ՅԻՇԱՍԱԿ ԻՆՁ ԵՒ ՇՆՈՂԱՑՆ ԻՍՈՑ...»³¹, այնուհետեւ երկարաբան
ոճով պատմվում է շրջակայքի «գանձագին» արվելու եւ վանքին

²⁷ Գ. Յովսեփեան, Յիշատակարանք ձեռագրաց, հ. Ա, Անթիլիաս, 1951, էջ 663:

²⁸ Գ. Յովսեփյան, Հավուց Թառի ամենափրկիչը եւ նույնանուն հուշար-
ձաններ հայ արվեստի մեջ, Նյութեր եւ ուսումնասիրություններ հայ
արվեստի պատմության, հ. Բ, Երեւան, 1987, էջ 92:

²⁹ Կ. Մաթեոսյան, Հավուց թառի վանքի..., էջ 165-166:

³⁰ Ն. Ակինյան, Գրիգոր-Սպիրատ, որդի Հասանա, Մագիստրոս, էջ 118, Գ.
Սարգսյան, Հավուց թառի հիմնադրման վկայագրի շուրջ, ՀՀ ԳԱ «Լրա-
բեր» հաս. գիտ., 1988, թիվ 4, էջ 70:

³¹ Գ. Յովսեփյան, Հավուց Թառի ամենափրկիչը..., էջ 6:

նվիրաբերվելու³², ինչպես նաև Քրիստոսի՝ փայտից փորագրված «անձեռագործ սուրբ պատկերի» նվիրատվության մասին:

Գեւորգ իշխանի տոհմաբանության մասին նորահայտ տեղեկության շնորհիվ ակներեւ է, որ եթե Յավուց թառում եղել է 1013 թվականի մի արձանագրություն Գրիգոր Մագիստրոսի անունով, ապա նա վաճառի հովանավոր իշխանի եղբայր Գրիգոր Ապիրատն է, որն, ինչպես տեսանք, 11-րդ դարի աղբյուրներում հիշատակվում է միայն Գրիգոր Մագիստրոս անունով: Հնարավոր է, որ հենց այդ անունն էլ շփոթեցրել է հետագայի հեղինակներին, որոնց իմացած «Գրիգոր Մագիստրոսը» միայն Պահլավունի (Բջնեցի) իշխանն էր, ուստի «Ամենափրկիչին» վերաբերող պատմությունները «ծաղկեցրել են» հենց Պահլավունի իշխանի կենսագրության տվյալներով:

Վերադառնալով Մանուել Բջնեցու հաղորդմանը՝ նշենք, որ թեւեւ նա երկար բարակ պատմելով Գրիգոր Մագիստրոս Պահլավունու մասին, այնուամենայնիվ գրում է, որ Ամենափրկիչն ընծայել են Վասիլ կայսրն ու Գեւորգ իշխանը («Մեզ տրւեալ ընծա յարքայէն Վասլայ եւ Գորգ իշխանայ»): Բայց ավելի ուշագործ է իշխանի ծագման մասին հեղինակի ակնարկը՝ «...**Գեորգ իշխանի՝ ոստ Բագրատունի**»³³: Դժվար է ասել, արդյոք 15-րդ դարում ապրող հեղինակն ունեցել է որեւէ աղբյուր այդ արտահայտության համար, թե՞ այն պարզապէս թելադրվել է չափածո ստեղծագործության գովաբանական ոճով:

Ցավոք, հայտնի չէ Հասանի հոր անունը: Հրապուրիչ է թվում ենթադրել, թե Հասանի նախնիներից էր Աշոտ Երկաթի (914-929)

³² Արձանագրության շարունակությունը՝ «...գանձագին արարի զվայրս սորա լերամբն եւ դաշտամբն եւ ամենայն կազմութեամբն որ ի սմա», համեմատելի է Վահրամ Պահլավունու՝ Մարմաշանի 1029 թ. արձանագրության մի հատվածին՝ «...լիացուցաք ամենայն գոյիւք, լերամբք եւ դաշտաւք, աւանդեցաք ի սա գեղս եւ ագարակս գանձագինս...» (Աբէլ Մխիթարեանց, Տեղագրութիւն Մարմաշինոյ վանացն ի Շիրակ, Վաղարշապատ, 1870, էջ 10):

³³ Գ. Հովսեփյան, Յավուց Թառի ամենափրկիչը..., էջ 91:

հավատարիմ զորական, ականատես պատմիչ Հովհաննես Դրասխանակերտցու բնութագրմամբ՝ թագավորի պատվավորներից («ոմն ի պատուաւորաց») Գեւորգը (հետագայում ենթադրաբար Մարգպետունի կոչված): Ուշագրավ է, որ նա հիշվում է հենց Քելի ամրոցում, երբ մոտեցող արաբներին պարտության է մատնում բերդից դուրս գալով ու համարձակորեն նրանց վրա հարձակվելով³⁴: Սակայն այդպիսի ենթադրության համար լրացուցիչ փաստարկներ են պետք: Նկատենք, որ այս Գեւորգի ժառանգների մասին ոչինչ հայտնի չէ³⁵:

Ինչ վերաբերում է տոհմանվանը, ապա մինչեւ այժմ մասնագիտական գրականության մեջ հավասարապես կիրառվող «Հասանյան» կամ «Ապիրատյան» տարբերակներից պետք է ընտրել առաջինը: Բանն այն է, որ մինչ այժմ Գրիգոր Ապիրատն էր համարվում տոհմը բարձրացնող, հետեւաբար իշխանական տան հիմնադիր, բայց այժմ նրա եւ Քելիի տեր Գեւորգ իշխանի եղբայրներ լինելու հանգամանքի բացահայտմամբ մեծանում է Հասանի կշիռը որպես տոհմապետ: Նշենք նաեւ, որ այս տոհմի կրտսեր ներկայացուցիչներին անդրադառնալիս պատմիչները նրանց նախնիների թվարկումը հասցնում են մինչեւ Հասանի անունը: Օրինակ, Մատթեոս

³⁴ Հովհաննես կաթողիկոս Դրասխանակերտցի, Հայոց պատմություն (գրաբար, աշխարհաբար) աշխարհաբար թարգմանությունը եւ ծանոթագրությունները Գ. Թոսունյանի, Երեւան, 1996, էջ 356-357:

³⁵ Մ. Չամչյանը գրում է, թե Աշոտ Գ-ը (953-977) Գեւորգի որդուն՝ «գոռ յագգէ Մարգպետունեաց» դարձրել է սպարապետ, որը «ժողովեաց զօր բազում մինչեւ ցքառասուն եւ հինգ հազար» (Մ. Չամչեան, Պատմութիւն Հայոց, հ. Բ, Վենետիկ, 1785, էջ 837): Սա արձագանքն է Ուռնայեցու հայտնած մի տեղեկության. «...ժողով արար զօրապետն Հայոց զմարգպետական գունդն քառասուն եւ հինգ հազար...» (Մատթեոս Ուռնայեցի, էջ 8): Ենթադրելի է, որ Մ. Չամչյանի օգտագործած ձեռագրում «զմարգպետական գունդն» ձեւակերպման երկրորդ բառը եղծված է եղել եւ կարդացվել «զմարգպետական Գոռն»: Այլապես դժվար է բացատրել, թե ինչ Գոռի մասին է խոսքը, որին չի հիշատակում եւ ոչ մի պատմիչ, ոչ մի սկզբնաղբյուր: Հիշյալ դարաշրջանի հայկական աղբյուրներում այդպիսի անձնանուն ընդհանրապես չի հանդիպում:

Ուռհայեցին Գրիգոր Ապիրատի թոռանը ներկայացնում է հետևյալ կերպ՝ «...քաջ զորականն եւ մեծ հաւատացեալն **Գրիգոր, որդի Վասակայ, որդի Ապիրատին՝ որդւոյ Ռասանայ**, յազգէ քաջանց...»³⁶: Պատմիչը եւ նրան հետեւելով Սմբատ Սպարապետը, նույն հետադարձ թվարկումն են անում այս Գրիգորի եղբորը՝ Բարսեղ Ա Անեցի կաթողիկոսին ներկայացնելիս³⁷:

Քեղիի տեր Գեւորգ իշխանի ժառանգների մասին մինչ այժմ ոչինչ հայտնի չէր, սակայն հոր անվան հայտնի դառնալով այժմ հնարավոր է նրանց փնտրել հենց նույն տոհմական վանքում՝ Հավուց թառում: Վանքի տարածքում սելջուկյան տիրապետության շրջանից պահպանված միակ արձանագրությունը, որը խաչքարի վրա է, հետևյալ բովանդակությունն ունի. «Յիշէ Քրիստոս **զՌասան**, զորդի **Սմբատա**, զծառա քո եւ ողորմեա մմա, ամեն, թվ. ՇԼ (1081) էր»³⁸: Եթե նկատի ունենանք հայկական իշխանական տոհմերի մոտ ավագ թոռանը պապի անունով կոչելու կայուն սովորությունը³⁹, ապա կարող ենք ենթադրել, որ Գեւորգ իշխանի որդին կրել է պապի անունը՝ Ռասան, եւ նրա ժառանգներն են Սմբատն ու նրա որդի Ռասանը: Անուղղակիորեն այս ենթադրության օգտին է խոսում այն, որ Գրիգոր Ապիրատի երկու որդիները Ապլջահապ եւ Վա-

³⁶ Սատթեոս Ուռհայեցի, էջ 288:

³⁷ Նույն տեղում, էջ 226, Սմբատայ Սպարապետի տարեգիրք, Վենետիկ, 1956, էջ 82:

³⁸ Գ. Հովսեփյան, Հավուց Թառի ամենափրկիչը..., էջ 17: Գ. Հովսեփյանը, որ վանքը Պաղկատիներիցն էր համարում, Հասանին եւ Սմբատին այդ ազնվականական տոհմի ներկայացուցիչներ է կարծում (նույն տեղում, էջ 20):

³⁹ Կիլիկյան հայկական ազնվական տոհմերին անդրադառնալով Լ. Տեր-Պետրոսյանը գրում է. «Մեծ հոր եւ անդրանիկ թոռան անունների նույնությունը քարացած ավանդույթ էր հայ միջնադարյան ազնվական գերդաստաններում: Համենայն դեպս Ռուբինյան եւ Հեթումյան ընտանիքների ազգաբանությունն այս առումով համարյա բացառություն չի ճանաչում. բոլոր այն դեպքերում, երբ հաստատված է, որ թոռն անդրանիկն է, նա անպայման կրում է պապի անունը...» (Լ. Տեր-Պետրոսյան, Խաչակիրները եւ հայերը, հ. Բ, Երեւան, 2007, էջ 79):

սակ անուններն ունեին: Գրիգոր Ապիրատն իր զավակներից մեկին հոր անունով Հասան չի անվանակոչել ամենայն հավանականությամբ այն պատճառով, որ իր ավագ եղբոր՝ Գեւորգի որդին արդեն կրում էր այդ անունը:

Կարծում ենք, որ հենց այս համատեքստում պիտի որոնել Գրիգոր Ապիրատի մասին ասվածը, թե նա «**յաննշանից մեծացեալ**, եւ վասն խելացի եւ առատ ձեռացն մինչեւ լիներ տէր երկոտասան հազար հեծելոց»: Հավանորեն նա Հասանի կրտսեր որդին էր, եւ մինչ Գեւորգը ավագության իրավունքով ժառանգել էր հոր իշխանությունն ու Քեղի բերդը, իր որդուն էլ կոչել նրա անունով՝ Հասան, կրտսեր Գրիգորն իր խելքով ու ձեռներեցությամբ «ոչ նշանավորներից», կամ «փոքրերից» բարձրացել ու տեր էր դարձել բազմաքանակ հեծելազորի:

Հավուց թառի խաչքարի առնչությամբ ավելացնենք, որ այն հավանաբար պատահականորեն չի կանգնեցվել հատկապես 1081 թվականին: Այդ տարի Գրիգոր Ապիրատի թոռը՝ Բարսեղը, Հաղբատում կաթողիկոս ձեռնադրվելով, մեծ շուքով եկավ Անի, եւ ինչպես Մատթեոս Ուռհայեցին է գրում՝ «...եղել օրն այն օր մեծ եւ ուրախութիւն ամենայն Տանն Հայոց, վասն զի տեսին նորոգեալ զաթոռ հայրապետութեանն ի քաղաքն յԱնի»⁴⁰: Եթե Հավուց թառի արձանագրության մեջ հիշված Սմբատը Քեղիի տեր Գեւորգի թոռն էր, ապա նրա ու Բարսեղի պապերը, փաստորեն, եղբայրներ էին, եւ հավանական է, որ Սմբատի որդի Հասանը 1081-ին խաչքար կանգնեցնելով յուրովի արձագանքել է կաթողիկոսական աթոռի՝ Անիում վերահաստատվելու տոնին, որի գլխավոր դերակատարն իր տոհմակիցն էր:

⁴⁰ Մատթեոս Ուռհայեցի, էջ 236-238:

ԳՐԻԳՈՐ ԱՊԻՐԱՏԻ ՎԱԽՃԱՆԸ

Ինչպես Մխիթար Անեցու հայտնածից իմացանք, Գրիգոր Ապիրատը Հովհաննես Սմբատ թագավորին Աշոտի դատաստանից ազատելով տանում է Անի: Աշոտի տեսանկյունից՝ դավաճանական, իսկ Հովհաննես Սմբատի տեսանկյունից՝ վեհանձն այդ արարքից հետո Գրիգոր Ապիրատը հայտնվում է դժվարին կացության մեջ: Նա այլևս չէր կարող վերադառնալ իր գերակայի մոտ (իշխանի կալվածքները գտնվում էին «Դրուց աշխարհում»), ոչ էլ կարող էր Անիում մնալ, քանի որ դրանից կարճ ժամանակ առաջ Աշոտի զորքի հետ ծանր կորուստներ էր պատճառել անեցիներին⁴¹: Այս իրավիճակում, հատկապես Աշոտի վրեժխնդրությունից խուսափելու համար, Գրիգոր Ապիրատը հարկադրված էր ընտանիքով ու զորքով հեռանալ Բագրատունիների տիրույթներից: Մատթեոս Ուռհայեցու վկայությամբ նա ապաստան է գտնում Դվինի ամիրա Ապուսուարի մոտ, որը Շադդադյան Աբուլասվար (Աբու-լ-Ասվար) ամիրան է: Ըստ պատմիչի, սա սկզբում լավ է ընդունում Ապիրատին, սակայն չարախոս մարդիկ նրան զգուշացնում են, որ բազմաթանակ զորքով իր մոտ գտնվող իշխանը վտանգ է ներկայացնում, եւ նա դավադրաբար սպանում է Ապիրատին: Իշխանի զորավար Սարին վերցնում է Ապիրատի կնոջն ու երկու որդիներին եւ գալիս Անի, որտեղ Հովհաննես Սմբատ թագավորը գրկաբաց է ընդունում նրանց եւ գավառներ ու իշխանություն շնորհում: Պատմիչը գրում է. «Իսկ յայսմ աւուրս Ապիրատ ոմն, որ էր մեծ իշխան Հայոց, որդի Հասանայ, սա վասն Աշոտոյ միաբանութեանն, զոր ունէր յառաջագոյն, երկյուղեալ ի թագաւորէն Յովհաննիսէ, ապստամբեալ փախեաւ ի նմանէ եւ գնաց ի Դուին քաղաք, առ Ապուսուար զօրաւարն

⁴¹ «Եւ եղեւ յաւուր այնմիկ սաստիկ պատերազմ եւ դարձուցին զքաղաքն ի փախուստ, մինչ զի փախուցեալքն ոչ ժամանէին մտանել ի քաղաքն, այլ յԱխուրան գետն անկանէին, եւ դարձաւ Աշոտ մեծաւ յաղթութեամբ» (Մատթեոս Ուռհայեցի, էջ 14):

Պարսից եւ երկոտասան հազար ծիաւորք ընդ նմա. եւ Ապուսուար մեծարեալ զնա բազում աւուրս: Յայնժամ մատեան առ Ապուսուար չարախօսք ոմանք եւ ասէն, եթէ «Այսպիսի այր յաղթող եւ զօրաւոր եւ զօրօք բազմօք եկեալ է առ քեզ, կորուստ գործէ քեզ եւ ամենայն տանս Տաճկաց»: Յայնժամ ոխս առեալ ամիրային ի սիրտ իւր եւ գաղտ յայլ զօրացն ի գրոյց սիրոյ կոչեաց զԱպիրատն եւ ի ծածուկ կորոյս զայնպիսի այր քաջ, հզօր եւ անուանի ի մէջ ամենայն աշխարհին Յայոց:

Իսկ իշխան ոմն Սարի անուն, որ էր զօրավար մեծ իշխանին Ապիրատին, առեալ զկին եւ զորդիս նոցա եւ զհեծեւագունդ զօրսն եւ զնաց ի քաղաքն յԱնի. եւ թագաւորն Յովհաննէս կարի յոյժ ապաշաւէր զանիրաւ մահն Ապիրատին Յայոց իշխանին: Եւ որդեաց նորա Ապլջահապայ եւ Վասակայ, եւ Սարէ եւ զմենայն զօրացն տայր թագաւորն Յայոց գաւառս եւ զիշխանութիւնս»⁴²:

Եթէ հայտնի չլինէր Մխիթար Անեցու պատմածը Թալինի դէպքի մասին, Ուռհայեցու հաղորդածի սկիզբն ու վերջը ոչ մի կերպ չէր կապակցվի: Այսինքն, եթէ Ապիրատը ապստամբել ու փախել էր Յովհաննէս Սմբատից, ինչու պիտի վերջինս այդպես ողբար իշխանի «անիրաւ» կորուստը եւ նրա զավակներին էլ կալվածքներ ու իշխանություն տար:

Ուռհայեցին եւ Մխիթար Անեցին այս դէպքերի թվականը չեն նշում: Բայց Ուռհայեցու մոտ այս տեղեկությունը գետեղված է մի հատվածում, ուր խոսվում է 1021 թ. տեղի ունեցած անցքերի մասին: «Թագաւորք վերջինք Բագրատունիք» բնագրի վերջում ավելացված անանուն հեղինակի փոքր ժամանակագրության մեջ արձանագրված է Ապիրատի մահվան թվականը. «ՆՅ (1021) Թուրքն Եհար զԱպիրատն»⁴³: Այս տեղեկությունը, նույն թվականով, մուծված

⁴² Մատթեոս Ուռհայեցի, էջ 16-17: Ապիրատի հետ պատահածի մասին Ուռհայեցուց օգտվելով հակիրճ պատմում է նաեւ Սմբատ Սպարապետը (Սմբատայ Սպարապետի տարեգիրք, էջ 6):

⁴³ Մանր ժամանակագրություններ, 13-18-րդ դդ., հ. 2, կազմեց՝ Վ. Հակոբյան, Երեւան, 1956, էջ 502:

է նաեւ Սամվել Անեցու ժամանակագրության այն օրինակում, որը շարունակել է Ստեփանոս Օրբելյանը. «Թուրքն էհար զԱպիրատն»⁴⁴:

Հարկ է նշել, որ Աբուլասվար Շադդադյանի իշխանության սկիզբը Դվինում համարվում է 1021 կամ 1022 թվականը⁴⁵: Փաստորեն, Գրիգոր Ապիրատն Աբուլասվարի մոտ է գնացել նրա Դվինում հաստատվելու առաջին տարում⁴⁶:

Գրիգոր Ապիրատի սպանության պատմության մեջ շատ պարզունակ է թվում պատմիչի բացատրությունը, թե Շադդադյան ամիրան իշխանին սպանում է «չարախոս մարդկանց» լսելով⁴⁷: Հայ իշխանը Դվին մեկնելով որոշ երաշխիքներ պիտի ունենար: Չի բացառվում, որ Աբուլասվարը Գրիգոր Ապիրատին սպանել է Աշոտի դրդմամբ կամ էլ վերջինիս հաճոյանալու համար: Մի բան հստակ է, որ հետագայում նրանց հարաբերությունները սերտացել են այնքան, որ Աշոտն իր դստերը (որն իր մոր՝ Կատրամիդեի անունն էր

⁴⁴ Ժամանակագրութիւն Ստեփաննոսի Օրբէլեանի, հրատարակության համար պատրաստեց Ա. Աբրահամյանը, Երեւան, 1942, էջ 12:

⁴⁵ Մունաջջիմ Բաշիի վկայությամբ Աբուլասվարը մահացել է 1067 թ. նոյեմբերին, իսկ նրա իշխանությունը տեւել է 46 տարի: Այս մասին նշելով Ա. Տեր-Ղեւոնդյանը գրում է. «...ուստի 46 տարի ետ գնալով կստանանք մոտավորապես 1022 թ., որպես Դվինում նրա իշխանության սկիզբը» (Ա. Տեր-Ղեւոնդյան, Արաբական ամիրայությունները Բագրատունյաց Հայաստանում, Երեւան, 1965, էջ 209): Գուցե մեկ տարվա տարբերությունն այստեղ այնքան էլ կարելու չէ, սակայն Աբուլասվարի մահվան թվականից նրա իշխանության տարիների թվով հետ գնալու դեպքում ստանում ենք 1021 թ. (1067-46=1021):

⁴⁶ Աբուլասվարից առաջ Դվինում մի կարճ շրջան անիշխանություն է եղել (Ա. Տեր-Ղեւոնդյան, Արաբական ամիրայությունները..., էջ 208):

⁴⁷ Եթե Ապուստարի մտավախությունը Դվինում քրիստոնյա զորքի ներկայությունը լիներ, ապա պիտի միայն Ապիրատի սպանությամբ չբավարարվեր: Սակայն ուրիշ զոհեր չեն եղել: Ըստ երեւութի՝ ժամանակակիցների համար պարզ եւ որոշ իմաստով հասկանալի է եղել, որ Գրիգոր Ապիրատն իր գերակային՝ Աշոտին դավաճանելու համար վերջինիս վրեժխնդրության զոհն է դարձել: Իսկ իշխանի ընտանիքն ու զորքը անարգել հեռացել են Դվինից եւ գնացել այնտեղ, ուր նրանց (արդեն առանց Ապիրատի) պատրաստ էին գրկաբաց ընդունելու՝ Անի:

կրում)⁴⁸ կնության է տվել Աբուլասվարին⁴⁹: 1030-ականներին այս ամուսնությունից ծնված նրանց որդին՝ Մանուչեն, Անիի տերը դարձավ 1065-ին⁵⁰: Հետաքրքիր է, որ վերջինիս եւ Գրիգոր Ապիրատի զավակների միջեւ հետագայում թշնամություն չի եղել: Դվինում կատարված դեպքից շուրջ չորս տասնամյակ անց, երբ սելջուկների ձեռքն անցած Անին հանձնվեց Մանուչեին, վերջինս քաղաք հրավիրեց Գրիգոր Ապիրատի որդուն՝ տարեց Վասակին եւ նրա որդի Գրիգորին: Երիտասարդ ամիրան քաղաքից դուրս գալով եւ ընդառաջ գնալով դիմավորեց նրանց ու բերեց Անի: Իսկ վերջիններս, ընդունելով Մանուչեի գերիշխանությունը, հավատարմորեն ծառայեցին նրան:

ԳՐԻԳՈՐ ԱՊԻՐԱՏԻ ԶԱՎԱԿՆԵՐԸ

Կեչառիսի 1003 թ. արձանագրության մեջ Գրիգոր Ապիրատը հիշատակում է իր որդիներին, հետեւաբար ենթադրելի է, որ Ալլախապն ու Վասակն այդ ժամանակ արդեն ծնված էին (եթե ուրիշ զավակներ չի ունեցել): Դատելով Ուռհայեցու մոտ նրանց անունների հիշատակման հերթականությունից, Ալլախապն ավագն է եղել:

Սակայն նրանց անդրադառնալուց առաջ հիշատակենք Գրիգոր Ապիրատի դստերը, որն իր մասին հիշեցնում է Տեկորի 1042 թ. արձանագրության մեջ. «Ես **Տիկ(ն)աց Տիկին, դուստր Քրգորոյ Մագիստոռսին** եւ ամուսին Սարգսի Արեւելից Վեստիս...»⁵¹: Ուսումնասիրողները հաճախ նրա հորը թյուրիմացաբար նույնացրել են Գրի-

⁴⁸ Նրա անունը հիշվում է Կատա կրճատ ձեւով (Վարդան Արեւելցի, էջ 126, Կ. Մաթեոսյան, Անի. եկեղեցական կյանքը եւ ձեռագրական ժառանգությունը, Ս. Էջմիածին, 1997, էջ 347-348):

⁴⁹ Արիստակիսի Լաստիվերցույ Պատմութիւն (աշխատասիրությամբ՝ Կ. Յուզբաշյանի), Երեւան, 1963, էջ 62, К. Юзбашян, Армянские государства эпохи Багратидов и Византия, с. 167-168.

⁵⁰ Հ. Մարգարյան, Հյուսիսային Հայաստանի եւ Վրաստանի ԺԲ դարի պատմության մի քանի հարցեր, Երեւան, 1980, էջ 86:

⁵¹ Ղ. Ալիշան, Շիրակ, Վենետիկ, 1881, էջ 135:

գոր Մագիստրոս Պահլավունու (Բջնեցու) հետ⁵², մինչդեռ Պահլավունի իշխանը մագիստրոսի պատիվ ստացել է ավելի ուշ՝ 1045-ին:

Ոմանց կարծիքով արձանագրության մեջ բացակայում է իշխանուհու անունը, «Տիկնաց տիկինը» համարում են մեծարական դիմելածեւ, ինչպես օրինակ Գրիգոր Պահլավունու քույրն է Բագմայրի արձանագրություններից մեկում գրում. «ես Սեդա տիկնաց տիկին»⁵³: Սակայն կար նաեւ «Տիկնացտիկին» անձնանուն, կրճատ ձեւը՝ Տիկնաց⁵⁴, եւ Գրիգոր Ապիրատի դուստրը, մեր կարծիքով, հենց այդ անվան կրողն էր:

Ն. Ալիմյանը գրում է. «1021-ին երբ Ապիրատ սպանուեցաւ Ապուսուարէն, Վասակ եւ Ապլջահապ վերադարձան Անի. Յովհ. Սմբատ սիրով ընդունեցաւ զանոնք եւ յանձնեց հաւանօրէն անոնց քրոջ, որ կինն էր Վեստ Սարգսի»⁵⁵: Սակայն դժվար է ստույգ ասել, որ 1021-ին Տիկնացտիկինն արդեն Վեստ Սարգսի կինն էր: Գրիգոր Ապիրատի մահից հետո, երբ նրա զավակներն Անի եկան, Յովհաննես Սմբատն իր խնամակալության տակ առավ նրանց եւ հնարավոր է, որ հենց այդ ժամանակ էլ իշխանադստերն ամուսնացրեց Սարգսի հետ, որը մեկն էր «ի գլխաւոր ազատացն Յայոց»⁵⁶:

Յովհաննես Սմբատի մահվան ժամանակ Վեստ Սարգիսը նրա հոգաբարձուն էր⁵⁷: Նա տեր էր մի շարք բերդերի, կառուցել է Խծկոնքի վանքը, իսկ Ծառաքարի վանքը բերդի վերածել (բերդը հիշատակվում է նաեւ Մաղասբերդ անունով): 1033 թ. արեւի խավարման մեկնաբանությունը ստանալու համար Անիից Սեւան՝ Յովհաննես Կոզեռնի մոտ մեկնած պատվիրակների մեջ Մատթեոս Ուռ-

⁵² Լեո, Անի, Երեւան, 1963, էջ 322-327, Յայ ժողովրդի պատմություն, հ. 3, էջ 148, К. Юзбашян, Армянские государства эпохи Багратидов..., с 161.

⁵³ Ղ. Ալիշան, Շիրակ, էջ 113:

⁵⁴ Զ. Աճառյանը «Տիկնաց» անձնանվան մասին գրում է. «անշուշտ տիկնաց տիկին ձեւից՝ կրճատմամբ» (Զ. Աճառյան, Յայոց անձնանունների բառարան, հ. Ե, Երեւան, 1962, էջ 153):

⁵⁵ Ն. Ալիմյան, Ներսես Լամբրոնացի, էջ 390:

⁵⁶ Արիստակիսի Լաստիվերցույ Պատմութիւն, էջ 57:

⁵⁷ Նույն տեղում:

հայեցին Վեստ Սարգսին կոչում է «Մեծն Սարգիս»⁵⁸: Հովհաննես Սմբատի մահից հետո նա փորձեց գրավել թագավորական գահը, բայց անհաջողության մատնվեց: Թագադրությունից հետո Գագիկ Բ-ը (1042-1045) նրան պատժեց, բայց հետո գործակցեց նրա հետ: Առերես թագավորին հպատակվելով Վեստ Սարգիսը գլխավոր անդամներից մեկն էր այն խմբավորման, որը կողմ էր Անին կայսրությանը հանձնելուն: Հայտնի չէ, թե Անիի բյուզանդական նվաճումից հետո ինչ է եղել Վեստ Սարգսի հետ: Սակայն հետաքրքիր է, որ հետագայում նրան պատկանած Ծառաքար բերդն անցել է իր կնոջ՝ Տիկնացտիկնոջ տոհմակիցներին՝ Հասանյաններին⁵⁹:

Այժմ տեսնենք թե ինչ ճակատագիր ունեցան Գրիգոր Ապիրատի որդիները՝ **Ապլջահապը** եւ **Վասակը**, որոնց Հովհաննես Սմբատը 1021-ին «գավառներ եւ իշխանություն» շնորհեց: Հավանաբար այս ժամանակ էլ նրանք խնամիացան Պահլավունիների հետ, կնության առնելով Գրիգոր Պահլավունու (Բջնեցու) երկու դուստրերին:

1045-ին Անին ընկնում է բյուզանդական տիրապետման տակ, Կոստանդին Սոմոմախ (1042-1054) կայսեր հրավերով Կոստանդնուպոլիս մեկնած Գագիկ Բ-ին արգելվում է Հայաստան վերադառնալ: Մեկ տարի անց բյուզանդացիները Անիից հեռացնում են նաեւ Պետրոս կաթողիկոսին:

Գրիգոր Պահլավունին կայսրությանն է թողնում հայրենի կավածքը՝ Բջնին, որի դիմաց կայսրից մագիստրոսի պատվաստիճան

⁵⁸ Մատթեոս Ուռհայեցի, էջ 76:

⁵⁹ Անեցիների՝ 1186 թ. Ծառաքարի գրավման առնչությամբ պատմիչները նշում են, որ բերդը Անիի Բարսեղ Բ եպիսկոպոսի տոհմի սեփականությունն էր (Մխիթար Անեցի, էջ 109-110, Վարդան Արեւելցի, էջ 136): Հնարավոր է, որ Տիկնացտիկին անունը պահպանվել է Հասանյանների կամ Վեստ Սարգսի տան աղջիկների մեջ: 12-րդ դարի վերջին Տիկնացտիկին անունով ազնվագարմ նվիրատու է հիշվում Կեչառիսում եւ Հավուց թառում: Նրա հոր անունը Սարգիս էր, իսկ որդունը՝ Կուկոր («պարոն Կուկոր»): Տե՛ս Գ. Սարգիսեան, Վիմագրագիտական նո-րոյթներ, «Հանդէս ամսօրեայ», 2001, էջ 250:

է ստանում⁶⁰, նշանակվում Տարոնի ու Հայկական Միջագետքի կուսակալ եւ փաստորեն դառնում է Հայաստանում ամենաազդեցիկ հայազգի գործիչը⁶¹:

Այդ շրջանում կայսրությունն ընդգծված պայքար էր սկսել Հայոց եկեղեցու դեմ⁶²: Խաչիկ Անեցու մահից հետո (1065) բյուզանդացիները փորձում են արգելել նոր կաթողիկոսի ընտրությունը, բայց հայության միասնական ջանքերով հաղթահարվում է այդ արգելքը: Գրիգոր Մագիստրոս Պահլավունու Վահրամ որդին Գրիգոր անունն ընդունելով դառնում է Հայոց կաթողիկոս (Գրիգոր Բ Վկասեր՝ 1066-1105):

Ավելի վաղ Գրիգոր Մագիստրոս Պահլավունին փորձել է արքունիքում ունեցած իր կապերն օգտագործելով արտոնություններ ստանալ Հայաստանի առանձին վանքերի համար: Այդ առանձնաշնորհին արժանացել են երկու վանք՝ Մարմաշենը, որ հիմնել էր իշխանի հորեղբայր սպարապետ Վահրամ Պահլավունին եւ Կեչառիսը, որի հիմնադիր Գրիգոր Ապիրատի երկու զավակներն իր փեսաներն էին:

Գրիգոր Ապիրատի որդիների եւ Գրիգոր Բջնեցու դուստրերի ամուսնության մասին⁶³ Ն. Ակինյանը գրում է. «Վկայուած է, թէ Վասակի կինը Գրիգորի դուստրն է, բայց լռած է պատմութիւնը ի մասին Ապլջահապի: Մինչ Վասակ մնաց Արեւելք (Անի, Խաչէնք), Ապլջա-

⁶⁰ «Գրիգոր որդի քաջին Վասակայ... գնաց առաջի թագաւորին եւ... տայ զբանալին Բջնոյ թագաւորն եւ զամենայն զիր զհայրեանի ժառանգութիւնն եւ... առնու զպատիւ մագիստրոսութեան եւ տեղիս բնակութեան ի սահմանս Միջագետաց...», Արիստակիսի Լաստիվերցույ Պատմութիւն, էջ 62:

⁶¹ Մխիթար Այրիվանեցին այս իրավիճակն ընդհանրացնելով գրում է. «Իսկ Մոմոնմախն, որ կալաւ զԳագիկ թագաւորն՝ ետ զիշխանութիւն երկրիս Գրիգորոյ Մագիստրոսի...» (Մխիթար Այրիվանեցի, էջ 58):

⁶² Կ. Մաթեւոսյան, Անի, էջ 36-47, 193:

⁶³ Այդ ամուսնությունները տեղի են ունեցել առնվազն 1030-ական թվականներին, եթե նկատի ունենանք Գրիգոր Պահլավունու տարիքը, որը 1021 թվականին Գրիգոր Ապիրատի, ու նաեւ իր հոր՝ Վասակի մահվան ժամանակ, բավական երիտասարդ էր:

հապ կերելայ թէ 1045-ին իր աներոջ հետ գաղթեց Միջագետք եւ տիրացաւ այնտեղ Ծովք ամուր բերդին»⁶⁴։ Ն. Ակինյանի այն ենթադրությունը, որ հենց Գրիգոր Ապիրատի որդի Ապլջահապն է եղել Գրիգոր Բջնեցու դուստրերից մեկի ամուսինը, որից ծնվել են նրանց Ապիրատ, Գրիգորիս, Վահրամ, Վասակ զավակները, միամզամայն տրամաբանական է։ Բնութագրական է հատկապես Ապիրատ հազվագյուտ անունով անդրանիկ որդու անվանակոչությունը, որի մասին նրա զավակը՝ Ներսես Շնորհալին գրում է. **«Ձնախնական անուն առեալ, որ Ապիրատն էր յորջորջեալ»**⁶⁵ («Նախնական», այսինքն՝ նախնյաց, հայրենի)⁶⁶։ Սակայն տարօրինակ է, որ Ապլջահապ անունն այս տոհմի սերունդների մեջ այլեւս չի կիրառվել։

Ապլջահապին չի հիշատակում նաեւ իր տոհմի անցյալը համզամանորեն ներկայացնող Ներսես Շնորհալին, որի պապն էր։ «Վիպասանութիւն նախնի ըստ Զոմերի սկսեալ ի վերուստ» երկում Ներսես Շնորհալին պատմում է իր տոհմի մասին, զովաբանական ոճով անդրադառնում է Գրիգոր Մագիստրոս Պահլավունու գործունեությանը, նկարագրում նրա Վահրամ որդու կաթողիկոսանալը, որի քրոջ թոռն էր ինքը։ Շնորհալին, որ այնքան սիրով է հիշատակում իր հորը՝ Ապիրատին, զարմանալիորեւն չի տալիս նրա հոր անունն այն դեպքում, երբ նշում է Ապիրատի մայրական գծով պապին՝ Գրիգոր Մագիստրոս Պահլավունուն ու անգամ վերջինիս հորը՝ Վասակին⁶⁷։

Քանի որ կաթողիկոսական իշխանությունը շարունակելու տեսակետից Ներսես Շնորհալու համար չափազանց կարեւոր էր իր եւ ավագ եղբոր՝ Գրիգորի (հետագայում՝ Գրիգոր Գ Պահլավունի, նաեւ «Փոքր Վկայասեր» կոչված) Պահլավունյաց, այսինքն Ս. Գրիգոր Լուսավորչի տոհմից սերված լինելն ընդգծելը, նա հատուկ տեղ է

⁶⁴ Ն. Ակինյան, Ներսես Լամբրոնացի, էջ 379-380, Բ. Կիւլեւերեան, Ծովք (Ծովք-Տլուք եւ Զոմ-Կլայ), Վիեննա, 1904, էջ 10-16։

⁶⁵ Ներսեսի Շնորհալոյ Բանք չափաւ, Վենետիկ, 1928, էջ 601։

⁶⁶ Նոր բառգիրք հայկազգեան լեզուի, հ. Բ, Վենետիկ, 1837, էջ 401։

⁶⁷ Ներսեսի Շնորհալոյ Բանք չափաւ, էջ 587-588։

տալիս դրամ⁶⁸, սակայն խոստովանում է, որ մայրական գծով են կապված եղել Պահլավունիներին:

Պատմիչ Սամվել Անեցին, որն իր ժամանակագրությունը կազմել է Գրիգոր Գ-ի պատվերով, 1113 թ. տեղի ունեցած նրա աթոռակալությունը ներկայացնելով, կաթողիկոսի ծագման մասին միայն նշում է. «...Տեր Գրիգորիս մեծաշուք պատուով նստեալ յաթոռ վիճակի Սրբոյն Գրիգորի Զայաստանեայցս լուսաւորչի. որ յազգէ նորին հարազատութեան ճանաչի»⁶⁹:

Անիի պատմության դրվագները ներկայացնելիս Սամվել Անեցին ընդհանրապես չի նշում Գրիգոր Գ-ի արական գծով նախնիներից որեւէ մեկին⁷⁰:

Հետաքրքիր է, որ «Պատմութիւն Սրբոց Զարցն մերոց» ուշագորավ բնագրում Գրիգոր Գ-ի հայր Ապիրատ իշխանը համարվում է ոչ թե Գրիգոր Վկայասերի քրոջ զավակը, այլ եղբորորդին⁷¹: Կաթողիկոսական իշխանության փոխանցումը այսօրինակ ուղիղ (արական գծով) ժառանգականությամբ շատ ցանկալի պիտի լիներ Գրի-

⁶⁸ Հատկանշական է 1166 թ. ապրիլի 17-ին Հռոմկլայում կաթողիկոսական ձեռնադրության ժամանակ Ներսես Շնորհալու արտասանած ճառի այն հատվածը, որը վերաբերում է նրա նախնիներին՝ Գրիգոր Լուսավորչից մինչև Գրիգոր Վկայասեր եւ Բարսեղ Անեցի (Ներսեսի Շնորհալույ Հայոց կաթողիկոսի թուղթը, Վենետիկ, 1875, էջ 8):

⁶⁹ Սամուէլի քահանայի Անեցւոյ Զաւաքնունք ի գրոց պատմագրաց, էջ 122, Հմմտ., Սատենադարան, ձեռ. թիվ 5619, թերթ 101բ-102ա:

⁷⁰ Հասանյանները չեն հիշատակվում նաեւ այլ առիթներով: Օրինակ, գրելով, որ Մարմաշենը հիմնադրել է Վահրամ Պահլավունին, Բագնայրը՝ Սմբատ Մագիստրոսը, Խժկոնքը՝ «մեծապատիվ» Վեստ Սարգիսը եւ այլն, Սամվել Անեցին ոչինչ չի գրում Կեչառիսի հիմնադրման կամ Հավուց թառի մասին: Հայտնի է, որ ժամանակագրությունը կազմելիս Սամվել Անեցին առաջնորդվել է պատվիրատուի նախասիրություններով ու ցուցումներով (Կ. Մաթեոսյան, Սամվել Անեցին Անիի պատմության մասին, «Էջմիածին», 2006, Բ-Գ, էջ 72-85):

⁷¹ «Իսկ տէր Վահրամ (Գր. Վկայասեր – Կ. Մ.) եւ գմանուկն Գրիգորիոս, զորդի Ապիրատին եղբորորդոյ իւր, յանձնեալ տէր Բարսղի ուսման դպրութեան, զի ետ մահուան իւրոյ նստուցէ աթոռն» (Տե՛ս Լ. Տեր-Պետրոսյան, Խաչակիրները եւ Հայերը, հ. Բ, հավելված 1, էջ 512):

գոր Գ-ի եւ նրա եղբոր՝ Ներսես Շնորհալու, ինչպես նաեւ նույն տոհմից սերող մյուս կաթողիկոսների համար: Հնարավոր է, որ նրանց ժամանակ էլ շրջանառվել է Գրիգոր Վկայասերի եւ Ապիրատի հոր եղբայրներ լինելու մասին կեղծ տեղեկությունը, որը տեղ է գտել վերոնշյալ բնագրում:

Չի բացառվում, որ իր հետնորդների կողմից մոռացության մատնված Ապլջահապը⁷² բավական վաղ է մահացել: Նման ենթադրության օգտին է խոսում այն, որ նրա կրտսեր եղբայր Վասակն իր ամենակրտսեր որդուն (դատելով Ուռհայեցու թվարկումից)⁷³ կոչել է Ապլջահապ, գուցե ի հիշատակ մահացած եղբոր:

Հավանաբար Ապլջահապի զավակները մանուկ հասակից մնացել են մայրական պապի՝ Գրիգոր Մագիստրոս Բջնեցու խնամքին: Մասնավորապես այդ իմաստը կարելի է տեսնել Ներսես Շնորհալու խոսքերում, որը Գրիգոր Բջնեցու՝ իր հոր՝ Ապիրատի նկատմամբ վերաբերմունքը բնութագրում է **«Հօրն մերոյ նա հայր եղեալ, ըստ**

⁷² Եթե մի պահ ենթադրենք, որ Գրիգոր Բջնեցու դստեր ամուսինը Ապլջահապը չէր, ինչն ակնարկում է Վ. Վարդանյանը («Ծովքի Պահլավունիները դարաշրջանի որոգայթներում», ՀՀ ԳԱԱ պատմության ինստիտուտ, Հայոց պատմության հարցեր, թիվ 8, Երեւան, 2007, էջ 47-48), այլ մեկ ուրիշը, միեւնույն է, նրա անունը, փաստորեն, իր սերունդները մոռացության են մատնել, որի ստույգ պատճառն անհայտ է: Բայց որ այդ մարդն Ապլջահապն էր, երեւում է ոչ միայն այն բանից, որ նա իր ավագ որդուն իր հոր անունով Ապիրատ է կոչել, այլեւ հարակից փաստերից: Հայտնի է, օրինակ, որ Գրիգոր Գ կաթողիկոսը 1120-ական թվականներին մտադիր էր հաստատվել Անիում: Մինչ այդ Անիում աթոռակալած վերջին կաթողիկոսը Ապլջահապի եղբայր Վասակի որդի Բարսեղ Ա-ն էր (որն Անիից հեռացել է 1105-ին): Սամվել Անեցին գրում է, որ Գրիգոր Գ-ն Անիի, այսինքն Բարսեղ Ա-ի աթոռը համարում է իր «սեփական» աթոռը: Դա անհնարին կլիներ, եթե նա Բարսեղի տոհմակիցը չլիներ: Իսկ Ներսես Շնորհալին Բարսեղ Ա Անեցուն համարում է իր նախնին եւ «արեմառուն», այսինքն արյունակիցը (Ներսեսի Շնորհալոյ Հայոց կաթողիկոսի թուղթ, էջ 8, Անեցի, էջ 127):

⁷³ Մատթեոս Ուռհայեցի, էջ 238:

մայրականն մեջնորդեալ»⁷⁴ բառերով: Այսինքն, մայրական պապն է, որ հայրություն է արել իր հորը:

Հատկանշական է, որ Գրիգոր Բջնեցու որդին՝ Գրիգոր Վկայասերը, նույնպես շատ կապված է եղել հատկապես իր այս քրոջ ընտանիքի ու նրա չորս զավակների հետ: Վկայասերն էր, որ նրանցից մեկին՝ Գրիգորիսին, իր հետ Կոստանդնուպոլիս տարավ, ապա կաթողիկոս դարձրեց Եգիպտոսում եւ շուտով պաշտոններ ապահովելով այնտեղ ուղարկեց նրա եղբայրներին՝ Վահրամին եւ Վասակին⁷⁵, հոգ տարավ նաեւ եղբայրներից ավագի՝ Ապիրատի զավակների համար, կտակելով, որ նրա Գրիգոր որդուն (Գրիգոր Գ) փոխանցվի հայրապետական աթոռը: Իսկ երբ հանգամանքների բերումով այդ պատգամի կատարումը տեղի ունեցավ Գրիգորի համար շատ վաղ տարիքում (1113 թ.), ժամանակակիցները չառարկեցին գլխավորապես այն պատճառով, որ նրան համարեցին «ընտրեալ ի սուրբ ազգէ»⁷⁶, այսինքն՝ Ս. Գրիգոր Լուսավորչի տոհմից:

Գրիգոր Գ-ից սկսած կաթողիկոսական այս տոհմի ներկայացուցիչները հայրապետական աթոռն իրենց ձեռքում պահեցին 90 տարի, մինչեւ Գրիգոր Զ Ապիրատ (1194-1203): Նրանք իրենց համարում էին Ս. Գր. Լուսավորչի տոհմակիցներ՝ Պահլավունիներ եւ բազմում կաթողիկոսական աթոռին տոհմական ժառանգականության իրավունքով⁷⁷:

⁷⁴ Ներսեսի Շնորհալոյ Բանք չափաւ, էջ 587-588:

⁷⁵ Ն. Ակինյան, Ներսես Լամբրոնացի, էջ 380-385:

⁷⁶ Գ. Յովսեփեան, Յիշատակարանք ձեռագրաց, էջ 422:

⁷⁷ Հաջորդաբար կաթողիկոս դարձան Գրիգոր Գ Պահլավունին՝ 1113-1166 թթ. եւ նրա եղբայր Ներսես Դ Կլայեցին (Շնորհալի)՝ 1166-1173 թթ.: Սրանց Վասիլ եղբոր որդին էր կաթողիկոս Գրիգոր Դ Տղան (1173-1193), Վասիլի դստեր որդին էր Գրիգոր Ե Քարավեժ (1194) կաթողիկոսը, իսկ Զորավար եղբոր որդին էր Գրիգոր Զ Ապիրատը (1194-1203): Զորավարի դստեր՝ Շահանդուխտի եւ իշխան Օշինի որդին էր Կիլիկիայի հայտնի եկեղեցական գործիչ Ներսես Լամբրոնացին (1153-1198): Նրա եղբայրներից մեկը Ապիրատ անունն էր կրում:

Ն. Ակինյանն այս տոհմի ներկայացուցիչներին անվանում է «պատվաստված Պահլավունիներ»⁷⁸:

Գրիգոր Ապիրատի կրտսեր որդին՝ Վասակն իր որդիների հետ առաջնակարգ դեր ստացավ Ամիուն հատկապես բյուզանդացիների հեռանալուց հետո, Շաղադյանների տիրապետության շրջանում: 1064 թվականին Ամին գրավեց սելջուկ սուլթան Ալփասլանը եւ քիչ անց այն տվեց Աբուլասվարի՝ Աշոտ Դ-ի աղջկանից ծնված որդուն՝ Մանուչեին: Վերջինիս տիրապետության եւ Հասանյաններին քաղաք հրավիրելու մասին ուշագրավ տեղեկություն է պահպանվել Վարդան Արեւելցու պատմության մեջ: Նա գրում է, որ Մանուչեն «...յաւելոյր ի պարիսպն Անւոյ եւ յամրութիւնս նորա. եւ ած ի քաղաքն զամենայն մնացեալ իշխանսն, որպէս եւ **մեծաւ հանդեսիւ ընդ առաջ ելեալ մուծանէր ի ներքս զԳրիգոր զորդին Վասակայ, զթոռն Ապիրատին**. զոր ասեն ունել ի գլուխ ազատականացն հինգհարիւր թագս երեւելիս. զի տէր էր մեծ զօրաց եւ բազում ազատաց: Եւ էր եղբայր տէր Բարսղի, որ զկնի Գեորգեայ ձեռնադրեցաւ ի Հաղբատ կաթողիկոս հրամանաւ եւ կամօք Մանուչէին եւ ամենայն Հայոց: Եւ շինեցաւ քաղաքն Անի ոչ ինչ պակաս քան զառաջինն»⁷⁹:

Շատ հնարավոր է, որ այս հատվածը եւս Վարդան Արեւելցին քաղել է Մխիթար Անեցու պատմությունից: Այդ մասին է հուշում մախորդ հատվածի հետ համեմատությունը: Երկու դեպքում էլ պատմիչն օգտագործում է «ասում են թե» արտահայտությունը («զսմանէ ասեն», «զոր ասեն»), մեծարական խոսքերով է ներկայացնում

⁷⁸ «Պատուաստուած Պահլավունիներ» վերնագրի տակ Ն. Ակինյանը գրում է. «Պահլաւունիներու արական գիծը շիջաւ Գրիգոր Մագիստրոսի թոռներու մէջ, որոնք չթողուցին ժառանգ: Բայց պահլաւական արիւնը պատուաստուեցաւ ուրիշ իշխանական տուներու, որոնք պարծեցան պահլաւունի ծագումով: Այդ պատուաստումը կատարուեցաւ միջնորդութեամբ Բջնեցի Գրիգոր Մագիստրոսի երեք դուստրերու, որոնք հարս զացին Ապիրատեանց եւ Թոռնիկեանց» (Ն. Ակինյան, Ներսէս Լամբրոնացի, էջ 372-373):

⁷⁹ Վարդան Արեւելցի, էջ 108:

Հասանյանների գործությունը (մի դեպքում նշելով տասներկու հազար հեծյալներին, մյուս դեպքում՝ հինգ հարյուր «թագակիր» ազատներին): Նկատենք, որ Մխիթարի ժամանակ Անիի եպիսկոպոսն այս նույն տոհմի ներկայացուցիչ Բարսեղ Բ Անեցին էր: Եւ վերջապես, Անիի կյանքի մասին Մխիթարի պատմությունն էր ամենահավաստի աղբյուրը, որին կարող էր վստահել Վարդան Արեւելցին: Հատվածի ավարտական նախադասությունն էլ դրա հավաստումն է: Մանուչեի ժամանակ Անիի վերաշինումը «ոչ պակաս քան նախկինը», մի պատասխանատու հայտարարություն էր, որ 13-րդ դարում ապրող Վարդան Արեւելցին դժվար թե իրեն թույլ տար, եթե լավատեղյակ աղբյուրից չքաղեր այդ միտքը:

Հիշյալ հատվածը մի շարք կարեւոր հանգամանքներ է պարզում: Նախ այն, որ բյուզանդական տիրապետության շրջանում եւ Ալփասլանի սելջուկյան ներխուժումից հետո Վասակն ու նրա որդի Գրիգորը կարողացել են պահպանել իրենց զինական ուժն ու գործությունը⁸⁰: Նրանք նոր պայմաններին հարմարվելով եւ համաձայնության գալով Մանուչեի հետ, վերադարձաւ են Անի: Դա տեղի է ունեցել Մանուչեի իշխանության անցնելուց կարճ ժամանակ անց, քանի որ արդեն 1072 թ. Վասակի որդին՝ Բարսեղը, Անիում եպիսկոպոս է ձեռնադրվել:

Վկայությունից պարզվում է, որ Անի վերադառնալու ժամանակ թեւեւ Վասակը ողջ էր, սակայն գուցե ծերության պատճառով, առաջնությունը զիջել էր ավագ որդուն՝ Գրիգորին: Նույն հատվածից երեւում է, որ Բարսեղի կաթողիկոսական ձեռնադրությունը (1081) տեղի է ունեցել նաեւ Մանուչեի «հրամանաւ եւ կամօք»:

Մինչեւ Վասակի որդիներ Գրիգորի ու Բարսեղի գործունեությունը ծանոթանալը անդրադառնանք Բաղաց (Սյունիքի) թագավորության վերջին գահակալներից մեկի՝ Սենեքերիմի սպանության

⁸⁰ Հայտնի է, որ Հայաստանում բյուզանդական տիրապետությունը հատկանշվում էր հայկական զինվորականության կազմալուծման քաղաքականությամբ (Հայ ժողովրդի պատմություն, հ. 3, էջ 434-435):

մասին Վարդան Արեւելցու եւ Մխիթար Այրիվանեցու մոտ պահպանված մի տեղեկության, որն առանձին մեկնաբանության կարիք ունի:

Վերը նշված՝ Մանուչեի ժամանակ Հասանյանների Անի գալու մասին հատվածից անմիջապես առաջ Վարդան Արեւելցու մոտ կարդում ենք հետեւյալը. «Ի հինգ հարիւր քառասուն եւ երեք (1094) թուին առաքեաց Փատլուն ամիրայն Գանձակայ զՎասակ Պահլաւ՝ որդի Գրիգորոյ Մագիստրոսի, ամենայն զօրօքն Առանայ յանառիկ յամուրսն Բաղաց եւ Կապանին, որ եւ խաբէութեամբ հնարեալ մտին անդր եւ սպանեալ զՍենեքերիմ արքայն Հայկազնի...»⁸¹: Սենեքերիմի սպանության մասին ավելի հանգամանորեն պատմում է Ստեփանոս Օրբելյանը, ըստ որի, այն տեղի է ունեցել ոչ թե Վասակի, այլ նրա որդու՝ Գրիգորի հարկադրական մասնակցութեամբ (այդ մասին՝ քիչ հետո): Սակայն այս հատվածը հետաքրքրական է նրանով, որ այստեղ Վասակի հայրը՝ Գրիգոր Ապիրատը, ներկայացվում է Գրիգոր Մագիստրոս անունով, ինչպես որ վերը նշված 11-րդ դարի արձանագրություններում: Այս տեղեկությունն Արեւելցին վստահաբար Մխիթար Անեցուց չի քաղել, քանի որ վերջինս, ինչպես տեսանք, իշխանին կոչում է Ապիրատ:

Գրիգոր Մագիստրոս անվան առկայությունն այս հատվածում ոմանց թյուրիմացության մեջ է գցել, ենթադրել տալով, որ խոսքը նույնանուն Պահլավունի (Բջնեցի) իշխանի մասին է, մանավանդ որ Վասակի անվան կից նշված է «Պահլաւ»: Սակայն Գրիգոր Մագիստրոս Պահլավունու Վասակ անունով որդին հեռավոր Անտիոքի դուքսն էր եւ դավադրաբար սպանվել է 1078 թվականին⁸²: Հ. Մանանդյանը գրում է. «Վարդանը եւ Մխիթար Այրիվանեցին կարծում են սխալմամբ, որ այս արշավանքի ժամանակ Փատլունի զորա-

⁸¹ Վարդան Արեւելցի, էջ 108:

⁸² Լ. Տեր-Պետրոսյան, Խաչակիրները եւ Հայերը, հ. Ա, Երեւան, 2005, էջ 418-419:

վարն էր Գրիգոր Մագիստրոսի որդին՝ Վասակ Պաիվաժունին»⁸³։ Սակայն հիշյալ պատմիչները չեն սխալվում, պարզապես նրանց ունեցած սկզբնաղբյուրը Գրիգոր Մագիստրոս նախնական անունով է կոչել Վասակի հորը՝ Գրիգոր Ապիրատին։ Իսկ Վասակին նրանք իրավունք ունեին նաեւ «Պաիվա» կոչելու, քանի որ վերջինիս մայրը Գրիգոր Բջնեցու դուստրն էր։ Սխալմունքը միայն նրանում է, որ հիշյալ դեպքերի մասնակիցը ոչ թե Վասակն էր (նա այդ ժամանակ 90-ամյա ծերունի կլիներ), այլ նրա որդին՝ Գրիգորը։

ՎԱՍԱԿԻ ՈՐԴԻՆԵՐԸ՝ ԻՇԽԱՆ ԳՐԻԳՈՐ ԵՒ ԲԱՐՍԵՂ Ա ՎԱԹՈՂԻԿՈՍ

Վասակը ունեցել է չորս որդի՝ Գրիգոր, Բարսեղ, Հասան, Ապլջահապ։ Ինչպես վերը տեսանք, սրանցից առաջինը հիշվում է պապի անունով անվանակոչված Գրիգորը, որի գլխավորությամբ Հասանյանների այս ընտանիքը Անի է վերադարձել Մանուչե ամիրայի հրավերով։ Երկրորդ հիշատակվողը Բարսեղն է, որն Անիի եպիսկոպոս է դարձել 1072 թվականին, իր մորեղբոր՝ կաթողիկոս Գրիգոր Վկայասերի կամքով. «...Տէր Գրիգորիս (Վկայասերը – Կ. Մ.) գնացեալ ի մայրաքաղաքն Հայոց, որ կոչի Անի, եւ անդ ձեռնադրեաց եպիսկոպոս զԲարսեղն՝ զքեռորդին իւր՝ զորդի Վասակայ, որդւոյ Ապիրատին, որդւոյ Հասանայ»⁸⁴։

Դրանից շատ չանցած՝ 1081 թ. Գրիգոր Վկայասերի համաձայնությամբ Բարսեղը Հաղբատում հանդիսավորապես ձեռնադրվում է Հայոց կաթողիկոս ու փառավոր երթով ուղեւորվում Անի, որի մուտքի մոտ նրան դիմավորում են իր ազգակիցներն ու ցնծացող ժողովուրդը. «...ի վանքն, որ կոչի Հաղբաթ, ձեռնադրեցին զտէր Բարսեղ կաթողիկոս յաթոռ սրբոյն Գրիգորի՝ ի վերայ ամենայն աշ-

⁸³ Հ. Մանանդյան, Երկեր, հ. Գ, Երեւան, 1977, էջ 88, տեւս նաեւ Հ. Աճառյան, Հայոց անձնանունների բառարան, հ. Ե, Երեւան, 1962, էջ 50։

⁸⁴ Մատթեոս Ուռհայեցի, էջ 226, Սմբատ Սպարապետ, էջ 82։

խարհին Յայոց... Յայսմ ժամանակի նորոգեալ եղել արժոք սրբոյն Գրիգորի ի քաղաքն Անի... Եւ ելեալ գայր Բարսեղ կաթողիկոսն Յայոց ի թագաւորաբնակ քաղաքն Անի, եւ ելեալ ամենայն Տունն Շիրակայ գնալ ընդ առաջ նորա, **եւ ահա գայր Վասակ՝ հայրն տէր Բարսղի եւ եղբարք նորա՝ Յասան եւ Գրիգոր եւ Ապլջահապ, արք քաջք եւ հզօրք՝ հանդերձ եպիսկոպոսօք, եւ նստուցին զտէր Բարսեղ յաթոռ տեառն Պետրոսի:** Եւ եղել օրն այն օր մեծ եւ ուրախութիւն ամենայն Տանն Յայոց, վասն զի տեսին նորոգեալ զարժոք հայրապետութեանն ի քաղաքն յԱնի»⁸⁵:

Այստեղ ուշադրության է արժանի ոչ միայն Բարսեղի տոհմակիցների թվարկումը, այլեւ այն, որ պատմիչն Անիի արժոքը համարում է քաղաքից հեռացած վերջին կաթողիկոս Պետրոսի (Գետադարծ) արժոքը:

Մինչեւ Գրիգոր Վկայասերի մահը՝ 1105 թ., Բարսեղ Ա Անեցին համարվում է նրա արժոնակիցը, որից հետո՝ մինչեւ 1113 թ.՝ միանձնյա կաթողիկոս, թեւէ ձեռնադրությունից անմիջապես հետո նա իր ձեռքն է վերցնում կաթողիկոսական վարչական իշխանությունը:

Յայաստանեայց եկեղեցու ընդհանուր վիճակն այդ ժամանակ անմախաղեպ էր, առաջացել էին մի քանի հակաթոռ կաթողիկոսություններ⁸⁶: Բարսեղ Անեցին կաթողիկոսական արժոն ամրապնդելու եւ եկեղեցու դրությունը բարվոքելու համար 1090 թ. մեծ պատվիրակությամբ ուղեւորվում է սելջուկյան պետության տիրակալ Մելիքշահի մոտ, նրանից ստանում անհրաժեշտ արտոնություններ, որոնք շուտով գործադրում է հակաթոռ կաթողիկոսությունների դեմ⁸⁷: Ինչպես Սամվել Անեցու ժամանակագրության լրաց-

⁸⁵ Մատթեոս Ուռհայեցի, էջ 236-238:

⁸⁶ Մ. Օրմանյանը գրում է. «Այս շփոթ կացութեան մէջ Բարսեղն էր միայն, որ իրաւ հայրապետական պաշտօն կը վարէր, իր հօտին հոգածութիւնն ունէր եւ անոր ներքին եւ արտաքին պէտքերը լրացնելու կ'աշխատէր»: (Մ. Օրմանյան, Ազգապատում, հ. Ա, Ս. Էջմիածին, 2001, էջ 1536):

⁸⁷ Մատթեոս Ուռհայեցի, էջ 256-258:

նողներից մեկն է գրում, Բարսեղը հնազանդեցնում է «զամենայն հակառակսն»⁸⁸:

Բարսեղ Անեցու գործունեությունը բավական լավ է ուսումնասիրված⁸⁹, ուստի այստեղ դրան չենք անդրադառնում: Նշենք միայն, որ մինչ Բարսեղը Անիում քայլ առ քայլ ամրապնդում է եկեղեցու դիրքերը, վերականգնում կաթողիկոսարանի դպրոցը, այն հանձնելով ժամանակի նշանավոր վարդապետ Հովհաննես Սարկավազին⁹⁰, հոգ տանում ժողովրդի հոգեւոր կորովը պահպանելու մասին⁹¹, նրա եղբայր Գրիգոր իշխանն իր զինվորական ծառայությունն էր կատարում Շաղդադյանների մոտ՝ երբեմն հարկադրված լինելով գործել նաեւ իր հայրենակիցների դեմ:

Ստեփանոս Օրբելյանը Բաղաց թագավորության կործանմանն անդրադառնում է երկու անգամ, հակառակ հերթականությամբ: Նախ «Սյունիքի թագավորները» բաժնում (գլ. ԾԹ) պատմում է Սեյնքերիմ թագավորի սպանության մասին (շուրջ 1094 թ.), իսկ ավելի ուշ, Կապանի գրավման եւ թագավորության անկման բաժնում (գլ. ԿԱ) տեղեկացնում է, թե ինչպես էր Սեյնքերիմը, մի հարցում խոստումնազանց լինելով, մահմեդականների թշնամությունը հաղթել⁹²:

⁸⁸ Անեցի, էջ 117:

⁸⁹ Մ. Օրմանյան, Ազգապատում, էջ 1506-1576, Կ. Մաթեոսյան, Անի, էջ 47-58:

⁹⁰ Կ. Մաթեոսյան, Հովհաննես Սարկավազի գործունեությունն Անիում, «Էջմիածին», 2005, է-Ը, էջ 59-72:

⁹¹ Վարդան Արեւելցու վկայությամբ 1094 թ. մեծ հանդիսավորությամբ Անի է բերվում մի նշանավոր սրբություն՝ Նունեի խաչը, որը Հայաստան էր տեղափոխվել դեռևս Սահակ Պարթևի ժամանակ, պահվել տարբեր տեղերում: Այն Անի բերելով Բարսեղ կաթողիկոսն այստեղ դրա համար հատուկ տոն է սահմանում (Վարդան Արեւելցի, էջ 115):

⁹² Ստեփանոս Օրբելեան, Պատմութիւն մահանգին Սիսական, Տփղիս, 1910, էջ 332-333, Ստեփանոս Օրբելյան, Սյունիքի պատմություն, թարգմանությունը եւ ծանոթագրությունները Ա. Աբրահամյանի, Երեւան, 1986, էջ 277-278:

Օրբելյանը գրում է, որ Մելիքշահի մահից հետո Գանձակի ամիրան Սենեքերիմին պաշարում է բերդում: Ամիրայի հետ էր «Շիրակայն իշխանն՝ Գրիգոր Ապիրատեան»⁹³: Տեսնելով բերդի անմատչելիությունը՝ ամիրան Գրիգորին ուղարկում է Սենեքերիմի մոտ, համոզելու, որ իր մոտ գա, որից հետո նրան պարգևներով ազատ կարձակի, իհարկե, չմոռանալով Գրիգորին սպառնալ, որ եթե Սենեքերիմին չբերի, կյանքից կզրկվի: Գրիգորը բերում է Սենեքերիմին, ամիրան դրժում է խոստումը, սպանում թագավորին եւ հեռանում իր երկիրը: Սենեքերիմի որդիները, Սյունյաց մեծամեծները գալիս սգում են թագավորի կորուստը եւ նրա դին տանում են հողին հանձնում Վահանավանքում⁹⁴: Սյունյաց գահը ժառանգում է Սենեքերիմի որդի Գրիգորը:

Հասանյան Գրիգոր իշխանի վարքն այս պատմության մեջ պայմանավորված էր նրա ծառայության բնությով: Նա իր զորականներով պետք է ծառայեր Անիի ամիրային, եւ հենց այդ պարտականությունը կատարելիս էլ, որոշ ժամանակ անց, զրկվեց կյանքից:

Գրիգորի մահվան մասին (1099 թ.) պատմում են Մատթեոս Ուռհայեցին եւ Վարդան Արեւելցին: Վերջինս, մեր կարծիքով, օգտվել է Մխիթար Անեցու պատմությունից: Այստեղ Գրիգորը ներկայացվում է որպես քաջ պատերազմող, ցույց է տրվում նրա վայելած մեծ հեղինակությունը: Բուն դեպքը տեղի է ունենում Անիի ամիրայության սահմանները ներխուժած ասպատակիչների դեմ մղված կռվում, որի մասին Վարդան Արեւելցու մոտ կարդում ենք. «...ազգ մի սկիւթական, որ ի վաղեաց ժամանակաց ղօղեալ կեայր առ Վրկանօք, անուն գլխաւորին Ելխագի կոչեցեալ, որ եկն եօթն հազարաւ ընդ միջոցս աշխարհի մինչեւ յԱնի քաղաք պատերազմաւ. եւ մեռաւ անդ եղբայր նորա, որ նման էր Գողիադու հսկայի, ի Գրիգորոյ որդւոյ Վասակայ, թոռին Ապիրատին, որ զկնի աւուրց նահատակեցաւ

⁹³ Ստեփանոս Օրբելեան, Պատմութիւն նահանգին Սիսական, էջ 320:

⁹⁴ Նույն տեղում, էջ 320-321, Ստեփանոս Օրբելյան, Սյունիքի պատմություն, էջ 270:

ի Կաղզուանն, գերծուցեալ ի մահուանէ զամիրայն Անույ զՄանուչէ. եւ տարեալ թաղեցին զնա ի Կեչառուս. եղբայր Տէր Բարսղի կաթողիկոսի. եւ Մանուչէ եւ ամենայն զօր բանակին Հայոց զկնի դիոյն»⁹⁵:

Գրիգոր իշխանի հանդիսավոր հուղարկավորությունը Կեչառիսում վկայում է, որ Գրիգոր Ապիրատի հիմնադրած այդ վանքը նրա որդի Վասակի տոհմաճյուղի հանգստարանն էր:

Գրիգորի մահվան մասին փոքր ինչ այլ կերպ է պատմում Մատթեոս Ուռհայեցին: Նախ իշխանին կոչում է «Գրիգոր կուրապաղատ արեւելից», ապա նշում, որ նա զորքով զնաց Կաղզվան, այնտեղ պարտության մատնեց թուրքերին, որից հետո Անի վերադառնալու ճանապարհին սպանվեց դարանակալ մի թուրքի արծակած նետից. «...դարձեալ գնալով ի քաղաքն Անի, յայնժամ մի ոմն ի դարանի կայր ի թուրք զորացն ընդ ծառով միով, եւ գաղտ նետիւ հարեալ զնա ի բերանն եւ ի սաստիկ խոցոյն ի յերկիր անկեալ աւանդեաց զհոգին, եւ եղեւ սուգ մեծ Շիրակայ եւ ամենայն Տանն Հայոց»⁹⁶:

Այսպիսով Արեւելցին եւ Ուռհայեցին միմյանց լրացնելով ներկայացնում են Գրիգորի մահվան հանգամանքները: Ձարմանալի է, բայց փաստ, որ Վասակի ավագ որդու՝ Գրիգորի սպանությունից

⁹⁵ Վարդան Արեւելցի, էջ 113-114, աշխարհաբար՝ էջ 153: Ներկայացնում ենք այս հատվածի մեր կատարած աշխարհաբար թարգմանությունը, քանի որ հրատարակության մեջ եղած թարգմանությունը բնագրից իմաստային լուրջ շեղումներ ունի (տե՛ս Կ. Մաթեոսյան, Վարդան Արեւելցին Անիի պատմության մասին, «Էջմիածին», 2002, էջ 92-95): «...Սկյութական մի ցեղ, որ վաղ ժամանակներից աննկատ ապրում էր Վրկանից աշխարհի մոտ, որի առաջնորդի անունը Ելխագի էր, յոթ հազար հոգով, պատերազմելով (Հայոց) աշխարհի միջով գալիս է մինչեւ Անի քաղաքը, եւ այդտեղ նրա եղբայրը, որ նման էր հսկա Գողիաթին, սպանվում է Վասակի որդի եւ Ապիրատի թոռ Գրիգորից, որը օրեր անց նահատակվում է Կաղզվանում, մահից փրկելով Անիի ամիրա Մանուչեին, եւ նրան՝ Բարսեղ կաթողիկոսի եղբորը՝ տանում թաղում են Կեչառիսում եւ դիակի հետեւից գնում էին Մանուչեն եւ հայոց բանակի ամբողջ զորքը»:

⁹⁶ Մատթեոս Ուռհայեցի, էջ էջ 288-289:

շուրջ մեկ տասնամյակ անց (մոտ. 1110 թ.) Վասակի եղբոր՝ Ապլջահապի ավագ որդու՝ Ապիրատ իշխանի սպանությունը տեղի է ունեցել ճիշտ նույն ձեռով՝ դարանակալ թշնամուց նետահարությամբ, որը պատկերավոր կերպով նկարագրել է նրա որդին՝ Ներսես Շնորհալին⁹⁷:

Կարծես թե ճակատագրական մի բան կա այս տոհմի պատմության մեջ, սկսած Գրիգոր եւ միաժամանակ Ապիրատ առեղծվածային անունով անհայտ մեկի, միանգամից մագիստրոսի պատվաստիճանով պատմական թատերաբեմ իջնելուց, նրա եղերական մահից մինչեւ նրա անունով անվանակոչված ավագ թոռների՝ Գրիգորի եւ Ապիրատի նույնանման սպանությունը: Ակամա այդ տխուր օրինաչափությունների շարունակողը եղավ նաեւ Գրիգոր իշխանի եղբայրը՝ Բարսեղ Ա Անեցին, որը կաթողիկոսի համար անսովոր վախճան ունեցավ: 1113 թ. մայիսին նա զոհ գնաց մի դժբախտ պատահարի, անսպասելիորեն փլված շենքում մահացու վիրավորվելով: Սակայն մինչեւ մահկանացուն կնքելը Բարսեղը հասցրեց կատարել 1105 թվականին մահվան մահճում գտնվող Գրիգոր Վկայասերին տված խոստումը⁹⁸ եւ Ապիրատ իշխանի որդուն՝ 15

⁹⁷ Շնորհալին գրում է, որ այն օրը, երբ իր եղբայրը քահանայական ձեռնադրության արժանացավ, եւ իրենք ուրախության մեջ էին, գույժ ստացան իրենց հոր մահվան մասին, որը տեղի էր ունեցել Ծովք ամրոցում, հետեւյալ կերպ. «Թագնաբար անդ դարանեալ, / Յագարացի ոմն նստեալ, / Ըզլայնալիճն լի քարշեալ, / Թէ երբ նայի դետակն առեալ: / Յորժամ ետես ունայնացեալ, / Ի վահանէն, որով ծածկեալ, / Երեքթեւեան եռաթունեալ, / Յանկարծակի ըզնա հարեալ... / Եւ գյաղթանդամն ջախջախեալ...» (Ներսեսի Շնորհալոյ Բանք չափաւ, էջ 602-603):

⁹⁸ Բարսեղն Անիից Քեսուն է գալիս Գրիգոր Վկայասերի կանչով եւ 1105 թ. դառնալով միանձնյա աթոռակալ, որոշում է մնալ Քեսունի շրջանում: Գրիգոր Դարանաղեցին գրում է, որ «յորժամ հեռացաւ Տէր Բարսեղն... ի յԱնույ», դրանից Հայաստանում դժգոհեցին «մեծամեծ հռչակաւոր վանորէից եպիսկոպոսքն»: Հետաքրքիր է, որ նրա թվարկած հինգ վանքերից երկուսը Հասանյան տան հոգեւոր կենտրոններն էին Կեչառիսը եւ Հավուց թառը (ժամանակագրութիւն Գրիգոր վարդապետի Կամախեցոյ, Երուսաղեմ, 1915, էջ 303):

կամ 17-ամյա Գրիգորին եպիսկոպոս ձեռնադրել: Բարսեղի մահից մի քանի օր հետո, նրա պատգամի համաձայն, Գրիգորը ձեռնադրվեց կաթողիկոս (Գրիգոր Գ Պահլավունի) եւ շարունակեց Գրիգոր Բ Վկայասերից սկզբնավորված «Պահլավունյաց» կաթողիկոսական տոհմը:

Հասանյանները որպես աշխարհիկ եւ հոգեւոր առաջնորդներ լայն գործունեություն են ունեցել Անիում նաեւ 12-րդ դարում⁹⁹, որն առանձին քննության նյութ է:

Ամփոփելով կարող ենք ասել, որ հայտնի եւ նորահայտ նյութերի շնորհիվ ուրվագծվում է Անիի Բագրատունյաց թագավորության իշխանական տներից մեկի սկզբնավորման պատմությունը: Քեղի ամրոցի իշխան Հասանի ավագ որդին՝ Գեւորգը ժառանգել է հոր իշխանությունը, 1002 թ. կառուցել է Հավուց թառի Կաթողիկե եկեղեցին, իսկ կրտսեր որդին՝ Գրիգոր Ապիրատն իր խելքով եւ ձեռներեցությամբ կարողացել է ավելի մեծ դիրքի հասնել, արժանանալ մագիստրոսության պատվաստիճանի եւ «մեծ իշխան» հորջորջման: 1003 թ. Գրիգոր Ապիրատը կառուցել է Կեչառիսի Ս. Գրիգոր մեծադիր եկեղեցին: 1021 թ. Բագրատունի Յովհաննես Սմբատ եւ Աշոտ Դ եղբայրների միջեւ ծագած գահակալական կռիվներից հետո, Աշոտի լարած խարդավանքի ժամանակ հրաժարվելով թագավորասպան դառնալուց, Գրիգոր Ապիրատն ընտանիքով ապաստանել է Դվինի ամիրայի մոտ, սակայն այստեղ դավադրաբար սպանվել է: Նրա ընտանիքը տեղափոխվել է Անի, ուր Յովհաննես Սմբատ

⁹⁹ Անիի Հասանյանների մասին տե՛ս Ն. Ակինյան, Ներսես Լամբրոնացի, էջ 394-397, Հ. Մարգարյան, Հյուսիսային Հայաստանի եւ Վրաստանի..., էջ 102, 120, 155-156, 166, Կ. Մաթեոսյան, Անի, էջ 62-82, 116-120: Մեր կարծիքով Հասանյանների տոհմից է եղել նաեւ Մաղարդավանքի առաջնորդ Գրիգորիսը, որը հիշվում է «Էջմիածնի Ավետարանի» 1173 թ. հիշատակարանում եւ մեկ այլ ձեռագրի անթվական հիշատակարանում, ուր անվանվում է «Գրիգորեւ, որդի Ապիրատին»: Հետաքրքիր է, որ այդ ձեռագիրը Մաղարդավանքին նվիրողը բնակվում էր «մերձ առ ղղեկին Քեղայոյ» (Հայերեն ձեռագրերի հիշատակարաններ, Ե-ԺԲ դդ., էջ 213, 312):

թագավորն ստանձնել է մահացած իշխանի զավակների խնամակալությունը: Գրիգոր Ապիրատի դուստրը կնության է տրվել Վեստ Սարգիս իշխանին, իսկ որդիները՝ Ապլջահապը եւ Վասակը կնության են առել Գրիգոր Պահլավունի (Բջնեցի) իշխանի երկու դուստրերին: Առաջինի ընտանիքը 1045 թվականից հետո բյուզանդական ծառայության անցած եւ մագիստրոս դարձած Գրիգոր Պահլավունու հետ տեղափոխվել է հարավ՝ Միջագետք Յայոց, վայելելով նրա ու 1066-ին կաթողիկոս դարձած նրա որդու՝ Գրիգոր Վկայասերի հովանավորությունը: Այս ընտանիքի անդամներն ու ժառանգները մայրական գծով Պահլավունի լինելու շնորհիվ Յայոց եկեղեցուն հաջորդաբար հինգ կաթողիկոս են պարգևել: Իսկ Վասակի ընտանիքը մնացել է Անիում եւ այստեղ առաջնակարգ դիրք գրավել:

Վերջում զետեղում ենք Հասանյանների տոհմաճառը, մասամբ լրացնելով նախկինում Ներսես Ալիմյանի կազմածը¹⁰⁰:

¹⁰⁰ Ն. Ալիմյան, Ներսես Լամբրոնացի, ներդիր 402-403 էջերի միջեւ: Ն. Ալիմյանը Հասանյանների տոհմաճառի ստորին մասում զետեղել է 12-րդ դարի վերջերին եւ 13-րդ դ. սկզբում Շիրակում հայտնված մի տոհմի անդամների անունները, ումն Ապուղամրի գլխավորությամբ, որի զավակներն իրենց համարում էին սպարապետ Վահրամ Պահլավունու սերունդ եւ այդ մասին արձանագրություն ունեն Մարմաշենում: Այս տոհմը կապ չունի Հասանյանների հետ (Կ. Մաթեոսյան, Անի, էջ 76): Նույն տոհմաճառում որպես Ապլջահապի որդի Վասակի որդիներ են նշվում Ապլդարիպը եւ Լիկոսը (նույն տեղում, էջ 384-385), որոնք իրականում Գրիգոր Մագիստրոս Բջնեցու Վասակ որդու զավակներն են (Լ. Տեր-Պետրոսյան, Խաչակիրները եւ հայերը, հ. Ա, էջ 423): Մենք ավելացրել ենք տոհմապետ Հասանի որդի Գեւորգ իշխանի ճյուղը, 12-րդ դարում ապրած Հասան Մագիստրոսի եւս մի որդու եւ փեսայի անունները (Մանր ժամանակագրություններ, հ. 2, էջ 502), կիլիկյան տոհմաճյուղում՝ Գրիգոր Դ Տղա կաթողիկոսի քրոջը, որի ամուսինն էր Կիլիկիայի Յայոց իշխան Մլեիը (Լ. Տեր-Պետրոսյան, Խաչակիրները եւ հայերը, հ. Բ, էջ 152), միաժամանակ յուրաքանչյուր գործչի անվանը կից նշել ենք նրա հիշատակության թվականները (կաթողիկոսների դեպքում՝ աթոռակալության տարիները):

ԳՐԻԳՈՐ ՄԱԳԻՍՏՐՈՍ ՊԱՅԼԱՎՈՒՆՈՒ ԱՐՁԱՆԱԳՐՈՒԹՅՈՒՆԸ ԿԵԶԱՌԻՍՈՒՄ

Կեչառիսի վանքը միջնադարյան Հայաստանի ամենանշանավոր եկեղեցական, հոգեւոր եւ մշակութային կենտրոններից էր: Վանքի հնագույն եւ գլխավոր **Սուրբ Գրիգոր** մեծադիր եկեղեցին կառուցել է Բագրատունյաց պետության մեծ իշխան Գրիգոր Ապիրատ Մագիստրոսը: Եկեղեցու հիմնադրման մասին է վկայում հարավային մուտքի բարավորի վեցտողյա արձանագրությունը.

ՆՁԲ (1033) Թ. ՀԱ(ՅՈՑ). Ի ԹԱԳԱՒՈՐՈՒԹԵ
ԱՆ ԳԱԳԱ ԵՒ Ի ՀԱՅՐԱՊԵՏՈՒԹԵԱՆ Տ(ԵԱՌ)Ն
ՍԱՐԳՍԻ, ԵՍ ԳՐԻԳՈՐ ՄԱԳԻՍՏՐՈՍ, ՈՐԴԻ ՀԱՍԱՆ
Ա, ՇԻՆԷՑԻ ԶԵԿԵՂԷՑԻՍ՝ ԻՆՁ Ի ԲԱՐԵԽՈՍՈՒԹ(ԻՒ)Ն ԵՒ Ի
Ս ՊԱՏՐՈՆԻՆ ԵՒ ԻՍ ՈՐԴԵԱՑՆ. ՈՐՔ ԸՆԹԵՆՈՆՅՔ Զ
ԻՍ ՅԱՂԱԹՅՈՒ ՅԻՇԷՑԷՔ Ի Ք(ՐԻՍՏՈ)Ս ԱՂԱԶԵՄ:

Նկատի ունենալով արձանագրության մեջ 1017 թ. մահացած Գագիկ Ա Բագրատունի թագավորի եւ 1019 թ. կաթողիկոսական աթոռից հրաժարված Սարգիս Ա Սեւանցու անունների առկայությունը, դեռեւս Ղեւոնդ Ալիշանը, այնուհետեւ Գարեգին Հովսեփյանը եւ Ներսես Ակինյանն առաջարկել են արձանագրության սկզբում նշված ՆՁԲ (1033) թվականը համարել գրչական սխալ եւ սրբագրել ՆԾԲ (1003)¹:

Հայ պատմիչները եկեղեցու կառուցման թվականը չեն հայտնում իսկ Գրիգոր Ապիրատին հիշատակում են միայն Ապիրատ ա-

¹ Ղ. Ալիշան, Այրարատ, Վենետիկ, 1890, էջ 259, Գ. Հովսեփյան, Խաղբակեանք կամ Պռոշեանք Հայոց պատմութեան մէջ, Ամթիլիաս, 1969, էջ 159, Ն. Ակինեան, Ներսէս Լամբրոնացի, Վիեննա, 1956, էջ 374: Հավանաբար արձանագրության տեքստը թելադրվել է փորագրող վարպետին, որի դեպքում Ձ (Ձա) եւ Ծ (Ծա) տառ-հնչյունների շփոթությունը միանգամայն հնարավոր է: Հայկական վիմագրերում նման սխալներ էլի են հանդիպում:

նունով եւ նշում, որ նա «**շինեաց զսուրբ ուխտն Կեչառու...**»²: Կեչառիսի կառուցման վերաբերյալ հայտնի է նաեւ Սիմեոն Երեւանցու «Ջամբռում» տեղ գտած վկայությունն, ըստ որի եկեղեցին «սկզբնապես հիմնվել է 444 (995) թվին Ապիրատ իշխանի կողմից»³: Սիմեոն Երեւանցին թվական նշելու համար որել է աղբյուր պիտի ունեցած լիներ, որը ցավոք առայժմ հայտնի չէ: Կարելի է ենթադրել, որ 995-ը եկեղեցու հիմնարկերի թվականն է, իսկ ավարտվել է շինարարությունը 1003-ին:

Կեչառիսի վանքի պատմությանն անմիջականորեն առնչվում է նաեւ Գրիգոր Մագիստրոս Պահլավունու (Բջնեցու) անունը: Գրիգոր Ապիրատի մահից հետո (1021) Գրիգոր Պահլավունին իր հովանավորության տակ առավ նրա երկու որդիներին՝ Ապլջահապին եւ Վասակին, որոնց կնության տվեց իր երկու դուստրերին, իսկ 1045 թ. Բագրատունյաց պետության անկումից հետո բյուզանդական կայսրից ստացավ մագիստրոսության պատիվ. «Գրիգոր որդի քաջին Վասակայ... զնաց առաջի թագաւորին եւ... տայ զբանալին Բջնոյ զթագաւորն եւ զամենայն զիւր զհայրեանի ժառանգութիւնն եւ... առնու զպատիւ **մագիստրոսութեան** եւ տեղիս բնակութեան ի սահմանս Միջագետաց...»⁴: Գրիգոր Պահլավունին նշանակվեց Տաւրոնի ու Հայկական Միջագետքի կուսակալ:

Այդ շրջանում կայսրությունը պայքար էր սկսել Հայոց եկեղեցու դեմ: Կաթողիկոսական աթոռը հեռացվել էր Անիից (1046 թ.), դավանաբանական հողի վրա հայերի նկատմամբ սկսվել էին բազմապիսի հալածանքներ⁵: Նման պայմաններում Գրիգոր Մագիստ-

² Վարդան Արեւելցի, Տիեզերական պատմություն, աշխարհաբար թարգմանությունը Գ. Բ. Թոսունյանի (գրաբար տեքստը ըստ Վենետիկի 1862 թ. տպագրության), Երեւան, 2001, էջ 103, 3-րդ տ. Մխիթար Այրիվանցի, Պատմութիւն Հայոց, Մոսկուա, 1860, էջ 58:

³ Սիմեոն Կաթողիկոս Երեւանցի, Ջամբռ, Երեւան, 2003, էջ 395:

⁴ Արիստակիսի Լաստիվերցույ Պատմութիւն (աշխատասիրությամբ՝ Կ. Յուզբաշյանի), Երեւան, 1963, էջ 62:

⁵ Կ. Մաթեոսյան, Անի, Ս. Էջմիածին, 1997, էջ 36-47, 193:

րոս Պահլավունին արքունիքում ունեցած իր հեղինակությունն օգտագործելով արտոնություններ ստացավ առանձին վանքերի համար: Այդ բախտին արժանացան նրա հորեղբայր Վահրամ Պահլավունու կառուցած Մարմաշենի վանքը եւ Կեչառիսը:

Մարմաշենին կայսերական արտոնություն շնորհելու մասին է վկայում Պահլավունի իշխանի նամակը՝ հասցեագրված Մարմաշենի Սոսթենես վանահորը⁶: Ավելի ընդարձակ են Կեչառիսի մասին պահպանված տեղեկությունները:

Գրիգոր Մագիստրոս Պահլավունու անունից մի մեծ արձանագրություն է գրված Կեչառիսի Ս. Գրիգոր եկեղեցու հարավային պատի վերնամասում: Սակայն պահպանվել է նաեւ այս արձանագրությանն առնչվող, ժամանակին իտալերեն թարգմանված եւ Հռոմի դիվաններից մեկում պահված մի փաստաթուղթ, որ հրատարակել է Սեն Մարտենը, եւ որից քաղելով այն գրաբարի է վերածել Ղ. Ալիշանը: Գրությունը հետեւյալն է.

«Ի Շ (1051) թուականիս, ի ժամանակս Կոստանդնոյ Մոնոմախի թագաւորի Հայոց (Յունաց), դուքսս Վասպուրականի, գաւառիս Ծաղկնուց եւ Գրիգոր Մագիստրոս որդի Վասակայ, հրովարտակաւ եւ հրամանաւ վերոյասացեալ թագաւորիս՝ հիմնադրեալ շինեցի զեկեղեցիս ի տեղուջս որ կոչի Կեչառուս, ի նախասացեալ գաւառիս Ծաղկնուց, հանդերձ մատրամբ. եւ նուիրեցի զտաճարս եւ զեկեղեցիս յանուն Սրբոյն Գրիգորի Լուսաւորչի մերոյ. եւ զարդարեցի զսասպասութ արծաթեղինօք եւ ոսկեղինօք, գրովք եւ այլովք պիտոյիւք, որպէս վայել էր տաճարիս: Դարձեալ ետու եկեղեցւոյս զեօղս երկուս եւ այգի մի:

(Եւ) մեք շնորհիւն Աստուծոյ եպիսկոպոսունքս Բջնոյ՝ Վանական եւ Համավար, սահմանեցաք եւ հաստատեցաք ի թեմ եւ կալուած վերոյգրեալ եկեղեցւոյս՝ զեօղս քսան եւ հինգ եւ քաղաք մի, որք են Բուժան, Շոկաթն (եւ այլն...):

⁶ Գրիգոր Մագիստրոսի թղթերը (աշխատասիրությամբ՝ Կ. Կոստանյանցի), Ալեքսանդրապոլ, 1910, էջ 103-104, 304:

Եւ հաստատեցաք զվճիռս մերով ձեռնագրովս եւ կնքովս: Արդ ե-թէ որ յետ մեր կամ յեկեղեցականաց կամ յաշխարհականաց իշ-խեսցէ հակառակ կալ վճռոյս մերոյ, նզովս առցէ ի Սրբոյն Գրիգորէ մերոյ Լուսաւորչէ եւ ՅԺԸ հայրապետացն Նիկիոյ ժողովոյն, եւ մասն եւ բաժին նորա ընդ Յուդայի մատնչի եւ ընդ խաչհանուացն Քրիս-տոսի եղիցի, իսկ որ հաստատուն պահէ՝ օրհնեալ եղիցի ի Տիառնէ Աստուծոյ»⁷:

Ինչպես տեսնում ենք, փաստաթուղթը 1051 թվականից է, առա-ջին մասը գրված է Գրիգոր Մագիստրոս Պաշլավունու, երկրորդ մասը՝ Բջնիի եպիսկոպոսներ Վանականի եւ Համավարի (Համա-վո՞ր) անունից, որոնք նշում են Կեչառիսին որպես թեմ հատկա-ցված 25 գյուղի եւ մեկ քաղաքի մասին: Ցավոք բնակավայրերի ա-նուններն աղավաղված են, եւ ուսումնասիրողները միայն Բուժանը Բուժականի հետ նույնացնելու հնարավորությունն են ունեցել:

Փաստաթղթում Գրիգոր Մագիստրոս Պաշլավունին նշում է իր կառուցած եկեղեցու մասին՝ «հիմնադրեալ շինեցի զեկեղեցիս ի տեղուջս որ կոչի Կեչառուս», որն ուսումնասիրողները նույնացնում են Ս. Գրիգոր եկեղեցու մոտ կառուցված Ս. Նշան եկեղեցու հետ⁸:

Մեր կարծիքով, փաստաթղթում որոշ չափով մեծացվել է Գրիգոր Մագիստրոս Պաշլավունու դերը Կեչառիսում, նպատակ ունենալով բյուզանդական արքունիքին ցույց տալ, որ վանքը պատկանում է Պաշլավունիներին (նրանց հիմնածն է, ինչպես Մարմաշենը):

Այժմ ժանոթամամբ Կեչառիսի վեցտողյա մեծ արձանագրությա-նը, որի բովանդակության մեջ առկա հակասությունները հայագի-տությունը դեռես չի պարզել:

«1. Ի հիմնգհարիւրերրորդի ամի թուականութեանս Թորգոմեան, ի թագաւորութեան ս(ուր)բ եւ ինքնակալ թագաւորին Կոստանդեա

⁷ Ղ. Ալիշան, Այրարատ, էջ 260, Գ. Հովսեփյան, նշվ. աշխ., էջ 158:

⁸ Գ. Սարգսյան, Գրիգոր-Ապիրատ Հասանյան. Հիմնադիր Կեչառիսի վանքի (վիմագրական նոր վկայություն), «Հին Հայաստանի մշակույթը» ժո-ղովածու 12, Երեւան, 2002, էջ 112:

Մաւնումախին, բերաւ ոսկի մատանիս զոր հզաւրին եւ առաքինոյն բարե

2. պաշտին Գրիգորո Մագիստոռոսին, կիտաւնտին եւ դուկին Վասպուրականի եւ Տարաւնո, Արշակունոյն եւ Յայկազն(ո)յն մեծաւ աշխատութեամբ ազատեալ էր զմեծ եւ զհռչակաւոր եկեղե

3. ցիքս իւր եւ ոչ այլ ինչ հայցէ, բայց միայն աղաւթս առնել ս-(ուր)բ եւ ինքնակալ թագաւորին Կոստանդեայ ընդ նմին եւ ծառաին Ք(րիստոս)ի Գրիգորոյ եւ որդոց իւրոց եւ յիշատակ կարգեալ յեկեղեցիքս Կ

4. եւչառուաց ցուր Մագիստոռոսն կենդանի է ամեանայն շաբաթաւր զժամն Հասանա արասցեն անխափան եւ յետ ելիցն Մագիստոռոսին արասցեն անխափան, արդ (որ) ոք այսմ վճռի հաստատնո խափանել ջանա թ

5. ե յառաջնորդաց ոք իցէ կամ յիշխանաց կամ ի քահանայից այնպիսի Յ եւ ԺԸ հայրապետացն նզովեալ եղիցի եւ բաժինն ընդ Յուդայի եղիցի եւ ընդ տիրասպան քահանիցն եւ այս գիր մեր է Յովանիսի շնորհւն Ա(ստուծո)յ Բջ

6. նո էպիսկոպոսիս եւ ս(ուր)բ եւ մեծի հաւրս Բարսղիս, էթե ոք այս գրոյս խափանել ջանա այնպիսին նզովս չ(ար)աչարս ընկալցի ի սրբո Լուսաւորչէն Գրիգորո եւ յամենայն սրբոց եւ ի մենջ, կատարիչք գրոյս աւրինեալ եղ...»⁹:

Արձանագրութիւնն ունեցել է մի քանի հրատարակւթյուն, բայց առավել ամբողջականը Գ. Հովսեփյանի մոտ է: Արձանագրութեան թվականը Հ. Շահխաթունյանցը, Ղ. Ալիշանը, Կ. Կոստանյանը եւ սկզբուն մաեւ Գ. Հովսեփյանը կարդացել են «Ի հինգհարիւրերորորդի ամի», այսինքն 500+551=1051, որը մաեւ Հռոմի դիվանական փաստաթղթի թվականն է: Սակայն Գ. Հովսեփյանը նկատելով, որ վերոհիշյալ փաստաթղթուն նշվում են Բջնիի Վանական եւ Համավար եպիսկոպոսները, իսկ արձանագրութեան մեջ նույն Բջնիի Հով-

⁹ Գ. Հովսեփյան, նշվ. աշխ., էջ 312:

համենա եպիսկոպոսը, փորձել է խնդիրը լուծել արձանագրության թվականը «Ի հինգհարիւր երրորդի ամի» կարդալով, որով ստացվում է $500+3+551=1054$ ¹⁰ : Բայց անգամ թվականի այս, մեր կարծիքով, ոչ այնքան համոզիչ վերընթերցմամբ, արձանագրության մեջ առկա հակասությունները չեն վերանում: «Մեզ համար պարզ չէ միայն, թե ի՞նչ Հասան է, որին մատենագիր Գրիգոր Մագիստրոսը իւր արձանագրութեան մէջ կամենում է, որ յիշեն, քանի ինքը կենդանի է», - գրում է Գ. Յովսէփյանը¹¹:

Այս հարցն էլ յուրովի փորձել է լուծել Ն. Ակինյանը, կարծելով, որ արձանագրության առաջին մասը Պահլավունի Մագիստրոսինն է, իսկ երկրորդը («ընդ նմին» բառերից սկսած)՝ բոլորգիր՝ Գրիգոր Ապիրատինը, այդ պատճառով էլ հիշվում է վերջինիս հայր Հասանը: Նա նաեւ նկատում է, որ Գրիգոր Մագիստրոս Պահլավունու ԾԸ եւ ԿԵ թղթերից դատելով «1051, կամ ասկէ քիչ յառաջ կամ ետքը Բջնոյ եպիսկոպոս էր Եփրեմ... Ուստի Յովհ. եպիսկոպոս եւ Բարսեղ մեծ հայր կը պատկանին 1003 շրջանին, երբ կառուցուեցաւ եկեղեցին»¹²:

Գրիգոր Մագիստրոս Պահլավունու սան Եփրեմի 1050-ական թվականներին Բջնիի եպիսկոպոս լինելու մասին դիտարկումը կարելու է, սակայն Յովհաննեսը չէր կարող 1003-ին Բջնիի եպիսկոպոս լինել, քանի որ այդ եպիսկոպոսությունը հաստատվել է Պետրոս Ա Գետադարձ կաթողիկոսի եւ Յովհաննես Սմբատ թագավորի հրամանով 1031 թ., որի մասին է վկայում Բջնիի եկեղեցու մեծ արձանագրությունը: Անընդունելի է նաեւ Ն. Ակինյանի կարծիքը Կեչառիսի արձանագրության տարբեր գրչությամբ երկու մասից կազմված լինելու վերաբերյալ, քանի որ արձանագրությունը մեկ ամբողջություն է եւ միատեսակ գրչություն ունի:


¹⁰ Գ. Յովսէփյան, նշվ. աշխ., էջ 161, 312:

¹¹ Գ. Յովսէփյան, նշվ. աշխ., էջ 161:

¹² Ն. Ակինյան, Ներսէս Լամբրոնացի, էջ 377:

Գ. Հովսեփյանը նշում է արձանագրության բարբառային եւ հնագրական որոշ առանձնահատկությունները, որոնցից մի քանիսը կապվում է ուշ շրջանի՝ 13-րդ դարի հետ¹³: Կարծում ենք, ուշադրության է արժանի նաեւ կայսեր անվան «Մաւնունախ» գրությունը:

Արձանագրությունն ունի եւս մի հետաքրքրական մանրամասն: 3-րդ տողից հետո տողասկզբում փոքրիկ խաչաքանդակ կա (քառակուսի փորվածքի մեջ հավասարաթեւ խաչ), որի պատճառով 4-րդ եւ 5-րդ տողերը մի փոքր խորքից են սկսվում: Դժվար թե խաչը քանդակված լիներ նախապես (արձանագրության փորագրությունից առաջ), որպես ձեւավորման տարր, քանի որ եկեղեցու այլ մասերում նման զարդաքանդակներ չկան, եւ բացի այդ խաչն այնքան փոքր է, որ չէր կարող դիտվել որպես առանձին զարդ: Հետեւաբար մեծ հավանականությամբ կարելի է ասել, որ այն քանդակվել է արձանագրության գրության ժամանակ: Խաչաքանդակը, փաստորեն, երկու մասի է բաժանում վեցտողյա արձանագրությունը:



Նկատենք, որ սովորաբար, երբ արձանագրությունների մեջ նման նշաններ՝ խաչեր են դրվում, ապա դա արվում է արձանագ-

¹³ Գ. Հովսեփյան, նշվ. աշխ., էջ 312-313:

րության սկզբում: Հենց այդպես է արված նույն պատի ստորին մասում՝ մուտքի բարավորի վրա Գրիգոր Ապիրատի արձանագրության մեջ: Մինչդեռ մեր քննած «մագիստրոսյան» արձանագրության մեջ խաչաքանդակը տեղադրված է 3-րդ տողից հետո, մեր կարծիքով, բովանդակային կապ ունենալով հաջորդող տողերում արտահայտված մտքի հետ: Իսկ հիշյալ հատվածը պարունակում է եպիսկոպոսական որոշումն ու անեծքի բանաձևեր: Քառակուսու մեջ առնված խաչաքանդակն այստեղ, հավանորեն արձանագրված խոսքերը հաստատող, «կնքող» նշանակություն ունի:

Այժմ փորձենք պարզել դիվանական փաստաթղթի եւ Կեչառիսի արձանագրության նմանություններն ու տարբերությունները:

Նախ տեսնենք, թե ինչ ընդհանրություններ կան:

Ա. Երկու վկայագիրն էլ **կառուցվածքով նման** են, ունեն **առաջին մաս**՝ գրված Գրիգոր Մագիստրոս Պաշլավունու, եւ **երկրորդ մաս**՝ գրված «շնորհիւն Աստուծոյ Բջնոյ եպիսկոպոս» անվանված հոգեւորականների կողմից:

Բ. Երկուսի առաջին մասում էլ նշվում է Գրիգոր Մագիստրոս Պաշլավունու նախաձեռնությամբ Կեչառիսի՝ բյուզանդական Մոնոմախ կայսրից ստացած առանձնաշնորհման մասին. «բերաւ ոսկի մատանիս», - ասվում է արձանագրության մեջ (որով՝ «մեծաւ աշխատութեամբ ազատեալ էր զմեծ եւ զհռչակաւոր եկեղեցիքս»), իսկ փաստաթղթում նշվում է՝ «հրովարտակաւ եւ հրամանաւ... թագաւորիս»: Սա համեմատելի է Մագիստրոսի՝ Մարմաշենի Սոսթենես վանահորը գրած նամակի հետ, ուր նախ նշվում է «կարմրակերտ մեւլանաւն զիծ թագաւորական... զոր առաքեաց... Կոստանդիանոս արքայ Մաւնաւմախն... յոյժ զօրաւոր բանս՝ հանդերձ կնքովն ոսկեղինաւ», ապա ասվում է, որ վանահայրը գա եւ տանի ոսկե մատանին՝ «եկեսցես դու եւ տարցիս զոսկի մատանիս»¹⁴ (կայսեր հրովարտակը՝ ոսկե կնիքով):

¹⁴ Գրիգոր Մագիստրոսի թղթերը, էջ104:

Գ. Երկուսն էլ նույն թվագրումն ունեն (1051):

Դ. Երկու գրությունը եզրափակող անեծքի բանաձևերն ունեն նույն բաղադրիչները, որոնք թեև հիմնականում տիպային են, բայց նաեւ ինքնատիպ են հատկապես Ս. Գրիգորի նգովքի նշման առումով:

Այսպիսով երկու վկայագրերի միջեւ առկա կապն ակնհայտ է, եւ բնական է ենթադրել, որ նախ եղել է գրությունը, որը ստորագրությամբ ու կնիքով հաստատել են Բջնիի եպիսկոպոսները, ապա՝ արձանագրությունը:

Այժմ տեսնենք, թե որոնք են հիմնական տարբերությունները:

	<i>Դիվանական փաստաթուղթ</i>	<i>Արձանագրություն</i>
1	Նշվում է Գրիգոր Պահլավունու տիտղոսը եւ հոր անունը. «դուքսս Վասպուրականի, գաւառիս Ծաղկնուց ես Գրիգոր Մագիստրոս որդի Վասակայ»:	Գր. Պահլավունու տիտղոսաշարն ավելի մեծ է, բայց չկա նրա հոր անունը. «Գրիգորո Մագիստրոսին, կիտանտին եւ դուկին Վասպուրականի եւ Տարանո, Արշակունոյն եւ Զայկազնոյն»:
2	Գր. Պահլավունին նշում է իր ձեռամբ եկեղեցու եւ մատուռների կառուցման եւ դրանց տրված առատ նվիրատվությունների մասին. «հիմնադրեալ շինեցի զեկեղեցիս ի տեղւոջս որ կոչի Կեչառուս... հանդերձ մատրամբ. եւ նուի-	Որեւէ շինարարության կամ նվիրատվության մասին չկա վկայություն կամ ակնարկ, բայց Կեչառիսի եկեղեցիները համարվում են Գր. Պահլավունունը՝ «...ազատեալ էր զմեծ եւ զհռչակաւոր եկեղեցիքս իւր»:

	րեցի գտաճարս եւ գեկեղեցիս յանուն Սրբոյն Գրիգորի Լուսաւորչի մերոյ. եւ զարդարեցի զսա սպասուք... Դարձեալ ետու եկեղեցւոյս գեօղս երկուս եւ այգի մի»:	
3	Նվիրատվության դիմաց որեւէ պահանջ չկա, չի հիշվում Հասան անունը:	Գր. Պաշլավունին պահանջում է աղոթել կայսեր, նաեւ իր ու զավակների համար, միաժամանակ՝ ամեն շաբաթ օր պատարագել, քանի դեռ ինքը ողջ է՝ Հասանի համար, իսկ մահից հետո՝ իր համար:
4	Բջնիի եպիսկոպոսներ Վանականն ու Համալարը եկեղեցուն (վանքին) հատկացնում են թեմ եւ կալվածք՝ 25 գյուղ եւ մի քաղաք. «...սահմանեցաք եւ հաստատեցաք ի թեմ եւ կալուած վերոյգրեալ եկեղեցւոյս՝ գեօղս քսան եւ հինգ եւ քաղաք մի, որք են Բուժան, Շոկաթն...»:	Բջնիի եպիսկոպոս Հովհաննեսը եւ հայր Բարսեղը հաստատում են Գր. Պաշլավունու՝ իր հիշատակը պահպանելու եւ ամենշաբաթյա պատարագի մասին պահանջը՝ «այս գիր մեր է Յովանիսի շնորհին Աստուծոյ Բջնո էպիսկոպոսիս եւ սուրբ եւ մեծի հաւրս Բարսղիս, էթե ոք այս գրոյս խափանել ջանա...»: Ոչինչ չի ասվում Կեչառիսի թեմի, գյուղերի ու կալվածքների մասին:

Ինչպես տեսնում ենք, երկու վկայագրերն ունեն էական նմանություններ եւ բավական մեծ տարբերություններ¹⁵: Ուսումնասիրողներին դեռեւս չի հաջողվել վերջնականապես պարզել իրականությունը, քանի որ փաստերն իրոք խճողված են:

Մեր ենթադրությունը հետեւյալն է: Հավանաբար սույն արձանագրությունը գրվել է ավելի ուշ (այս մասին են խոսում Գ. Հովսեփյանի հնագրական դիտողությունները, ինչպես նաեւ Ն. Ադոնցի որոշ դիտարկումները)¹⁶: Այն գրողները՝ Բջնիի եպիսկոպոս Հովհաննեսը եւ վանահայր Բարսեղը, ձեռքի տակ ունեցել են վերը նշված փաստաթուղթը կամ դրա պատճենը, հիմնականում օգտվել են դրանից, բայց բաց են թողել այն կետերը, որոնք արձանագրության գրվելու ժամանակ արդեն անիրական էին: Մասնավորապես անհնար էր, որ եթե փաստաթղթում նշված գյուղերը դեռեւս Կեչառիսին պատկանեին, դրանք չնշվեին: Արձանագրության գրության ժամանակ անուշադրության կամ մոռացության է մատնված եղել Գրիգոր Մագիստրոս Պահլավունու տոհմաբանությունը, եւ տեքստը կազմողները Կեչառիսի մեկ այլ, բայց փաստորեն նույն պատի վրա գտնվող (1003 թ.) արձանագրության մեջ առկա Գրիգոր Մագիստրոսի (Գրիգոր Ապիրատի) հայրանունը՝ Հասան, նույնությամբ փոխադրել են 1051 թվականը կրող արձանագրության մեջ:

¹⁵ Փաստաթղթից-վիմագիր կամ վիմագրից-փաստաթուղթ տեքստային տարբերությունների առաջացման երեւոյթի ակնառու օրինակ է Նորավանքում Լիպարիտ Օրբելյանի գրած 1221 թ. արձանագրությունը, որը Սյունյաց մետրոպոլիտ, պատմիչ Ստեփանոս Օրբելյանը շուրջ 70 տարի հետո եկեղեցու պատից արտագրել եւ իր պատմության մեջ է զետեղել: Սակայն նա, ինչպես նշում է Ա. Ա. Աբրահամյանը, տեքստը «զգալի չափով փոխել է, խմբագրել, որոշ հավելումներ ու կրճատումներ կատարել, բառեր եւ բառաձեւեր փոխել» (Ստեփանոս Օրբելյան, Սյունիքի պատմություն, թարգմ. Ա. Աբրահամյանի, Երեւան, 1986, էջ 501, տե՛ս նաեւ Դիվան հայ վիմագրության, պր. 3, կազմեց Ս. Բարխուդարյան, Երեւան, 1967, էջ 211-212):

¹⁶ Գ.Հովսեփյան, նշվ. աշխ., էջ. 312, 464:

Հովհաննես անունով Բջնիի եպիսկոպոս հիշատակվում է 1298-1299 թթ., որը Ստեփանոս Օրբելյանի՝ կաթողիկոս Գրիգոր Է Անավարզեցուն հասցեագրված թուղթը ստորագրողներից մեկն է եղել¹⁷: 1298 թ. մի հիշատակարանում նա՝ «Յովհաննէս զարիեպիսկոպոսն Բրջնոյ եւ զվերատեսուչն Այրարատեան նահանկին», բնութագրվում է որպես «այր... երկայնամիտ եւ զուարթ դիմաւք»¹⁸:

Մեր կարծիքով, արձանագրողների հիմնական նպատակը Կեչառիսի՝ ժամանակին կայսերական առանձնաշնորհում ունեցած վանք լինելը ցույց տալն է եղել, որի համար գրել են տվել վիմագիրը հիմնվելով վերը նշված դիվանական փաստաթղթի վրա, բայց տեքստի երկրորդ մասում, Բջնիի նախկին առաջնորդների անունների փոխարեն, գրել են իրենց անունները:

¹⁷ Ստեփանոս Օրբելյան, Սյունիքի պատմություն, էջ 362:

¹⁸ Հայերեն ձեռագրերի հիշատակարաններ, ԺԳ դար, (կազմող՝ Ա. Մաթևոսյան), Երեւան, 1984, էջ 824:

ԳՐԻԳՈՐ ՊԻԽՏ ՇԻՐԱԿԱՑԻ

(Անտիոքի դուքս Խաչատուր)

Սամվել Անեցու ժամանակագրության ձեռագրերում պահպանվել են բազմաթիվ ժամանակագրական միավորներ, որոնք դուրս են մնացել պատմագրքի հայերեն միակ հրատարակությունից և երբեմն օգնում են պատմական տարբեր հարցերի լուծմանը: Այդպիսի մի հարցի պարզաբանման զգալի նպաստ են բերում Մատենադարանի թիվ 1898 և 2965 ձեռագրերը¹: Խոսքը վերաբերում է 11-րդ դարի երկրորդ կեսի մի զինվորական գործչի, որը Շիրակից էր և Բագրատունյաց թագավորության անկումից հետո ծառայում էր Բյուզանդական կայսրությանը: Նրա անունը հայ պատմիչները չեն տալիս, միայն նշում են պաշտոնից ծագող մականունը՝ Մատթեոս Ուռհայեցին՝ **Պիխտ, Պիխտ, Եպիխտ, Վարդան Արեւելցին՝ Բեդդ**:

¹ Սամվել Անեցու ժամանակագրությունը հրատարակելիս Ա. Տեր-Միքելյանն օգտագործել է այս երկու մատյանը (համապատասխանաբար Ա և ԺԳ օրինակներ), սակայն դրանց մեջ եղած մի շարք ժամանակագրական միավորներ տեղ չեն գտել գրքում (Սամուելի քահանայի Անեցույ Հաւաքմունք ի գրոց պատմագրաց՝ յաղագս գիւտի ժամանակաց անցելոց մինչեւ ի ներկայս ծայրաքաղ արարեալ, յառաջաբանով, համեմատութեամբ, յաւելուածներով և ծանօթութիւններով Արշակ Տեր-Միքելեանի, Վաղարշապատ, 1893, էջ Է-Թ): Ձեռագրերից առաջինը (թիվ 1898) ժողովածու է, գրչության ժամանակը, վայրը, գրիչն անհայտ են, համարվում է 13-րդ դարի մատյան: Վերջին մասում նշված են հիմնականում Կիլիկիայի պատմությանը և խաչակիրներին վերաբերող հատվածներ, որոնք զանց է առել Ա. Տեր-Միքելյանը, իսկ բոլորովին վերջերս դրանց մի մասը հրատարակել է Լ. Տեր-Պետրոսյանը՝ սակայն սկսելով 1074 թվականին վերաբերող տեղեկությամբ (Լ. Տեր-Պետրոսյան, Խաչակիրները և հայերը, հ. Ա, Երեւան, 2005, հավելված 2, էջ 483-484): Երկրորդ մատյանը (թիվ 2965) ժողովածու է (17-րդ դ.), գրչության համագամանքներն անհայտ են: Հիշյալ ձեռագրերում եղած հավելումները տես Կ. Մաթեոսյան, Սամվել Անեցու ժամանակագրության ձեռագրերը և նորահայտ լրացումները, Երեւան, 2009, էջ 114-120:

Մատթեոս Ուռհայեցին գրում է. «Եւ մի ոմն Յայոց քաջ զօրականացն... Պեխտ անուն, որ էր տուկ Անտիոքայ քաղաքին»²: Այնուհետեւ նա պատմում է, թե ինչպէս 1065 թվականին քաջ զորավար Պեխտն իր զորականներով պատահաբար Ուռհայում էր գտնվում, երբ այն թուրքերից հարձակման ենթարկվեց: Տեղի դուքսի հույն զորավարը թշնամուն դիմադրություն ցուցաբերած Պեխտին օգնելու փոխարեն դավաճանական դիրք գրավեց: Պեխտի վճռականության եւ խիզախության շնորհիվ թշնամին Նշենիկ բերդում պարտվեց, եւ քաղաքը փրկվեց թուրքերից, բայց հույն զորավարի արարքի մասին նա նամակով հայտնեց Տուկիծ³ կայսրին, իսկ վերջինս դաժան հաշվեհարդար տեսավ դավաճանի հետ⁴:

Մեկ այլ տեղում իշխանի մահը ներկայացնելիս Մատթեոս Ուռհայեցին գրում է. «Եպիխտ իշխանն Յայոց, այր քաջ եւ պատերազմող **ի Տանէն Շիրակայ**»⁵, ապա նշում, որ կայսրը նրան հարկադրաբար էր քաղկեդոնական դարձրել, բայց նա ծածուկ պահում էր Սուրբ Գրիգորի հավատը: Իսկ սպանվեց իշխանը Անդրիոն բերդում, երբ հիվանդ էր («հիւանդացեալ ի բերդն, որ կոչի Անդրիոն»), եւ կայսեր՝ նրա մոտ ուղարկած «Յոռոմ աբեղա» խոստովանահայրը քնած ժամանակ բարձով խեղդեց նրան («Եւ չարաչար սպանանէր զայր հօգօր եւ քաջ՝ չարագործ եւ պիղծ կրօնաւորն Յոռոմոնց»), որից հետո իշխանի զորականները սպանեցին չարագործին⁶:

² Մատթեոս Ուռհայեցի, Ժամանակագրություն (աշխարհաբար թարգմանությունը եւ ծանոթագրությունները Յ. Բարթիկյանի), (գրքում զետեղված է ժամանակագրության գրաբար տեքստը Վաղարշապատի 1898 թ. հրատարակությունից), Երեւան, 1991, էջ 170: Ուռհայեցուց օգտվելով՝ Պեխտին հիշատակում է Սմբատ Սպարապետը (Սմբատայ Սպարապետի Տարեգիրք, Վենետիկ, 1956, էջ 84):

³ Կոստանդին Ժ Դուկաս (1059-1067):

⁴ Մատթեոս Ուռհայեցի, էջ 170:

⁵ Նույն տեղում, էջ 230: Մեջբերումներում ընդգծումները մերն են – Կ. Մ.:

⁶ Նույն տեղում, էջ 228-230: Տեղեկությունը զետեղված է Անտիոքի դուքս Վասակ Պաիլավունու (Գրիգոր Մագիստրոսի որդու) սպանության մասին պատմությունից հետո, որն Ուռհայեցին դրել է 1076 թվականի տակ, թեւ ղեպը տեղի է ունեցել 1078 թ. (Լ. Տեր-Պետրոսյան, մշվ. աշխ., էջ 418):

Մատթեոս Ուռհայեցու աշխարհաբար թարգմանությունը հրատարակելիս Զ. Բարթիկյանն իշխանի անվան մասին հետեւյալ ծանոթագրումն է արել. «Պեխտը (եպիստ) անուն չէ, այլ հունարեն է-պիստես բառը, որ վերակացու, տեսուչ է նշանակում»⁷:

Վարդան Արեւելցին (13-րդ դար) գրում է. «...սպանաւ **Բեխդն, իշխանն Շիրակունի**, որ վասն յոյժ լաւութեանն նշդեալ սիրով ի կայսերէ՝ եղել հռոմ»⁸, ապա ավելացնում է, որ նրան խեղդամահ է արել կայսեր նշանակած հռոմ (հույն, քաղկեդոնական) խոստովանահայրը «ի բերդն իւր **յԱնդրիօնն**»⁹: Այդ բերդը գտնվում է Կիլիկիայում, Մարաշից արեւմուտք¹⁰:

Քաղկեդոնականությունն ընդունած այս իշխանին դեռեւս հայ նոր պատմագրության արշալույսին անդրադարձել է Միքայել Չամչյանը, որը 1060-ական թվականների մասին պատմելիս գրում է. «Ի սմին ժամանակի իշխան ոմն Զայոց Շիրակունի Անեցի բնակեալ ի սահմանս Փոքուն Ասիոյ՝ Խաչատուր կամ Խուտատար անուն, վեստ կոչեցեալ..., որ ի գիրս Զայոց Պեխտ կոչի»¹¹:

⁷ Նույն տեղում, էջ 500:

⁸ Վարդան Արեւելցի, Տիեզերական պատմություն (գրքում զետեղված է Վենետիկի 1862 թ. տպագրության գրաբար տեքստը), աշխարհաբար թարգմանությունը Գ. Բ. Թոսունյանի, Երեւան, 2001, էջ 109:

⁹ Նույն տեղում, էջ 110: Մոսկովյան հրատարակության մեջ. «...տաւ հայր խոստովանութեան նորա Աբել հռոմ ամ մի» (Մեծին Վարդանայ Բարձրաբերդցոյ Պատմութիւն Տիեզերական, Մոսկուա, 1861, էջ 140):

¹⁰ Թ. Զակոբյան, Ստ. Մելիք-Բախշյան, Զ. Բարսեղյան, Զայաստանի եւ հարակից երկրների տեղանունների բառարան, հ. 1, Երեւան, 1986, էջ 260: Կիլիկյան մի ձեռագրի 1332 թ. հիշատակարանում նշվում է, որ այն գրվել է «մերձ յաստուածապահ ամրոցն, որ կոչի Անդրունին բերդ» (ԺԴ դարի հայերեն ձեռագրերի հիշատակարաններ, կազմեց Լ. Խաչիկյան, Երեւան, 1950, էջ 251): Անդրիուն անունը շուրջ երկուսուկես դարի ընթացքում հայկական միջավայրում բնականորեն կարող էր դառնալ Անդրուն: Ավելի ուշ շրջանում թուրքերենի ազդեցությամբ կոչվել է նաեւ Էնդրուն (Զայաստանի ազգային ատլաս, հ. Բ, Երեւան, 2008, էջ 49, 50, 55, 62, 80-81, 84, 88, 151, 167):

¹¹ Մ. Չամչյանց, Զայոց Պատմություն, հ. Բ, Երեւան, 1984, էջ 972, տե՛ս նաեւ Զ. Աճառյան, Զայոց անձնանունների բառարան, հ. Բ, Երեւան, 1944, էջ 468:

Անտիոքի դուքս Խաչատուրին հիշատակում են բյուզանդական հեղինակները, երբ անդրադառնում են 1071 թ. Մանազկերտի ճակատամարտում պարտություն կրած Ռոմանոս Դ Դիոգենես (1067-1071) կայսեր ողիսականին, որին այդ պարտությունից եւ սելջուկների ձեռքը գերի ընկնելուց հետո Կոստանդնուպոլսում աթոռանկ հայտարարեցին, եւ գահակալեց Միքայել Է Դուկասը (1071-1078): Սելջուկյան սուլթան Ալփասլանից (Ալփ Արսլան) որոշ պայմանների դիմաց ազատ արձակված Դիոգենեսը փորձեց իրեն հավատարիմ մնացած ուժերով գահը գրավել, եւ նրա սակավաթիվ աջակիցներից էր Անտիոքի դուքս Խաչատուրը: Ինչպես հայտնի է, Դիոգենեսը ձախողվեց եւ ողբերգական վախճան ունեցավ: Իսկ Խաչատուրի մասին ասվում է, որ նա գերության մատնվեց:

Անտիոքի դուքս Խաչատուրի եւ հայկական աղբյուրներում հիշված Պեխտի նույնացմանը անդրադարձել է Ժան Լորանը¹²: Նա գրում է, որ Խաչատուրը զարմանալիորեն չի հիշվում հայկական աղբյուրների մեջ, ապա նշում է, որ 1067-ին Անտիոքի դուքսն էր Նիկեփորիցեսը, որին հաջորդել է Նիկեփորոս Վոտանիատեսը, այնուհետեւ՝ Խաչատուրը: Հետագոտողը հիմնական շեշտը դնում է այն փաստի վրա, որ Մատթեոս Ուռհայեցին 1065 թ. Պեխտին համարում է Անտիոքի դուքս, որը հնարավոր չէ, եւ դրանով մերժում այս երկուսի նույնացումը¹³: Ըստ նրա Պեխտը կարող էր ոչ թե Մեծ Անտիոքի, այլ Իսավրիայի Անտիոքի կառավարիչը լինել: Բայց Ժ. Լորանը ավելի հեռուն գնալով, հայ պատմաբաններին մեղադրում է այն բանում, որ նրանք երկու տարբեր գործիչների նույնացմամբ փորձել են «շահագործել Պեխտ=Եպիխտ=Խաչատուրի կեանքն ու

¹² J. Laurent, Le duc d'Antioche Khatchatour, Byzantinische Zeitschrift, Bd. XXX, 1930, Leipzig, p. 405-411, հայերեն թարգմանությունը՝ Յ. Լորան, Խաչատուր իշխան Անտիոքի 1068-1072, «Հանդես ամսօրեայ», 1930, էջ 303-310:

¹³ Յ. Լորան, նշվ. աշխ., էջ 306-308:

քաջութիւնները» եւ դրանով գոհացնել «հայ ազգի եսասիրութիւնը»¹⁴:

Խնդրին անդրադարձել է Ե. Քասունին՝ փորձելով հակադարձել ժ. Լորանին: Նա մասնավորապես նշում է, որ 1060-1067 թթ. Անտիոքի դուքս Նիկեփորիցեսը ինչ-որ ժամանակամիջոցում պաշտոնազրկված է եղել եւ գրում. «Պետք է հարցնել, թէ երբ եւ որքա՞ն ժամանակով տեղի ունեցավ Նիկեփորիցեսի պաշտոնազրկութիւնը (եւ ո՞վ է փոխարինել նրան այդ միջոցին)»¹⁵: Շարունակելով միտքը՝ նա գրում է, որ ժ. Լորանը նշում է բյուզանդացի հեղինակների խոսքերը Խաչատուրի մախկին խիզախ գործերի մասին, որոնք, սակայն, ոչ մի որոշակի դեպքի մասին չեն պատմում եւ, վկայաբերելով Մ. Ուռհայեցու գրածը 1065 թ. Պեխտի քաջագործության մասին, եզրակացնում է. «Նշենիկի մօտ Պեխտի մղած ճակատամարտը անսակարկելիօրէն իրեն կը շնորհէ «քաջութեան», «մտացիութեան» եւ «պաղարիւնութեան» առաքինութիւնները, նկարագրի գիծեր, զոր Բիւզանդացի պատմիչներ եւ Լօրան կը շնորհեն Խաչատուրի... Ասպարեզին եւ նկարագրի այս նմանութիւնը իրաւունք չէ՞ն տար մեզի մտածելու, որ Պեխտ եւ Խաչատուր նոյն անձն է»¹⁶:

Այս երկու տեսակետների առնչությամբ նկատենք, որ մախ Պեխտի եւ Խաչատուրի նույնացումը որեւէ կապ չունի հայ պատմաբանների «ազգասիրության» հետ, որովհետեւ Խաչատուրին Անտիոքի դուքս եւ ազգությամբ հայ է համարում բյուզանդացի հեղինակ Ատտալիատեսը¹⁷: Երկրորդ, եթե խոսքը նույն մարդու մասին է, ապա նրան Մատթեոս Ուռհայեցին շուրջ մեկ դար հեռվից ճանա-

¹⁴ Նույն տեղում, էջ 309:

¹⁵ Ե. Քասունի, ԺԱ դարու Անտիոքի հայ կառավարիչներ Պեխտ-Խաչատուր եւ Վասակ Պաիլավունի, «Հայկազեան հայագիտական հանդես», 1971, հ. Բ, էջ 125: Հեղինակն ակնարկում է, որ Նիկեփորիցեսի պաշտոնանկության ժամանակ նրան կարող էր փոխարինած լինել Խաչատուրը:

¹⁶ Ե. Քասունի, նշվ. աշխ., էջ 126-127:

¹⁷ Հովհաննես Սկիլիցես, թարգմանություն բնագրից, առաջաբան եւ ծանոթագրություններ Հ. Բարթիկյանի, Երեւան, 1979, էջ 376:

չում էր որպես Անտիոքի դուքս՝ անկախ այն բանից 1065 թվականին նա ունե՞ր այդ պաշտոնը, թե՞ այն ստացել է մի քանի տարի հետո¹⁸։ Հասկանալի է, որ մինչև Անտիոքի դուքս դառնալը Պեխտն անհայտ մեկը չէր. նա բյուզանդական ծառայության մեջ գտնվող զորահրամանատար էր եւ կարող էր իր զորականներով մասնակցել Ուռհայում կատարված դեպքերին։

Հարցին անդրադարձել է նաեւ Հ. Բարթիկյանը Հովհաննես Սկիլիցեսի երկի ու դրա շարունակության հայերեն թարգմանության մեջ՝ խաչատուրին նվիրված հանգամանակից ծանոթագրությամբ։ Վկայակոչելով Ատտալիատեսի հաղորդումը «խատատուրի» հայ եւ Անտիոքի դուքս լինելու մասին՝ նա գրում է. «Զարմանալին այն է, որ խաչատուրի մասին հայկական աղբյուրներում չենք հանդիպում որեւէ տեղեկության։ Այդ ուսումնասիրողներին դրդել է ենթադրելու, որ խաչատուրը հայկական աղբյուրներում հանդես է գալիս այլ անվան տակ։ Սկսած Զամչյանից ենթադրել են, որ Մատթեոս Ուռհայեցու մոտ 1065 թ. տակ հիշատակված Անտիոքի հայազգի դուքս-կառավարիչ Բեխտը (Մատթ. Ուռհ., էջ 157) հենց խաչատուրն է։ Զամչյանն այդ նույնացումը կատարելով գտնում էր նաեւ, որ Բեխտ անուն չէ, այլ բյուզանդական վեստ պատվաստիճանը։ Զամչյանի ենթադրությունը կրկնում են Բրոսսեն (նրան նա անվանում է Vest Khatchatour: St' u Lebeau, Histoire du Bas-Empire,

¹⁸ Պատմիչը նույնպիսի մոտեցում է ցուցաբերել մեկ այլ հարցում։ Գրելով 1033 թ. Անիից Սեւանի վանք՝ Հովհաննես Կոզեռնի մոտ զննացած պատվիրակության մասին, նա մեկնողների թվում նշում է «Գրիգոր Մագիստրոսն որդին Վասակայ» (Մատթեոս Ուռհայեցի, էջ 76-77), մինչդեռ հայտնի է, որ Վասակի որդի Գրիգոր Պաիլափունին մագիստրոսության պատիվ ստացել է ավելի ուշ՝ 1045 թ.։ Այսպիսի մոտեցումը բնական է եւ արտառոց չէ անգամ մեր օրերի համար։ Օրինակ, եթե մեկն ասի, որ մարշալ Բաղրամյանը Հայրենական մեծ պատերազմի հայտնի զորավարներից էր, դժվար թե նրան ուղղեն՝ ասելով, որ պատերազմն ավարտվել է 1945 թ., իսկ Հովհաննես Բաղրամյանը մարշալի կոչում է ստացել 1955 թվականին (այսինքն պատերազմի ժամանակ մարշալ չէր)։

տ. XIV, 18334 p. 441...), Ալիշանը (տե՛ս նրա Վարդան Բարձրբերդ-ցու Պատմության 105-րդ ծանոթագրությունը) եւ այլ ուսումնասիրողներ, այդ թվում մեր օրերում նաեւ Ե. Քասունին... Դեռեւս 1929/1930 թթ. Ժ. Լորանն իր մի հոդվածում (տե՛ս նրա *Le duc d'Antioche Khatchatour*), ապացուցեց այդ նույնացման անհնարինությունը եւ հանգեց այն եզրակացության, որ Բեխտը ոչ թե Մեծ Անտիոքի կառավարիչն էր, այլ հավանաբար Իսավրիայի Անտիոքի»¹⁹: Իսկ Մատթեոս Ուռհայեցու Ժամանակագրության համապատասխան ծանոթագրության մեջ Հ. Բարթիկյանը նշում է, որ Պեխտին «սխալմամբ նույնացնում են Անտիոքի դուքս Խաչատուրի հետ»²⁰:

Այժմ տեսնենք թե ինչ նորություն են բերում վերը նշված ձեռագրերը:

Այստեղ Սամվել Անեցու Ժամանակագրության անանուն շարունակողը քաղկեդոնական հայ իշխանին անդրադառնում է երկու կարճ վկայությամբ: Առաջինը վերաբերում է Մանազկերտի ճակատամարտին նախորդած ռազմական իրադարձությունների մի դրվագի, թեեւ բուն Մանազկերտի ճակատամարտի մասին պատմվում է դրանից առաջ. «ՇԺԹ (1070) Դեաւթենն եկն յարեւելս եւ էառ զՄանժկերտ ի թուրքաց եւ Ալփասլանն պատերազմեալ յաղթեաց նմա եւ կալաւ զնա եւ դարձեալ ազատեաց ուխտադրութեամբ»²¹: Ումանք զկոտորիլն Դիաւթենին ի թու. Հայոց ՇԺԸ (1069) են գրեալ: Եւ ի **ՇԺԹ (1070) Գողձախմատն**²² **աւերեաց զՍեւ լեառն եւ կոտորեաց**

¹⁹ Հովհաննես Սկիլիցես, էջ 376:

²⁰ Մատթեոս Ուռհայեցի, էջ 500:

²¹ Հատվածը թիվ 2965 ձեռագրում ավարտվում է «ուխտադրութեամբ հարկին» բառերով (թերթ 104ա):

²² Ձեռագրում գրված է «գողձախմատն»: Կարծում ենք՝ օտարախունչ անվան աղավաղված ձև է: Հնարավոր է նաեւ, որ մի անուն է, որի սկզբում նշված է «Գող» մականունը, ինչպես որ այս նույն շրջանում հիշվում է հայ իշխան Գող Վասիլը: Իսկ շարունակությունը կարող է լինել Ահմատ անվանը մոտ հնչյունափոխված մի անուն:

զնա Գրիգոր Պիխտն ի դաշտն Հարունոյն ի մամխենուտն»²³։ Սրանից անմիջապես հետո թիվ 2965 ձեռագրում նշվում է Դիոգենես կայսեր գահագրկման, կուրացման եւ մահվան մասին («Յայսմ վայրի ո՛չ հնազանդեալ Դիոթէնին ազգն իւր, այլ թագաւորեցուցին զՍիխայլ որդի Դուկօին։ Դարծեալ պատերազմեալ Սիխայլէ՝ եհար զԴիոթանն եւ զօրացն քուրծ ագուցեալ նմա ածին առ թագաւորն Սիխայլ եւ ի ճանապարհին փորեալ զաչս նորա կուրացուցին հրամանաւ կայսեր եւ յանհնարին խստութենէ կսկծւոյն մեռաւ ի ՇԻԱ (1072) թուականն»)»²⁴։

Երկրորդ վկայությունը իշխանի մահվան վերաբերյալ է. «ՇԻԱ (1072), **զՊիխտն յԱնդրիունն խեղդեցին ծառայք իւր**»²⁵։

Այսպիսով՝ հայկական աղբյուրում առաջին անգամ հանդիպում ենք իշխանի ամբողջական անվանն ու մականվանը՝ **Գրիգոր Պիխտ**²⁶։ Հատկանշական է, որ այս աղբյուրը երկու հայ պատմիչների մոտ պահպանված տեղեկությունների համեմատ իշխանի մականունն ավելի ճիշտ տառադարձությամբ է մատուցում՝ Պիխտ, քանի որ, ինչպես տեսանք, այն ծագում է հունարեն «էպիխտես» բառից։

²³ Մատենադարան, ձեռ. թիվ 1898, թերթ 85ա։

²⁴ Մատենադարան, ձեռ. թիվ 2965, թերթ 104ա, հմմտ. Սամուէլի քահանայի Ամեցւոյ Հաւաքմունք, էջ 114։

²⁵ Մատենադարան, ձեռ. թիվ 1898, թերթ 85բ։ Հնարավոր է, որ այս տեղեկությունների հեղինակը Հեթում Պատմիչ Կոռնիկոսցին է։

²⁶ Նկատենք, որ Գրիգոր անունն ընդհանրապես միջնադարյան Հայաստանում շատ տարածված էր, եւ այդ անունով գործիչներն առավել հաճախ անվան հետ նաեւ մականունով են հիշատակվում։ Խոսքը վերաբերում է ինչպես հոգեւորականներին (կաթողիկոսներ՝ Գրիգոր Վկայասեր, Գրիգոր Տղա, Գրիգոր Ապիրատ, վարդապետներ՝ Գրիգոր Տուտեորդի, Գրիգոր Մանունիկ, Գրիգոր Խուլ, Գրիգոր Թոքակերի որդի, Գրիգոր որդի Աբասա), այնպես էլ աշխարհականներին (Գրիգոր Համզե, Գրիգոր Սուփան, Գրիգոր Մագիստրոս, Գրիգոր Խուցես եւ այլն)։ 12-13-րդ դարի հայ պատմիչները 11-րդ դարի մի նշանավոր իշխանի հիշատակում են միայն մականունից ծագող երկրորդ անվամբ՝ Ապիրատ, մինչդեռ իր հիմնած Կեչառիսի վանքի արձանագրության մեջ նա իրեն կոչում է Գրիգոր։

Թվում է, որ նորահայտ աղբյուրը, որտեղ իշխանը կոչվում է Գրիգոր Պիխտ, ամբողջովին համապատասխանում է այն տեսակետին, որը մերժում է նրա եւ Խաչատուրի նույնացումը: Սակայն, մյուս կողմից, այդ նույն վկայության մեջ հիշատակված դեպքերը ժամանակով եւ որոշ մանրամասներով համընկնում են Խաչատուրի մասին հայտնի տվյալներին: Այսպես՝ Յովհաննես Սկիլիցեսի շարունակողը, նկարագրելով 1070 թվականի իրադարձությունները, երբ սելջուկների դեմ պատերազմելու համար Արեւելք էր եկել կայսր Ռոմանոս Դիոգենեսը, հետեւյալ տեղեկությունն է հայտնում. «Կայսրը տագմաներից մի զորամաս Կիլիկիա ուղարկեց՝ միանալու Անտիոքի դուքս Խաչատուրին, մի քաջարի մարդու, որ դեռ անցյալում ցույց էր տվել իր բազում աչքի ընկնող առաքինությունները, հրաման տալով նրան փութանակի Մոպուսեստիայում (Մամեստիա, Մսիս – Կ. Մ.) ընդդիմակայել հակառակորդին, քանզի սպասում էր, որ թուրքերն այնտեղից պետք է անցնեն, այնտեղ սպասել նրանց եւ ամեն գնով ջարդ տալ: Նրանք Սելեւկիայի լեռների վրայով անցնելով, Տարսուսի դաշտում ջարդ կերան, հենց այդտեղ պատահմամբ հայերին հանդիպելով, գրեթե ողջ ավարը կորցրին: Թշնամիները իմանալով հռոմայեցիների Մոպուսեստիայում բանակելու մասին, առանց ժամանակ կորցնելու, ինչքան հնարավոր էր հանգստանալով Վալտոլիվադիում, գիշերով ճանապարհ ընկան եւ անցնելով Սարվանդիկոն լեռը, ինչպես եւ շուտափույթ՝ Հալեպի սահմանները, մի կերպ վտանգից պրծան»²⁷:

Ինչպես վերը տեսանք, նույն 1070 թվականի դիմաց մեր ձեռագրերում հավելում կատարողը նշել էր. «Գողձախմատն աներեաց զՍեւ լեռան եւ կոտորեաց զնա Գրիգոր Պիխտն ի դաշտն Հարունոյն ի մամխենուտն»: Այստեղ կարող է լինել երկու ենթադրություն. կամ Սկիլիցեսի շարունակողի, եւ այս տեղեկությունը վերաբերում է նույն դեպքին, կամ տարբեր դեպքերի:

²⁷ Յովհաննես Սկիլիցես, էջ 231-232:

Նախ քննենք առաջին տարբերակը: Երկու տեղեկությունների մեջ ընդհանուր է նախ թվականը, երկրորդ՝ գլխավոր իրադարձության՝ ճակատամարտի տեղը. որի դաշտ լինելն ընդգծված է երկուստեք (առաջինում այն «**Տարսոնի դաշտն**» է, երկրորդում՝ «**ի դաշտն Ջարունոյն**»): Վերջապես, այս իրադարձության ժամանակ նույնն են բյուզանդական եւ հայկական աղբյուրներում վկայված թշնամիները, մի կողմում՝ ավարառու թուրքերը, մյուսում՝ հաղթող հայերը:

Ջարունի, Ջարունիե բերդավանդ գտնվում է Կիլիկիայում, Սարվանդիքարից հյուսիս, Մարաշից հարավ²⁸, եւ այստեղ պետք է լինի նաեւ համանուն դաշտը: Չայ հեղինակը, դեպքին լավատեղյակ լինելով, նաեւ կոնկրետացրել է կռվի տեղը՝ «ի մամխենուտն», որ կարծում ենք՝ նշանակում է մամխենի (փշոտ վայրի սալորենի, մամուխ) ծառերով տեղանք (ինչպես, օրինակ, եղեգնուտ): Չատկանշական է, որ Սկիլիցեսի շարունակողի համաձայն, մարտից հետո սելջուկները Չալեսպի կողմը նահանջեցին Սարվանդիկոնով, որն ակներեւորեն Սարվանդիքարն է, որտեղից դեպի արեւելք միակ ճանապարհն անցնում է Ամանոսի (Սեւ լեռան) լեռնանցքով:

Չույն պատմիչի խոսքերը, թե թուրքերը ջարդ կերան «հենց այդտեղ պատահմամբ հայերին հանդիպելով», կարծում ենք, կարելի է հասկանալ երկու ձևով: Առաջին, որ Խաչատուրն իր հայ զորականներով ջարդեց նրանց (դեպքն այսպես է ընկալել Ղ. Ալիշանը)²⁹, երկրորդ, դա տեղաբնակ հայերի մի ջոկատ էր³⁰: Սակայն, ինչպես պարզորոշ երեւում է պատմիչի խոսքերից, այդ շրջանի բո-

²⁸ Չայաստանի ազգային ատլաս, էջ 47, 48, Մարի-Աննա Շեվալիե, Կիլիկիայի Չայաստանի եւ հոգեւորասպետական միաբանությունների փոխհարաբերությունների պատմությունից, Երեւան, 2007, էջ 25, 33, 35, 50:

²⁹ Ղ. Ալիշան, Սիսուան, Վենետիկ, 1885, էջ 46:

³⁰ Այդպիսի ենթադրություն է անում Զ. Բարթիկյանը՝ ելնելով Ատտալիատեսի հայտնած մի տեղեկությունից, ըստ որի «Սելեւկիայի լեռնային շրջաններում բնակվող հայերը» հրաման էին ստացել կիրճերում հարձակվելու եւ վնասելու թուրքերին (Յովհաննես Սկիլիցես, էջ 376):

լոր գորքերը ենթարկվում էին հենց խաչատուրին, որին հույն պատմիչը, ոչ առանց պատճառի, «քաջարի մարդ» է կոչում:

Երկու սկզբնաղբյուրների միջեւ եղած հիմնական անհամաձայնությունն այն է, որ ըստ հայկական տեքստի ավարառուները եկել են Սել լեռան կողմից, այսինքն՝ արելելքից: Սակայն այս տարբերությունը կարող է բացատրվել նրանով, որ հայ հեղինակը կամ նրա աղբյուրը ծավալուն պատմություն չեն շարադրել, այլ մեկ հակիրճ նախադասությամբ արձանագրել են հայկական միջավայրի համար էական երկու փաստ: Առաջինը Սել լեռան հայաբնակ շրջանի ավերումն է, որ կարող էին անել Կիլիկիայից դեպի Զալեպի կողմը նահանջող թուրքերը, իսկ մյուսը՝ հայկական միջավայրում տարածված այն տեղեկությունը, որ թուրքերին ջարդել է Գրիգոր Պիխտը: Հնարավոր է, որ այստեղ գործ ունենք երկու փաստի ետեւանաջութան հետ:

Ինչ վերաբերում է կռվի տեղին, որն ըստ բյուզանդացի հեղինակի Տարսոնի դաշտն է, ըստ հայ հեղինակի՝ Հարունիի դաշտը, ապա այդ տարբերությունը կարող է առաջանալ տարածքին ավելի կամ պակաս ծանոթ լինելուց: Մասնավորապես Կոստանդնուպոլսում ապրող մարդը կարող էր Կիլիկիայի հիշյալ շրջանի ամենանշանավոր քաղաքի՝ Տարսոնի անունով կոչել այդ դաշտը (դաշտային Կիլիկիան ընդհանրապես), մինչդեռ ավելի մոտ բնակվողը կարող էր տեղն ավելի որոշակի դարձնել³¹:

Այժմ դիտարկենք երկրորդ տարբերակը. Սկիլիցեսի շարունակողի եւ նորահայտ աղբյուրի տեղեկությունները վերաբերում են նույն թվականին կատարված, բայց միանգամայն տարբեր դեպքերի: Բյուզանդացի հեղինակի հայտնածն ընդունում ենք այնպես, ինչպես որ կա, իսկ հայ հեղինակը նշում է, որ 1070 թ. մի ավարա-

³¹ Նույն կերպ, օրինակ, Հայաստանին ոչ քաջածանոթ մարդը կարող է ասել, որ 1918 թ. մայիսին հայերը թուրքերին հաղթել են Արարատյան դաշտում, իսկ այստեղ ապրողը գիտի՝ Սարդարապատի դաշտում:: Երկուսն էլ ճիշտ են, միայն երկրորդը տեղն ավելի որոշակի գիտի:

ռու զորք, ոմն «Գողծախմատի» գլխավորությամբ հարձակվում, ավերում է Սեւ լեռան շրջանը, ապա Յարունիի դաշտում (արդեն Կիլիկիայում) նրան ջարդում է Գրիգոր Պիխաը:

Իհարկե կարող էին նման դեպքեր լինել: Բայց այստեղ հարց է առաջանում, թե այդ թվականին ո՞վ էր Կիլիկիայում գտնվող այն հայը, որը ձեռքի տակ համապատասխան զինվորական ուժեր ուներ եւ կարող էր այդպիսի հաղթանակ տանել: Ինչպես վերը տեսանք, Կիլիկիան սելջուկներից պաշտպանելու համար ոչ միայն զորք, այլեւ հատուկ կայսերական հրաման ստացած մարդը հենց Խաչատուրն էր:

Ծանոթանանք բյուզանդացի հեղինակների՝ Խաչատուրի մասին պատմած մյուս տեղեկություններին: Հովհաննես Սկիլիցեսի շարունակողը բավական մանրամասն պատմում է, թե ինչպես 1071 թ. Մանազկերտի ճակատամարտում պարտված ու գերի ընկած, ապա սուլթանի բարեհաճությամբ ազատ արձակված Դիոգենես կայսրը երբ ուզում է Կոստանդնուպոլիս վերադառնալ, բայց իմանում է, որ այնտեղ արդեն նոր կայսր է հռչակվել, փորձում է կողմնակից ուժեր ժողովել, եւ այդ ժամանակ նրան աջակցություն է ցուցաբերում Խաչատուրը՝ իր մոտ՝ Կիլիկիա տանելով: Նոր կայսրը Անդրոնիկոս զորավարին ուղարկում է Դիոգենեսի դեմ՝ Կիլիկիա, «որտեղ նրան ընդդիմակայում է Խաչատուրը, բայց մի փոքր մարտնչելուց հետո գերվում է Անդրոնիկոսի զինվորների կողմից»³²: Դրանից հետո այս զորավարին է հանձնվում նաեւ Դիոգենեսը, որին երդումներով հավաստիացնում են, որ նրանից միայն գահից հրաժարվել է պահանջվում: Սակայն հետո դաժանաբար կուրացնում, տանջում եւ կիսամեռ դարձրած աքսորում են մի տեղ, ուր շուտով կնքում է մահկանացուն:

Խաչատուրի գերության մեջ եղած ժամանակին վերաբերող մի դրամատիկ եւ գեղարվեստական տարրեր ունեցող պատմություն է

³² Հովհաննես Սկիլիցես, էջ 244:

փոխանցում Նիկեփոր Բրիեննիոսը³³, որից երևում է, որ ի վերջո Անդրոնիկոսը նրան պահում էր «անկալանք կալանքի մեջ»³⁴: Դա վերաբերում է 1072 թվականին եւ վերջին տեղեկությունն է խաչատուրի մասին³⁵:

Իսկ հայկական նորահայտ աղբյուրն ասում է, որ Գրիգոր Պիխտոն իր ծառաների ձեռքով խեղդամահ արվեց 1072 թվականին Անդրիոն բերդում: Եթե դա նույն խաչատուրն է, ապա նրա այսօրինակ վախճանը համահունչ է դեպքերի տրամաբանությանը՝ նկատի ունենալով, թե ինչպիսի վախճանի արժանացավ Դիոգենես կայսրը: Դժվար է հավատալ, որ անպատիժ պիտի մնար վերջինիս կողմն անցած եւ անգամ զինված դիմադրություն ցուցաբերած խաչատուրը: Եթե անգամ նրան ներել են ու որոշ ժամանակ պահել «անկալանք կալանքի մեջ», ապա իշխանությունից, պատիվներից ու հեռանկարից զրկված, թերեւս գերության մեջ առողջությունն էլ կորցրած³⁶ խաչատուրին ի վերջո պիտի բաժին հասներ մոտավորապես այնպիսի վախճան, որն ունեցավ Գրիգոր Պիխտոն:

³³ Ըստ այս հեղինակի խաչատուրը փախչում է գերությունից, թաքնվում անտառում, սակայն նրան բռնում է մի զինվոր եւ ուզում սպանել: Խաչատուրի խնդրանքին անսալով՝ նա բավարարվում է նրա բոլոր հանդերձները խլելով եւ մերկ բաց թողնելով: Հետո նրան բռնում է մեկ այլ զինվոր, սրան էլ իբր խաչատուրը խնդրում է իրեն տանել Անդրոնիկոսի մոտ: Վերջինս նրան հագուստ է տալիս եւ ընդունում ինչպես վայել է քաջ զորականին, ինչից զգացված խաչատուրը նրան ասում է, որ անտառում թաքցրել է մի շատ թանկագին քար եւ դրա տեղն ասելով՝ այն նվիրում է Անդրոնիկոսին: Սա էլ իր հերթին այդ հազվագյուտ քարը նվիրում է թագուհի Մարիային (Հովհաննես Սկիլիցես, էջ 381):

³⁴ Նույն տեղում:

³⁵ Տե՛ս G. Dédéyan, *Les Arméniens entre Grecs, Musulmans et Croises*, vol. 1-2, Lisabonne, 2003, p. 44-45. Լ. Տեր-Պետրոսյանը 1078 թ. սպանված Անտիոքի դուքս Վասակ Պաիլավունու մասին ծանոթագրության մեջ նշում է. «Վասակից առաջ, 1069-1072 թվականներին, Անտիոքն ունեցել է մաււ մի այլ հայ դուքս՝ խաչատուր անունով» (Լ. Տեր-Պետրոսյան, նշվ. աշխ., էջ 419):

³⁶ Հիշենք Մ. Ուռհայեցու նշումը Պեխտի՝ սպանությունից առաջ հիվանդ լինելու մասին (Մատթեոս Ուռհայեցի, էջ 230):

Առայժմ մենք խաչատուր եւ Գրիգոր Պիխտ անունները ներկայացնում ենք զուգահեռաբար, որովհետեւ տեսականորեն չի կարելի բացառել, որ եղել են այդպիսի տարբեր մարդիկ: Բայց այդ դեպքում պետք է ընդունել, որ նրանք երկուսն էլ նույն ժամանակ մասնակցել են միեւնույն իրադարձություններին, մասնավորապես 1070 թվականին Կիլիկիայում սելջուկների դեմ մղված կռիվներին: Հովհաննես Սկիլիցեսի շարունակողը խաչատուրին կոչում է «Անտիոքի դուքս»³⁷, Մատթեոս Ուռհայեցին էլ Պիխտին անվանում է «տուկ Անտիոքայ քաղաքին»³⁸: Այս նույնությունն էլ կարելի է տրոհել կարծելով, որ մի դեպքում խոսքը Մեծ Անտիոքի, մյուսում՝ Իսապրիայի Անտիոքի մասին է: Բայց այդ դեպքում էլ պիտի ընդունել, որ մոտավորապես նույն ժամանակաշրջանում երկու Անտիոքն էլ հայազգի կառավարիչ են ունեցել, ընդ որում երկուսն էլ դուքսի հանգամանքով:

Այս ամենը քիչ հավանական է: Մյուս կողմից, մի շարք տվյալներ հուշում են, որ նկարագրված բոլոր դեպքերը մեկ հերոս ունեն, եւ դա Շիրակից Կիլիկիայի սահմանները գաղթած ու քաղկեդոնականություն ընդունած միեւնույն հայ իշխանն է: «Բեխոն... կնքեցաւ հռոմ»³⁹ գրված է Վարդան Արեւելցու հին օրինակներից մեկում: Մատթեոս Ուռհայեցին էլ նշում է, թե «թագաւորն Յունաց բռնադատեաց զնա եւ արկեալ կնքեաց զնա Հռոմն հաւատն»⁴⁰: Արդյոք այս դավանափոխության ժամանակ նա չի՞ ստացել իր երկրորդ անունը՝ «Խատատուրիոս», ինչպես հիշատակվում է բյուզանդական աղբյուրներում:

Դավանությունը փոխելիս (կրկնամկրտությամբ) անունը փոխելու փաստ է արձանագրված 11-րդ դարի «Վարք Հովհանի եւ Էփիմի» երկում. «Դարձյալ եկավ Գյուրպելը՝ Ջոջիկի գանձապահների

³⁷ Հովհաննես Սկիլիցես, էջ 231:

³⁸ Մատթեոս Ուռհայեցի, էջ 170:

³⁹ Վարդան Արեւելցի, էջ 109, հմմտ. «...կնքեցաւ ի Հռոմ» (Մեծին Վարդանայ Բարձրաբերդցոյ..., էջ 140):

⁴⁰ Մատթեոս Ուռհայեցի, էջ 230:

ավագը, եւ մկրտվեց, քանզի հայ էր, եւ Արսեն կոչեցին» (Ի. Ջավախիշվիլու հրատ., Թբիլիսի, 1946, էջ 41)⁴¹: Հիշենք նաեւ բյուզանդական եւ հայկական աղբյուրներում բազմիցս Փիլարտոս կամ Ֆիլարետոս անունով հայտնի նույն այս ժամանակաշրջանի հայտնի գործիչ, քաղկեդոնականություն ընդունած Վարաժնունի իշխանին, որի վաղ շրջանի արճճե կնիքի վրա նշված է նրա հայկական անունը՝ Վահրամ⁴²:

Արդյոք քաղկեդոնականություն ընդունելն ու կրկնամկրտությանը նոր անուն ստացած լինելը չէ՞ պատճառը, որ դավանանքի հարցում նախանձախնդիր մեր պատմիչները հրաժարվում են խատատուրիոս-խաչատուրի անունը տալուց⁴³, այլ միայն պաշտոնից ածանցված մականունն են հիշում: Հատկանշական է, որ եւ Մատթեոս Ուռհայեցին, եւ Վարդան Արեւելցին, այս քաջ եւ առաքինի իշխանին հիշատակելով, հիմնականում պատմում են հույների՝ նրան արած վատությունների, դավաճանության եւ վերջապես՝ սպանության մասին, այն էլ խոստովանահայր կրոնավորի ձեռքով: Ենթատեքստը հասկանալի է. քաղկեդոնական դառնալով եւ հույներին ծառայելով՝ նրանցից երախտագիտություն չես գտնի, այլ դառնություն ու մահ:

Իսկ ահա նորահայտ վկայության անանուն հեղինակն իր առջեւ նման «քարոզչական» խնդիր չի ունեցել, այդ պատճառով հիշատակում է իշխանի իրական անունը՝ Գրիգոր Պիխտ, ոչ էլ նրա մահվան դեպքում առաջնային է դարձնում քաղկեդոնական կրոնավորի պարագան: Տեղին է հիշել, որ հայտնի բյուզանդագետ Ն. Յորգան,

⁴¹ Այս տեղեկությունը մեզ տրամադրելու համար շնորհակալություն ենք հայտնում պատմական գիտությունների դոկտոր, պրոֆեսոր Պարույր Մուրադյանին (հեղ.):

⁴² V. Laurent, Les sceaux Byzantins du Médaillier Vatican, Citta del Vaticano, 1962, p. 117, N 2.

⁴³ Ըստ Ե. Քասունու՝ հայ պատմիչների՝ իշխանի անունը չտալու «պատճառը պետք է փնտռել անոր յունադաւանութիւնը ընդունած ըլլալուն մէջ» (Ե. Քասունի, նշվ. աշխ., էջ 127):

հղելով մեկ այլ հետազոտություն, գրում է, որ Խաչատուրը սպանվել է բյուզանդական մի գործակալի ձեռքով 1072 թ.⁴⁴։ Սա զարմանալի ճշտությամբ համընկնում է հայկական աղբյուրում նշված Գրիգոր Պիխտի սպանության թվականի հետ։ Ինչպես վերելում տեսանք, «գործուղված» մարդասպանի (կայսեր կողմից ուղարկված խոստովանահոր) պարագան շեշտում են մաեւ հայ պատմիչները։ Մեծ հաշվով այս տեղեկությունը հակասության մեջ չէ նոր աղբյուրի հետ, քանի որ մարդասպանն իր սեւ գործը չէր արել Անդրիուն հասնելուն պես, այլ մախ դարձել էր իշխանի վստահությունը շահած ծառաներից մեկը։

Չետաքրքիր է, որ նույն 1072 թ. Միքայել է Դուկաս կայսրը Ապլ-դարիպ Արծրունուն նշանակել է Կիլիկիայի ստրատեգոս⁴⁵։ Ըստ երևույթին այս ժամանակաշրջանում հայկական տարրի, մաեւ զինվորականության ներկայությունը Կիլիկիայում այնքան զգալի էր, որ երկրամասն ամբողջովին վերահսկելու համար կայսերն անհրաժեշտ էր տեղում հայազգի վստահելի պաշտոնյա ունենալ։ Եթե 1070 թ. Ռոմանոս Դիոգենեսը տեղի զորահրամանատարությունը հանձնել էր Խաչատուրին, ապա 1072-ին Միքայել Դուկասը, փաստորեն, նրան փոխարինել էր իրեն հավատարիմ մարդով։

Ամփոփելով վերը շարադրվածը՝ կարող ենք ասել, որ հայկական աղբյուրներում նշված Գրիգոր Պիխտը եւ բյուզանդացի հեղինակների հիշատակած Խատատուրիոս-Խաչատուրը հանդես են գալիս բազմաթիվ ընդհանրություններով։ Երկուսն էլ հայ են, քաղկեդոնական, զինվորական, ապրել են նույն ժամանակաշրջանում ու տարածքում, երկուսն էլ հիշվում են որպես Անտիոքի դուքս,

⁴⁴ N. Jorga, Geschichte des Osmanischen Reiches, Gotha, 1908, S. 68 (Տե՛ս <http://www.archive.org/details/geschichtedesosm01iorguoft>): Ն. Յորգան հղում է՝ Gfrörer, Byzantinische Geschichten III, S. 841-842: Ցավոք, այս հրատարակությունը կամ դրա տեքստը համացանցում չհաջողվեց գտնել։

⁴⁵ Արդյունքում մա «տիրում էր Տարսոն, Սսիս, Ադանա քաղաքներին, ինչպես մաեւ Լամբրոն եւ Պապեռոն բերդերին» (Լ. Տեր-Պետրոսյան, նշվ. աշխ., էջ 416)։

նկատելի է նաեւ երկուսի «նկարագրի նմանութիւնը»⁴⁶ (քաջություն, ազնվություն, հավատարմություն կայսերը):

Նորահայտ աղբյուրը հայտնում է, որ 1070 թ. Գրիգոր Պիխտը Զարունիի դաշտում ջարդել է ավարառու թուրքերին, մի տեղեկություն, որը զուգադրվում է Զովհաննես Սկլիցեսի շարունակողի՝ Խաչատուրի մասին պատմածի հետ, որին Ռոմանոս Դիոգենես կայսրը նույն թվականին հանձնել էր Կիլիկիայում գտնվող բյուզանդական զորքի հրամանատարությունը: Նոր բնագրում Գրիգոր Պիխտի մղած կռվի մասին տեղեկությունը զետեղված է Ռոմանոս Դիոգենես կայսեր 1070-1071 թթ. գործունեությանը վերաբերող երկու հատվածների միջեւ, որը հուշում է, թե խոսքն այս շրջանում կայսեր հետ առնչություն ունեցած մարդու մասին է:

Նույն աղբյուրում Գրիգոր Պիխտի մահվան թվականը՝ 1072, համընկնում է բյուզանդական աղբյուրներում Խաչատուրի անվան վերջին հիշատակության կամ նրա մահվան մասին եղած տեղեկությունների հետ: Միանման են մահվան (սպանության) հանգամանքները: Այս ամենը թույլ է տալիս եզրակացնելու, որ Անտիոքի դուքս Խաչատուրը նույն Գրիգոր Պիխտն է:

Պատմիչ Արիստակես Լաստիվերցին 11-րդ դարի 70-ական թվականներին գրած իր պատմության մեջ հայտնում է, որ Բագրատունյաց թագավորության անկման (1045 թ.) հետեւանքով Անի-Շիրակի հայ արիեստավարժ զինվորականությունը հայրենագուրկ ու թափառական էր դարձել. «Հեծելազորն անտերունջ շրջեալ ոմն ի Պարսս, ոմն ի Յոյնս, ոմն ի Վիրս: Սեպուհ գունդն ազատաց ելեալ ի հայրենեաց, անկեալ ի ճոխութենէ, մռնչեն ուր եւ են իբրեւ զկորիւնս առիւծուց...»⁴⁷: Գրիգորն ամենայն հավանականությամբ հենց այս ժամանակ Շիրակից հեռացած հայ ազատներից էր, կամ

⁴⁶ Ե. Քասունի, նշվ. աշխ., էջ 126-127:

⁴⁷ Պատմութիւն Արիստակիսի Լաստիվերտցոյ, աշխատասիրությամբ Կ. Յուզբաշյանի, Երեւան, 1963, էջ 60:

ինչպես Մատթեոս Ուռհայեցին է գրում «իշխանն Հայոց... ի Տանէն Շիրակայ», որն իր զորականներով ծառայության էր անցել բյուզանդացիների մոտ: Եթե ենթադրենք, որ Շիրակից հեռանալիս նա մոտավորապես 30 տարեկան էր, ապա մահվան ժամանակ 60-ին չհասած տղամարդ պիտի լիներ: Ըստ այդմ, նա ներկայացուցիչն էր մի սերնդի, որն ականատես էր եղել Անիի ողբերգական անցքերին, հայկական պետականության անկմանը, եւ որը, թեւ համակերպվել էր նոր իրավիճակին, սակայն վիրավորված արժանապատվությանմ⁴⁸:

Բյուզանդիայում Գրիգորը հայտնվել է դժվարին երկրնտրանքի առաջ, որը հայադավանությունից հրաժարվելն ու կրկնամկրտությունն էր: Հետաքրքիր է, որ եւ Մատթեոս Ուռհայեցին, եւ Վարդան Արեւելցին նշում են, թե իշխանը քաղկեդոնականությունը միայն առերես էր ընդունել. «բայց նա ի ծածուկ զհայրենի հաւատն իւր պաշտէր զսրբոյն Գրիգորի»⁴⁹, «ոչ պահէր զօրէնս Հռոմոնց»⁵⁰: Դժվար է համոզված լինել, որ սա ամբողջովին համապատասխանում է իրականությանը, սակայն հնարավոր է, որ այդ պնդումներն առաջացել են Գրիգորի՝ ազգային-կրոնական պատվախնդրության մի ինչ-որ դրսեւորումից, եւ գուցե հենց այս հարթության մեջ պետք է որոնել քաղկեդոնական դառնալու ժամանակ նրա ընդունած խատատուրիոս անվան ծագումը: Ինչպես տեսանք վերը նշված օրինակներում, կրկնամկրտված երկու հայերը ստացել են հույների համար միանգամայն հասկանալի Արսեն եւ Ֆիլարետոս անունները, իսկ Գրիգորը կոչվել է խատատուրիոս, որը խաչատուրն է՝ հու-

⁴⁸ Այսպիսի հոգեւիճակի դրսեւորման հատկանշական օրինակ է Անիի վերջին թագավոր, գահագուրկ Գագիկ Բ-ի ճակատագիրը Բյուզանդիայում, որտեղ նա թեւ կալվածքներ էր ստացել, բայց ազգային եւ դավանական հողի վրա մշտապես բախվում էր հույների հետ, որն էլ նրա սպանության պատճառը դարձավ 1079 թ.: Հետաքրքրական է նաեւ Գորգ Շիրակացու վրեժխնդրության դեպքը, որի մասին պատմում է Ուռհայեցին (Մատթեոս Ուռհայեցի, էջ 194-199, 234-237, 242-243):

⁴⁹ Մատթեոս Ուռհայեցի, էջ 230:

⁵⁰ Վարդան Արեւելցի, էջ 109:

նարեն արտաբերմամբ: Այսօր դժվար է ստույգ ասել, թե ինչ հանգամանքներում եւ ինչու է հատկապես այդ անունն ընտրվել, սակայն շատ հնարավոր է, որ դա եղել է հենց Գրիգորի խնդրանք-ցանկությամբ: Հայավանդ այդ անունը, ինչպես այն ժամանակ, այնպես էլ հետագայում, պիտի վկայեր այն կրողի հայ-քրիստոնյա լինելու մասին, եթե անգամ պատմությունը նրա վերաբերյալ չպահպաներ ուրիշ ոչինչ՝ անունից բացի:

ՀՈՎՀԱՆՆԵՍ ՍԱՐԿԱՎԱԳԻ

ԳՈՐԾՈՒՆԵՌԻԹՅՈՒՆՆ ԱՆԻՈՒՄ

Հայ միջնադարի ամենամշանավոր գործիչներից էր Հովհաննես Սարկավազը՝ բանիբուն վարդապետ, աստվածաբան, փիլիսոփա, մատենագիր, տոմարագետ, մանկավարժ, երաժշտագետ, բանաստեղծ: Սկզբնաղբյուրները նրան ծագումով համարում են Փառիսոս գավառից, քահանայական տոհմից: Վաղ հասակից ուսանել է Հաղբատի վանքում, իր քեռու մոտ, ապա աշակերտել Գեորգ Ուռճացի մշանավոր վարդապետին¹:

Հովհաննես Սարկավազի բազմարդյուն կյանքը կապված է եղել երկու կենտրոնների հետ՝ Հաղբատի վանք եւ Անի քաղաք: Հաղբատում ուսում է առել, հմտացել գիտության մեջ, այնուհետեւ եկել է Անի, գլխավորել տեղի վարդապետարանը, գրել իր երկերի մի մասը, որոնք անհրաժեշտ էին ուսումնական գործընթացի համար: Եղել է ժամանակի ամենահեղինակավոր վարդապետներից մեկը, հանրագիտակ անհատ: Վարքագիրը նրա մասին ասում է՝ «Յամենայն դէմս բանի եւ գործոյ, տեսութեան եւ յառաջբերութեան, գրելոյ եւ ընթեռնոյ, պատմագրութեան եւ վարդապետական վերլուծութեան, մարգարեականին եւ առաքելականին այնպէս կատարելագոյն գտաւ, որպէս եւ ո՛չ ոք ի միմն միայն համբաւեալ...»²: Նրա մասին մեծարանքով են խոսում պատմիչներ Սամվել Անեցին, Վարդան Արեւելցին, Կիրակոս Գանձակեցին, Մխիթար Այրիվանեցին եւ

¹ Հովհաննես Սարկավազի վարքում մշված «Ուռճացի» վարդապետին իրավացիորեն Գեորգ Ուռճացու հետ է նույնացնում Կ. Մելիք-Օհանջանյանը: Մատթեոս Ուռհայեցին եւ Վարդան Արեւելցին Գեորգ Ուռճացուն կոչում են «վարդապետ Հայոց», «լուսաւորիչ Տանն Հայոց»: Ապրել է շուրջ 100 տարի, մահացել 1091 կամ 1093 թ. եւ թաղվել Կամրջաձորի վանքում: Կիրակոս Գանձակեցի, Պատմություն հայոց, աշխատասիրությամբ Կ. Մելիք-Օհանջանյանի, Երեւան, 1961, էջ 2:

² Ա. Աբրահամյան, Հովհաննես Իմաստասերի մատենագրությունը, Երեւան, 1956, էջ 120

ուրիշներ: Կյանքի վերջում Յովհաննես Սարկավազը կրկին վերադարձել է Չաղբատ, մահացել ծեր հասակում 1129 թվականին: Չաղբատում պահպանվել է նրա տապանաքարը:

Յովհաննես Սարկավազը մատենագրական հսկայական ժառանգություն է թողել, որը դեռևս ամբողջովին չի ուսումնասիրվել: 1956 թ. Ա. Աբրահամյանը հրատարակել է «Յովհաննես Իմաստասերի մատենագրությունը» ժողովածուն, ուր տեղ են գտել Սարկավազի պատմագիտական, մաթեմատիկական, տոմարագիտական, փիլիսոփայական եւ գրական որոշ երկեր, զանց են առնված «կրոնական հայտնի եւ անհայտ գործերը»³, որոնք պիտի հրատարակվեին առանձին գրքով, բայց չհրատարակվեցին:

Սարկավազի կյանքի ու աշխատությունների մասին (ըստ գործունեության եւ գիտական ուղղությունների) բազմաթիվ հրապարակումներ են եղել⁴: Ստորեւ մեր նպատակն է պահպանված վկայությունների եւ հարակից տեղեկությունների ուսումնասիրությամբ

³ Նույն տեղում, էջ 350:

⁴ Ղ. Ալիշան, Սարկավազ սոփեստես, Յուշիկք հայրենեաց Չայոց, հ. Բ., Վենետիկ, էջ 279-307, Յ. Ոսկեան, Յովհաննես Սարկավազի կեանքը, գրութիւնները, «Հանդես ամսօրեայ», 1925, էջ 27-40, 117-125, 233-248, Յ. Աճառյան, Չայոց անձնանունների բառարան, հ. Գ, էջ 571-572, Ա. Մովսիսյան, Ուրվագծեր հայ դպրոցի եւ մանկավարժության պատմության, Երեւան, 1958, էջ 240-250, Մ. Աբեղյան, Երկեր, հ. Դ, Երեւան, 1970, էջ 63-82, 444-450, Ն. Թահմիզյան, Յովհաննես Սարկավազ Իմաստասերը եւ հայ միջնադարեան երաժշտական մշակոյթը, «Բազմավեպ», 1978, 3-4, էջ 328-356, Յ. Քյոսեյան, Յովհաննես Սարկավազի «Վասն պատկերաց» եւ «Վասն մասանց պատուոյ» աշխատությունները, Պատմա-բանասիրական հանդես, 1979, 4, էջ 127-134, Կ. Միրումյան, Յովհաննես Սարկավազի աշխարհայացքը, Երեւան, 1984, Աս. Մնացականյան, Յովհաննես Սարկավազի «Բան իմաստության» պոեմը եւ նրա զնահատությունն ըստ օգտագործված աղբյուրների, «Բանբեր Սատենադարանի», 14, 1984, էջ 9-42, Գ. Բրուտյան, Օրացույց հայոց, Ս. Էջմիածին, 1997, էջ 115-145, Ռ. Վարդանյան, Չայոց տոնացույցը, Երեւան, 1999, էջ 230-266, Մ. քհ. Արամյան, Յովհաննես Սարկավազի «Յաղագս նշանակի հաւատոյ Նիկիականն ՅժԸ-իցն» ժողովածուն, «Գանձասար», 2, 1996, էջ 44-78, Տ. քհ. Ուզունեան, Յովհաննես Սարկավազ վարդապետ, «Գանձասար», 2, 1996, էջ 298-339 եւ այլն:

ներկայացնել Հովհաննես Սարկավազի անհական շրջանի գործունեությունը, այդ առնչությամբ անդրադառնալով նաեւ նրա **պատմական** բնույթի աշխատություններին:

Անհուն Հովհաննես Սարկավազի գործունեության մասին վկայվում է վարդապետի կենսագրության մեջ, ուր բազմաթիվ արժեքավոր տեղեկություններ կան նրա գլխավորած դպրոցի ուսումնական ծրագրի, կրթական գործընթացի մասին: Դպրոցի ստեղծումը կենսագիրը ներկայացնում է պատկերավոր արտահայտությամբ, գրելով, որ Սարկավազը **«իբրեւ զհմաստուն մեղու, բարձեալ յանդամս մտաց զճաղիկս յերանգոց գունոց, եւ հոտոց եւ համոց, բերէր ի քաղաք իւր եւ տեղի սննդեան՝ ի քաղաքամայրս Անի եւ լի առնէր ըզտունն ի փարթամութենէ անտի... Շուրջ բակ բոլորեալ զմանկունս զիւրեալ՝ խոնարհաբար եւ ախորժելի սիրով ուսուցանէր զխրթին եւ զխորին իրս... եւ զետք յորվայնէ նորա բղխեալ՝ արբուցին զտուն տէրունական եւ զնորատունկ մանկունս յարկաց Աստուծոյ... ելին յարմատոյ եւ ի շառաւիղէ նորին... ուսուցիչք եւ լուսաւորք ոգւով... եւ լցին զտիեզերս բանին կենաց...»⁵:**

Հովհաննես Սարկավազի գլխավորած դպրոցին անդրադարձող ուսումնասիրողները, որպես կանոն, չեն խորացել դրա հիմնադրման հանգամանքների մեջ, որի պատճառով անտեսվել է այդ շրջանում Անիում կաթողիկոսական աթոռի վերահաստատման հանգամանքը: Ենթադրվել է, թե Սարկավազը քաղաքում մի մասնավոր դպրոց է ստեղծել, իսկ ոմանք էլ այն պարզապես աշխարհիկ դպրոց են համարել: Ա. Աբրահամյանը գրում է. «Հովհաննեսը Հաղբատում կրթություն ստանալուց հետո եկել է Անի եւ այնտեղ դպրոց հիմնել»⁶: Ըստ Կ. Միրումյանի՝ Սարկավազը եղել է «Անիի դպրոցի (գուցե Անիի դպրոցներից մեկի) ղեկավար», որը ձեռք է բերել «աշ-

⁵ Ա. Աբրահամյան, նշվ. աշխ., էջ 120-121: Այս եւ հաջորդ մեջբերումներում ընդգծումները մերն են, Կ.Մ.:

⁶ Ա. Աբրահամյան, նշվ. աշխ., էջ 25:

խարհիկ բնույթ»⁷: Թ. Հակոբյանի կարծիքով Սարկավագի գլխավորած դպրոցն «իր բնույթով հիմնականում աշխարհիկ էր, իմաստասիրական»⁸: Իսկ Ա. Մովսիսյանը կարծես մոռանում է դպրոցի գոյության ժամանակը եւ գրում. «Անիի դպրոցը միանգամայն աշխարհիկ պահանջներին համապատասխան էր կառուցված եւ ամբողջովին գտնվում էր արքունիքի հովանավորության ներքո»⁹: Մինչդեռ Հովհաննես Սարկավագի ապրած ժամանակներում մահմեդական Շադդադյան ամիրաների իշխանության տակ գտնվող Անիում համահայկական նշանակություն ունեցող բարձրագույն դպրոց կարող էր բացվել միայն եկեղեցական բարձր հովանավորության պայմաններում: Ինչ վերաբերում է դպրոցի ուղղվածությանը, ապա այն տալիս էր հոգեւոր բարձրագույն կրթություն, որը ներառում էր ժամանակի գիտության բոլոր հիմնական ուղղությունները:

11-րդ դարի վերջերին Անիում կարճ ժամանակով վերականգնվեց կաթողիկոսական աթոռը, երբ Գրիգոր Վկայասերի (1066-1105) համաձայնությամբ Հաղբատում կաթողիկոս ձեռնադրվեց ու հանդիսավոր երթով Անի եկավ Բարսեղ Ա Անեցին (1081-1113): Նրա կատարած կարեւոր գործերից մեկը պիտի համարել Անիում կաթողիկոսարանի վարդապետարանի վերաբացումը: Դեռեւս 10-րդ դարի կեսերի կաթողիկոսանիստ Արգինայից սկզբնավորվող, ապա Անի մայրաքաղաքում գործող բարձրագույն հոգեւոր դպրոցն էր, որ կրկին կյանք առավ Բարսեղ Ա-ի հոգածությամբ եւ ժամանակի նշանավոր վարդապետ Հովհաննես Սարկավագի ուսուցչապետությամբ: Այս էր պատճառը, որ բարձրագույն կրթություն ստանալու համար Սարկավագի մոտ էին գալիս Հայոց երկրի տարբեր ծայրերից, վարքագրի բնորոշմամբ՝ որպես «իմաստութեան զանձուց վաճառականք», Անիում ուսանելով դառնում «ուսուցիչք եւ լուսա-

⁷ Կ. Միրունյան, նշվ. աշխ., էջ 29:

⁸ Թ. Հակոբյան, Անիի պատմություն, գիրք Բ, Երեւան, 1982, էջ 114:

⁹ Ա. Մովսիսյան, նշվ. գշխ., էջ 243:

ւորք ոգւով», եւ վերադառնալով իրենց գավառները՝ վարդապետի պատգամները տարածում ողջ Հայաստանում՝ «...նորայն առասա-
ցութիւնք լցին զոլորտս Հայաստանեայց»¹⁰:

Կենսագրի վկայության այս նույն ոճով է արձանագրվում նաեւ Հովհաննես Սարկավազի ընդօրինակած, խմբագրած Սաղմոսարանի տարածումը՝ «գոր վերահասու եղեալ մեծ իմաստասերն Հայոց հոգեխառն վարդապետն սուրբ Յովհաննէս մականուն Սարկաւազ, որ... գտեալ... թարգմանչագիր Սաղմոսարանն եւ պարապեալ ի յայնմ յաւուրս բազումս, ի լոյս էած... եւ ցրուեաց **ընդամենայն սահմանս Հայաստանեայց»¹¹:**

Այն, որ Հովհաննես Սարկավազը զբաղվել է ոչ միայն տեղային (Հաղբատ, Անի), այլեւ համահայաստանյան խնդիրներով, երեւում է տոմարական բարեփոխման ուղղությամբ նրա կատարած աշխատանքից: Հայոց տոմարի նախընթաց պատմությունը ցույց է տալիս, որ տոմարական խնդիրները, որոնք եկեղեցական տոների կարգավորման տեսանկյունից առաջնային նշանակություն ունեին, միշտ էլ լուծվել են Հայոց կաթողիկոսի եւ ժամանակի նշանավոր վարդապետներից մեկի համագործակցությամբ: 6-րդ դարում նման գործակցության մեջ էին Մովսես Բ եղիվարդեցին եւ Աթանաս Տարոնացին, 7-րդ դարում՝ կաթողիկոս Ամաստաս Ակոռեցին եւ Անանիա Շիրակացին, ուստի 11-րդ դարում էլ Հովհաննես Սարկավազ վարդապետի կողքին պետք է տեսնել Բարսեղ Ա Անեցուն: Իրավացի է Մ. Օրմանյանը, երբ գրում է. «...անհնար է, որ Բարսեղ որեւէ գործակցութիւն ունեցած չըլլայ»¹²: Նույն կարծիքն է հայտնել Մ. Ա-

¹⁰ Ա. Աբրահամյան, նշվ. աշխ., էջ 120: Անիի դպրոցում դասավանդվող առարկաների, ուսումնական գործընթացի եւ այլ հարցերի մասին նշվում է վարդապետի վարքում, որի հեղինակը այդ մասին տեղեկացել է Սարկավազին ծանոթ անձանցից: Այս հարցերի մասին ավելի համազամանորեն տես Ա. Աբրահամյան, նշվ. աշխ., էջ 26-27, 120-121, Ա. Մովսիսյան, նշվ. նշխ., էջ 410-420:

¹¹ Հայերեն ձեռագրերի հիշատակարաններ, Ե-ԺԲ դդ., աշխատասիրությամբ Ա. Մաթեւոսյանի, Երեւան, 1988., էջ 157:

¹² Մ. Օրմանյան, Ազգապատում, հ. Ա, Ս. Էջմիածին, 2001, էջ 1309:

բեղյանը՝ գրելով. «Թեև մեր ժամանակագիրները չեն հիշում, բայց անպայման անհրաժեշտ պիտի լիներ իշխանության հաճություն այդ գործի համար, եւ հավանորեն այն եղել է Անիում նստող Բարսեղ եպիսկոպոսի կողմից, որ 1081 թ. Հաղբատի վանքում ձեռնադրվել է կաթողիկոս: Հավանորեն այս թվականին էլ հանձնարարվել է Սարկավագին գլուխ բերել այդ գործը»¹³:

Պատմիչները Հովհաննես Սարկավագի կատարածի մասին գրում են համառոտ՝ «զհաստատ եւ զանշարժ տոմարն կարգեաց հայոց փոխանակ շարժականին եւ անհաստատնոյն. արար եւ միաբանութիւն ամենայն ազգաց տոմարի ընդ Հայոց. վասն զի յոյժ իմաստուն էր այրն...»¹⁴: Սարկավագի՝ տոմարական խնդիրներին վերաբերող մի քանի աշխատություն է պահպանվել, որոնք հանգամանորեն ուսումնասիրվել եւ պատկերացում են տալիս վարդապետի կատարած ծավալուն աշխատանքի մասին¹⁵:

Հովհաննես Սարկավագը կազմել է հայոց օրացույցի երկրորդ 532-ամյա (ՇԼԲ) շրջանի աղյուսակը 1085-1616 թվականների համար (Հայոց Փոքր թվական): Տոմարական խնդիրների մեկնություն պարունակող նրա «Պատճեն տոմարի» երկը գրվել է 1094 թ.¹⁶: Պահպանվել են նաեւ Սարկավագի տոմարագիտական մի շարք այլ գրություններ, որոնք երբեմն նրան ուղղված հարցերի պատասխաններ են¹⁷:

¹³ Մ. Աբեղյան, նշվ. աշխ., էջ 449:

¹⁴ Կիրակոս Գանձակեցի, էջ 113, Մխիթարայ Այրիվանեցու Պատմութիւն Հայոց, Մոսկուա, 1860, էջ 60:

¹⁵ Գ. Բրուտյան, նշվ. աշխ., էջ 115-145, Ռ. Վարդանյան, նշվ. աշխ., էջ 230-266

¹⁶ Ռ. Վարդանյան, նշվ. աշխ., էջ 231-232, 265-266:

¹⁷ Դրանցից մի քանիսի խորագրերն են՝ «Մեկնութիւն տոմարիս Հայկազնեայ», Յովհաննու վարդապետի արարեալ մեկնութիւն... յաղագս Շ.եկին», «Յաղագս ըստ Հռոմոց ամսոց եւ Դժ.երորդ լուսնոյ Ջատկաց եւ փոփոխման իրաց եւ անուանց եւ յարակայից», «Յոհաննու քահանայի յաղագս եղանակաց եւ տաւնից եւ քանիաւնութեան ամաց...», «Յաղագս յարակայից, գերադրաց եւ թոպէից», «Յաղագս ամսոց Հայոց եւ տաւնից», «Վասն շարժման եւ սասանութեան երկրի», Ա. Աբրահամյան, նշվ. աշխ., էջ 222, 237, 246, 252, 256, 280, 302:

Տոմարի խնդիրներին վերաբերող աշխատանքը Հովհաննես Սարկավազը շարունակել է հետագա երկու տասնամյակներին, բարեփոխել է Անանիա Շիրակացու «խառնախորանը»՝ այնտեղ ավելացնելով Սարկավազադիր հայկական օրացույցը եւ այլն: Սակայն Սարկավազի բարեփոխումները միայն մասնակի կիրառություն գտան, «Հայոց հետագա պատմիչներն ու հիշատակագիրներն սկսեցին կիրառել Սարկավազադիր թվականը կամ զուգահեռ դնել այլ թվականության համակարգերին, իհարկե ոչ այն չափով ինչ որ հայոց մեծ թվականն էր, որը շարունակեց իր ընթացքը»¹⁸: Պատճառը թերեւս այն էր, որ այդ շրջանում եկեղեցական բարձրագույն իշխանությունը շատ ավելի բարդ խնդիրների առաջ էր կանգնած, եւ տոմարական մեծ բարեփոխում իրականացնելը դյուրին չէր¹⁹:

Այսպիսով Հովհաննես Սարկավազն Անիում զբաղվում էր մանկավարժությամբ, նաեւ տոմարական հարցերով եւ իր սաներին էլ այս ուղղությամբ անհրաժեշտ գիտելիքներ տալիս, որի մասին նշվում է նրա վարքում. «...կրթեր, արկաներ ի գիրս նուրբս եւ դժուարալուրս..., Յետ այսորիկ ի խոյզ եւ ի քնին ընթացից լուսաւորացո մտեալ, տայր գումարել ի միատեսակ եւ յանստերիւր թիւս տոմարի, զուշ եւ զակն ոգւոց: Եւ տեղեակ առնէր տօնից կարգաւորաց եւ փոփոխման ամսոց եւ ամանակաց եւ եղանակաց...»²⁰: Այս գիտելիքները լավագույնս կիրառեց նրա սաներից մեկը, հետագա-

¹⁸ Ռ. Վարդանյան, նշվ. աշխ., էջ 266:

¹⁹ Մ. Օրմանյանը տոմարի կիրառության առնչությամբ գրում է՝ «...գուցէ գործը Վկայասէին ներկայացուցին, իսկ նա պաշտօնական հրամանը զանց ըրաւ...» (Մ. Օրմանյան, նշվ. աշխ., էջ 1530): Գրիգոր Վկայասերի թույլ վարչարարության եւ այլ պատճառներով 1070-90-ական թվականներին առաջացել էին մի քանի հակաթոռ կաթողիկոսություններ: Վկայասերն անգամ կայուն աթոռանիստ չունէր եւ որոշ իմաստով կաթողիկոսական լիազորությունները հանձնել էր Բարսեղ Ա Անեցուն: Վերջինս հնազանդեցրեց կամ վերացրեց հակաթոռ կաթողիկոսությունները: 1105 թ. մահամերձ Վկայասերի կանչով Բարսեղը գնաց Քեսունի հայկական իշխանություն: Գրիգոր Վկայասերի մահից հետո նա մինչեւ կյանքի վերջը (1113 թ.) այլեւս Անի չվերադարձավ:

²⁰ Ա. Աբրահամյան, նշվ. աշխ., էջ 121:

յուն Անիի Մայր տաճարի երեց դարձած Սամվել Անեցին, որը Եվսեբիոս Կեսարացու Քրոնիկոնի սկզբունքով կազմեց Ադամից մինչև իր օրերը հասնող ժամանակագրություն, նաև գրեց տոմարագիտական աշխատություն՝ «Մեկնութիւն տունարի»²¹: Սարկավագի Անիի աշակերտներից պատմության մեջ հիշվում են նաև Երեմիա Անձրեւիկ եւ Սարգիս Կունդ վարդապետները, անեցիներ Խաչատուրը, Գրիգորը, Յովհաննեսը²²: Բուրոբովին վերջերս հայտնի դարձավ, որ Յովհաննես Սարկավագի կրտսերագույն աշակերտներից է եղել նաև Հառիճի վանք երկրորդ զարթոնքը նախաձեռնող, Մխիթար Անեցու Պատմության պատվիրատու Գրիգոր Հառիճեցին, որին ժամանակակիցները կոչել են «ուսուցիչ եւ աւրինակ բարեաց ամենեցուն»²³:

Անիում Յովհաննես Սարկավագն առաջին հերթին պատրաստել է գրքեր, որոնք անհրաժեշտ էին ուսումնական գործի համար: Ինչպես կենսագիրն է նշում՝ «ամենայն նսեմացեալ եւ խամրացեալ գիտութիւնք, որ ի տգիտութենէ... ծածկեալ աղաւաղեցան, որ ի նախնեացն, սորին աշխատաջան երկովք եւ արագութեամբ մտաց զարդարեցան եւ ցնծացան անձինք տեսասէր եւ լսասէր արանց»²⁴:

Անցյալի գիտամշակութային ժառանգության վերհանումը կարեւորում էր դեռելու Գրիգոր Մագիստրոսը, երբ Անիում նստող Պետրոս Ա Գետադարձ կաթողիկոսին գրած թղթերում հորդորում էր ուսումնական գործընթացում կիրառել Ամանիա Շիրակացու Քննիկունը, որը գտնվում էր կաթողիկոսարանում: Ընդհանրապես Անիի կաթողիկոսարանում, արքունիքում, եկեղեցիներում բազմաթիվ արժե-

²¹ Ա. Աբրահամյան, Սամվել Անեցու տոմարական եւ տիեզերագիտական աշխատությունները, «Էջմիածին», 1952, Ա, էջ 30-36:

²² Սամուել Անեցի, Հաւաքմունք ի գրոց պատմագրաց, աշխատասիրութեամբ Ա. Տեր-Միքելյանի, Վաղարշապատ, 1893, էջ 128 (այսուհետեւ՝ Անեցի):

²³ Յ. Քիւրտեան, Հռոմի վանքի արձանագրութիւնները, «Բազմավեպ», 1957, 11-12, էջ 268, Կ. Մաթևոսյան, Գրիգոր Հառիճեցու նորայայտ թուղթը, «Հանդէս ամսօրեայ», 2009, էջ 171-178:

²⁴ Ա. Աբրահամյան, Յովհաննես Իմաստասերի..., էջ 120:

քավոր մատյաններ էին պահվում²⁵, պակաս հարուստ չէր նաեւ Զաղբատի վանքի մատենադարանը: Սակայն 1045 թ. Բագրատունյաց թագավորության անկման, ապա սելջուկյան ներխուժման ու երկրի ծանր վիճակի հետեւանքով այդ գրավոր հարստությունը անուշադրության էր մատնվել: Այն վերստին կյանքի կոչելուն էին ուղղված Զովհաննես Սարկավազի ջանքերը: Ձեռագրերում պահպանված մատենագրական տարբեր միավորների խորագրեր, հիշատակարաններ ու այլ տվյալներ վկայում են, որ բազմաթիվ հանրահայտ հեղինակների մատյաններն ու գործերը անցել են Սարկավազի ձեռքի տակով, ճշտվել, «ստուգաբանվել»²⁶ կամ «երկրորդվել», ինչպես նշվում է Եվսեբիոս Կեսարացու «Եկեղեցական պատմության» պարագայում²⁷: Սարկավազը «Ամիի դպրոցում դասավանդելու ժամանակ սրբագրել, խմբագրել, արտագրել է հայ եւ օտարազգի աստվածաբանների ու փիլիսոփաների (Դավիթ Անհաղթ, Մովսես Խորենացի, Արիստոտել, Փիլոն Ալեքսանդրացի, Դիոնիսիոս Արիոպագացի, Բարսեղ Կեսարացի, Գրիգոր Նազիանզացի, Կյուրել Ալեքսանդրացի, Զովհաննես Ոսկեբերան եւ ուրիշներ) բազում... աշխատություններ, որոնք օգտագործվել են նաեւ որպես դասագիրք»²⁸:

Զովհաննես Սարկավազն Ամիում զբաղվել է նաեւ գիտական ստեղծագործական ու գրական գործունեությամբ: Ս. Արեւշատյանը նշում է, որ Զովհաննես Սարկավազը «եղավ բնափիլիսոփայական ուղղության ձեւավորողը հայ իրականության մեջ»²⁹: Նա անդրադառնում է Սարկավազի արտահայտած մի շարք մտքերին, ինչպես օրինակ՝ «առանց քննելու եւ փորձելու չի կարելի ընդունել որեւէ

²⁵ Կ. Մաթեոսյան, Ամի, Ս. Էջմիածին, 1997, էջ 225-240:

²⁶ «Կարգադրութիւնք գրոց սրբոց որք ստուգաբանեցան ի Սարկաւազ վարդապետեն...»: Է. Զարոբյունյան, Մխիթար Այրիվանցի, Երեւան, 1985, էջ 115:

²⁷ Ա. Աբրահամյան, Զովհաննես Իմաստասերի..., էջ 137:

²⁸ Քրիստոնյա Հայաստան հանրագիտարան, Երեւան, 2002, էջ 632:

²⁹ Հայ ժողովրդի պատմություն, հ. 3, Երեւան, 1976, էջ 339:

պնդում», «առանց փորձի կարծիքը չի կարող ճշմարիտ համարվել», «ոչ թե խոսքն է հաստատում իրի ստուգությունը, այլ իրը՝ խոսքի, եւ սրանից ելնելով պետք է փնտրել ճշմարտությունը» եւ այլն, դրանց ի հայտ գալը կապելով քաղաքների զարգացման հետ, «որոնք կյանքի էին կոչել գիտության նոր ճյուղեր, հետաքրքրություն առաջ բերելով ճշգրիտ գիտելիքների նկատմամբ»³⁰:

Հատկապես քաղաքային միջավայրում առկա տարբեր կրոն ու դավանանք ունեցող հասարակական խմբերի համակեցության եւ մասնավորապես քրիստոնյաների համերաշխության գիտակցումով է պայմանավորված հայ միջնադարյան իրականության մեջ դավանական հանդուրժողականության սկզբունքները պաշտպանող գրությունների ի հայտ գալը³¹: Այս տեսակետից հայտնի են Մխիթար Գոշի եւ Վարդան Այգեկցու հայացքներն ու համապատասխան գրությունները, սակայն նրանց նախորդում է Հովհաննես Սարկավազը, որի դավանաբանական գործերում հստակորեն առաջ է բերվում դավանական հանդուրժողականության անհրաժեշտությունը³²:

Քաղաքային միջավայրում ծնունդ առած աշխարհայացքային նոր միտումներն արտահայտություն են գտել նաեւ «Յովհաննու Սարկաւագի իմաստասիրի եւ վարդապետի ասացեալ բան իմաստութեան ի պատճառս զբօսանաց» խորագրով պոեմում: Այս մեծարժեք եւ հանգամանորեն ուսումնասիրված ստեղծագործության մանրամասները չներկայացնելով մեջբերենք Աս. Մնացականյանի եզրահանգումները. «Բան իմաստության» պոեմում մշակված է մի

³⁰ Նույն տեղում, էջ 341:

³¹ Պ. Մուրադյան, Դավանական հանդուրժողականության եւ ազգամիջյան համերաշխության գաղափարները ԺԲ-ԺԴ դդ. Հայաստանում, «Գանձասար», Դ, 1993, էջ 95-109, Կ. Մաթեոսյան, Անի, էջ 190-192:

³² Մ. քհ. Արամյան, նշվ. աշխ., էջ 76-78: Սարկավագի դավանաբանական աշխատություններն ուսումնասիրելով հեղինակը դրանք բնութագրում է որպես «ԺԱ-ԺԲ դդ. արեւելաքրիստոնեական մշակոյթի կարեւորագոյն կոթողներից մէկը» (Նույն տեղում, էջ 45):

թարմ թեմա՝ մարդու եւ բնության հարաբերության հարցը. ա) Բնությունը ի դեմս Սարյակի, արվեստների սկզբնաղբյուրն է, որից սովորել ու սովորում է մարդկությունը, բ) Մարդկությունն անարդար է, որ հալածում է բնության ստեղծագործ ուժերին: ...«Բան իմաստության» պոեմի մեջ քննված արվեստի հարցերը ծնվել են Անիի միջավայրում զարգացած մշակութային ընդհանուր նվաճումների հիման վրա»³³:

Նկատենք, որ, իհարկե, Անին Հովհաննես Սարկավագի ժամանակ Բագրատունյաց շրջանի փայլը չուներ, սակայն դա մի ժամանակ էր, երբ որոշակի դժվարությունների պայմաններում համախմբվում եւ իր ուրույն դիմագիծն էր ձեռք բերում քաղաքային դասը: Քաղաքի մահմեդական տերը, մոր կողմից հայ Մանուչե ամիրան (1065-1110) իր իշխանության առաջին տարիներին քայլ առ քայլ վերացնում էր Ալփասլանի (Ալփ Արսլան) գործած ավերածությունների հետքերը եւ քաղաք հրավիրում հեռացած հայ ազնվականներին, մասնավորապես Պահլավունիների հետ խնամհացած Հասանյաններին (Ապիրատյաններ): 1072-ից քաղաքի եպիսկոպոս դարձած, իսկ 1081-ին կաթողիկոս ձեռնադրված Բարսեղ Անեցիին ավելի մեծ թափ հաղորդեց Անիի քաղաքացիության դիրքերի ամրապնդմանը: Այս շրջանում Անին շարունակում էր պահպանել արհեստավորական ու առեւտրական, նաեւ եկեղեցական ու մշակութային կենտրոնի համբավը, հայության գիտակցության մեջ մնում էր որպես «քաղաքամայր»: Իրավացի է Մ. Աբեղյանը, երբ գրում է. «Արդարեւ Բագրատունի թագավորների օրով արդեն Անիում... մեծ ձգտում եւ ջանք կար գիտությունը նորոգելու հայերի մեջ, եւ այդ ձգտման ու ջանքի ներկայացուցիչն էր Գրիգոր Մագիստրոսը, բայց իսկական կատարողը, գլուխ բերողը եղել է Սարկավագ Վարդապետը: Նա շարունակել է Անի քաղաքի գործը, անպայման նաեւ այս քաղաքի ազդեցությամբ...»³⁴:

³³ Աս. Մնացականյան, նշվ. աշխ., էջ 38:

³⁴ Մ. Աբեղյան, նշվ. աշխ., էջ 70:

Այժմ ավելի մանրամասնորեն անդրադառնանք Հովհաննես Սարկավազի պատմագիտական գործերին կամ, ինչպես սովորաբար նշվում է, «կորած պատմությանը»:

«Հովհաննես Իմաստասերի մատենագրությունը» գրքում Ա. Աբրահամյանն առանձին ենթավերնագրում անդրադառնում է հեղինակի «պատմագիտական աշխատություններին»: Նա գրում է. «Հովհաննես Իմաստասերի աշխատություններից, ըստ մատենագրական տեղեկությունների, արժեքավոր գործ է հանդիսացել նրա Պատմությունը: ...Հովհաննեսի այդ կորած Պատմությունը Ալիշանի կարծիքով բաղկացած է եղել երկու մասից. առաջին մասում շարադրված է եղել սկյութացիների պատմությունը՝ սելջուկների հանդես գալը, նրանց արշավանքները, Տուղրիլ բեկի, Մահմուդի, Ալփասլանի պատմությունները եւ այլն, իսկ երկրորդ մասում շարադրված է եղել Մելիքշահի պատմությունը»³⁵: Այնուհետեւ նա գրում է, որ այդ կարծիքը ճիշտ չէ, քանի որ կարծեցյալ առաջին մասը Սամվել Անեցիին չի գտել, ուստի դա առանձին գործ է եղել, եւ եզրակացնում է. «Ինչպես տեսնում ենք... Հովհաննեսի պատմական աշխատություններից մենք ունենք ո՛չ թե մեկ, այլ երկու կորուստ»³⁶: Կորած առաջին գրքի մի հատված, ըստ Ա. Աբրահամյանի, տեղ է գտել Սանահինի «Քյոթուկում»: Այստեղ պատմվում է, որ 1110 թվականի օգոստոսի 13-ին Սանահինում միաբանները ենթարկվել են սելջուկների անակնկալ հարձակմանը, սակայն կարողացել են անվնաս վանքից դուրս բերել իրենց մոտ գտնվող Կյուրիկյան Դավիթ թագավորին: Նյութը Սարկավազի գրությունից քաղողն իր աղբյուրի մասին հայտնում է. «...էր եւ պատահումն ի վանսն Սանահին կոչեցեալ, զոր տայ մեզ գրով իմաստուն պւետիկոսն Սարկաւազ եւ ասէ այսպէս...»³⁷: Միանգամից ասենք,

³⁵ Ա. Աբրահամյան, Հովհաննես Իմաստասերի..., էջ 34:

³⁶ Նույն տեղում, էջ 35:

³⁷ Նույն տեղում, էջ 35, 136, հմմտ. Յիշատակարան Սանահնոյ վանից, (Սանահինի Քէթուկը), աշխատասիրութեամբ Պ. Մուրադեանի, Ս. Էջմիածին, 2007, էջ 60:

որ 1110 թվականի դեպքը չէր կարող ընդգրկվել Ալփասլանի (մահ.1072 թ.) թագավորությամբ ավարտվող երկում:

Հովհաննես Սարկավագի սելջուկներին վերաբերող գրությունների մասին առաջինը հայտնում եւ դրանցից մեջբերումներ է կատարում նրա սան Սամվել Անեցին: Նա իր «Հաւաքմունք ի գրոց պատմագրաց յաղագս գիւտ ժամանակաց անցելոց մինչեւ ի ներկայս ծայրաքաղ արարեալ» վերնագրով ժամանակագրությունը գրել է կաթողիկոս Գրիգոր Գ Պահլավունու (1113-1166) պատվերով: Ժամանակագրությունն ավարտում է 1163 թվականով³⁸: Անեցին թեւէ ընդհանրապես գրել է շատ համառոտ, իր խոսքերով՝ «կարճ ի կարճոյ», սակայն պատվիրատուի պահանջը կատարելով (կաթողիկոսն այդ ժամանակ հարաբերությունների մեջ էր Անիի ամիրայի հետ եւ սելջուկների պատմության իմացության կարիքն ուներ) ավելի հանգամանորեն է անդրադարձել սելջուկներին եւ մասնավորապես Մելիքշահին: Նրա մասին պատմիչի հաղորդումներն ուղղակի մեջբերումներ են Հովհաննես Սարկավագի գործերից:

Սամվել Անեցին իր պատվիրատուին սովորաբար բացատրություններ է տալիս Սարկավագի գրություններից քաղվածքներ ներկայացնելիս: Արաբներից հետո սելջուկների գերիշխանության հաստատման մասին գրում է. «Սկիւթացւոցն (սելջուկների - Կ. Ս.) առնուլ զբռնակալութիւն այսպիսի պատճառաւ: Ընթերցաք գրեալ **վարդապետին մեծի, որ Սարկաւագ վերակոչի անուանեալ**, զի ասէ թէ...»³⁹: Հատվածի վերջում ավելացնում է. «Զայսոսիկ **նշանակաւ գրոյ եցոյց մեզ Իմաստասէրն** մինչեւ ցՄելիքշահն, **զոր յիւրում տեղւոջն գրեցից**, սորին ձեռնտուութեամբ»: Շարունակելով եւ Մելիքշահի նախնիների անունները տալով՝ Անեցին նշում է, որ ինքը ժամանակին տեսել է Սարկավագի գրությունը նաեւ նրանց մասին, ե-

³⁸ Կ. Մաթեոսյան, Սամուել Անեցու «Ժամանակագրության» ավարտման թվականը եւ պատվիրատուն, «Պատմա-բանասիրական հանդես», 1992, թիվ 1, էջ 156-162, Նույնի, Սամուել Անեցի (կենսագրական լրացումներ), «Էջմիածին», 2003, Զ, էջ 47-57:

³⁹ Մատենադարան, ձեռ. թիվ 5619, թերթ 88բ, Անեցի, էջ, 97:

թե մատյանը գտնի, կվերաշարադրի. «Իսկ հաւրն նորա (Մելիքշահի - Կ. Մ.) ժամանակ՝ զաւրինախանձն **Ալփասլանայ** եւ զնորին հաւրն եւ հաւուց, զոր **Տուղլուպէկ** եւ **Մահմուտ** եւ **Սարջուկ** անունք են նոցա, **տեսաք երբեմն գրեալ սորին** (Սարկավագի - Կ. Մ.) **ձեռաւք, ստոյգ գտակաւ**, եթէ հանդիպինք մատենին եւ մեք շարագրեսցուք եւ թե ոչ, լքցուք...»⁴⁰: Ինչպէս երեւում է, Սամվել Անեցին Սարկավագի այդ գրությունը չի գտել: Հետաքրքիր է, որ Սամվելի՝ Մելիքշահի նախնիների պատմության փնտրտուքը շարունակել է նրա կրտսեր ժամանակակից պատմիչը՝ Մխիթար Անեցին⁴¹:

Ալփասլանի մահվան մասին նշելուց հետո Սամվել Անեցին գրում է. «Աստանօր զխոստացեալ պարտսն հատուցից զմնացուածս բանից, զոր եթող հարկ տեղւոյն այնորիկ այսու պատշաճեալ ժամանակի: Զի ասէ **Իմաստասերն աստուածային**՝ թե «Իբրեւ առնոյր զփառս իշխանութեան բարեբաղտն Մելիքշահ...»⁴²: Շարունակությունն ընդարձակ մեջբերում է Սարկավագի այժմ կորած երկից, որտեղ հիմնականում փառաբանվում է Մելիքշահը: Հատվածի վերջում պատմիչը նշում է, թե այս ամենն Իմաստասերն ասաց Մելիքշահի կյանքի մասին (որը տիրեց 20 տարի), իսկ հետո ինքը

⁴⁰ Մատենադարան, ձեռ. թիվ 5619, էջ 89բ, Անեցի, էջ 98:

⁴¹ Մխիթար Անեցու այժմ կորած բնագրից մեջբերում անելով Վարդան Արեւելցին գրում է. «Պատուական երեցն Մխիթար Անեցին... այսպէս ասէ. «**Յուլով աշխատ եղէ գտանել զորպէսն սուլտանացն, որ ի թուրքաց եւ զտի շնորհօքն Աստուծոյ, այսպէս՝ Մահմուտն...** Արքթանայ որդի, յաննշանից մեծացեալ...: Իսկ յառաջադէմն ի թուրքացն՝ որում անուն էր Մուսեափաղոյ **Սարջուքեայ** որդի...: Եւ փոխէ զնա **Արփասլան** հօրեղբօրորդի **Տուղրիլին**, որ ելից զամենայն աշխարհ արեամբ եւ... հասանէր յաթոռ թագաւորութեանն **Մելիքշահն**, բարի եւ խաղաղարար...» (Վարդան Արեւելցի, Տիեզերական պատմություն, Երեւան, 2001 (բնագիր), էջ 99-102): Ինչպէս տեսնում ենք Մխիթար Անեցին դժվարությամբ է գտել սելջուկների պատմությունը, որը եւ իր երկում մեջ է բերել: Այն հասցնում է մինչեւ Տուղրիլ Բ (1177-1187), «որ կայր մինչ ի պատմագիրս», եզրափակում է Արեւելցին, նկատի ունենալով Մխիթար Անեցուն: Դատելով ոճից ու ժամանակագրական ընդգրկումից՝ այս պատմությունը Սարկավագի գրածը չէ:

⁴² Մատենադարան, ձեռ. թիվ 5619, թերթ 98ա, Անեցի, էջ 115:

կգրի նաեւ նրա մահվան մասին ասածը. «Արդ՝ **ասաց զայս** զկենաց նորա, որ տիրեաց ամս Ի (20) իսկ զկնի գրեցից զոր ինչ **վասն մահուան է ասացեալ**»⁴³: Քիչ անց խոստումը կատարելով՝ պատմիչը գրում է Մելիքշահի մահվան, բայց նաեւ՝ քրիստոնյաների եւ մասնավորապես հայերի նկատմամբ նրա ունեցած բարյացակամ վերաբերմունքի մասին: Սամվել Անեցին դարձյալ մեջբերում է կատարում Սարկավագից՝ չմոռանալով մեծարանքով հիշել նրան. «ախորժելի եղև բանիւք դրուատիւք **վարդապետին սրբոյ** գրել եւ խոստանալ դարձեալ գրել արուեստաբան եւ երկայն ճառիւք: Եւ ... **այսպէս է գրեալ, քէ**»⁴⁴:

Ինչպէս տեսնում ենք, Սամվել Անեցին կատարել է պատվիրատուի պահանջը եւ հնարավորինս նյութեր քաղել սելջուկների մասին: Համառոտաբան ժամանակագրի երկում այդ մեծ հատվածներն այնքան ակնառու են, որ հաջորդ դարի պատմիչ Կիրակոս Գանձակեցին իրավացիորեն գրում է. «...մինչեւ ցՄելիքշահ սուլթանն գրեալ էր զպատճառ տիրելոցն նոցա մեծիմաստ վարդապետին, որ Սարկաւագն կոչէր, եւ **երկորորեալ էր Սամուէլ քահանայ...**»⁴⁵:

Սամվել Անեցին Սարկավագից քաղած եւս մի տեղեկություն ունի՝ 1097 թ. խաչակրաց առաջին արշավանքի եւ նրանց նկատմամբ բյուզանդական Ալեքսիոս Ա կայսեր ցուցաբերած թշնամական վերաբերմունքի մասին, որը գրելուց հետո նշում է. «**Եւ այս բանքս գրեալ էր վարդապետին Սարկաւագին**»⁴⁶:

Հովհաննես Սարկավագի մասին Սամվել Անեցու հայտնած վերջին տեղեկությունը վերաբերում է վարդապետի մահվանը. «ԸՅԸ (1129) Փոխեցաւ ի Քրիստոս մահուամբ **մեծ վարդապետն Սարկաւագն ի Հաղբատ**»⁴⁷:

⁴³ Մատենադարան, ձեռ. թիվ 5619, թերթ 99ա, Անեցի, էջ 116:

⁴⁴ Մատենադարան, ձեռ. թիվ 5619, թերթ 99բ-100ա, Անեցի, էջ 119:

⁴⁵ Կիրակոս Գանձակեցի, էջ, 84:

⁴⁶ Մատենադարան, ձեռ. թիվ 5619, թերթ 101ա, Անեցի, էջ 120:

⁴⁷ Մատենադարան, ձեռ. թիվ 5619, թերթ 105բ, Անեցի, էջ 129:

Այսպիսով, Յովհաննես Սարկավազը Սամվել Անեցու ժամանակագրության մեջ առավել շատ հիշատակված հեղինակն է: Չնայած դրան, իր երկի սկզբում հայ «պատմագիրներին» թվարկելիս Սամվել Անեցին Յովհաննես Սարկավագի անունը չի տալիս (ավելի բազմաթիվ սկզբնաղբյուրներ հիշատակող Մխիթար Անեցին եւս Սարկավագին պատմիչ չի համարում): Մեր կարծիքով, պատճառն այն է, որ Յովհաննես Սարկավազը սելջուկներին վերաբերող ամբողջական պատմագրական երկ չի գրել, այլ առանձին փոքր գրություններ (թղթեր, ճառեր), ինչը երեւում է նաեւ Սամվել Անեցու կատարած մեջբերումներից:

Հարց է առաջանում, թե ի՞նչն է ստիպել Յովհաննես Սարկավագ վարդապետին գրելու սելջուկների պատմության մասին: Նրա մատենագրական ժառանգությանն անգամ մակերեսորեն ծանոթանալով կարելի է համոզվել, որ հեղինակն ամբողջանվեր եւ բանիբուն մի հոգեւորական է, որի հետաքրքրությունները աստվածաբանական, եկեղեցագիտական, տոմարագիտական, գրական են: Եւ հանկարծ նա գրում է պատմություն, այն էլ արյունարբու սելջուկների պատմությունը: Նկատենք, որ այդ ժամանակ Ալփասլանի կողմից 1064-ին Անին գրավելուց ու ավերելուց կես դար էլ չէր անցել, իսկ քաղաքի Մայր տաճարը դեռ մնում էր սելջուկների ձեռքով մզկիթի վերածված: Այս պայմաններում Յովհաննես Սարկավագին միայն մի բան կարող էր ստիպել թղթին հանձնել սելջուկների (սկիւթացւոց) պատմությունը: Դա կարող էր լինել պատվեր, մասնավորապես՝ կաթողիկոսական պատվեր: Իսկ թե ինչու էր Բարսեղ Ա Անեցուն հարկավոր տեղյակ լինել սելջուկների պատմությանը, հասկանալի է, քանի որ նա պետք է բանակցելու մեկներ սելջուկ աշխարհակալ սուլթան Մելիքշահի մոտ:

Այդ ուղեւորությունը տեղի ունեցավ 1090 թ., երբ Բարսեղը նախապես հոգալով ժամանակի դիվանագիտության պահանջները՝

համապատասխան ճոխ ընծաներ, Անիից բազմամարդ պատվիրակությամբ մեկնեց սուլթանի մոտ: Մատթեոս Ուռհայեցին այդ մասին գրում է. «...հայրապետն Հայոց տէր Բարսեղ... տեսանէր, որ նեղէին զհաւատացեալսն Քրիստոսի... եւ հարկս պահանջէին յեկեղեցեացն Աստուծոյ... եւ յայնժամ կաթողիկոսն... **խորհեցաւ զնալ առ բարի եւ քաղցր թագաւորն Պարսից**... առ ի ծանուցանել նմա զայս ամենայն. եւ **առեալ ընդ իւր նուէրս սուլտանին**... հանդերձ ազատօք եւ եպիսկոպոսօք եւ քահանայիւք՝ **առեալ վարդապետ զհետ իւր** եւ զնաց ի Պարսիկս առ աստուածասէր սուլտանն: Եւ տեսեալ սուլտանին զտէր Բարսեղ՝ յոյժ մեծարեաց զնա, եւ կատարեաց զամենայն խնդրուածս նորա. եւ արարեալ զամենայն կամս տէր Բարսեղին»⁴⁸:

Ուռհայեցու սույն հիշատակությանն անդրադառնալով դեռ Մ. Օրմանյանն է ուշադրություն դարձրել Անիից Մելիքշահի մոտ մեկնող պատվիրակության կազմում «վարդապետի» ներկայության հանգամանքին⁴⁹: Նա կարող էր լինել հենց քաղաքում բնակվող Հովհաննես Սարկավագը: Հարկ է նշել, որ այս շրջանում (հայ միջնադարում ընդհանրապես) նշանավոր վարդապետները եզակի անձնավորություններ էին, հայտնի ոչ միայն աստվածաբանական եւ այլ գիտելիքներով, այլեւ լեզուների իմացությամբ (երբեմն կոչվում էին «վարդապետ Հայոց» պատվանունով): Եթե հիշյալ դեպքերի ժամանակակիցը կարդար պատմիչի խոսքերը, որ կաթողիկոսն իր հետ վերցրել է վարդապետին («առեալ վարդապետ զհետ իւր»), ոչ մի կասկած չէր ունենա վարդապետի ով լինելու վերաբերյալ: Ուռհայեցին այստեղ նրա անունը չի տալիս, քանի որ Բարսեղից ու

⁴⁸ Մատթեոս Ուռհայեցի, Ժամանակագրություն, գրաբար, աշխարհաբար (աշխարհաբար թարգմանությունը եւ ծանոթագրությունները Հ. Բարթիկյանի), Երեւան, 1991, 256-258:

⁴⁹ Մ. Օրմանյան, նշվ. աշխ. էջ 1537: Հարկ է նշել, որ Մ. Օրմանյանին, Ղ. Ալիշանին եւ միջեւ 1940 թ. աշխատած մյուս հայագետներին հայտնի չի եղել Հովհաննես Սարկավագի վարքը, ուր նշված է նրա Անիում գտնվելու, տեղի վարդապետարանը գլխավորելու փաստը:

Մելիքշահից (առաջին դեմքերից) բացի ընդհանրապես ուրիշ մեկի անունը չի նշում: Սակայն հատուկ շեշտում է, որ պատվիրակության կազմում է եղել նաեւ «վարդապետը», որն այս դեպքում, մեր կարծիքով, Հովհաննես Սարկավազն էր:

Նման ենթադրության օգտին է խոսում նաեւ հենց Հովհաննես Սարկավազի գրածը Մելիքշահի մասին: Սամվել Անեցու ժամանակագրության միջնորդավորմամբ մեզ հասած Սարկավազի գրության մեջ Մելիքշահի մասին նշվում է. «Էր եւ ազատաբարոյ եւ մեծախորհուրդ, **այլ եւ տեսիլ մարմնոյն արժանի թագաւորութեան**. ըստ որում հեզութիւն ի քաղցրութիւն բարուցն լծակցեալ առնէր սիրելի ամենեցուն, զոր միայն կոչեցից թագաւոր եւ փարթամ: ...Սիրէր զազգս մեր այնքան, մինչ զի **աղաթս հայցէր եւ աւրինութիւնս, յորմէ եւ անդ երբեմն չոգաւ հայրապետն**՝ աւշ թէ միայն էր աշակերտեալ Քրիստոսական կրանից եւ կարգաց»⁵⁰: Այս տողերը զրված են ականատեսի, մասնակցի անմիջականությամբ ու զգացակարությամբ:

Կարող է հարց առաջանալ, թե ինչո՞ւ Հովհաննես Սարկավազի վարքում չի նշվում նրա Մելիքշահի մոտ գնալու մասին: Բանն այն է, որ վարքը ոչ թե կենսագրության շարադրանք է, այլ «երիցս երանեալ ամեներջանիկ» վարդապետին որպես «մարգարէութեան եւ սքանչելեաց»⁵¹ շնորհ ունեցող սուրբ անձ ներկայացնող գործ, ուր կենսագրական տվյալները հաճախ երկրորդական են, եթե դրանք չեն կապվում հոգեւոր-եկեղեցական գործերի հետ: Օրինակ, Հովհաննես Սարկավազի մասին հայտնի է նաեւ Կիրակոս Գանձակեցու վկայությունը, թե վրաց Դավիթ Շինարար թագավորը սիրով ու ակնածանքով էր վերաբերվում նրան, հետիոտն ընդառաջ գնում ու զլուխը խոնարհելով օրհնություն խնդրում՝ «Կարի յոյժ սիրէր զսա

⁵⁰ Մատենադարան, ձեռ. թիվ 5619, թերթ 98բ, 100բ, Անեցի, էջ 115, 119: Հետաքրքիր է, որ այստեղ էլ Սարկավազը նշում է հայրապետին, առանց անունը տալու (ինչպես Ուռհայեցին՝ վարդապետին): Ոճի հարց է:

⁵¹ Ա. Աբրահամյան, Հովհաննես Իմաստասերի..., էջ 121, 124:

թագաւորն Վրաց Դաւիթ... այնքան զի մինչ լսէր զգալուստ նորա, յոտն յառնէր ընդ առաջ նորա եւ խոնարհեցուցեալ զգլուխն՝ խնդրէր ի նմանէ օրհնութիւն»⁵²: Այս մասին, գրեթէ նույն խոսքերով պատմում է նաեւ վրացի հեղինակը, ոչ մի կասկած չթողնելով դրա ճշմարտացիության վերաբերյալ⁵³: Սակայն այս իրողության մասին նույնպէս ոչինչ չի ասվում Հովհաննես Սարկավազի վարքում:

Վերադառնալով Սարկավազի պատմական թղթերին, պետք է նշենք, որ Սամվել Անեցին դրանցից չորս մեջբերում է արել, մինչդեռ Ա. Աբրահամյանը «Հովհաննես Իմաստասերի մատենագրության» մեջ «Պատմության հատվածը Սամուել Անեցուց» վերնագրի տակ միայն երկու հատված է բերել⁵⁴: Դուրս թողնվածները ծավալով ավելի փոքր, բայց նույնպէս կարելոր են⁵⁵:

Կարելի է ենթադրել, որ Հովհաննես Սարկավազը Բարսեղ Անեցու պատվերով⁵⁶ իրեն հասու աղբյուրներից օգտվելով կազմել է սելջուկների վաղ շրջանի պատմության մասին մի գրություն, որը տեսել է Սամվել Անեցին՝ («տեսաք երբեմն գրեալ սորին ձեռաւք, ստոյգ գտակաւ»), բայց իր ժամանակագրությունը կազմելիս չի գտել, որպէսզի օգտվի: Այն հավանորեն գրվել է մինչեւ Մելիքշահի

⁵² Կիրակոս Գանձակեցի, էջ 114:

⁵³ «(Դավիթը) սիրէր... զոմն հռետոր վարդապետ ի Հաղբատ՝ Սարկաւագ անուն. խոստովանէր նմա զյանցանա իւր եւ կորացուցեալ զպատուական զլուխն՝ օրհնէր ի նմանէ եւ նստէր ընդ նմա եւ փարէր զպարանոցաւ նորա...» (Լ. Մելիքսեթ-Քեկ, Վրաց աղբյուրները Հայաստանի եւ հայերի մասին, Խ. Ա, Երեւան, 1934, էջ 219): Դավիթի վերաբերմունքի մեջ կարելի է տեսնել ոչ միայն հարգանք սրբակյաց վարդապետի, այլեւ մի հեղինակավոր մարդու նկատմամբ, որն առնչվել է աշխարհի մեծամեծերի հետ:

⁵⁴ Ա. Աբրահամյան, Հովհաննես Իմաստասերի..., էջ 129-130:

⁵⁵ Մատենադարան, ձեռ. թիվ 5619, էջ 88բ, 101ա, Անեցի, էջ, 97, 120:

⁵⁶ Ուշագրաւ է, որ Բարսեղից առաջ Անիում աթոռակալած երկու կաթողիկոսները պատմական երկեր են պատվիրել ժամանակի նշանավոր վարդապետներին՝ Սարգիս Ա Սեւանցին՝ Ստեփանոս Տարոնեցի Ասողիկին, Պետրոս Ա Գետադարձը՝ Հովհաննես Կոզեռնին, իսկ Բարսեղի հաջորդը՝ Գրիգոր Գ Պաիլապունին, Սամվել Անեցու պատվիրատուն էր:

մոտ մեկնելը (1090 թ): Երկրորդ գրությունը ստեղծվել է Մելիքշահի մահից (1092 թ.) հետո, որից օգտվել է Սամվել Անեցին:

Պատմիչը Սարկավագին հղելով վերջին հիշատակությունը (առաջին խաչակրության մասին) դրել է իր ժամանակագրության 1097 թվականի տակ⁵⁷: Այժմ դժվար է ասել, թե Անեցին արդյոք նույն թղթից է օգտվել այդ տվյալը քաղելիս, թե՞ եղել է նաեւ պատմական բովանդակությամբ մի այլ թուղթ, որի մեջ ներառված են եղել այս եւ վերը նշված 1110 թ. Սանահինում պատահած («Քյոթուկում» հիշատակված) դեպքի նկարագրությունը:

Հովհաննես Սարկավագի պահպանված գործերի մի մասի վերնագրերը կամ առաջին տողերը վկայում են, որ դրանք գրվել են տարբեր մարդկանց հարցումներին (խնդրանք-պատվերներին) ի պատասխան⁵⁸: Հավանաբար նույն կերպ են ստեղծվել Հովհաննես Սարկավագի պատմական բովանդակությամբ թղթերը:

Փորձենք պարզել, թե ո՞ր թվականներին է Հովհաննես Սարկավագն Անիում գտնվել: Ցավոք նրա կենսագրության հայտնի թվականները սակավ են: Եթե ընդունենք, որ Անիի դպրոցը բացվել է Բարսեղ Անեցու կաթողիկոսության սկզբում, իսկ դա հավանական է, քանի որ ժամանակի մեծ իրադարձություններից էր («եղել... ուրախութիւն ամենայն Տանն Հայոց, վասն զի տեսին նորոգեալ զԱթոռ հայրապետութեանն ի քաղաքն յԱնի»⁵⁹), եւ ենթադրում էր աթոռի հիմնավորումը ամրապնդող քայլեր, որպիսին կարող էր վարդապետարանի վերաբացումը լինել, ապա պետք է 1081 թվականը համարենք Հովհաննես Սարկավագի Անիում հաստատվելու տարին:

Սարկավագն Անիում մնացել է բավական երկար ժամանակ, որը ճշտելու հնարավորություն է տալիս գրիչ Մարկոսի 1195 թ. հիշատակարանը: Այստեղ խոսվում է ձեռագրի («Կոչումն ընծայու-

⁵⁷ Մատենադարան, ձեռ. թիվ 5619, թերթ 100բ-101ա, Անեցի, էջ, 120:

⁵⁸ Ա. Աբրահամյան, Հովհաննես Իմաստասերի..., էջ 97, 140, 222, 252, 302, 325, 327, Մ. քհ. Արամյան, նշվ. աշխ., 61:

⁵⁹ Ուռհայեցի, էջ 236-238:

թեան Կիրողի Երուսաղէմացւոյ») նախօրինակի մասին, որը գրված է եղել Անիում, Մայր տաճարի (Կաթողիկէի) սպասավոր Սարկավազ քահանայի (Հովհաննէս Սարկավազի) կողմից՝ «...գոր **Սարկավազ քահանայ՝ սպասաւոր Սուրբ Կաթողիկէի մեծի, որ յԱնի**, ի բազմաց արինակաց ի ձեռն եւ այլոց գիտնականաց, զաւգտակարսն առեալ հաւաքեց ի մի դիր եւ շարադրեաց իւրով ձեռամբ ի դիւրաւուր մտաց եւ գիտութեան...»⁶⁰:

Հայտնի է, որ Անիի Մայր տաճարը 1064-ին սելջուկները մզկիթի էին վերածել: Այն կրկին օծվեց 1124 թ., երբ վրաց Դավիթ Շինարար թագավորը գրավեց Անին: Թեւեւ 1126-ին վրացիները հարկադրված քաղաքը վերադարձրեցին Շադդադյաններին, բայց պայմանով, որ Կաթողիկեն մշտապես պետք է հայերին պատկանի: Փաստորեն, Հովհաննէս Սարկավազը Անիի Մայր տաճարում կարող էր սպասավորել միայն 1124 թվականից հետո:

Այսպիսով, եթե ընդունենք, որ նա Հաղբատից Անի է եկել 1081 թվականին, ապա այս հիշատակարանի շնորհիվ կարող ենք ասել, որ քաղաքում է մնացել նվազագույնը մինչեւ 1124 թվականը: Ահավասիկ այս շուրջ **չորս տասնամյակը** գերազանցող ժամանակաշրջանը նկատի ունենալու դեպքում միանգամայն հասկանալի են դառնում վարքագրի՝ Հովհաննէս Սարկավազի մասին ասած խոսքերը, թե նա իմաստութեան գանձերը բերում էր «**ի քաղաք իւր եւ**

⁶⁰ Ա. Աբրահամյան, Հովհաննէս Իմաստասերի..., էջ 126, հմմտ. Ե-ԺԲ դդ. հայերեն ձեռագրերի հիշատակարաններ, էջ 282: Հիշատակարանի բովանդակությունը կասկած չի թողնում, որ խոսքը Հովհաննէս Սարկավազի մասին է, որի սովորությունն էր հայտնի հեղինակների գործերի համեմատական ճշգրտումն ու մատչելի վերաշարադրումը: Այն, որ մեր հեղինակը կոչվում է քահանա, անսովոր չէ, քանի որ այդպես է անվանվում նաեւ իր մի շարք երկերի խորագրերում՝ «Հովհաննու քահանայի յաղագս անկինաւոր թուոց», «Յոհաննու քահանայի յաղագս եղանակաց...», «Յոհաննու քահանայի առ Սարգիս, վասն տաղիցն» եւ այլն (Ա. Աբրահամյան, Հովհաննէս Իմաստասերի..., էջ 148, 252, 327, 330, Մ. քհ. Արամյան, մշվ. աշխ., էջ 55, տե՛ս նաեւ Լ. Խաչիկյան, Աշխատություններ, հ. Ա, Երեւան, 1995, էջ 143):

տեղի սննդեան՝ ի քաղաքամայրս Անի»: Մ. Աբեղյանը գրում է, թե հիշյալ խոսքերից կարելի է եզրակացնել, «որ Սարկավագ վարդապետն Անեցի է եղել: Բայց նրա ծնողները կարող էին Փառիսոս գաւառից լինել եւ Յովհաննեսի մատաղ մանկության ժամանակ Անի տեղափոխված, եւ Յովհաննեսն այստեղ մեծացած ու սնված, ուստի եւ Անին նրա համար կարող էր համարվել «քաղաք իւր եւ տեղի սննդեան»։ Այդպիսի եղելությունները ոչ սակավ են»⁶¹:

Կարծում ենք, որ անհական ողջ շրջանում Յովհաննես Սարկավագը սերտորեն կապված է եղել նաեւ Հաղբատի հետ, որպես այդ վանքի միաբան⁶²: Դա մի ժամանակ էր, երբ Անին, Հաղբատն ու Սանահինը վեր էին ածվում հայ եկեղեցու ինքնուրույնությունն ու ավանդության անփոփոխությունը պաշտպանող գաղափարական կենտրոնի, որի հայրենասեր գործիչներն ավելի ուշ կոչվեցին «Հայոց հյուսիսային կողմանց վարդապետներ» կամ «արեւելյան վարդապետներ» ընդհանուր անվանումով:

Յովհաննես Սարկավագի գործունեության անհական շրջանը նրան ներկայացնում է ոչ միայն որպես ուսուցիչ, գիտնական, արդյունաշատ հեղինակ, այլեւ երկրի ապագայով մտահոգ գործիչ: Ավելի հասկանալի են դառնում նրա երկերում առկա հայրենասիրական տոդերը: Կիրակոս Գանձակեցին նշում է, որ Սարկավագն «արար շարական Ղեւոնդեանցն քաղցր եղանակաւ եւ յարմար բանիւ...»⁶³: Իսկ այդ շարականի խոսքերում հեղինակն Աստուծոց խնդրում է ժողովել հայ եկեղեցու ցրված զավակներին, արտասուքն աչքերին երկրից տարագրվածներին (վարատվածներին), եւ փրկել նրանց: «Հեղմամբ արեան սրբոց քոց հօտապետաց զեկեղեցւոյ քոյ ցրուեալ մանկունքս ժողովեալ՝ յուրախութիւն, ըզվարա-

⁶¹ Մ. Աբեղյան, նշվ. աշխ., էջ 446:

⁶² «Հաղբատի առաջնորդ են համարել... Յովհաննես Սարկավագին, բայց այդ չի հաստատվում մատենագրական եւ վիմագիր արձանագրությունների տվյալներով»: Կ. Ղաֆադարյան, Հաղբատ, Երեւան, 1963, էջ 275:

⁶³ Կիրակոս Գանձակեցի, էջ 113:

տեալս տրտմութեամբ եւ արտասուաց յորդահոս բըղխմամբ փրկութեան մերոյ պարգեւաց բաշխօղ»⁶⁴:

Իսկապես ողբերգական ժամանակի պարտադրանքով են գրված այս խոսքերը, որոնք եկեղեցում կատարվող կրոնական երգին մի նոր իմաստ են հաղորդում: Մանուկ Աբեղյանն այս առնչությամբ գրում է. «Սարկավագ Վարդապետի այս աղոթքը շատ փոքր, իր ձեւով շատ հասարակ..., բայց իր բովանդակությամբ մեծ ու վսեմ է եւ անկեղծորեն բխած լինելով իրականությունից, խորն ազդու է մանավանդ երբ իր «քաղցր եղանակով» երգվում էր եկեղեցում...»⁶⁵: Ի մի բերելով հայ գրականության հիշյալ շրջանի պատկերը՝ նա ավելացնում է. «Եւ ահա ծնվում է ցրված հայ ժողովրդին ի մի հավաքելու եւ փրկելու ձգտումը որոշ գաղափարախոսությամբ, որի առաջին արտահայտիչը գրականության մեջ՝ է մեծիմաստ Սարկավագ Վարդապետը»⁶⁶:

Այսպիսով, վանական միաբանության գրկում ուսում առած եւ գիտությամբ զորացած Հովհաննես Սարկավագը, գալով «իր քաղաքը»՝ Անի, ծառայեց որպես ուսուցիչ, կազմեց ու խմբագրեց դասագրքեր, դարձավ տոմարի բարեփոխիչ, առնչվեց ժամանակի հզորների հետ, բայց եւ ապրեց ժողովրդի հոգսերով: Նրան շատերն են կոչել իմաստասեր, սոփեստես, սուրբ վարդապետ, իսկ մահվան մասին նշելիս Կիրակոս Գանձակեցին գրում է. «Եւ այսպիսի բարուք քաղաքավարութեամբ կեցեալ յաշխարհի՝ փոխեցաւ ի Քրիստոս **աշխատասէրն** ի Հաղբատ»⁶⁷:

⁶⁴ Մ. Աբեղյան, նշվ. աշխ., էջ 71:

⁶⁵ Մ. Աբեղյան, նշվ. աշխ., էջ 71-72:

⁶⁶ Նույն տեղում:

⁶⁷ Կիրակոս Գանձակեցի, էջ 115:

ՀՈՌՈՄՈՍԻ ՎԱՆԱՅԱՅԻՐԸ

Անիի մերձակա Հոռոմոսի վանքը միջնադարյան Հայաստանի նշանավոր հոգեւոր եւ նշակութային կենտրոններից էր, միաժամանակ հանդիսանում էր Անիի Բագրատունի թագավորների հանգստարանը (դամբարանավայրը): Այդ մասին ուղղակիորեն նշում է Հովհաննես Սմբատ (1017-1041) թագավորը 1036 թ. վանքում իր կառուցած Ս. Հովհաննես եկեղեցու արձանագրության մեջ, գրելով որ նվիրատվություն է կատարել «...ի մեր հանգստարանս թագաւորաց, ի տիեզերահռչակ վանսս Հոռոմոսի»¹: Իսկ նրա հայրը՝ Գագիկ Առաջինը (989-1017), կառուցել է վանքի Ս. Գեւորգ եկեղեցին, որի արձանագրության մեջ սուրբ Գեւորգի բարեխոսությունն է հայցում Հիսուսի երկրորդ գալստյան ժամանակ:

Հոռոմոսի վանքը հիմնադրվել է մինչեւ Անիի մայրաքաղաք հռչակվելը (961), 10-րդ դարի 30-40-ական թվականներին: Համալիրի կառույցներից հնագույնը փոքր եկեղեցի է, որը ճարտարապետական գրականության մեջ հայտնի է ենթադրյալ Ս. Մինաս անունով, սակայն, դատելով Ստեփանոս Տարոնեցի Ասողիկի մի վկայությունից, հնարավոր է որ Ս. Շողակաթ է կոչվել²:

¹ Ն. Սարգիսեան, Տեղագրութիւնք ի Փոքր եւ ի Մեծ Հայս, Վենետիկ, 1864, էջ 166: Հովհաննես Սմբատի մահվան եւ թաղման մասին Մատթեոս Ուռեայեցին գրում է. «...մեռաւ թագաւորն Հայոց Յովհաննէս... եւ թաղեցին զնա ի գերեզմանսն առաջին թագաւորացն Հայոց» (Մատթեոս Ուռեայեցի, Ժամանակագրություն (աշխարհաբար թարգմանությունը եւ ծանոթագրությունները Հ. Բարթիկյանի), Երեւան, 1991, էջ 92):

² Պատմիչը գրում է, որ Աբլիաճ ամիրան «եկեալ զՀոռոմոսի վանքն այրեաց եւ զփրկական նշանն (խաչը - Կ. Ս.), որ ի վերայ սրբոյ Շողակաթի զմբեթին կանգնեալ էր, ճոպանօք ի վայր բերէր ի ՆԼԱ (982) թուականին» (Ստեփանոս Տարոնեցի Ասողիկ, Պատմութիւն տիեզերական, աշխատասիրութեամբ Ստ. Մալխասեանցի, ՄՊԲ, 1885, էջ 188-189): Սրանից Մաղաքիա պատրիարք Օրմանյանը բխեցրել է, որ վանքի «առաջին անունը Ս. Շողակաթ եղած կերէի» (Ս. Օրմանեան, Ազգապատում, հ. Ա, Էջմիածին, 2001, էջ 1285):

Վանքը, որ Բագրատունյաց ժամանակաշրջանում ծաղկուն վիճակի էր հասել արքունական հովանավորության շնորհիվ, հետագայում եւս անեցիների համար առաջնակարգ հոգեւոր կենտրոնի դեր էր կատարում: Այն նշանավոր էր իր դպրոցով, գրչատնով³, հոգեւոր-բարեսիրական ավանդներով, որոնք գալիս էին դեռ հիմնադիր վանական՝ ողորմած ու առաքինի Հովհաննես վանահորից: Անիի շրջանից ամենից մեծ թվով ձեռագրեր հայտնի են Հռոմոսից: Վանքի եկեղեցիների պատերին պահպանվել են մեծաթիվ վիմագիր արձանագրություններ, որոնք վկայում են վանական ընդարձակ կալվածքների եւ հարուստ ինչքի մասին: Հետաքրքիր է, որ ինչպես Անին հռչակված էր մեկ օրում 1001 եկեղեցիներում մատուցվող պատարագներով⁴, Հռոմոսն էլ հռչակված էր մեկ օրում մատուցվող 40 պատարագով⁵:

Հռոմոսի վանքի պատմության մասին առաջին անգամ փոքր գրքույկ է տպագրել Էջմիածնի միաբան Աբել Մխիթարյանցը 1870 թվականին: Այստեղ նա բերում է պատմական համառոտ տեղեկություններ, նաեւ վանքի վիմագրերը, որոնց հիման վրա թվարկում

³ Հռոմոսում աշխատել են մի շարք հմուտ գրիչներ, որոնցից Իգնատիոսը միջնադարյան հայ լավագույն գրիչ-մանրանկարիչներից մեկն է համարվում: Գրչությամբ են զբաղվել նաեւ Հռոմոսի դպրոցի աշակերտները: Վանքում գործել է կազմարարական հայտնի արվեստանոց (տե՛ս Կ. Մաթեոսյան, Գրիչ եւ մանրանկարիչ Իգնատիոս Հռոմոսցի, «Բանբեր Երեւանի համալսարանի», 1982, թիվ 1, էջ 121-133, նույնի, Կազմարարությունը Հռոմոսի գրչության կենտրոնում, ՀՍՍՀ ԳԱ Լրաբեր հաս. գիտ., 1986, N 10, էջ 64-68):

⁴ Կ. Մաթեոսյան, Անի. եկեղեցական կյանքը եւ ձեռագրական ժառանգությունը, Ս. Էջմիածին, 1997, էջ 176-188:

⁵ Այդ մասին տեղեկությունը հավելում է Վարդան Արեւելցու «Աշխարհացույցի» մեջ (Հռոմոսը հիշվում է ուշ միջնադարում ստացած Ղոշավանք անունով), բայց հավանորեն հին ծագում ունի: «Ղոշավանքն Սուրբ Յովաննէ եւ Սուրբ Գեորգ զարմանաշէն եւ հռչակաւոր աթոռ եւ կան բազում եկեղեցիք Խ (40) Խորան է, Խ (40) պատարագ կու լինի աւուրն» (Մատենադարան, ձեռ., թիվ 8100, թերթ 254 ք, Փ. Անթապյան, Վարդան Արեւելցի, հ. Ա, Երեւան, 1987, էջ 108):

վանահայրերին: Այդ ցանկը առաջինը լինելով եւ վիմագրական նյութը միայն մասամբ արտացոլելով, թերի է⁶:

Հռոմոնոսի վանահայրերին անդրադարձել է Ղեւոնդ Ալիշանը եւ իր ժամանակ հայտնի վիմագրերի ու հիշատակարանների տվյալների հիման վրա հրատարակել է Հռոմոնոսի վանահայրերի 20 ա-նուն պարունակող հետեւյալ գավազանագիրքը.

«936 Յովհաննէս հիմ- նադիր վանացն	1218 Գրիգորիս 1222 Անդրէաս
972 Սարգիս (թուի կա- թողիկոսն)	1246 Սարգիս 1269 Յովսէփ
986 Սողոմոն	1336 Ստեփանոս
1013 Անանիա	1685 Դանիել Տիգրանակերտցի
1036 Սարգիս եւ Գէորգ	1751-5 եղիա վրդ. Ալաշկերտցի
1038 Յովհաննէս	1788 Յովհաննէս Շամբեցի
1174-81 Խաչատուր	Եպիսկոպոս
1195 Պետրոս	... Աւետիք Եպիսկոպոս
1198-1201 Մխիթար	1829 (°) Ստեփանոս եպս.
1229-53 Տէր Բարսեղ	Չախալեան» ⁷ :

Ղ. Ալիշանից հետո հայ հետազոտողները Հռոմոնոսի վանահայրերի գավազանագրքին չեն անդրադարձել: Ժան-Միշել Թիերին 1980-ին լույս տեսած՝ Հռոմոնոսի վանքի պատմությանը նվիրված իր գրքում վանահայրերին առանձին չի անդրադարձել⁸: Իսկ 2002 թ. Թորոս Թորամանյանի՝ Հռոմոնոսի վանքին նվիրված նյութերի ժողովածուի մեջ Ժ-Մ. Թիերին ներկայացրել է վանահայրերի գավազանագիրքը ֆրանսերենով, գրեթե նույնությամբ կրկնելով Ղ. Ալիշանի

⁶ Ա. Մխիթարեանց, Պատմութիւն Հռոմոնոսին վանաց ի Շիրակ, Վաղարշապատ, 1870, էջ 20-21:

⁷ Ղ. Ալիշան, Շիրակ, Վենետիկ, 1881, էջ 28:

⁸ J-M. Thierry, Le couvent Arménien d'Horomos, Louvain-Paris, 1980.

կազմած ցանկը: Ավելացված է միայն Ավետիք եպիսկոպոսի հիշատակման թվականը՝ 1751 եւ 19-րդ դարին վերաբերող երկու անուն (Գրիգոր, Վարդան Օձնեցի)⁹:

Բարեբախտաբար պահպանվել են Հռոմոսի Ստեփանոս վանահորից հետո (հիշվում է 1336 եւ 1347 թվականներին) մինչեւ Դանիել Տիգրանակերտցին (1685 թ.), վանքի առաջնորդությունը վարած եւս երեք վանահայրերի անունները¹⁰: Այս ժամանակահատվածի լուսաբանումը կարելու է հատկապես նրանով, որ 14-րդ դարի 30-ական թվականներից մինչեւ 1685 թվականն ընկած ժամանակահատվածը սովորաբար համարվել է Հռոմոսի վանքի պատմության անհայտ շրջան: Ինչպես Լեոն է գրում. «Հռոմոսի կյանքը ներկայացնող արձանագրությունները ընդհատվում են 1336 թվականին... այնուհետեւ սեւ անհայտություն է գալիս հռչակավոր վանքի վրա...»¹¹: Իսկ Թ. Թորամանյանը գրում է. «1336 թվականեն հետո 349 տարի վանքին վիճակը անստույգ է, եթե բոլորովին ամայացած չէր, զոնե անտերունչ վիճակի մատնված էր մինչեւ 1685 թվականը, երբ Դանիել վարդապետ նորոգեր եւ վերստին շենացուցեր է»¹²: Հիշյալ երեքուկես դարը վանքի համար անհայտության ժամանակ է համարում նաեւ Ժ-Մ. Թիերին¹³:

Հիշյալ ժամանակաշրջանի կարծեցյալ «անհայտությունը» գրեթե ամբողջությամբ լցնում են Հռոմոսում գրված կամ վանքին նվիրված (այստեղ պահված) ձեռագիր մատյանների հիշատակարանները եւ մի քանի այլ նյութեր: Դրանցում հիշատակվում են վանահայրերի անուններ, վանքի պատմության համար

⁹ Le couvent de Horomos d'après les Archives de Toros Toramaian (Monuments et mémoires de la fondation Eugène Piot), Paris, 2002, p. 14.

¹⁰ Կ. Մաթևոսյան, Հռոմոսի վանքի պատմության նոր էջեր (ԺԴ-ԺԹ դդ.), «Էջմիածին», 1993, Դ-Ե-Ձ, էջ 72-79:

¹¹ Լեո, Անի, Երեւան, 1963, էջ 122:

¹² Թ. Թորամանյան, Նյութեր հայկական ճարտարապետության պատմության, աշխատությունների ժողովածու, Երեւան, 1942, էջ 302:

¹³ J-M. Thierry, Le couvent Arménien d' Horomos, p. 5.

կարեւորություն ունեցող փաստեր¹⁴: Այս եւ նոր շրջանի մի քանի գործիչների անունների ավելացմամբ ամբողջանում է Հռոմոսի վանահայրերի գավազանագիրքը:

Հարկ է նշել, որ Ղեւոնդ Ալիշանի կազմած ցանկը հիմնականում հաջող է, բայց հին մասում որոշ ճշտումների եւ ավելացումների կարիք ունի: Մասնավորապես հայտնի է, որ Հռոմոսի վանքը հիմնադրվել է Աբաս Բագրատունու (929-953) թագավորության շրջանում Բյուզանդիայից եկած հայ վանականների կողմից¹⁵: Քանի որ աղբյուրները որոշակի թվական չեն հայտնում, Հռոմոսի առաջին վանահոր ժամանակը նախընտրելի է նշել 10-րդ դարի 30-40-ական թվականները:

Հիշատակված հաջորդ վանահայրը՝ Սարգիսը՝ մասնակցել է 969 թ. Անիի եկեղեցական ժողովին¹⁶, 979-ին հիմնել է Անիի մերձակա Կարմիր վանքի Ս. Գրիգոր եկեղեցին, բայց մահացել է 980-ին: Սարգսի մահից հետո Հռոմոսի վանահայրությունն անցել է նրա որդի Սողոմոնին, որն էլ 985-ին ավարտին է հասցրել Ս. Գրիգոր եկեղեցու շինարարությունը¹⁷:

1198-1201 թթ. նշված Մխիթարի առաջնորդությունն ավելի երկար է տևել, քանի որ նա Հռոմոսի վանահայր է համարվում «Հաղբատի ավետարանի» 1211 թ. հիշատակարանում¹⁸:

¹⁴ 1459 թ. Աստվածատուր եպիսկոպոսը Հռոմոսին է նվիրել իր ստացած, Այրիվանքում գրված ճաշոցը (Մատենադարան, ձեռ. թիվ 6276): 1485 թ. այս ձեռագրում հիշատակարան է գրել Հռոմոս այցելած Սարգիս Գ (1484-1515) կաթողիկոսը: 1699-ին Հռոմոսի վանքին թավշյա ասեղնագործ վարագույր է նվիրել Ամիթեցի Դահմազը (պահվում է Հայաստանի ազգային պատկերասրահում): 1782-ին Հռոմոսում ձեռագիր է ընդօրինակել Ակնագյուղեցի Գրիգոր արեղան (տես Կ. Մաթևոսյան, Հռոմոսի վանքի պատմության նոր էջեր, էջ 72-79):

¹⁵ Ստեփանոս Տարոնեցի Ասողիկ, էջ 174:

¹⁶ Ստեփանոս Տարոնեցի Ասողիկ, էջ 181:

¹⁷ Ա. Մանուչարյան, Կարմիր վանքի արձանագրությունը, «Պատմա-բանասիրական հանդես», 1967, N1, 154-155:

¹⁸ Հայերեն ձեռագրերի հիշատակարաններ, ԺԳ դար, կազմեց Ա. Մաթևոսյան, Երևան, 1984, էջ 72:

1215 թվականին հիշված Անդրեասի (Ղ. Ալիշանի մոտ նշված է 1222)¹⁹ եւ 1218-ին հիշված Գրիգորիսի անունները պետք է 1229-1253 թթ. առաջնորդ եղած Բարսեղ եպիսկոպոսի (Ամիր Երկաթի որդու) անունից առաջ դրվեն, իսկ 1246 թվականի արձանագրության մեջ նշված Սարգիս վարդապետի անունը ցանկից պիտի հանվի, քանի որ նա Հռոմոսի միաբան էր, բայց վանահայր չի եղել²⁰:

1336 թ. արձանագրության մեջ հիշված Ստեփանոսի անունը պահպանվել է նաեւ Հռոմոսին ընծայված մի ձեռագրի արձաթյա կազմի 1347 թ. արձանագրության մեջ²¹: Նրանից հետո 15-րդ դարում հիշվում է Հռոմոսի վանահայր Գրիգոր եպիսկոպոսը՝ 1485 թ.²², 16-րդ դարում՝ Հովհաննես եպիսկոպոսը՝ 1585 թ.²³: Մեկ այլ Հովհաննես եպիսկոպոսի (1653 թ.) հիշատակում է Ղ. Ալիշանը, ա-

¹⁹ Ղ. Ալիշանն օգտվել է Ն. Սարգիսյանի գրքից, բայց այնտեղ Անդրեասի անունը պարունակող երկու արձանագրությունն էլ անթվական են (Ն. Սարգիսեան, Տեղագրութիւնք ի Փոքր եւ ի Մեծ Հայս, էջ 151, 159-160, Ղ. Ալիշան, Շիրակ, էջ 21): Դրանցից խուսիլու խաթունի արձանագրությունը 1215 թվականից է, որը նշում է Ժ-Մ. Թիերին (J-M. Thierry, Le couvent Arménien d' Horomos, p. 54-55):

²⁰ Աշոտ Դսեղեցու արձանագրության սկզբում նշվում է. «Յառաջնորդութեան Տէր Բարսղի», ապա հռոմոսացիների անունից գրված հատվածում ասվում է. «Ես Տէր Բարսեղ եւ Սարգիս վարդապետս եւ այլ եղբարքս...» (Ն. Սարգիսեան, Տեղագրութիւնք ի Փոքր եւ ի Մեծ Հայս, էջ 154):

²¹ Կազմը, որն այժմ պահվում է Սանկտ Պետերբուրգում (Էրմիտաժ՝ 93-834) պատրաստել են տվել ոմն Ջաջն ու իր որդի Ամիր Սմբատը, ոսկերիչ վարպետն է Գրիգորը, արձանագրության մեջ Հռոմոսի վանահորից բացի հիշվում են նաեւ Սարգիս կրոնավորը եւ Սադունյան իշխանական տնից Մանկասարը (Կ. Մաթեոսյան, Կազմարարությունը Հռոմոսի գրչության կենտրոնում, էջ 64-68, Հ. Մարգարեան, Մահկանաբերոցիների (Սադունեանների) իշխանական տունը ԺԲ-ԺԴ դարերում, Հայկազեան հայագիտական հանդես, հտ. ԺԸ, Պէյրուք, 1998, էջ 29-33):

²² Ժե դարի հայերեն ձեռագրերի հիշատակարաններ, մասն Գ, կազմեց Լ. Խաչիկյան, Երեւան, 1967, էջ 70:

²³ Հռոմոսում գրված հիշատակարանում Հովհաննեսը թվարկում է իր հարազատներին, նշելով 34 հոգու անուն: Եպիսկոպոսի եղբորորդին, դարձյալ Հովհաննես անունով, վարդապետ էր (Ս. Տէր-Ավետիսեան, Մայր ցուցակ հայերեն ձեռագրաց Նոր Ջուղայն Ամենափրկիչ վանքի, հ. Ա, Վիեննա, 1970, էջ 134):

ռանց աղբյուրը նշելու, բայց որի անունը չի դրել գավազանագրքում²⁴:

Նոր շրջանում, Կարսում գրված մի հիշատակարանում նշվում է վանահայր Խաչատուր վարդապետը՝ 1714 թ.²⁵, իսկ Ստեփանոս եպիսկոպոս Չախալյանի հիշատակման թվականը ճշտում է Ս. Էփրիկյանը (1825)²⁶: Գրականության մեջ հիշվում են նաեւ Պետրոս վարդապետը՝ 1851 թ.²⁷, նորոգման աշխատանքներ կատարած Վարդան վարդապետ Օձնեցին՝ 1851-1856 թթ.²⁸, եւ Գրիգորը՝ 1868-1871 թթ.²⁹:

Վերոնշյալ տվյալներն ի մի բերելով ստորեւ ներկայացնում ենք Հռոմոսի վանահայրերի գավազանագիրքը:

²⁴ Ղ. Ալիշան, Շիրակ, էջ 96:

²⁵ Մատենադարան, ձեռ. թիվ 4608, էջ 114-115, հմմտ. Կ. Մաթեոսյան, Հռոմոսի վանքի պատմության մոտ էջեր, էջ 77:

²⁶ Ս. Էփրիկեան, Բնաշխարհիկ բառարան, հ. Բ, Վենետիկ, 1907, էջ 225:

²⁷ Ա. Մխիթարեանց, Պատմութիւն Հռոմոսիւն վանաց ի Շիրակ, էջ 53, J-M. Thierry, Le couvent Arménien d' Horomos, p. 85:

²⁸ Վարդանը նաեւ Կարսի թեմի առաջնորդն էր: Պահպանվել են 1856-ին նրա՝ կաթողիկոս Ներսես Աշտարակեցուն ուղարկած՝ վանքի տնտեսական վիճակին վերաբերող հաշվետվությունները (Մատենադարան, Կաթողիկոսական դիվան, թղթ. 17, վ. 55 եւ թղթ. 181, վ. 82, 133):

²⁹ Ս. Էփրիկեան, Բնաշխարհիկ բառարան, հ. Բ, Վենետիկ, 1907, էջ 224: 19-րդ դարում Հռոմոսի վանքը ենթարկվել է Կ. Պոլսի հայոց պատրիարքարանին, ընդգրկվել Կարսի թեմի կազմում: 1912 թվականին լույս տեսած «Ազգապատումի» առաջին հատորում Մաղաքիա Օրմանյանը գրում է, որ Հռոմոսի վանքն այս տարածքում «տակաւին չէն մնացածներէն մէկն է» (Մ. Օրմանեան, Ազգապատում, էջ 1285):

ԳԱԽԱՋԱՆԱԳԻՐՔ ՎԱՆԱՅԱՐՑ ՀՈՐՈՄՈՍԻ

1. Յովհաննէս Ա	10-րդ դ. 30-40-ական թթ.
2. Սարգիս Ա	969-980
3. Սողոմոն	980-986
4. Անանիա	1013
5. Սարգիս Բ եւ Գեորգ	1036
6. Յովհաննէս Բ	1038
7. Խաչատուր Ա	1174-1181
8. Պետրոս Ա	1195
9. Մխիթար	1198-1211
10. Անդրէաս	1215
11. Գրիգոր Ա (Գրիգորիս)	1218
12. Բարսեղ արքեպիսկոպոս	1229-1253
13. Յովսէփ	1269
14. Ստեփանոս Ա	1336-1347
15. Գրիգոր Բ եպիսկոպոս	1485
16. Յովհաննէս Գ եպիսկոպոս	1585
17. Յովհաննէս Դ եպիսկոպոս	1653
18. Դանիել վարդապետ Տիգրանակերտցի	1685
19. Խաչատուր Բ վարդապետ	1714
20. Աւետիք եպիսկոպոս	1751
21. Եղիա վարդապետ Ալաշկերտցի	1751-1755
22. Յովհաննէս Ե վարդապետ Շաբեցի	1788
23. Ստեփանոս Բ եպիսկոպոս Չախալեան	1825
24. Պետրոս Բ վարդապետ	1851
25. Վարդան վարդապետ Օձնեցի	1851-1856
26. Գրիգոր Գ վարդապետ	1868-1871

ՀԱՌԻՃԻ ՎԱՆՔԻ ՊԱՏՄՈՒԹՅՈՒՆԻՑ

Հայաստանի նշանավոր վանքերից է Շիրակի Հառիճա վանքը¹, որը նշանավոր է եղել ինչպես միջնադարում, այնպես էլ նոր շրջանում²: Հառիճը մեծ հռչակ ձեռք բերեց 12-րդ դարի վերջերին, երբ շուրջ 1197 թվականին Իվանե եւ Ջաքարե Ջաքարյաններն այն գնեցին նախկին հայրենատերերից, այստեղ հիմնեցին ամրոց եւ կառուցեցին Կաթողիկե Ս. Աստվածածին մեծադիր եկեղեցին (1201)³: Սակայն մինչ այդ Հառիճի վանքը վերականգնել էր Գրիգոր վանահայրը Անի-Շիրակն ավերած 1064 թ. սելջուկյան արշավանքներից շուրջ 100 տարի անց, այսինքն՝ 1160-ական թվականների երկրորդ կեսին: Այդ մասին է վկայում վանքի Ս. Գրիգոր եկեղեցու պատին նրա թողած արձանագրությունը. «Ես Գրիգոր առաջնորդ սուրբ ուխտիս Հառիճայի շինեցի գտեղի սննդեան իմոյ ի Ծ (100) ամեայ կործանմանէ եւ կարգեցի ի սա արս ընտրեալս եւ խրատեալս ւարինաւքն Աստուծոյ եւ հաստատեցի կամակցութեամբ եղբարց...»⁴:

¹ Վանքի անունը միջնադարում գրվել է «Հառիճայ» ձեւով (սեռական հոլովում՝ «Հառիճայի»):

² 19-րդ դարի կեսերից Հառիճի վանքը վերածնունդ է ապրել, Գյումրիում ստեղծված «Հառիճավանքի ընկերության» ջանքերով բացվել է դպրոց, որը հետո դարձել է Ս. Էջմիածնի Գեւորգյան ճեմարանի նախապատրաստական բաժանմունքը: Որոշ ժամանակ Հառիճը եղել է Կաթողիկոսական ամառանոց: Հառիճի դպրոցի պատմությանն է նվիրված Սատթես աբեղա Պողոսյանի «Հառիճա վանքը եւ նրա վանական դպրոցը» արխիվային հարուստ նյութեր պարունակող անտիպ աշխատությունը:

³ Հառիճը Ջաքարյանների առաջին տիրույթն ու հենակետը դարձավ Շաղ-դադյանների տիրապետության տակ գտնվող Շիրակում, որի ոստանին՝ Անիին նրանք տիրեցին 1198 թ. վերջերին: Տե՛ս Կ. Սաթեսյան, Հառիճի վանքը ԺԳ դարի սկզբին (գրչության կենտրոնը եւ հարակից հարցեր), «Էջմիածին», 1998, Ա, էջ 115-124:

⁴ 3. Քիրտեան, Հառիճոյ վանքի արձանագրութիւնները, «Բազմավէպ», 1957, 1-12, էջ 267-268: «Քրիստոնյա Հայաստան» հանրագիտարանում Հառիճի վանահայր Գրիգորը նույնացվել է Աբասի որդի Գրիգոր վարդապետի հետ (13-րդ դ. սկիզբ), որը սխալ է («Քրիստոնյա Հայաստան» հանրագիտարան, Երևան, 2002, էջ 566):

Հառիճի վանահայր Գրիգորը Անիի Կաթողիկե եկեղեցու (Մայր տաճարի) փակակալ, Մխիթար Անեցու պատմության պատվիրատուն էր⁵, իսկ վերջերս հայտնաբերված նրա՝ Հովսեփ վարդապետ Հաղբատեցուն հասցեագրված թուղթը վկայում է, որ նա եղել է Անիի դպրոցի նշանավոր ուսուցչապետ Հովհաննես Սարկավագի (մահ. 1129 թ.) կրտսերագույն աշակերտներից մեկը⁶: Հառիճում պահպանվել է Գրիգոր վանահոր տապանաքարը, որի արձանագրությունը պերճախոս կերպով բնութագրում է նրան. **«Այս հանգիստ է երջանիկ ծերունի սուրբ հաւր Գրիգորի՝ առաջին առաջնորդի երկրորդ շինութեան սուրբ ուխտիս, որ էր ուսուցիչ եւ աւրինակ բարեաց ամենեցուն:** Աղաչեմք, որք երկրպագէք սրբոյ խաչիս ասացէք. Աստուած յիշեսցէ զհայր Գրիգոր յողորմութեան իւրում եւ զգրիչս եւ դուք յիշեալ լիջիք ի Քրիստոսէ. ամէն: Ի թուին Հայոց ՈԼԷ (1188)»⁷:

Հառիճեցիները Գրիգոր վանահոր մահից հետո Պետրոս վանահոր գլխավորությամբ գնահատել են նրա վաստակը եւ հոգացել հիշատակը պահպանելու մասին, որի վերաբերյալ գրում են 1192 թվականի արձանագրության մեջ⁸: Նույն Պետրոս վանահոր ժամա-

⁵ Իր պատմության առաջին ճառում ներկայացնելով իր աշխատության նպատակը՝ Մխիթար Անեցին հետեւյալ խոսքերով է դիմում Գրիգորին. «Արդ՝ ո՛ր պատուական հայր Գրիգորիէ, գրեթէ զհարիւր եւ Խ (40) ամաց մեծամեծ գործս խնդրէ քո պատուականութիւնդ՝ ի ժամանակաց անտի Յովհաննիսի, յետին եւ վերջնոյն Բագրատունեաց, մինչեւ ի ներկայս յայս, յորում եմս դեռ եւս» (Մխիթար Անեցի, Մատեան աշխարհավէպ հանդիսարանաց, աշխատասիրությամբ Հ. Գ. Մարգարյանի, Երեւան, 1983, էջ 61):

⁶ Կ. Մաթեոսյան, Սամվել Անեցու ժամանակագրության ձեռագրերը եւ նորահայտ լրացումները, Երեւան, 2009, էջ 185-190:

⁷ 3. Քիրտեան, նշվ. աշխ., էջ 268: Այս եւ հաջորդ մեջբերումներում ընդգծումները մերն են - Կ. Մ.:

⁸ «Կամաւն Աստուծոյ մեք հառիճեցիքս՝ հայր Պետրոս եւ այլ եղբարքս, սահմանեցաք ի տաւնի Տապանակին ի մի մատուռն պատարագել զՔրիստոս յանուն Գրիգորոյ, փոխանակ արդեանց իւրոց... ՈխԱ (1192)», (3. Քիրտեան, նշվ. աշխ., էջ 268):

նակ գրված մեկ այլ արձանագրություն տեղեկացնում է, որ 1196 թ. նշանավոր վարդապետ Գրիգոր Տուտեորդին այցելել է Հառիճ եւ վանքին է նվիրել թանկարժեք պահարանով խաչ⁹:

Հառիճի վանքը, որքան էլ ճանաչված, սակայն պատմության մեջ Շիրակի բազմաթիվ փոքր վանքերից մեկը կմնար, եթե 12-րդ դարի մայրամուտին չդառնար ժամանակի խոշորագույն ռազմա-քաղաքական գործիչներից մեկի՝ Ջաքարե ամիրսպասալարի սեփական վանքն ու նրա գլխավոր շինարարական ձեռնարկման վայրը: Վանքի Ս. Գրիգոր հնագույն եկեղեցու հարեւանությամբ Ջաքարեն հիմնեց մեծաշեն եւ շքեղ Ս. Աստվածածին եկեղեցին, որի շինարարությունն ավարտվեց 1201 թ.:

Հարկ է նշել, որ մինչեւ Ջաքարեի եկեղեցու կառուցումը, 1196 թվականի երկու արձանագրություններում Հառիճի ուխտը կոչվում է Ս. Գրիգորի եւ Ս. Աստվածածնի անունով¹⁰: Այժմ Հառիճում Ջաքարեի եկեղեցուց բացի Ս. Աստվածածին անունով այլ եկեղեցի հայտնի չէ (հնարավոր է, որ այդպես է կոչվել փոքր մատուռներից մեկը), սակայն իշխանաշեն եկեղեցին չի կառուցվել նույնանուն հին եկեղեցու տեղում, քանի որ 1219 թ. Հառիճում գրված ձեռագրի հիշատակարանում նշվում է, որ մատյանը գրվել է «ի հրեշտակաբնակ ուխտիս Հառիճ, **ընդ հովանեաւ Սուրբ Աստուածածնիս եւ Սուրբ Գրիգորոյ եւ ի հրաշակերտ նոր Կաթողիկէիս**»¹¹: Ջաքարեի շինարարական արձանագրության մեջ եւս նորաշեն եկեղեցին Կաթողիկե է կոչվում, բայց նշվում է նաեւ եկեղեցու Ս. Աստվածածին

⁹ Նույն տեղում:

¹⁰ 1196 թ. նվիրատու Աստվածատուրը նշում է, որ Արուճում գտնվող մի այգի եւ հնձան է տվել «ի սուրբ ուխտս Հառիճայի, ի Սուրբ Գրիգորս եւ Սուրբ Աստուածածինս»: Նույն թվականին Գրիգոր Տուտեորդին էլ գրում է. «...ետու զսուրբ նշանս... ի Սուրբ Աստուածածինս Հառիճայու» (Ա. Մխիթարեանց, Պատմութիւն մենաստանին Հառիճոյ ի Շիրակ, Տփղիս, 1856, էջ 82, 83):

¹¹ ԺԳ դարի հայերեն ձեռագրերի հիշատակարաններ (կազմող՝ Ա. Մաթեոսյան), Երեւան, 1984, էջ 114:

անունը¹²: Այսպիսով Ս. Աստվածածին է կոչվել եւ վանքի հին եկեղեցիներից մեկը, եւ Ջաքարեի հիմնած Կաթողիկեն:

Ինչպես նշվեց, Ջաքարեի շինարարական արձանագրությունը գրվել է 1201 թ., այսինքն այն ժամանակ, երբ Հայաստանի հյուսիսային շրջանները, նաեւ Շիրակը, արդեն Ջաքարյաններին էր անցել: Իսկ ե՞րբ Ջաքարեն դարձավ Հառիճի «հայրենատերը»: Ստույգ թվական հայտնի չէ, սակայն ենթադրելի է, որ այդ տեղի է ունեցել մինչեւ Շիրակի ամբողջական ազատագրումը: Նախ, ինքնին հետաքրքիր է, որ վանքի ձեռքբերումը նախկին հայրենատերերից կատարվել է գնման միջոցով, ինչպես Ջաքարեն է արձանագրության մեջ նշում՝ **«գանձագին արարի զհռչակաւոր սուրբ ուխտս Հառիճայի յիւր բնական հայրենատերացն»**¹³: Նշենք, որ գրականության մեջ երբեմն Հառիճի «բնական հայրենատեր» են անվանվում Պահլավունիները¹⁴, սակայն այդ մասին վկայող ոչ մի փաստ չկա: Մեր կարծիքով Հառիճը չի պատկանել Պահլավունիներին, որոնք իրենց հովանավորած բոլոր վանքերում մեկից ավելի հիշատակներ ունեն թողած, մինչդեռ Հառիճում այդպիսիք բնավ չկան: Ուստի առայժմ պետք է բաց թողնել վանքի «բնական» հայրենատերերի հարցը, մինչեւ որոշակի տվյալների երեւան գալը:

Ուշագրավ է, որ գանձագին անելով վանքը՝ Ջաքարեն այստեղ ոչ միայն եկեղեցի է կառուցել, այլեւ, թերեւս ավելի վաղ, ռազմական հենակետ՝ ամրոց: Արձանագրության մեջ Ջաքարեն սկզբում հենց այս կառույցն է նշում՝ **«շինեցի ի սմա ամրոց եւ զկաթուղիկես»**¹⁵:

¹² «...շինեցի ի սմա (Հառիճում - Կ. Մ.) ամրոց եւ զկաթուղիկես... ընծայեցի Սուրբ Աստուածածնիս...» (Ա. Մխիթարեանց, նշվ. աշխ., էջ 62-63):

¹³ Նույն տեղում:

¹⁴ Օ. Халпахчян, Архитектурные ансамбли Армении, Москва, 1980, с. 265, Վ. Հարությունյան, Հայկական ճարտարապետության պատմություն, Երեւան, 1992, էջ 312, Ռ. Քարտաշյան, Հառիճավանքը գտնում է իր տեսքը, «Հուշարձան» տարեգիրք, Բ, Երեւան, 1993, էջ 45:

¹⁵ Ա. Մխիթարեանց, նշվ. աշխ., էջ 62-63:

Ամրոցի եւ Ս. Աստվածածին մեծաշեն եկեղեցու կառուցման համար բավականին ժամանակ էր անհրաժեշտ, եւ եթե նկատի ունենանք շինարարության ավարտի թվականը՝ 1201 թ., ապա կարող ենք ենթադրել, որ Ջաքարեն վանքը գանձագին է արել դրանից առնվազն 5-6 տարի առաջ: Հառնիճում 1201 թվականին նախորդող երկու արձանագրություն կա 1196 թվականից (Ս. Գրիգոր եկեղեցու պատին), սակայն նրանցում ոչ մի ակնարկ չկա Ջաքարեի՝ Հառնիճի հայրենատեր լինելու մասին: Կարելի է ենթադրել, որ Ջաքարեն տեր է դարձել Հառնիճին այդ թվականի վերջին կամ 1197-ին: Հենց այդ ժամանակ են Ջաքարյանները գրավել դժվարամատույց Ամբերդը նաեւ կարելոր հաղթանակ տարել Գանձակի ամիրայության նկատմամբ:

Եթե Ջաքարյանների կողմից Արագածոտն գավառի գրավման վերաբերյալ մի շարք արձանագրություններ են պահպանվել (Փարպի, Անտառուտ, Կոշ), որոնց միջոցով հնարավոր է ուրվագծել ռազմական գործողությունների ընթացքը¹⁶, ապա նրանց Շիրակ ներթափանցելու մասին սկզբնաղբյուրները սուղ են: Այս տեսանկյունից Հառնիճի պարագան միանգամայն ինքնատիպ եւ եզակի է: Այն վկայում է, որ Ջաքարյաններն այստեղ օգտագործել են ոչ միայն զինական ուժը, այլեւ, օգտվելով ժամանակի տնտեսակարգի ընձեռած հնարավորություններից, նաեւ՝ դրամը:

Հառնիճից ոչ հեռու գտնվող Լմբատավանքը 1191 թ. մահմեդականներից գնել է Անիի Բարսեղ Բ արքեպիսկոպոսը՝ թողնելով համապատասխան արձանագրություն. «Ես տեր Բարսեղ... գնեցի զվանքս յանաւրինաց...»¹⁷: Նույն կերպ Ջաքարեն Հառնիճը գնել է նախկին տիրոջից: Այս վանքը գտնվելով Շիրակի հյուսիսարեւելյան մասում, որը սահմանակից էր Ջաքարյանների կենտրոնական

¹⁶ Այս մասին տե՛ս Պ. Մուրադյան, Հայաստանի վրացերեն արձանագրությունները, Երեւան, 1977, էջ 106, Ա. Շահնազարյան, Ջաքարյանների ազատամարտի առաջին փուլը, Հայոց պատմության հարցեր, N 6, Երեւան, 2005, էջ 132-147:

¹⁷ Կ. Կոստանեանց, Վիմական տարեգիրք, Տփղիս, 1913, էջ 37:

տիրույթներին (նրանց նստավայրը Լոռին էր), շատ հարմար ռազմավարական հեմակետ էր դեպի արեւմուտք եւ հարավ առաջխաղացման համար: Ուշագրավ է, որ 12-րդ դարի վերջին Ջաքարյանները պարբերաբար մարտական գործողություններ էին վարում արեւելյան եւ հարավարեւելյան ուղղությամբ, մինչդեռ արեւմուտքում՝ Հառիճում, ընդարձակ շինարարություն են ծավալում:

Հառիճի մեծադիր եկեղեցու կառուցումը նաեւ յուրօրինակ քարոզչություն էր: Բանն այն է, որ այդ տարիներին (1197-1201) Հայաստանում չի կատարվել ավելի նշանակալից մեկ այլ եկեղեցաշինական իրագործում, քան Հառիճի՝ ներքուստ եւ արտաքուստ շքեղազարդ եկեղեցու կառուցումն է: Ջաքարյան եղբայրներն առանձնահատուկ նշանակություն են տվել Հառիճին՝ պատվիրելով նաեւ իրենց կոտիտորական բարձրաքանդակը, որը մինչեւ օրս զարդարում է Ս. Աստվածածին եկեղեցու արեւելյան ճակատը:

Հատկանշական է, որ Ջաքարյանների քանդակը կերպարների տեղադրման առումով կատարված է Հաղբատի եւ Սանահինի **թագավորական** բարձրաքանդակների նմանությամբ¹⁸, իսկ ընդհանուր հորինվածքով (վերին մասում՝ հովանավոր խաչ) հիշեցնում է Անիի Բագրատունյաց շրջանի զինանշանը: Հենց այդ տիրական, «թագավորական» շունչն էր, որ պիտի զգային Հայոց պետության ոստանի՝ Շիրակի բնակիչները՝ տեսնելով Ջաքարյանների վեհաշուք ձեռակերտը:

Բնական է, որ Շիրակում Ջաքարյանների գերխնդիրը Անիի գրավումն էր: Այստեղ հարկ է հիշել, որ 12-րդ դարի ընթացքում վրացիները երեք անգամ գրավեցին Անին (1124-26, 1161-64, 1174-76 թթ.), սակայն հարկադրված եղան կրկին վերադարձնել Շաղհադյաններին: Հառիճի ամրոցի ու եկեղեցու շինարարությունն սկսելու պահին Ջաքարյանները չէին կարող անվերապահորեն համոզված լինել, որ կառուցման ավարտի ժամանակ արդեն գրաված

¹⁸ Տե՛ս Ստ. Մնացականյան, Հայոց աշխարհիկ պատկերաքանդակը 9-14-րդ դարերում, Երեւան 1976, էջ 103:

կլինեն Անին: Սակայն հենց այդպես էլ եղավ: Անին Ձաքարյաններին անցավ 1198 թ. վերջերին¹⁹: Շիրակի նոր տերը՝ Ձաքարեն, ոչ միայն վերականգնեց Հառիճի վանքի նախկին սեփականությունը, այլև, դատելով արձանագրությունից, առատ նվիրատվություններ կատարեց իր ընդարձակ իշխանության տարբեր վայրերից (Անի, Երեւան, Թալին, Գետիկ): Հառիճը, փաստորեն, կատարեց իր եւ գործնական, եւ խորհրդանշական դերը՝ դառնալով այն շքեղ դարպասը, որով Ձաքարյանները ոտք դրեցին Շիրակ:

Հառիճում Ձաքարեի թողած արձանագրությունը պարունակում է նաեւ այլ հետաքրքիր տեղեկություններ՝ մասնավորապես վանքապատկան հողերի տեղանշման, կատարված նվիրատվությունների առումով եւ այլն: Նրա շնորհիվ է հնարավոր դարձել ճշտել Ձաքարեի որդու՝ Շահնշահի ծննդյան փականը²⁰:

Ձաքարեի եկեղեցու կառուցումից հետո Հառիճի հռչակն ավելի աճեց, իսկ ողջ Շիրակի ազատագրումը նպաստավոր պայմաններ ստեղծեց մշակութային կյանքի վերելքի համար: 13-րդ դարի սկզբից մեզ է հասել Հառիճի գրչատան երկու ձեռագրական հուշարձան:

ՀԱՌԻՃՈՒՄ ՆՈՐՈԳՎԱԾ ՄԱՏՅԱՆԻ 1209 Թ. ՀԻՇԱՏԱԿԱՐԱՆԸ

Մատենադարանի թիվ 1886 պատառիկը (մագաղաթյա մի թերթ է, որը Մատենադարանին նվիրել է Հ. Հազարյանը), ուր պահպանվել է մեծարժեք տեղեկություն «Կումիրի» մեծ գյուղաքաղաքի՝ Գյումրիի մասին, Հառիճի գրչատանը 1209 թ. նորոգված մի Ավետարանի հիշատակարան է պարունակում: Այն պատմում է, որ Հովասափ ծերունի կրոնավորը «ազգաւ եւ տոհմիւ ի մեծ գուղաքաղաքէն Կումիրոյ» իր «արդար ընչից» գումար հատկացնելով՝ փրկագնել է ձեռագիրը («ազատեցի ի գերողաց»), եւ քանի որ շատ

¹⁹ Ա. Շահնագարյան, նշվ. աշխ., էջ 142:

²⁰ Պ. Մուրադյան, նշվ. աշխ., էջ 104:

վնասված՝ «կարի զեղծեալ» էր, տվել է նորոգելու: Հառիճում մատ-
յանը հիմնովին նորոգվել ու կազմվել է, ինչպես Հովասափն է
գրում. «Ետու դարձեալ նշանագրել ծաղկեալ, եւ կազմեալ, եւ ար-
ծաթով փառագարդեալ»²¹: Գործը կատարել է Մարգարե աբեղան,
որն էլ գրել է հիշատակարանը²²: Այս նույն Մարգարեն մի քանի
տարի անց, 1211 թ., Անիի Բեխենց վանքում նկարագարդել է հե-
տագայում «Հաղբատի Ավետարան» անունը ստացած նշանավոր
ծեռագիրը (Մատենադարան, ձեռ. թիվ 6288), որն Անիի մանրան-
կարչության ցայժմ հայտնի առավել ամբողջական ու հատկանշա-
կան ստեղծագործությունն է:

1209 թ. հիշատակարանից դատելով՝ Մարգարեն այդ ժամա-
նակ Հառիճի միաբաններից մեկն է եղել: Ինչպես երեւում է, այդ
նույն միաբանության անդամ էր նաեւ Հովասափը: Նրա անունից
Մարգարեի ձեռքով գրված հիշատակարանը պահպանել է այդ ժա-
մանակվա Հառիճի միաբաններից եւս մի քանիսի անունները, սա-
կայն առավել կարելու է վանահայր **Վարդանի** հիշատակումը, որն
այլ աղբյուրներում այլեւս չի հանդիպում: Հիշատակարանում կար-
դում ենք. «(յիշեսցիք) զհայր Վարդան Հառիճայոյ, եւ ըստ հոգւոյ
զեղբարս մեր զԲարսեղ կուսակրան քահանայ, եւ զՍարգիս, եւ
զԽաչոտն, եւ զմեղաւոր կազմաւղս զՄարգարէս, եւ զամենայն
միաբանեալսն մեր»²³: Ինչպես երեւում է հիշատակարանի մաղթո-
ղական վերջաբանից, Մարգարեն ձեռագիրը միայնակ չի նորոգել.
«Եւ Աստուած, որ առատն է ի տուրս, տացէ վարձս բարեաց **ստա-
ցաւոցն եւ աշխատողացն**, եւ ամենայն հաւատացելոց...: ՈԾԸ
(1209) թուիս կազմեցաւ»²⁴:

²¹ Հայերեն ձեռագրերի հիշատակարաններ, ԺԳ դար, կազմեց Ա. Մաթեոս-
յան, Երեւան, 1984, էջ 65:

²² Ա. Մաթեոսյան, Նշմարներ Անի քաղաքի գրչության եւ մանրանկար-
չության, «Բանբեր Մատենադարանի», թիվ 14, Երեւան, 1984, էջ 128:

²³ Հայերեն ձեռագրերի հիշատակարաններ, ԺԳ դար, էջ 65-66:

²⁴ Նույն տեղում:

Վերը հիշված Գրիգոր վանահորից հետո (մահացել է 1188-ին) Հառիճում հիշվում է վանահայր Պետրոսը (Ս. Գրիգոր եկեղեցու 1192, 1196 թթ. արձանագրություններ), նրանից հետո մեր հիշատակարանի շնորհիվ 1209 թ. տեսնում ենք վանահայր Վարդանին, 1214 թ. Ս. Աստվածածին եկեղեցու արձանագրության մեջ հիշվում է մեկ այլ վանահայր Պետրոս²⁵:

Հառիճի վանահայրերի ցանկը լրացնելուն եւ վանքի պատմության որոշ հարցեր ճշտելուն օգնում է նաեւ 1219 թ. այստեղ գրված մատյանի հիշատակարանը:

ՀՈՎՀԱՆՆԵՍ ԳՐԶԻ 1219 Թ. ԺՈՂՈՎԱԾՈՒՆ

Մաշտոցյան Մատենադարանում 1382 թվահամարի տակ պահվող մատյանը, որը մեկնությունների ժողովածու է, ունի 316 թերթ (25.3 x 16 սմ), գրանյութը՝ թուղթ, գրությունը՝ միասյուն, գրչությունը՝ բոլորագիր: Մատյանն ունի լուսանցազարդեր, որոնցից մի քանիսը ներկայացնում են կերպարվեստի հնագույն ավանդների հետ կապված երեւակայական կենդանիներ: Այս հետաքրքրական պատկերների ծագմանն անդրադարձել է Գարեգին Հովսեփյանը²⁶:

Գրիչ Հովհաննեսը նաեւ ստացողն է: Հառիճյան այս մատյանը յուրովի շարունակում է Անիում սկզբնավորված անձնական օգտագործման մատյանների ստեղծման սկզբունքը՝ թուղթ գրանյութի եւ բոլորագիր գրչության կիրառությամբ²⁷:

²⁵ Ա. Մխիթարեանց, նշվ. աշխ., էջ 65:

²⁶ Գ. Յովսեփեան, Խաղբակեանք կամ Պռոշեանք Հայոց պատմութեան մէջ, Անթիլիաս, 1969, էջ 87-88:

²⁷ Հայերեն հնագույն մատյանը, որն ամբողջությամբ գրված է թղթի վրա եւ բոլորագիր գրչությամբ, 981 թ. Դավիթ քահանայի կազմած ու նրա որդի Ղուկասի ձեռքով գրված ժողովածուն է (Մատենադարան, ձեռ. թիվ 2679): Անձնական օգտագործման համար ստեղծվող մատյանի նման սկզբունքը (թուղթ եւ բոլորագիր) տարածված էր Անիի շրջանում: Հռոմոսում այդպիսի մատյաններ են գրել Հովհաննես գրիչն ու Մխիթար Անեցին:

Հովհաննես գրչի հիշատակարանն արժեքավոր տեղեկություններ է պարունակում Հառիճի վանքի ժամանակի առաջնորդների և հեղինակավոր միաբանների վերաբերյալ: «Գրացաւ ի ՈԿԸ (1219) թ[ուիս] Հայոց, ի հրեշտակաբնակ ուխտիս **Հառիճ...** յառաջնորդութեան հաւր **Պետրոսի** եւ **Քրիստափորի** եւ **Սոսթենիսի** եւ այլ միաբան սուրբ եղբարցս, որք կ[ա]մակ[ի]ց եղեն եւ աւգնական աղաւթիւք, եւ ընծայեցի զսայ ի սուրբ ուխտս **Հառիճայ**, յառաջնորդութիւն **Գրիգորոյ** վարդապետիս, որդւոյ **Աբասայ**, որ եկն ի սուրբ ուխտէն **Սանահնէն**՝ առաջնորդ Մաւրս Լուսոյ (այսինքն՝ «Սուրբ Աստուածածնիս» - Կ. Մ.) եւ սպասուոր, որ է հեզ եւ խաղաղարար եւ բարեւեր:

[Ար]դ, աղ[ա]չեմ զամենեսեան, որք կարոյայք... զիս՝ զանարհեստ եւ զողորմելի գրողս եւ զստացիչս **զՅոհաննէս**, եւ զծնաւուսն իմ, եւ զեղբարս եւ զքեռնս եւ **զՎարդերեսն** յիշեսցիք ի սուրբ յաղաթս ձեր եւ զվերայգրեալս՝ զհայր **Պետրոս**, եւ **զՔրիստափոր**, եւ **զ[Ս]ոսթենես**, եւ առաւել զմոր հայրս [մ]եր՝ **զԳր[գ]որ** վարդապետս զորդի **Ա[բա]սայ**՝ զա[ր]դարեա[լ]ն ամ[ե]ն[ա]յն ա[ռ]աքին[ու]թե[ամ]բ, եւ զայլ միաբան ե[ղ]բարքսս՝ զքահանայսս եւ զկրաւն[աւ]որսս, եւ զծ[երսս] եւ զերիտասարդսս [յիշե]ցեք յա[ղաթս] ձ[եր]... եւ **զՂազար** տանուտէր տարոյս, որ է հոգաբարձու եղբարցս, յիշեսցիք, յաղաթս...»²⁸:

Հովհաննեսի հիշատակարանի շնորհիվ իմանում ենք, որ նա մատյանի գրչությունը սկսել է Պետրոս վանահոր ժամանակ, բայց ավարտման պահին՝ 1219 թ., Սանահինի վանքից եկել է Աբասի որդի Գրիգոր վարդապետը՝ որպես Հառիճի նոր վանահայր: Հիշվում են նաեւ ավագ վանականներ Քրիստափորն ու Սոսթենեսը, վանքի տնտեսական պետքերը հոգացող Ղազար տանուտերը, մյուս միա-

²⁸ Հայերեն ձեռագրերի հիշատակարաններ, ԺԳ դար, էջ 114: Ցավոք Մատենադարանի նոր ձեռագրացուցակում հիշատակարանը թերի է բերված (Մայր ցուցակ հայերեն ձեռագրաց Մաշտոցի անուան Մատենադարանի, հ. Դ, կազմեցին Ա. Քեօշկերեան, Կ. Սուքիասեան, Յ. Քեօտեան, Երեւան, 2008, էջ 1125):

բանները: Հիշատակարանից իմանում ենք, որ Հովհաննեսն այդ մատյանն ընծայել է հարազատ ուխտին:

Կյուրիկյան տոհմից սերող Գրիգոր վարդապետը (Աբասի որդին), որը մշակութային մեծ վաստակ ունեցող հոգեւորական էր, Հառիճում հիշվում է նաեւ 1221 թ. մի արձանագրության մեջ²⁹, բայց ինչպես երեւում է, նա այստեղ երկար չի պաշտոնավարել ու կրկին վերադարձել է Սանահին³⁰:

Հառիճում 1224-ին արդեն հանդիպում ենք Հովհաննես վանահոր անվան հիշատակությանը³¹: Հովհաննեսից հետո՝ 1235 թ., մի արձանագրության մեջ հիշվում է Հառիճի նոր վանահայր Համազասպը³²:

Հովհաննես գրչի 1219 թ. հիշատակարանը կարելուր տվյալներ է պարունակում Հառիճի վանքի մեծ ժամատան կառուցողի ու կառուցման ժամանակի վերաբերյալ:

²⁹ Ա. Մխիթարեանց, նշվ. աշխ., էջ 68:

³⁰ Գրիգոր վարդապետը (որդի Աբասա) որպես Սանահինի առաջնորդ հիշատակվում է 1217 թ. մի արձանագրության մեջ, ուր նա նշում է, որ վանքին մի խաչ եւ 13 ձեռագիր գիրք է նվիրել (Կ. Ղաֆադարյան, Սանահինի վանքը եւ նրա արձանագրությունները, Երեւան, 1957, էջ 116): Մինչ այդ՝ 1214-15 թթ., եղել է առաջնորդի աթոռակից: Գրիգորի՝ Հառիճ տեղափոխվելուց հետո (1219) Սանահինի վանահայր է դարձել Զաքարե ամիրսպասալարի ազգական Հովհաննեսը, որը հիշվում է մինչեւ 1225 թ.: Դրանից հետո Գրիգորը կրկին դարձել է Սանահինի վանահայր (հիշվում է 1229 եւ 1234 թվականներին): Նա ղեկավարել է տեղի դպրոցը, անվանվում է «մեծ թաթունապետ» (Հայերեն ձեռագրերի հիշատակարաններ, ԺԳ դար, էջ 910): Այս բազմաթիվ վարդապետի գրչին է պատկանում «Պատճառաց գիրքը»: Սանահինի վանքում է գտնվում Աբասի որդի Գրիգորի անթվակիր տապանաքարը (Կ. Ղաֆադարյան, նշվ. աշխ., էջ 55-61, 175, 195, տես նաեւ Յիշատակարան Սանահնոյ վանից (Սանահինի Քեթրուկը), աշխատասիրությամբ Պ. Մուրադեանի, Ս. Էջմիածին, 2007, էջ 72, 111, 126):

³¹ Ա. Մխիթարեանց, նշվ. աշխ., էջ 74:

³² Ա. Մխիթարեանց, նշվ. աշխ., էջ 76:

ՀԱՌԻՃԻ ԺԱՄԱՏԱՆ ԿԱՌՈՒՑՄԱՆ ԺԱՄԱՆԱԿՆ ՈՒ ԿԱՌՈՒՑՈՂԸ

Հառիճի ճարտարապետության ուսումնասիրողները, օգտվելով միայն վիմագրության ընձեռած տվյալներից, Ջաքարեի հիմնած Ս. Աստվածածին եկեղեցու արեւմտյան մասում գտնվող մեծ ժամատան (գավիթի) կառուցման ժամանակը որոշել են ըստ առաջին թվակիր արձանագրության, քանի որ ժամատունը կառուցող Վահրամ հեջուբի արձանագրության թվականը չի պահպանվել: Ժամատան վրա եղած առաջին թվակիր արձանագրությունը 1224 թվականից է (նվիրատու Մխիթար), ըստ այդմ՝ ժամատունը կառուցված է համարվել մինչեւ 1224 թվականը³³:

Հովհաննես գրչի հիշատակարանի շնորհիվ այս հարցն ավելի որոշակի է դառնում, միաժամանակ լրացուցիչ տեղեկություններ ենք քաղում կառուցողի վերաբերյալ: Հիշատակարանի ավարտամասում Հովհաննեսը խնդրում է հիշել. **«Եւ զմեծ իշխանն մեր զբարեպաշտ Վարհամ, որ զժամատունս շինեաց ի դրան Կթողիկէիս, եւ զորդիսս իւր՝ զիշխանն եւ զՍարգիս պահեսցե խաղաղութեամբ զմեզ ի խորին ծերութիւնն Քրիստոս, եւ յետ աստի ելանելոյ հանգուցէ զհոգիս նոցա յարքայութեանն ըստ սիրելիսս իւր, ամեն»**³⁴: Քանի որ Հովհաննեսի 1219 թվականին գրած հիշատակարանում արձանագրված է ժամատան կառուցման փաստը, ուստի, բնականաբար, **Հառիճի ժամատունը կառուցվել է մինչեւ 1219 թվականը**:

Ինչպես նշվեց, ժամատունն ունի նաեւ կառուցմանը վերաբերող անթվական արձանագրություն: Այն հետեւյալն է. «Աստուածասէր եւ արդիւնաւոր **պատրոնն հիջուպ Վահրամ** շինեաց զվայելուչ ժամատունս եւ եբեր զմիւս ջուրս յիշատակ հոգո իւրոյ եւ զաւակաց իւրոց եւ ամուսնո իւրո **Թամարին**: Եւ տէր **Յովհաննէս** միաբանաւքս ի խնդրոյ դատերն իւրո **Խաթունին** հաստատեցին ի տաւնի Թեոթոս

³³ Օ. Халпахчан, նշվ. աշխ., էջ 268, Ա. Ջալալյան, Հառիճի հուշարձանախումբը, ՀՍՍՀ ԳԱ Լրաբեր հաս. գիտ., 1986, թիվ 2, էջ 88:

³⁴ Հայերեն ձեռագրերի հիշատակարաններ, ԺԳ դար, էջ 114:

թագաւորին զամենայն եկեղեցիքս յանուն **Թամարին** պատարագել զՔրիստոս Աստծոյն մերոյ անխափան: Թվին»³⁵:

Ինչպէս տեսնում ենք, սա ուղղակի իմաստով շինարարական արձանագրութիւնն է, այլ, տեղեկացնելով Վահրամ հեջուրի կողմից ժամատան կառուցման, նաեւ դեպի վանք երկրորդ ջրատարը բերելու մասին, պարունակում է նրա դստեր՝ Խաթունի՝ իր մոր՝ Թամարի համար պատարագ ստանալու խնդրանքը, որը բավարարում է Հովհաննէսը: Վերջինս որպէս վանահայր հիշվում է 1224 թ.³⁶, իսկ նրանից առաջ վանահայրեր էր Աբասի որդի Գրիգորը (հիշված՝ 1219 եւ 1221 թ.): Հնարավոր է, որ ժամատան կառուցումից հետո ջրատարի շինարարութիւնն է ձգվել ու հասել մինչեւ Հովհաննէսի վանահայրութեան տարիները: Երեւի պատահական է, որ արձանագրութեան վերջում փակագրով գրված «Թվին» բառից հետո թվական չի գրվել, որովհետեւ հավանաբար ժամատան կառուցումը, ջրատարի ավարտը եւ Խաթունի խնդրանքը վերաբերել են տարբեր թվականների: Ըստ երեւոյթին արձանագրողներն անմիջապէս չկողմնորոշվելով, թէ որ թվականը պիտի գրեն, գործը հետաձգել են եւ ի վերջո արձանագրութիւնն այդպէս էլ մնացել է անթվական:

Հառիճի արձանագրութեան մեջ նշված Վահրամ հեջուրի դուստր Խաթունը որպէս եկեղեցիներ նորոգող, հիշվում է նաեւ Հռոմոսի վանքի վիմագրերից մեկում³⁷:

³⁵ Ա. Մխիթարեանց, նշվ. աշխ., էջ 73, Ղ. Ալիշան, Շիրակ, Վենետիկ, 1881, էջ 162, Հ. Քիւրտեան, նշվ. աշխ., էջ 270:

³⁶ Ղ. Ալիշան, Շիրակ, էջ 161, Հ. Եղիազարյան, Հառիճի վանքը եւ նրա վիմագրութիւնը, «Էջմիածին», 1957, Ա, էջ 61:

³⁷ Հռոմոսի վանքի տապանատան մատուռներից մեկի մոտ պահպանվել է հետեւյալ արձանագրութիւնը. «Քրիստոս Աստուած ի Քո մեծի ծագմանն լոյսո նորոգեա զիոգի **Խաթունին**, դստեր **հեճուլա Վարհամա**, որ մեծ յուսով եւ բազում արդեամբք վերստին նորոգեաց գեկեղեցիքս եւ զի ոչ ունելով մարմնաւոր զաւակ, ստացաւ իւր ժառանգն եւ յիշատակ զսուրբ Յովաննէսի...» (Ն. Սարգիսեան, Տեղագրութիւնք ի Փոքր եւ ի Մեծ Հայս, Վենետիկ, 1864, էջ 160):

Յովհաննես գրչի հիշատակարանի շնորհիվ իմանում ենք Վահրամի որդիների՝ Իշխանի եւ Սագիսի անունները: Ցավոք, մեզ չհաջողվեց նրանց հիշատակությունը գտնել այս սկզբնաղբյուրներում (Շիրակի վիմագրերում կան այդ անուններով իշխանագույններ, բայց հավելյալ փաստերի բացակայությունը թույլ չի տալիս նույնացում կատարել):

Ինչ վերաբերում է իրեն՝ Վահրամ հեջուբին, ապա հավանաբար նա 1218 թ. Անիի արձանագրություններից մեկում հիշատակվող Վահրամ ամիրան է: Հեջուբը կառավարչի պաշտոն է: Այդ պաշտոնը կրում էին Ջաքարյանների տան գործավար, տնտեսվար վերակացուները: Ջաքարեի կառուցած եկեղեցու ժամատունը չէր կարող պատահական մեկը կառուցել: Վահրամն այդ արել է հավանաբար իր պարոնի (հենց Ջաքարեի կան նրա որդի Շահնշահի) ցուցումով: Նկատենք, որ եթե Հառիճի եւ Յոռնոսի վիմագրերում նշված է Վահրամի պաշտոնը՝ հեջուբ, ապա Յովհաննես գրչի հիշատակարանում նա կոչվում է «մեծ իշխան»:

Անիի վերոհիշյալ արձանագրությունը պահպանվել է Վրաց Ետիփան (Եպիփանոս) կաթողիկոսի վրացերեն արձանագրության տակ, հայերեն. «Թվին ՈԿԷ (1218) ես տեր Գրիգոր իրիցապետ Եպիսկոպոս, ես՝ **Վահրամ ամիրա քաղաքիս**, վկայեմք, որ կաթողիկոսին հրամանք է գալս»³⁸: Ջաքարյանների ժամանակ Անիում ամիրան որոշ իմաստով քաղաքապետի դեր էր կատարում: Քաղաքը գրավելուց հետո Ջաքարե ամիրսպասալարը Լոռիից տեղափոխվեց այստեղ եւ քաղաքն իր նստավայրը դարձրեց: Բնականաբար Ջաքարեի տան հեջուբը եւս Անիում պիտ գտնվեր եւ կատարեր կառավարիչ-գործավարին հատուկ գործերը: Անին Ջաքարեի իշխանության վարչատնտեսական կենտրոնն էր, եւ տրամաբանական է, որ քաղաքի կառավարումը նույնպես հեջուբն իրականացներ, սա-

³⁸ Անիի Վիմագրերի ժողովածուում արձանագրության թվականը նշված է ՈԿԷ (1216), (Դիվան, Ա, էջ 61), սակայն Պ. Մուրադյանը ճշտում է՝ ՈԿԷ (1218), (Պ. Մուրադյան, նշվ. աշխ., էջ 43):

կայն այստեղ կրելով Շադդադյանների շրջանի մեկ ու կես հարյուրամյակի ավանդությամբ հաստատված «ամիրա» կոչումը:

Անիի Վահրամ ամիրան հիշվում է նաեւ մի անթվական արձանագրության մեջ: Շահնշահի ժամանակ Լուսոտ անունով անեցին պարսպի բուրգ է կառուցել եւ արձանագրել՝ «յամիրութեան Վահրամա կատարեցաւ բուրջս»³⁹:

Լրացուցիչ փաստերի բացակայության պատճառով չենք կարող վերջնականապես հաստատել Վահրամ հեջուբի եւ Վահրամ ամիրայի նույնությունը, սակայն երկուսի ապրած ժամանակը նույնն է, հիշվում են Ջաքարեի որդու՝ Շահնշահի ժամանակ (Հառիճում՝ 1219 եւ շուրջ 1224 թթ., Անիում՝ 1218 թ.) եւ կատարում գործավարկառավարչի նույն դերը:

ՀԱՌԻՃԻ ՄԻՋՆԱԴԱՐՅԱՆ ՎԱՆԱՀԱՅՐԵՐԸ

Հառիճի միջնադարյան վանահայրերի առաջին ցուցակը կազմել է Աբել Մխիթարյանցը 1856-ին⁴⁰, այնուհետեւ՝ Ղեւոնդ Ալիշանը՝ 1881-ին, որը հետեւյալն է.

Համազասպ (է կամ Ժ դար)

Գրիգոր ց'1185

Պետրոս 1185-1220

Գրիգոր Բ 1221

Յովհաննէս 1224

Համազասպ Բ 1234-5⁴¹:

Ցանկի սկզբում նշված Համազասպը հիշվում է Սարգիս ճոնի արձանագրության մեջ, որը վերաբերում է Ս. Գրիգոր եկեղեցու կա-

³⁹ Դիվան, Ա, էջ 6:

⁴⁰ Ա. Մխիթարեանց, նշվ. աշխ., էջ 39-42:

⁴¹ Ղ. Ալիշան, Շիրակ, էջ 163:

ռուցմանը⁴²: Իսկ Համազասպ Բ-ը հիշվում է 1235 թ. մի արձանագրության մեջ⁴³:

Վերը բերված 1209 եւ 1219 թթ. հիշատակարանները թույլ են տալիս էական ճշգրտումներ կատարել: Վիմագրերի եւ հիշատակարանների տվյալների համադրմամբ այժմ կարելի է ներկայացնել Հառիճի միջնադարյան վանահայրերի հետեւյալ ցուցակը.

1. Համազասպ Ա	մինչեւ 11-րդ դ.
2. Գրիգոր Ա	մոտ. 1160 -1188
3. Պետրոս Ա	1188, 1192
4. Վարդան	1209
5. Պետրոս Բ	1214-1219
6. Գրիգոր Բ որդի Աբասի	1219, 1221
7. Հովհաննես	1224
8. Համազասպ Բ	1235-ից

⁴² «Եւ Սարգիս ճոնս շինեցի զեկեղեցիս եւ ի քրտանց իմ ետու այլ ընծայ ի սուրբ ուխտս եւ հայր Համազասպս սահմանեաց, որ ի Սարգսի եւ ի Բագոսի տաւնին Բ (2) անդ պատարագեն զՔրիստոս յիմ անուն, ով խափանէ, դատի ի Տեառնէ» (Հ. Քիւրտեան, նշվ. աշխ., էջ 267): Տարբեր ուսումնասիրողներ արձանագրության ժամանակը տարբեր կերպ են որոշում (7-րդ կամ 10-րդ դ.):

⁴³ Հ. Քիւրտեան, նշվ. աշխ., էջ 271:

ԱՆԻ ՔԱՂԱՔԸ ԵՒ ԾԱՌԱՔԱՐ-ՄԱՂԱՍԲԵՐՐԴ

11-14-րդ դդ.

Անի մայրաքաղաքի մերձակա բնակավայրերը, վանքերն ու բերդերը սերտորեն կապված են եղել քաղաքի հետ թե՛ վարչատնտեսական եւ թե՛ հոգեւոր-մշակութային առումով: Եթե քաղաքի շրջակա Հռոմոսի, Բագմայրի, Արջո Առիճի, Տեկորի, Խժկոնքի, Մրենի վանքերի պատմությունը, դրանց կապն Անիի հետ, բավականաչափ հայտնի եւ ուսումնասիրված է, շնորհիվ այս կենտրոններում եղած վիմագրերի եւ այդտեղ գրված ձեռագրերի հիշատակարանների, ապա բերդերի վերաբերյալ շատ ավելի սակավ տեղեկություններ են պահպանվել: Ստորեւ կփորձենք հայտնի եւ նորահայտ նյութերի միջոցով ներկայացնել Անիի մերձակա բերդերից մեկի՝ Ծառաքար կամ Մաղասբերդ¹ անուններով հայտնի բերդի 11-14-րդ դարերի պատմությունը: Բերդի պատկառազու աշտարակավոր պարիսպները մինչեւ օրս վեր են խոյանում Ախուրյանի կիրճում: Բազմավաստակ Թորոս Թորամանյանի բնորոշմամբ, այն «իր ժամանակին ամենից ամառիկ բերդն էր եւ ավելի ամուր, քան Անին»²: Թ. Թորամանյանն ավելացնում է նաեւ, որ ռուսական բանակի հայտնի զորահրամանատար հայազգի Լոռիս-Մելիքովն Անիի

¹ Աղբյուրներում այս անունը հիշատակվում է տարբեր կերպ՝ «Մախագիբերդ» (10-րդ դ., Ամանուն գրուցագիր), «Մաղասբերդ» (1222 թ. հիշատակարան), «Մաղըսբերդ» (1343 թ. հիշատակարան), «Մաղասայբերդ», «Մաղասաբերդ», «Մաղասբերդ» (Զաքարիա Քանաքեռցի) (համապատասխան հղումները տես հոդվածում): Ս. Երեմյանը բերդը կոչել է «Մաղխագ բերդ», այն առնչելով Արշակունյաց արքունիքի «մաղխագ» պաշտոնի հետ (Հայ ժողովրդի պատմություն, հ. 2, Երեւան, 1984, էջ 199): Մենք նախընտրում ենք առավել հաճախ հանդիպող «Մաղասբերդ» տարբերակը:

² Թ. Թորամանյան, Նյութեր հայկական ճարտարապետության պատմության (աշխ. ժողովածու), Երեւան, 1942, էջ 311:



շրջանում «թե՛ տեղի ընտրության, թե՛ ռազմագիտորեն շինության տեսակետով ամենեն ավելի գնահատել է Մաղաս բերդը»³:

Հենց սկզբում նշենք, որ մինչեւ այժմ գրականության մեջ Ծառաքարը եւ Մաղասերդը համարվել են տարբեր բերդեր: «Մախագիբերդ» անունը առաջին անգամ հիշատակվում է կարծեցյալ Շապուհ Բագրատունու («Պատմութիւն Անանուն զրուցագրի») մոտ, ըստ որի բյուզանդական Մորիկ (582-602) կայսրը Մախագ անունով հայ կուսակալ է ուղարկել Արեւելք, եւ նա Ախուրյան գետի ափին կառուցել է մի բերդ ու կոչել Մախագիբերդ. «Եւ զՄախագ ոմն ի յաշխարհէն Հայոց կացոյց ի յարեւելս, այր չար եւ անաւրէն: Նայ շինեալ զամրոցն ար արն խորինա գետոյ եւ կոչեաց զնայ Մախագի-

³ Նույն տեղում, էջ 324:

բերդ»⁴: Աղբյուրը, տվյալ դեպքում, ոչ թե պատմագրական երկ է, այլ պատմական գրույցների ժողովածու, որի պարունակած տեղեկությունները կարող են իրականության հետ մոտավոր կապ ունենալ: Երկի օրինակներից մեկում Մախազին է վերագրվել նաեւ Անիի բերդի կառուցումը՝ «շինեաց եւ ամուրն Անի առ ափն Ախուրեան գետոյ»⁵:

Երկրորդ պատմիչը, որ տալիս է բերդի անունը՝ «Մաղասայ բերդ» («Մաղասաբերդ», «Մաղասբերդ») 17-րդ դարում ապրած Զաքարիա Սարկավազ Քանաքեռցին է, որը բերդի հիմնադրման մասին տեղեկությունը քաղելով Անանուն գրուցագրից, այն որոշ գեղարվեստական մշակման է ենթարկել եւ ավելացրել 1638-ին բերդի՝ պարսկական տիրապետությունից խաբեությամբ օսմանյան թուրքերին անցնելու պատմությունը⁶: Զաքարիան շատ մանրամասն է նկարագրել բերդի տեղադրությունը, հավանական է, որ այն տեսել է:

Մախազ-Մաղասի անվան հետ կապվող Մաղասբերդ անվան ծագման մասին պատմիչների հայտնած այս երկու հիշատակությունների միջեւ շուրջ հազար տարվա հեռավորություն կա: Անհավանական կլիներ, եթե Անիից շուրջ 5 կիլոմետր հարավ-արեւմուտք, Ախուրյան գետի կիրճում անմատչելի հրվանդանի վրա գտնվող բերդը երբեւէ չհիշատակվեր 11-13-րդ դարերում, երբ Անին պատմական իրադարձությունների կիզակետում էր: Եւ այն հիշատակվել է, սակայն իր երկրորդ՝ Ծառաքար անունով:

Ղ. Ալիշանը ժամանակին, Կեչրորի տեղը որոշելու կապակցությամբ, անդրադարձել է Ծառաքարին (նկատի ունենալով Վարդան

⁴ Պատմութիւն Անանուն գրուցագրի (կարծեցեալ Շապուհ Բագրատունի), թարգմանությունը գրաբարից ռուսերեն, առաջաբանն ու ծանոթագրությունները Մ. Զ. Դարբինյան-Մելիքյանի, Երեւան, 1971, էջ 51:

⁵ Նույն տեղում:

⁶ Զաքարիա Սարկավազ, Պատմագրութիւն, հ. Բ, Վաղարշապատ, 1870, էջ 15-16:

Արեւելցու հաղորդումը, որ Կեչրորի ամիրան գրավել է Ծառաքարը, եւ ենթադրել, որ դրանք գտնվել են Երասխածորում կամ Գաբեղենք գավառում⁷: Հետագայում տարբեր հեղինակներ, միմյանց կրկնելով, տարածել են այս տեսակետը⁸: Անգամ ծանոթ լինելով Ծառաքար-Մաղասբերդում գրված 1222 թ. հիշատակարանին, ուր պարզորոշ ասվում է բերդի երկամվանության մասին, ոմանք խուսափել են համապատասխան եզրահանգումից: Հատկանշական է Միքայել վրդ. Հովհաննեսյանի օրինակը, որը «Հայաստանի բերդերը» ստվար հատորում Մաղասբերդը եւ Ծառաքարը ներկայացնում է առանձին-առանձին, առաջինի վերաբերյալ վկայակոչում Անանուն զրուցագրին եւ Ջաքարիա Քանաքեռցուն, երկրորդի համար՝ Կիրակոս Գանձակեցուն եւ Սամվել Անեցուն, նաեւ 1222 թ. հիշատակարանը, ուր նշվում է. «Ջայս երազահանս ի տաճիկ յարապ գրէ ի հայ գիր մեկնեալ Առաքել իմաստասէր արեղայն, որ մականուն վառ ասեն, եւ Մխիթար Կլեկանց եւ Շերանն, **ի յԱնի քաղաքին**

⁷ Ղ. Ալիշան, Այրարատ, Վենետիկ, 1890, էջ 47, Հ. Ոսկեան, Վասպուրական-Վանի վանքերը, Վիեննա, 1940, էջ 236:

⁸ Հայ ժողովրդի պատմության ակադեմիական հրատարակության մեջ Մաղասբերդը համարվում է Անիի մատույցը պաշտպանող մի բերդ, իսկ Ծառաքարի համար ասվում է. «Նախկին Արշարունիքի արեւմտյան մասն էր կազմում Կեչրոր գավառը համանուն քաղաքով եւ Ծառաքար ամրոցով» (Հայ ժողովրդի պատմություն, հ. 3, Երեւան, 1976, էջ 98): Հայկական սովետական հանրագիտարանը «Մաղասբերդ» անունով է կոչում բառահողվածը («Մաղասբերդ, Մաղազբերդ, Մաղազիբերդ»), այն տեղադրելով Շիրակում, Անիից 4 կմ հարավ (ՀՍՀ, Երեւան, 1981, հ. 7, էջ 189), իսկ Ծառաքարը չի նշում: Հայաստանի եւ հարակից շրջանների տեղանունների բառարանը նույնպես բերդը կոչում է «Մաղասբերդ» (նշում նաեւ անվան այլ տառադարձություններ) եւ ավելացնում՝ «13-րդ դ. կոչվել է նաեւ Ծակքար» (Թ. Հակոբյան, Ստ. Մելիք-Բախչյան, Հ. Բարսեղյան, Հայաստանի եւ հարակից շրջանների տեղանունների բառարան, հ. 3, Երեւան, 1991, էջ 659): Իսկ Ծառաքարը նույն բառարանը համարում է վանք՝ «Այրարատ աշխարհի, ըստ ոմանց՝ Գաբեղյանք գավառում, հավանաբար Կեչրոր ավանի մոտ, ըստ այլոց՝ Շիրակի գավառում, Անիի մոտ» (Թ. Հակոբյան, Ստ. Մելիք-Բախչյան, Հ. Բարսեղյան, Հայաստանի եւ հարակից շրջանների տեղանունների բառարան, հ. 2, Երեւան, 1988, էջ 843):

դռան ի վերա բերդ եւ անունն Մաղասբերդ եւ բերդին անունն Ծարքար»⁹: Մեջբերումից հետո Մ. Յովհաննեսյանը գրում է. «Թէ ինչ ըսել կուզէ յիշատակագիրը մէջբերուած հատուածին մէջ՝ տարտամ կը մնայ, արդեօք ըսել կուզէ Անիի մօտ բերդ մը կար՝ որ Մաղասբերդն էր եւ այս բերդը կը կոչուէր Ծարքար, որով կը նոյնացնէ Մաղասբերդը Ծառաքար բերդին հետ, կը մնայ ստուգելի»¹⁰: Հեղինակը ճիշտ է հասկացել հիշատակագրին, որը հետագայի ընթերցողներին թուրիմացությունից զերծ պահելու համար հատուկ նշել է բերդի երկու անունները: Բազմաթիվ հարակից տվյալներ նույնպես խոսում են Մաղասբերդի եւ Ծառաքարի նույնության մասին:

Անիի 11-12-րդ դարերի պատմության մեջ կարեւոր դեր է կատարել Ծառաքար անունով հիշատակվող այս բերդը, որն, ինչպես տեսանք, 1222 թ. հիշատակարանում կոչվում է «Անի քաղաքի դռան վրա»¹¹ գտնվող բերդ:

Սամվել Անեցին, որ ընդհանրապես համառոտաբան հեղինակ է, իր Ժամանակագրության մեջ բավականին մանրամասնորեն է պատմում Վեստ Սարգսի շինարարական ձեռնարկների մասին, նախ Խժկոնքում, ապա՝ Ծառաքարում: Նա գրում է. «ՆՅԳ (1024) Մեծապատիւ Վեստն Սարգիս՝ զկնի բազում շինուածոց բերդից եւ եկեղեցեաց զիրաշալի վանս գեցկունս շինեաց, պայծառ պսակաւ զարդարեալ զսուրբ քաւարանն՝ որ ճանաչի անուն սրբոյն Սարգսի: ՆՅԷ (1028) Նաեւ **զԾառաքար վանքն՝ բերդ արարեալ** վեստն Սարգիս եւ պարսպեալ հաստահեղոյս կրով՝ բրգունս ձուլածոյս, յորում եւ ընդ սրբոյ խորանարդ տաճարին կանգնելոյ յանուն սուրբ Գեոր-

⁹ Հայերեն ձեռագրերի հիշատակարաններ, ԺԳ դար (կազմեց՝ Ա. Մաթեոսյան), Երեւան, 1984, էջ 131: Այս եւ հաջորդ մեջբերումներում կատարված ընդգծումները մերն են, Կ. Մ.:

¹⁰ Մ. Յովհաննեսյան, Հայաստանի բերդերը, Վենետիկ, 1970, էջ 643:

¹¹ Այս արտահայտությունը համեմատելի է Անիի մերձակա Արջո Առիճի վանքին տրված բնութագրումին՝ «...ուխտիս Արջուառճո, որ ի դրան մայրաքաղաքիս Անոյ...» (Հայերեն ձեռագրերի հիշատակարաններ, ԺԳ դար, էջ 197):

գայ՝ շինե երկուս այլ յարակիցս գմբեթաւորս՝ զսուրբ Յովհաննէս եւ զսուրբ Սեքենոս»¹²։ Սամվել Անեցուց օգտվելով՝ Ծառաքարի մասին տեղեկությունը փոքր-ինչ համառոտված ներկայացնում է նաեւ Կիրակոս Գանձակեցիին¹³։

Այսպիսով, ըստ Սամվել Անեցու Վեստ Սարգիսը բերդ է դարձրել Ծառաքարի վանքը, այն շրջապատել հաստ պարսպով եւ հզոր բուրգերով։ Նկատենք, որ մինչեւ օրս կանգուն եւ հրատարակված տարբեր պատկերներից հայտնի բերդի պարիսպները հենց անհական շրջանի պարսպաշինության դրոշմն են կրում¹⁴։

Սամվել Անեցու վկայությունը գալիս է լույս սփռելու բերդի երկանվանության խնդրի վրա։ Եթե հիմք ընդունենք Անանուն զրուցագրի հաղորդումը Մախագի մասին, որը հավանաբար այս տեղում բյուզանդական ռազմական մի հեմակետ է հաստատել 6-րդ դարի վերջերին, ապա պարզ է, որ դրան հաջորդած արաբական տիրապետության դժնդակ ժամանակներում, երբ Հայաստանում բերդ չի կառուցվել (եղածներն էլ մեծ մասամբ ավերվել են), այն եւս կորցրել է իր ռազմական դերը։ Ժամանակի ընթացքում այստեղ հաստատվել է մի փոքրիկ վանք, որը Ս. Գեւորգ անունով եկեղեցի ուներ։ Ծառաքարը հենց այդ վանքի անունն է։ Հովհաննէս Սմբատի օրոք, Անիի թագավորության մեջ կարելու դեր ունեցող Վեստ Սարգիսը Ծառաքարի վանքը բերդի վերածեց։ Ճիշտ է, պատմիչի հա-

¹² Մատենադարան, ձեռ. թիվ 5619, թերթ 94բ, ձեռ. թիվ 3613, թերթ 60ա, հմմտ. Սամուէլի քահանայի Անեցույ Հաւաքմունք ի գրոց պատմագրաց՝ յաղագս գիւտի ժամանակաց անցելոց մինչեւ ի ներկայս ծայրաքաղ արարեալ, յառաջաբանով, համեմատութեամբ, յաւելուածներով եւ ծանօթութիւններով Արշակ Տէր-Սիքելեանի, Վաղարշապատ, 1893, էջ 106։

¹³ «...Մեծապատիւ Վեստն Սարգիս զկնի բազում շինուածոյ բերդից եւ եկեղեցեաց շինեաց եւ զփառաւոր վանքն զիսցկօնսն եւ զեկեղեցին յանուն սրբոյն Սարգսի, եւ զԾառաքար վանքն բերդ արարեալ՝ պարսպեաց ամրագոյն, եւ եկեղեցիս շինեալ ի նմա փառաւորս»։ Կիրակոս Գանձակեցի, Պատմություն հայոց, աշխատասիրությամբ Կ. Մելիք-Օհանջանյանի, Երեւան, 1961, էջ 89։

¹⁴ Ղ. Ալիշան, Շիրակ, Վենետիկ, 1881, էջ 124։

ղորդմամբ նա այստեղ նաեւ երկու եկեղեցի կառուցեց¹⁵, սակայն կարծում ենք, դրանք փոքրիկ մատուռներ էին, որոնց շնիությանը յուրովի «քողարկվում էր» վանքը ռազմական կառույցի վերափոխելու բուն գործընթացը: Տեղին է հիշել, որ 19-րդ դարի սկզբին Մաղասբերդ այցելած Ն. Սարգիսյանն այստեղ տեսել է «աւերակք երից փոքր մատրանց»¹⁶:

Վեստ Սարգիսը Հովհաննես Սմբատ թագավորի մահվան ժամանակ նրա հոգաբարձուն էր¹⁷: Նրա կինը Կեչառիսի հիմնադիր Գրիգոր Ապիրատ Մագիստրոսի (մահ. 1021) դուստրն էր¹⁸ եւ ուներ երկու եղբայր՝ Ալլջահապ եւ Վասակ, որոնցից երկրորդի սերունդը հետագայում, Շաղդադյան ամիրաների ժամանակ, բարձր դիրք գրավեց Անիում:

Վեստ Սարգսի գործունեության մանրամասները զանց առնելով նկատենք, որ նրա եռանդուն բերդաշինությունը հեռու գնացող նպատակներ էր հետապնդում: Հովհաննես Սմբատի մահից հետո, պատմիչների վկայությամբ, Սարգիսը փորձեց գրավել թագավորական գահը, բայց անհաջողության մատնվեց: Պատմիչները նշում են, որ նա տեր էր մի շարք բերդերի: Անգամ Գագիկ Բ-ի թագադրումից հետո (1042) Սարգիսն իր ձեռքում էր պահում Անիի Ներքին բերդը, այնտեղից հարկադրված անցավ «բերդաքաղաքն Սուրմահի»¹⁹: Վրաց անանուն պատմիչը գրում է, որ Սարգիսը դաշնակցել է

¹⁵ Հետաքրքրական է Վեստ Սարգսի կառուցած մատուռներից մեկի Սուրբ Սեքենոս կոչվելը, որն այդ անունով աղբյուրներից հայտնի միակ եկեղեցին է հայ իրականության մեջ: Մ. Ավգերյանի «Լիակատար վարք եւ վկայաբանութիւնք սրբոց» ընդգրկուն բազմահատորյակի մեջ Սեքենոս անուն չկա: Արդյոք եկեղեցու հայրերից Սերենոսի (Սերինոս) անունն է:

¹⁶ Ն. Սարգիսեան, Տեղագրութիւնք ի Փոքր եւ ի Մեծ Հայս, Վենետիկ, 1864, էջ 125:

¹⁷ Արիստակիսի Լաստիվերցույ Պատմութիւն (աշխատասիրությամբ՝ Կ. Յուզբաշյանի), Երեւան, 1963, էջ 57:

¹⁸ Տե՛ս աստ՝ Գրիգոր Ապիրատ Մագիստրոսը եւ նրա տոհմը 11-րդ դարում:

¹⁹ Արիստակիսի Լաստիվերցույ Պատմութիւն , էջ 58:

Վրաց Բագրատ Դ (1027-1072) թագավորի հետ եւ նրան միացել «Անվո ինն բերդերով, բացի Ամբերդից»²⁰: Կարելի է չտարակուսել, որ Անիի ինը բերդերից մեկն էլ Ծառաքարն էր: Մայրաքաղաքի պաշտպանական համակարգում, հարավային ուղղությամբ, այս բերդին կարելուր դեր է վերապահվել:

Հայտնի չէ, թե Անիի բյուզանդական նվաճումից հետո ինչ է եղել Վեստ Սարգսի հետ: Սակայն հետաքրքիր է, որ հետագայում Ծառաքարն անցել է նրա կնոջ տոհմակիցներին: Վարդան Արեւելցին նշում է, որ 1186 թ. անեցիները մահմեդական ավազակներից գրավեցին Ծառաքար բերդը, որն Անիի Բարսեղ եպիսկոպոսի սեփականությունն էր. «...առին անեցիք զԾառաքար՝ զհայրենիսն տեառն Բարսղի...»²¹: Բարսեղ Բ եպիսկոպոսը, որը Սամվել Անեցու ժամանակակիցն էր, Ծառաքարը, որպես ժառանգական սեփականություն կարող էր ստանալ իր հորից՝ Հասան Մագիստրոսից²², իսկ վերջինիս պապը՝ Վասակը, Վեստ Սարգսի կնոջ եղբայրն էր:

Վերադառնանք Անիի պատմության 12-րդ դարի իրադարձություններին, որտեղ Ծառաքարի դեպքերը հետաքրքիր դրվագ են ներկայացնում: 1064 թ. սելջուկյան գրավումից եւ Շադդադյանների իշխանության տակ անցնելուց որոշ ժամանակ հետո, Մանուչե ամիրայի տիրապետության շրջանում, քաղաքն աստիճանաբար վերականգնվում է: Ապիրատյան տոհմից Վասակի որդի Բարսեղ Ա-ն - Հաղբատուն կաթողիկոս է օծվում (1081), իսկ Մանուչեի գլխավոր զորականներից մեկն է դառնում նրա եղբայր Գրիգորը: Անեցիների դիրքերի ամրապնդումը շարունակվում է նաեւ 12-րդ դարում, երբ խորանում է Շադդադյան ամիրաների ու զորացած Վրաց թագավորության միջեւ քաղաքի համար մղվող պայքարը: 1124-1126 եւ 1161-1164 թթ. քաղաքն անցնում է վրացիներին, բայց նորից վերա-

²⁰ Լ. Մելիքսեթ-բեկ, Վրաց աղբյուրները Հայաստանի եւ հայերի մասին, Խ. Ա, Երեւան, 1934, էջ 205-206:

²¹ Վարդան Արեւելցի, Տիեզերական պատմություն, Երեւան, 2001, էջ 136:

²² Ն. Ակինեան, Ներսէս Լամբրոնացի, Վիեննա, 1956, էջ 394:

դարձվում Շաղաղյաններին: Երրորդ անգամ վրացիները քաղաքին տիրանում են 1174-1176 թթ.: Այս դեպքերի ժամանակ (1160 թվականից մինչև 12-րդ դարի վերջը) քաղաքի ամենաազդեցիկ գործիչներից էր եպիսկոպոս Բարսեղ Բ Անեցին²³:

Հենց այս շրջանում է, որ իրադարձությունների կենտրոնում է հայտնվում Ծառաքարը: Դեպքերի մասին հայտնում է Վարդան Ա-րեւելցին, սակայն կարելի է ենթադրել, որ նրա համար սկզբնաղբյուր է հանդիսացել Մխիթար Անեցու Պատմության այժմ կորած հատվածը, քանի որ Արեւելցին Անիին անդրադառնալիս հիմնականում հենց նրանից է օգտվել: 1177 թ. մի դեպք նկարագրելուց հետո Արեւելցին գրում է. «Ի նոյն աւուրս առաւ Ծառաքար ի գողաց հրամանաւ Ղարաչայ ամիրային Կեչրորոյ, որ վաճառեաց զնա Խզլասլանայ ընդ բազում ոսկոյ. եւ նա բնակեցոյց անդ արս վնասակարս, որք ոչ դադարէին յարենհեղութենէ ի տուէ եւ գիշերի. մինչեւ գքրիստոնեայս ի խաւարային անդունդս ընկղմեալ սովով եւ գարշ հոտով առաջնոց մեռելոցն՝ սպանանէին, որ եւ եօթն կրօնաւորս անուանիս դառնակսկիծ վիրօք ընդ կատակս խաչանիշ հարմամբ դանակաց՝ փողոտէին. որոց պատիւ տօնին խառնեսցի ի տօն մեր Լուսաւորչին Գրիգորի»²⁴:

Խզիլ Արսլանը Գանձակի գործը Ելտկուզ աթաբեկի կրտսեր որդին էր, իսկ Ղարաչան՝ Կեչրորի իշխանության ամիրան: Ինչպես երեւում է, Վրաց պետության մեջ 1176-77 թթ. ծագած ապստամբության²⁵ եւ Անիի շուրջը ստեղծված անկայուն վիճակից օգտվելով՝ Ղարաչան Անիի ամիրայից գրավել է Ծառաքարը եւ վաճառել²⁶:

²³ Տե՛ս Կ. Մաթեոսյան, Անի, Ս. Էջմիածին, 1997, էջ 65-68:

²⁴ Մեջբերման վերջին տողը չկա վենետիկյան հրատարակության մեջ, ուստի վկայակոչում ենք Վարդանի Պատմության մոսկովյան հրատարակությունը՝ Վարդանայ Բարձրբերդեցույ Պատմութիւն տիեզերական, Մոսկուա, 1861, էջ 171:

²⁵ Հ. Մարգարյան, Հյուսիսային Հայաստանի եւ Վրաստանի ԺԲ դարի պատմության մի քանի հարցեր, Երեւան, 1980, էջ 154-161:

²⁶ Հ. Մանանդյան, Երկեր, հ. Գ, Երեւան, 1977, էջ 129-130:

Վարդան Արեւելցին Կեչորիի ամիրային հիշատակում է նաեւ «Գորոզոյ խաչի» պատմության առիթով, գրելով. «Ի վեցհարիւր երեսուն եւ մի (1182) թուին խարաչայն, որ էառ զԾառաքար եւ խորտակեաց կռանաւ զխաչն Գորոզոյ կոչեցեալ, անկեալ ի սիրտ նորա արհաւիրք երկիւղի՝ թողու յանկարծակի գտուն իւր զԿեչոր եւ զՈւխթիսն եւ զամենայն ձորն Երասխայ եւ երթայ կնաւ եւ որդւովք ի Դուին...»²⁷: Այնուհետեւ պատմվում է, թէ ինչպէս զարհուրելի մարդու կերպարանքով իրեն հայտնված խաչի տեսիլքից վախեցած Ղարաչան Դվինից փախչում է Շահ Արմենի մոտ, որը նրան տեղումտեղը սպանում է՝ համաձայն տեսիլքում արված կանխագուշակության:

Վարդան Արեւելցու վերը բերված հատվածը կարելի է հասկանալ այնպես, որ Գորոզոյ խաչը Ծառաքարում էր, սակայն հնարավոր է, որ պատմիչը Ծառաքարի անունը տալիս է ցույց տալու համար, որ Գորոզոյ խաչը ջարդողը նույն մարդն էր, որ գրավեց Ծառաքարը: Իսկ պատմիչի հիշատակած թվականը (1182) Ղարաչայի Դվին գնալու եւ սպանվելու տարին է:

Այսպիսով՝ Կեչորիի չարագործ ամիրան ու խզիլ Արսլանը Ծառաքարը դարձրել էին ավազակային որջ, որն անեցիներին մշտապես անհանգստություն էր պատճառում: Ծառաքարի մահմեդականների կատարած չարագործությունների մեջ ժամանակակիցների վրա հատկապես ցնցող տպավորություն է թողել յոթ հայ հոգեւորականների խոշտանգումն ու դաժան սպանությունը: Ուշագրավ է, որ Ծառաքարում նահատակված հոգեւորականներն անմիջապես համարվել են Հայ եկեղեցու վկաներ եւ Անիում նրանց հիշատակը պահպանելու համար քաղաքի եպիսկոպոսը սահմանվել է այն տոնվել է Ս. Գրիգոր Լուսավորչի տոնի օրը:

²⁷ Վարդան Արեւելցի, էջ 135:

Անեցիներն այլեւս չէին կարող հանդուրժել շուրջ 9 տարի շարունակվող այս վիճակը: Քաղաքի Շադդադյան Սուլթան ամիրայի հետ հայերը լավ հարաբերություններ ունեին²⁸: Եւ ահա 1186-ին, Բագրատունիների անկումից հետո, առաջին անգամ անեցիները սեփական անվտանգությունը պաշտպանելու համար հարձակողական ռազմական գործողություն են ձեռնարկում: Վարդան Արեւելցին գրում է. «Ի վեցհարիւր երեսուն եւ հինգ (1186) թուին առին անեցիք զԾառաքար՝ զհայրենիսն տեառն Բարսղի, յանխնայ կոտորելով զորս անդ, բաց ի կանանց եւ ի մանկանց: Ձոր լուեալ Ալիշէրն ամիրայն Դւնայ ճողէր զմօրուսն եւ սեւ զգեմոյր ի վերայ կնոջն եւ որդեացն որ անդ եւ ի վերայ զօրացն կոտորման եւ ի քրիստոնեից փառաւորիւր սուրբ Երրորդութիւնն»²⁹:

Ինչպես տեսնում ենք անեցիները հաջող ռազմական արշավ են իրականացնում, գրավում դժվարամատչելի բերդը: Դրանով նրանք ոչ միայն չեզոքացնում են ավազակային որջը, այլեւ վերականգնում Բարսեղ եպիսկոպոսի ժառանգական իրավունքը: Կարելի է ենթադրել, որ անեցիների համարձակ ելույթն անակնկալի է բերել բերդապահներին: Վտանգ ակնկալելու դեպքում Դվինի Ալիշեր ամիրան իր ընտանիքը չէր թողնի Ծառաքարում: Ամեն դեպքում, որքան էլ անեցիները չարացած էին եւ անխնա կոտորել են մահմեդական զորքը, բայց խնայել են կանանց ու երեխաներին:

Ծառաքարի հաղթանակն արձանագրվել է նաեւ «Պատմութիւն քաղաքին յԱնույ» երկում, որի կազմողը թեւս օգտվել է Վարդան Արեւելցուց, սակայն եղելությունն ավելի է մանրամասնել, ուստի ավելորդ չենք համարում այն նույնպես վկայակոչել. «ԶՃԼԵ (1186)...ի տոյն թուխս... **հարեան զօրօք քաղաքացիքն յԱնույ եւ զնացին ի վերայ ամուր բերդին, որ Ծարաքար անուանի, որ էր բնիկ սեփական եւ ժառանգութիւն տեառն Բարսղի կաթողիկոսին հարցն եւ եղբարցն, եւ քանդեալ զայն եւ զորս գտին արս՝ կոտորե-**

²⁸ Կ. Մաթեոսյան, Անի, էջ 68:

²⁹ Վարդան Արեւելցի, էջ 136:

ցին, բաց ի կանանց եւ ի տղայոց: Եւ լուեալ զայս Ալիշէր ամիրայն Դվնայ ճողէր զմորուսն եւ սեաւ զգենոյր ի վերայ կնոջն եւ որդւոցն, քանզի ի նոյն բերդին էին կինն եւ որդիքն: Բայց ոչ մեղանչեցին նոցա, այլ միայն զգօրսն կոտորեցին եւ զինչս եւ զկարասիս նոցա յափշտակեցին եւ տիրեցին բերդին եւ օրինեցին զԱստուած, զոր լուեալ այլազգեացն ափշեցան եւ բեկան զօրութիւնք բազկի նոցա եւ ոչ կարէին ճիգ արծակէլ, իսկ քրիստոնեայքն ամենայն այնմ կողմանց աշխարհին լուեալ փառաւորէին զամենասուրբ Երրորդութիւնն»³⁰:

1186-ին Ծառաքարն իրավաբանորեն անցավ Անիի ամիրայությանը, սակայն փաստացի՝ անեցի հայերին: 1198-ի վերջերին, երբ մահացավ Անիի վերջին ամիրա Սուլթանը, քաղաքի դարպասները բացվեցին Ջաքարե ամիրսպասալարի առաջ³¹: Վրաց պետության կազմում ընդգրկված Անին դարձավ Ջաքարեի տիրույթների վարչական կենտրոնը եւ անգամ մոնղոլական նվաճումից հետո (1236) բավական ժամանակ մնաց Ջաքարյան տոհմի ձեռքում:

Ծառաքարի դեպքերին ծանոթանալուց հետո դժվար է տարակուսել, որ բերդն Անիի մերձակայքում էր, ոչ թե Երասխաձորում, կամ քաղաքից տասնյակ կիլոմետրեր հեռու գտնվող մեկ այլ վայրում: Այս մասին շատ ավելի խոսում է 1222 թ. թարգմանված երազահանի հիշատակարանը, որին այժմ ավելի մանրամասն պիտի ծանոթանանք:

Թեպետ երազահանի թարգմանության բնօրինակը չի պահպանվել, սակայն հետագա ընդօրինակություններում (Մատենադարան,

³⁰ Մխիթար Անեցի, Մատենան աշխարհավէպ հանդիսարանաց, աշխատասիրությամբ Դ. Մարգարյանի (հավելված), Երեւան, 1983, էջ 109-110:

³¹ Կ. Մաթեւոսյան, Անիում Ջաքարյանների հաստատման ժամանակն ըստ նորահայտ հիշատակարանի, «Պատմա-բանասիրական հանդես», 1997, թիվ 1, էջ 280-283, Ա. Շահնազարյան, Ջաքարյանների ազատամարտի առաջին փուլը, ԶԳ ԳԱԱ պատմության ինստիտուտ, Հայոց պատմության հարցեր, գիտական հոդվածների ժողովածու, թիվ 6, Երեւան, 2005, էջ 140-147:

ծեռ. թիվ 695, գրված 1664 թ. Ձեյթունում եւ Վիեննայի Մխիթարյան-ների մատենադարան, ծեռ. թիվ 88, գրված 17-րդ դարի կեսերին Տրապիզոնում) արտագրվել է ձեռագրի հիշատակարանը, որտեղ մասնավորապես ասվում է. «Ձայս երազահանս ի տաճիկ յարապ գրէ ի հայ գիր մեկնեալ **Առաքել** իմաստասէր արեղայն, որ մակա-նուն **Վառ** ասեն, եւ **Մխիթար Կլելկանց** եւ **Շերանն**, ի **յԱնի** քաղաքին դռան ի վերա բերդ եւ անունն **Մաղասերդ** եւ բերդին անունն **Ծար-քար**: Ի յայն բերդին զընտանն մեծ մարդ մի կայր տաճկաց, եւ այս գիրս ի հետ յայն զընտանին եւ յայս Գ(3) հոգիս փոխել են ՈՅԱ (1222) թվին ի հայ լեզու ի սահմի ամսոյ Գ(3) աւուրն, որ է աւրի-նեալ անգրաւ յաւիտեանս, ամէն»³²:

Վիեննայում պահվող ձեռագրում հիշատակարանը փոքր-ինչ տարբեր է, բերդի անունը չկա, բայց տեղը նշված է «ի յԱնի քաղա-քի մաւտն», իսկ Մխիթարի տոհմանունն ավելի ճիշտ ընդօրինա-կությամբ է՝ Չեչկանց³³: Հիշատակարանում հետաքրքրական է նաեւ Մաղասերդում տաճիկ գերու պահվելու տեղի՝ զնդանի («բերդին զընտանն») հիշատակությունը, որը համեմատելի է Արե-ւելցու վերը նշված տեղեկության հետ, ըստ որի Ծառաքարում քրիստոնյա գերիներին պահում էին «ի խաւարային անդունդս ընկղմեալ»: Սա վկայում է, որ Ծառաքար-Մաղասերդում թե մահ-մեղականների եւ թե քրիստոնյաների իշխանության ժամանակ գետնափոր բանտ է գործել: Սակայն ակնառու է այստեղ նետված-ների նկատմամբ եղած վերաբերմունքի տարբերությունը:

Առաքել Անեցի արեղան ամենայն հավանականությամբ Ծառա-քարի վանքի հոգեւոր սպասավորն էր, իսկ Մխիթարն ու Շերանը՝

³² Հայերեն ձեռագրերի հիշատակարաններ, ԺԳ դար, էջ 131:

³³ Նույն տեղում, էջ 131-132: Բագմայրի 1233 թ. մի նվիրատվական արձա-նագրության մեջ նշվում են Չեչկանց տոհմից Ավետեացի որդի Մխի-թարը, որը մեր թարգմանիչն է, նաեւ նրա որդի Վահրամը (Ն. Սարգիս-եան, նշվ. աշխ., էջ 184): «Կլելկանց» սխալ ընդօրինակությունն ըստ երեւոյթին առաջացել է բառասկզբում մեծ գրված փոքրատառ «չ»-ի վերին մասը «կ» եւ ներքին մասը «լ» կարդալու հետեւանքով:

հավանաբար զինվորականներ: Չի բացառվում, որ 1211 թ. Անիի Բեխենց վանքում նկարագարոված «Հաղբատի ավետարանի» լուսանցքներից մեկում պատկերված զինվորական հագուստով երիտասարդ Շերանիկը երազահանի թարգմանիչներից Շերան անվանվածն է: Մանրանկարիչ Մարգարեն նրա պատկերի մոտ մակագրել է. «Շերանիկ քանի գաս, ծուկն բեր»³⁴: Ինչպես երեւում է Ախուրյան գետի ծուկը Անիի Բեխենց վանք տանող երիտասարդ զինվորականը գիր ու գրականության նկատմամբ սեր ունեցող մեկն է եղել եւ անհավանական չէ, որ հենց նա է Ծառաքար-Մաղասբերդի բերդապահ թարգմանիչը (Շերան-Շերանիկը հազվագյուտ անուն է):

Բուն երազահանը կրում է «Թուփառմուլք» կամ «Աղէկախօս» անվանումը: Նրա մեջ պահպանվել են միջին հայերենին բնորոշ բառեր ու արտահայտություններ, նաեւ շուրջ չորս տասնյակ արհեստների անուններ: Ուսումնասիրողներից ոմանք Առաքել Անեցուն են վերագրում նաեւ մեկ այլ աշխարհիկ երկի՝ «Պղնձե քաղաքի պատմության» թարգմանությունը³⁵:

Այսպիսով Անիի երկրորդ ծաղկման շրջանում՝ Ջաքարյանների օրոք Ծառաքար-Մաղասբերդը շարունակում էր մնալ ռազմական ամրություն, բայց նաեւ՝ մշակութային ավանդ թողած կենտրոն: Այդ դերը բերող պահպանել է բավական երկար ժամանակ, որի մասին հայտնի դարձավ բոլորովին վերջերս հայտնաբերված մի քանի հիշատակարանների շնորհիվ:

Մատենադարանի թիվ 3681 մատյանը, որը պարունակում է Սամվել Անեցու ժամանակագրությունը, ընդօրինակվել է Արճեշի Ուռնկար վանքում 1315 թ.: 1343 թվականին Մաղասբերդում այդ ձեռագիրն անցել է Հավուց թառի Նաթանայել եպիսկոպոսին, որի

³⁴ Նույն տեղում, էջ 69: Կ. Մաթեոսյան, Անիի քաղաքացիների դիմանկարները «Հաղբատի Ավետարանի» խորաններում, «Քանքեր Երեւանի համալսարանի», 1984, 3, էջ 162-168:

³⁵ Հ. Մկրտչյան, Առաքել Անեցի թարգմանիչ, «Անի», 1992, թիվ 2, էջ 28-30:

հիշատակարանում նշվում է. «ԶՂԲ (1343) սահմի: Ես նուսստ Նաթ (Նաթանայել – Կ. Մ.) եպ(իսկոպոս) Հայոց թառոյ յոյժ ...ե(ա)լ եւ անմխիթար տրտմե(ա)լ եւ ի լալագին աչալք] ...կացի ի Մաղղսբերդ Զ (6) ամիս եւ յԱստուած հաւատարիմ հո[գե]լոր եղբայրն իմ Ամիրզայն մեծաւ սիրով ընկալաւ զիս եւ քաղցրութեամբ մխիթարեց, Աստուած զինքն մխիթարէ, ամեն» (Մատենադարան, ձեռ. թիվ 3681, թերթ 83բ-84ա)³⁶:

Հավուց թառի վանքի առաջնորդ Նաթանայել եպիսկոպոսը հավանաբար հալածանքների պատճառով, ապաստանել է Մաղասբերդում, իր հոգեւոր եղբայր Ամիրզայի մոտ: Այս մասին նա գրում է այստեղ վեց ամիս մնալուց հետո եւ պատահական չէ, որ հիշատակարանի առաջին բառը ամսանվան հիշատակությունն է՝ «սահմի»: Սա ենթադրել է տալիս, որ նա հենց այդ ժամանակ է ձեռք բերել մատյանը եւ հիշատակագրել իր հետ կատարվածը, նաեւ երախտագիտությամբ հիշատակել Ամիրզային:

Իր բարերարին Նաթանայել եպիսկոպոսը հիշատակում է նաեւ մեկ այլ հիշատակարանում՝ «Քրիստոս Աստուած պահեայ զպարծանաց եղբայրքն **զպարոն Ամիրզայն** եւ **զԹանգուրն** եւ փրկեայ ի չարեաց» (թերթ 45բ): Ամիրզայի պարոն անվանվելը խոսում է նրա մանր ազնվականության դասին պատկանելու մասին: Երրորդ անգամ Ամիրզան եւ նրա ազգականները հիշատակվում են ձեռագրի 93բ-94ա թերթերի թերի պահպանված երկտող հիշատակագրության մեջ. «Քրիստոս Աստուած քում արդ բարեխաւսութեամբ/// յարքայութիւնդ հոգեւոր մաւրն իմ Արագ Խաթունին, որ բազում ար[ար]/// զմեզ ///եայ զԱմիրզայն եւ զՄաղագ Խաթ[ունն]...»: Այս հիշատակագրություններով ուրվագծվում է Ամիրզայի ընտանիքի կազմը: Արագ Խաթունը հավանաբար նրա մայրն էր, որին Նաթա-

³⁶ Ձեռագրի եւ Նաթանայել եպիսկոպոսի կատարած հավելումների մասին տե՛ս Կ. Մաթեոսյան, Հավուց թառի վանքի եւ Ապիրատյան տոհմի պատմության նորահայտ տվյալներ, «Բանբեր Մատենադարանի», 17, Երեւան, 2006, էջ 147-167:

նայելը կարող էր իր հոգեւոր մայրը համարել: Մաղազ Խաթունը պետք է որ Ամիրզայի կինը եղած լինի, իսկ նախորդ հիշատակագրության մեջ նշվում է Ամիրզայի եղբայրը՝ Թանգուբը: Այս ընտանիքը բնակվում էր Մաղասբերդում, ուր եւ իր գիրկն էր առել տարագիր Նաթանայել Հավուցթառեցուն:

14-րդ դարի 40-ական թվականներին Անին տակավին պատկանում էր մոնղոլների գերիշխանությունն ընդունած Ջաքարյաններին³⁷: Ավելացնենք, որ մշտապես Անիի հետ սերտ կապ ունեցող Մաղասբերդի մասին 1222 թվականից հետո, մինչեւ 17-րդ դարը, այլ տեղեկություն հայտնի չէր, եւ Նաթանայելի հիշատակարանը մասամբ լրացնում է այդ բացը:

Ձեռագրում կան նույն շրջանի իրադարձություններին վերաբերող եւ պատմական գործիչների անուններ պահպանած, սակայն ցավոք խիստ մաշված այլ հիշատակագրություններ: Թեեւ դրանք կցկտուր տեղեկություններ են պարունակում, սակայն հարակից այլ նյութերի համադրումով հնարավոր է դառնում ուրվագծել Անիի շրջանում եւ բուն Մաղասբերդում 14-րդ դարի 40-ական թվականներին ստեղծված իրավիճակը: Նախ ներկայացնենք հիշատակագրությունները:

«Աստուած լոյս արայ խաւարն, որ/// բազում զորաւք եկն ի վերայ **բերդիս Մաղասայ**///» (92բ): Հիշատակագրության մեջ նշվում է Մաղասբերդի նկատմամբ ձեռնարկված ինչ-որ հարձակման մասին:

«///աց սրբոցն միջնորդութեամբ ազա[տեա՞] **[զՇրվ]անշահն** ի յանաւրի[նաց] (4ա):

«///այ զպարոն **Թամարն** եւ **զՇրվանշահն** ի ձեռա/// եւ ժառանգե-

³⁷ Վահրամ Ջաքարյանի, Շահնշահ Գ-ի, ինչպես նաեւ Անիում նրանց նշանակած պաշտոնյա Գրիգոր Խուցեսի ու նրա որդիներ Ասիլի եւ Պարոնի գործունեության մասին պահպանված մի շարք տվյալներ վկայում են, որ քաղաքն այդ շրջանում համեմատաբար բարվոք վիճակում էր գտնվում: Հ. Մանանդյան, նշվ. աշխ., էջ 343, Կ. Մաթեւոսյան, Անի, էջ 331, 364-365:

ցայ գտունս հայրենի: Ամեն» (5ա):

«(Քրիստոս) որդի Աստուծոյ, Աստուած ճշմարիտ, սուրբ Աստուածածնիդ միջնորդութեամբ եւ քո ///ած խաչիդ եւ սուրբ ամենափրկչիդ եւ սուրբ/// (114բ), **[զ]Շահան[շ]ահ եւ զՇրվանշահ** յանաւրինացն չարեն/// եա եւ հաստատեա///» (115ա)³⁸:

Վերջին երեք հիշատակագրությունները հնարավոր է, որ գրվել են Հավուց թառում, քանի որ հատկապես վերջին հատվածում նշված Ամենափրկիչը այն նշանավոր փայտյա քանդակագործ խաչն է, որն այդ վանքի գլխավոր սրբությունն էր (այժմ պահվում է Ս. Էջմիածնում): Հիշատակագրություններում նշված Շրվանշահը Անիում իշխած վերջին Ջաքարյան իշխանի՝ Շահնշահ Գ-ի եղբայրն էր: «Բագմայրի ավետարանի» 14-րդ դարի մի հիշատակարանի գրիչը խնդրում է հիշել «...աթապակ **Շահանշահին** եւ եղբար իւրոյ պարոն **Շրվանշահի...**»³⁹:

Շահնշահ Գ-ը «տաճկաց զորքի» հարձակման պատճառով մազապուրծ փախել է Անիից, ինչպես այդ մասին վկայում է 1357 թ. Անիում գրված մի հիշատակարան, որտեղ խոսվում է դրանից որոշ ժամանակ առաջ տեղի ունեցած դեպքերի մասին. «...զօրքն տաճկաց բազմացեալ ամբոխիւք հասին **գաւառն քաղաքին Անոյ**: Եւ զաղետս եւ զոր ինչ արարին ի վանս եւ ի գեաւղս եւ ի գաւառիս ո՞ր բերան պատմէ կամ ո՞ր լեզու խօսի, քանզի անխնայապէս զործեցին զհլրեանց չարիս ի հաւատացեալս Սուրբ Երրորդութեանն... Եւ զորս ըմբռնեալ տանէին գերիս՝ բանդից եւ տանջանաց մատնեալ: ...Որոց գլուխ **աթապակ եւ մեծ սպասաւար Շահնշահ, որ հազիւ**

³⁸ Ձեռագրում եղած հիշատակագրությունները եւ Նաթանայելի հավելումները տե՛ս Կ. Մաթեոսյան, Սամվել Անեցու ժամանակագրության ձեռագրերը եւ նորահայտ լրացումները, Երեւան, 2009, էջ 129-142:

³⁹ Գ. Յովսեփեան, Յիշատակարանք ձեռագրաց, Անթիլիաս, 1951, էջ 891, Գ. Հովսեփյան, Հավուց Թառի ամենափրկիչը եւ նույնանուն հուշարձաններ հայ արվեստի մեջ, Նյութեր եւ ուսումնասիրություններ հայ արվեստի պատմության, հ. Բ, Երեւան, 1987, էջ 29:

կարաց զերծանիլ ի ձեռաց թշնամեացն»⁴⁰: Հավանաբար նույն դեպքերն են ակնարկվում Հովհաննավանքի մի անթվական արձանագրության մեջ: Գրիգորի որդի Ամսայջանը գրում է. «...հեց ելաւ **պար(ոնաց) ձեռնէ զերկիրս առին**, ես չբաժանեցայ ի ծառայութեանէ: Աստուած պարոնացն աջողում էրետ երկիրս էրեկ, Ռհանայվանք ինձ տվին հերէնիք...»⁴¹: Ապա նշում է Հովհաննավանքում իր բարեգործությունները՝ կատարված «...վասն արեւշատութեան պարոնաց մերոց եւ պարոն **աթապակ Շահանշահի եւ Շրվանշահի»⁴²**:

Ինչպես տեսնում ենք Անիի հիշատակարանի եւ Հովհաննավանքի արձանագրության տվյալներն ընդհանուր եզրեր ունեն Մաղաքերդում պահված ձեռագրի հիշատակագրությունների հետ, ուր հիմնական գործիչը Շրվանշահն է: Կարելի է ենթադրել, որ նա իր եղբոր նման հալածվել է: Հնարավոր է, որ Մաղաքերդը հենց Շրվանշահին էր պատկանում, եւ Նաթանայելի հովանավոր Ամիրզան նրա ենթականերից մեկն էր:

14-րդ դարի 50-ականների սկզբին Ջաքարյանները Մելիք Աշրաֆի (1344-1357) բռնությունների հետեւանքով վերջնականապես կորցրեցին Անին, հավանորեն նաեւ Մաղաքերդը: Նաթանայել Հավուցթառեցու 1343 թվականի հիշատակարանը վկայում է, որ այդ ժամանակ բերդը դեռեւս հայերի ձեռքին էր:

16-րդ դարի սկզբին Մաղաքերդը հիշատակվում է մի վրացական փաստաթղթում, որը վերաբերում է «Սամցխե-սաթաբագոյի» հոգեւոր պետերին⁴³: 17-րդ դարում բերդի՝ որպէս գործող կենտրոնի մասին պատմում է Ջաքարիա Քանաքեռցին (1627-1699): Այն բնակեցված է եղել ընդհուպ մինչեւ 19-րդ դարը⁴⁴:

⁴⁰ Մատենադարան, ձեռ. թիվ 6764, թերթ 264ա, Կ. Մաթեոսյան, Անի, էջ 364:

⁴¹ Կ. Ղաֆադարյան, Հովհաննավանքը եւ նրա արձանագրությունները, Երեւան, 1948, էջ 101:

⁴² Նույն տեղում:


⁴³ Վրացական իրավունքի հուշարձաններ, հ. 3, Թբիլիսի, 1970, էջ 245 (վրացերեն):

⁴⁴ Թ. Թորամանյան, նշվ. աշխ., էջ 311-312:

Ծառաքար-Մաղասբերդը որպես հնավայր քիչ է ուսումնասիրվել: Վերջին տասնամյակներին թուրքական իշխանությունները բերդի շրջանը համարել են փակ գոտի: Այնուամենայնիվ 2005 թ. այստեղ ուսումնասիրություն են կատարել ֆրանսիացի հետազոտողները, որոնք տիեզերքից կատարված լուսանկարների միջոցով պարզել են, որ բուն բերդի մոտ հնուն եղել է նաեւ բավական մի մեծ բնակավայր: Տեղում հետազոտությունը շարունակելով՝ նրանք Մաղասբերդից մոտավորապես 350 մ հարավ-արեւմուտք հայտնաբերել են շուրջ 800 մ երկարությամբ եւ 150 մ լայնությամբ տարածք ընդգրկող բնակավայրի հետքեր, որը նրանք կոչում են քաղաք (տե՛ս հատակագիծը): Ֆրանսիացի հետազոտողներն անդրադարձել են նաեւ Մաղասբերդի պատմությանը, կատարել չափագրումներ, հրապարակել են իրենց կատարած լուսանկարները⁴⁵:

Ամփոփելով կարող ենք ասել, որ 6-րդ դարի վերջերին հիմնված բյուզանդական զինվորական հենակետը, որ թերեւս հիմնադրի անունով կոչվել է Մաղասբերդ, հետագայում, արաբական տիրապետության ժամանակ, լքվել ու վեր է ածվել փոքրիկ վանքի, որը Ծառաքար անունն է կրել: Բագրատունյաց շրջանում գնահատելով Ծառաքարի վանքի ռազամվարական դիրքը՝ Վեստ Սարգիսն այն կրկին դարձրել է բերդ, կառուցել հզոր պարիսպներ եւ բուրգեր: Հետագայում այն դարձել է Վեստ Սարգսի կնոջ տոհմակիցների՝ Հասանյանների սեփականությունը: Շուրջ 1177 թ. Ծառաքարը գրավել է Կեչրորի ամիրան, բերդում հաստատվածները զբաղվել են ավազակությամբ: 1186-ին անեցիները զինված հարձակմամբ ազատագրել են Ծառաքարը: Հետագայում բերդն անցել է Զաքարյաններին, որոնց տիրապետության տակ է մնացել մինչեւ 14-րդ դարի 50-ական թվականները:

⁴⁵ P. Dangles, N. Prouteau, Observations sur quelques fortresses de la région d'Ani, "Revue des études Arméniennes, Tome 30, Paris 2005-2007, p. 273-299.



Ծառաքար-Մաղասերդը հետք է թողել նաեւ գրավոր մշակույթի ասպարեզում: 1222 թ. այստեղ Առաքել Ամեցի արեղան, իր երկու համաքաղաքացիների՝ Չեչկանց Մխիթարի ու Շերանի հետ արաբերենից հայերեն են թարգմանել մի երազահան: 1343 թ. Մաղասերդում հիշատակարան է գրել Հավուց թառի վանքի առաջնորդ Նաթանայել եպիսկոպոսը, որն ապաստանել էր բերդաբնակ իր բարեկամ պարոն Ամիրզայի մոտ:

ԴՎԻՆ-ԱՆԻ ՃԱՆԱՊԱՐՅԻ ԱՐՈՒՃ ԵՒ ԹԱԼԻՆ ՀԱՆԳՐՎԱՆՆԵՐԸ

Բագրատունյաց Հայաստանում արագորեն ծաղկած խոշոր քաղաքների՝ Անիի, Դվինի, Կարսի, Արծնի կողքին վերելք ապրեցին մի ամբողջ շարք գյուղաքաղաքներ եւ ավաններ: Դրանց թվում էին Արուճ եւ Թալին հնագույն բնակավայրերը, որոնք գտնվելով Անիի Բագրատունյաց թագավորության կազմում, անմասն չէին սկսված ազգային-պետական զարթոնքից եւ տնտեսական որոշակի դեր ունեին թագավորության մեջ: Անեցիների համար այս բնակավայրերը հատկապես մեծ արժեք էին ներկայացնում բազմաթիվ բերքատու այգիների ու մրգաստանների շնորհիվ, ինչից հիմնականում զուրկ էր Շիրակը:

Թալինն ու Արուճը գտնվում էին Անին երկրի հարավարեւելյան շրջանների հետ կապող եւ մասնավորապես Դվին տանող գլխավոր ճանապարհի վրա, որն ուղղակիորեն նպաստում էր բնակավայրերի տնտեսական շփումների ընդլայնմանը՝ հնարավորություն ընձեռելով մասնակից լինել տարանցիկ առեւտրին: Տեղի քարավանատների հնարավորությունների ու շինարարական արվեստի մասին Թ. Թորամանյանը գրում է. «Թալինի եւ Թալիշի (իմա՝ Արուճի – Կ. Մ.) մոտերը կան այնպիսի հսկայական իջեւաններ, որոնց մեջ կարող էին պատսպարվել հարյուրավոր մարդիկ եւ հարյուրավոր անասուններ, սայլեր եւ այլն: Այս իջեւանները եւս շինված են այնպիսի խնամքով եւ սրբատաշ քարերով, ինչպես շինված են արքայական, իշխանական պալատները»¹:

Արուճի եւ Թալինի պատմական զուգահեռները սկսվում են 7-րդ դարից, երբ այս բնակավայրերը հաջորդաբար դարձան Հայոց իշխան տիտղոսը կրող եւ Հայաստանի փաստական կառավարումն իրականացնող իշխանների նստավայր՝ Արուճը՝ Գրիգոր Մամիկոնյանի (661-685), Թալինը՝ Ներսեհ Կամսարականի (688-692) հա-

¹ Թ. Թորամանյան, Նյութեր հայկական ճարտարապետության պատմության, աշխ. երկրորդ ժողովածու, Երեւան, 1948, էջ 36:

մար: Արուճի եւ Թալինի իշխանանիստ կենտրոն դառնալը նշանավորվեց նախ եւ առաջ այդ բնակավայրերում ընդարձակ շինարարության ծավալմամբ: Գրիգոր Մամիկոնյանի՝ Արուճում կատարած շինարարության մասին պատմում է կաթողիկոս Յովհաննես Դրասխանակերտցին նշելով «չքնաղագեղ եկեղեցու», «արքունիքի» (պալատ) ինչպես նաեւ «հաստահեղոյս քարամբք եւ կրով» բնակավայրը պարսպապատելու մասին²: Այդ կառույցների մի մասն ավերակ է³, իսկ մեծադիր Կաթողիկե եկեղեցին (գրականության մեջ Ս. Գրիգոր անվանված)⁴, թեւ երկրաշարժի հետեւանքով զրկվել է զմբեթից, բայց կանգուն է, եւ մեծապես պահպանել է իր վեհաշուք տեսքը:

Թալինում Ներսեհ Կամսարականը երկու եկեղեցի է կառուցել, մեկը՝ մինչեւ Յայոց իշխան տիտղոսն ստանալը՝ Ս. Աստվածածին

² Յովհաննես կաթողիկոս Դրասխանակերտցի, Պատմութիւն Յայոց, աշխարհաբար թարգմանությունը եւ ծանոթագրությունները Գ. Թոսունյանի, Երեւան, 1996, էջ 94:

³ Արուճի իշխանաշեն պալատից արեւելք պահպանվել են բնակավայրի հին եռանավ բազիլիկ եկեղեցու ավերակները, որոնք 1950-ական թթ. կատարված պեղումների ժամանակ համարվել են պալատի մի մասը: Սակայն 2006 թ. լրացուցիչ պեղումների շնորհիվ հաստատվեց կառույցի բազիլիկ եկեղեցի լինելու փաստը (Կ. Մաթեոսյան, Պատմաշակութային նորաբաց էջեր, «Յայ արվեստ», 2006, N 4, էջ 34-36):

⁴ 20-րդ դարի սկզբին Արուճի տաճարին անդրադարձող հեղինակներից ոմանք այն կոչել են Ս. Գրիգոր, որը հետո. լայն տարածում է գտել: Սինչդեռ տաճարի հիմնարկերի արձանագրության մեջ Գրիգոր Մամիկոնյանն այն անվանում է Կաթողիկե՝ «ՅԻՄՆԱՐԿԵՑԱԻ ՍՈՒՐԲ ԿԱԹՈՂԻԿԵՍ» (Կ. Մաթեոսյան, Արուճ, Երեւան, 1987, էջ 54): Հաջորդ անգամ Արուճի եկեղեցին Կաթողիկե է անվանվում շինության 973 թ. նորոգման արձանագրության մեջ (նույն տեղում, էջ 60): Արուճի տաճարը Կաթողիկե են անվանում նաեւ պատմիչները՝ Ստեփանոս Տարոնեցի Ասողիկը, Սամվել Անեցին, Մխիթար Անեցին, Վարդան Արեւելցին, Կիրակոս Գանձակեցին: Եկեղեցիներին տրվող «Կաթողիկե» անունն ունի երկու նշանակություն՝ զմբեթավոր եւ գլխավոր (ընդհանրական): Այդպես են կոչվել էջմիածնի Մայր տաճարը, Դվինի կաթողիկոսարանի եկեղեցին, Անիի Մայր տաճարը: Արուճի տաճարն այսուհետեւ պետք է կոչել **Կաթողիկե**, ինչպես որ անվանված է եկեղեցու հիմնարկերի արձանագրության մեջ եւ միջնադարյան այլ սկզբնաղբյուրներում:

փոքր եկեղեցին⁵, մյուսը՝ մեծաշեն եւ շքեղ Կաթողիկե եկեղեցին, Հայոց իշխան դառնալուց հետո⁶:

8-րդ դարի սկզբներից արաբների ճնշումների հետեւանքով ծանր շրջան է սկսվում հայ իշխանական տների, հատկապես բյուզանդական կողմնորոշում ունեցողների համար, որոնցից գլխավորները Մամիկոնյաններն ու Կամսարականներն էին: 772-775 թթ. Մամիկոնյանների առաջնորդած հակաարաբական ապստամբության պարտութունից հետո այս տոհմը կորցրեց իր հիմնական տիրույթները⁷: 8-րդ դ. վերջերին թուլացած Կամսարականներն իրենց

⁵ Արձանագրության մեջ հիշում է նաեւ կնոջը՝ Շուշանին եւ որդուն՝ Հրահատին (տե՛ս Վ. Գրիգորյան, Հայաստանի վաղ միջնադարյան կենտրոնագմբէթ փոքր հուշարձանները, Երեւան, 1982, էջ 20):

⁶ Թալինի Կաթողիկեն չունի շինարարական արձանագրություն, որի պատճառով ուսումնասիրողների մոտ եկեղեցու կառուցման թվականի եւ կառուցողի ինքնության հարցը տարակարծություններ է առաջացրել: Հնարավոր է, որ արձանագրության բացակայության պատճառը Ներսեհի վաղաժամ մահն է եղել: Նա իշխել է չորս տարի, սակայն նման խոշոր կառույցի համար նվազագույնը 5-6 տարի էր անհրաժեշտ: Թալինի Կաթողիկեից առաջ կառուցված Դարույնքի եւ Արուճի իշխանական տաճարները, նաեւ Գարդմանի եկեղեցին, որմնանկարազարդել են տվել կառուցող իշխանները (Ղեւոնդ, Պատմություն, Երեւան 1982, էջ 27, Մովսէս Կաղանկատուացի, Պատմութիւն Աղուանից աշխարհի, Երեւան, 1983, էջ 195-196, Կ. Մաթեոսյան, Արուճ, էջ 52-53): Յոթերորդ դարի արժեքավոր որմնանկարներ ունի նաեւ Թալինի Կաթողիկեն, սակայն դրա վրա պահպանված ներկագիր արձանագրության համաձայն պատկերներն ստեղծվել են Մովսէս եկեղեցապանի պատվերով (Կ. Մաթեոսյան, Արուճի Ս. Գրիգոր եւ Թալինի Կաթողիկե տաճարների որմնանկարները, «Էջմիածին», 1982, Ը-Թ, էջ 70): Դա նշանակում է, որ շինարարության ավարտից հետո, երբ հերթը հասել է նկարազարդմանը, իշխանը ողջ չի եղել: Բայց որ բուն եկեղեցու կառուցողը Ներսեհ Կամսարականն է, չպետք է կասկած հարուցի, քանի որ Կաթողիկեի ծավալն ու շքեղությունն ինքնին խոսում են այդ մասին:

⁷ Այն, որ Արուճն այդ շրջանում է խլվել Մամիկոնյաններից, երեւում է նաեւ տեղի Կաթողիկե եկեղեցու արեւելյան պատի ձախ կողմում փորագրված արաբերեն կարճ արձանագրությունից, որտեղ Հասան իբն Մուհամմադ իբն Իսա ալ-Կալասանին գրել է իր անունը եւ թվականը՝ 786-787 (А. Хачатрян, Корпус арабских надписей Армении, VIII-XVI вв. Ереван, 1987, с. 47.)

տիրույթները վաճառեցին Հայոց իշխան Աշոտ Մսակեր Բագրատունուն⁸:

Բագրատունյաց շրջանում աղբյուրներում «գյուղաքաղաք» անվանվող Արուճն ու Թալինն անմիջականորեն պատկանել են Բագրատունյաց արքունիքին, որի մասին կարելի է դատել որոշ արձանագրություններից: Արուճի Կաթողիկեի պատին հարկ թողնելու մասին արձանագրություն է գրվել Սմբատ Բ Բագրատունու (977-989) անունից: Գագիկ Ա Բագրատունու (989-1017) կինը՝ Կատրամիդե թագուհին, իր արձանագրության համաձայն, սալահատակել է տվել Թալինի Կաթողիկեն⁹: Նրա որդին՝ Հովհաննես Սմբատը (1017-1041) Կաթողիկեի պատին արձանագրություն է թողել եկեղեցուն «Կոստանդեանց» կոչված այգին նվիրելու մասին¹⁰:

Արուճի տնտեսական վերելքը Բագրատունիների օրոք սկսվել էր դեռ 9-րդ դարում: Կաթողիկեի հարավարեւելյան որմնամույթի վրա փորագրված 867 թ. մի ուշագրավ արձանագրություն վերաբերում է ջրի համար Արուճի եւ Կոշի միջեւ ծագած վեճին ու գյուղացիների ընդհարմանը: Արձանագրությունից երեւում է, որ վեճ ու կռվի նախաձեռնողները արուճեցիներն են եղել եւ, վերջին հաշվով, հաղթել ու վերցրել են հարեւան գյուղի ոռոգելի ջրի մի մասը: Հավանաբար այդ ժամանակ Արուճը ընդարձակել էր իր ոռոգելի հողատարածությունները, ինչն էլ մեծացրել էր ջրի պահանջարկը¹¹:

⁸ Ստեփանոսի Տարոնեցոյ Պատմութիւն, էջ 106:

⁹ Ս. Ավագյան, Վիճաբարական պրպտումներ, Երեւան, 1986, էջ 187:

¹⁰ Ղ. Ալիշան, Այրարատ, Վենետիկ, 1890, էջ 139:

¹¹ Ըստ արձանագրության, գործին միջամտել է Բագրատունի Սմբատ սպարապետը: Նրա առաքած վերակացու Գրիգորը վերականգնելով հիշյալ բնակավայրերին հասանելիք ջրի նախնական չափը, արձանագրության վերջում սպառնում է «մահվամբ պատուհասել» ջրաբաշխման սահմանված կարգը խախտողներին: Ավելացնենք, որ Կոշը նույնպես ծաղկուն բնակավայր էր, որը հետագայում Ջաքարե եւ Իվանե Ջաքարյանների հատուկ ուշադրությանն արժանացավ (Վ. Մաթեւոսյան, Կոշավանքը VII-XIV դդ., «Եջմիածին», 1991, Ա-Բ-Գ, էջ 95-108):

Ոռոգման ջրի կարիք ուներ նաեւ Թալիմը: Կաթողիկեի մույթերից մեկի վրա պահպանված 783 թվականի արձանագրությունը վկայում է, որ Ուխտատուր վանականը եւ նրա եղբայր Տուտին ջուր են բերել բնակավայր¹²:

9-13-րդ դարերում Արուճն ու Թալիմը բազմաթիվ մրգատու այգիներով շրջապատված հարուստ բնակավայրեր էին: Նրանց բնակչությունն այդ ժամանակ կազմված էր մեծ մասամբ այգեգործներից, սակայն կարելի է կարծել, որ այնտեղ եղել են նաեւ արհեստավորներ, առետրականներ: Ջաքարիա Սարկավագ Քանաքեռցու մոտ պահպանված մի արժեքավոր վկայությունից իմանում ենք, որ Արուճի եւ Թալիմի բնակչության մեջ եղել են նաեւ ազատներ: Պատմիչը Սանահինի վանքի հին ձեռագրերից մեկից քաղել է Մարմարաշենի Երեմիա վանահորը նվիրված մի պատմություն: Այստեղ նշված է, որ 1033 թ. Հովհաննավանքում մի կարեւոր փաստաթուղթ է կազմվել, որը կնիքով հաստատել են Սոսթենես եւ Գրիգոր վարդապետները, ստորագրել են Վաղթանգ իշխանն ու **«ազատքն Արուճայ եւ Թալնայ...»**¹³:

Արուճը եւ Թալիմը քարավանային ճանապարհի վրա գտնվելով՝ մասնակցել են տարանցիկ առետրին, ունեցել են շուկաներ, որոնք հավանաբար գտնվել են քարավանատների մոտ:

ԱՐՈՒՃԻ ԴՐԱՄԱՓՈԽՈՒԹՅԱՆ ՇՈՒԿԱՆ

Արուճի Կաթողիկե եկեղեցու հարավային պատին պահպանվել է 987 թ. Սմբատ Բ Բագրատունու մի ուշագրավ արձանագրություն, որով նա Արուճում բաժ հարկից ազատում էր շալակավորներին. «ՅԱՆՈՒՆ Ա(ՍՏՈՒԾՈ)Յ, ԻՆՉ ԹՈՒՎԿԱՆ :ՆԼԶ: ԵՍ ՍՍ(Բ)ԱՏ ՇԱՅԱՆ-

¹² Ս. Ավագյան, Վիմագրական պրպտումներ, Երեւան, 1986, էջ, 192, տե՛ս նաեւ Գ. Շախկյան, Հայ ժողովրդի ճարտարապետական-շինարարական գործունեությունը 8-9-րդ դարերում, Երեւան, 2004, էջ 153-155:

¹³ Ջաքարեայ Սարկավագի Պատմագրութիւն, հ. Գ, Վաղարշապատ, 1870, էջ 10 (այս եւ հաջորդ մեջքերումներում ընդգծումները մերն են – Կ. Մ.):

ՇԱՅ ՈՐԴԻ ԱՇՈՏՈ ՇԱՅԱՆՇԱՅԻ ԱԶԱՏԵՑԻ ՎԱՍՆ ԻՄ ՅԱԻՐՆ ՅԱԻԳ-ՈՅՆ ԵՒ ԻՄ ԱՐԵԻՇԱՏՈՒԹԵԱԵՆ ԵՒ ՄԵՂԱՑ ԹԱԻՂՈՒԹԵԱՆ, ԶՇԱԼԱ-ԿԱԻՈՐ Ի ԲԱԺԷ ՇՆՈՐՅԻ(Ի)Ն ԱՍՏՈՒԾՈՅ ԵՒ ԵԹԵ ՈՔ ԻՄ ՎՃՈՒՍ ԴԻՄԱԴԱՐՁ ԼԻՆԻ ՆՁՈՎԵԱԼ ԻՑԷ...»:

Նախկինում ենթադրվել է, որ «շալակավոր» են անվանվել շալակով ապրանքներ փոխադրողները, եւ քանի որ արձանագրության մեջ հիշվում է, թե բաժից ազատվում են միայն շալակավորները, հետեւաբար փոխադրամիջոցներով (սայլ, ձի, ջորի) բերվող ապրանքների դիմաց հակ էր գանձվում, որի համար, ըստ ակադեմիկոս Բ. Առաքելյանի, «Արոււնում, իբրեւ գյուղաքաղաքում, կային հարկ հավաքող պաշտոնյաներ, որոնք բաժ էին գանձում շուկա հանվող մթերքներից»¹⁴:

Ակադեմիկոս Յ. Բարթիկյանն առանձին քննությամբ անդրադարձել է «շալակավոր» բառին, որը երկրորդ անգամ հիշատակվում է Բագարատ Վիսկացու՝ Անիի Մայր տաճարի 1060 թ. արձանագրության մեջ, որտեղ քաղաքի կառավարիչ կատապանը նշելով, որ սայլով եւ գրաստով ապրանք բերող «գինեւոր անեցին» բաժից ազատվում է, ավելացնում է. «եւ շալակաւոր անեցի բամբենցավ բաժին կէսն ազատ է»¹⁵: Նրա կարծիքով «շալակ» արմատն այս երկու դեպքում էլ օգտագործված է «մախաղ, պարկ, տոպրակ» իմաստով. «շալակաւոր՝ նշանակում է քսակաւոր...: «Շալակաւոր»-ը օգտագործվել է հունարեն «սակկուլարիոս» իմաստով, որի բառացի թարգմանությունն է»¹⁶: Վերջիններս սեղանավորների, լունայա-

¹⁴ Բ. Առաքելյան, Քաղաքները եւ արհեստները Յայաստանում, 9-13-րդ դդ. հ. Ա, Երեւան, 1958, էջ 86:

¹⁵ Դիվան հայ վիմագրության, պր. Ա, էջ 37: Պ. Մուրադյանն անդրադառնալով այստեղ անհասկանալի համարված «բամբենցավ» բառին, այն սրբագրելով «բամբենցավ», թարգմանում է «արդարությամբ» (Պ. Մուրադյան, Բնագրագիտական դիտարկումներ, «Պատմա-բանասիրական հանդես», 1994, 1-2, էջ 177):

¹⁶ Յ. Բարթիկյան, Բագրատունյաց Յայաստանի արհեստներից (Շալակաւոր՝ բեռնակիր, թե՞ բանկիր), Պատմա-բանասիրական հանդես, 1992, N 2-3, էջ 158:

փոխների կարգին պատկանող մարդիկ էին, որ զբաղվում էին դրամափոխությամբ եւ դրամական գործարքներով: «Շալակավորի» սույն բացատրությունն ընդունելով Պ. Մուրադյանը գրում է. «Տուր եւ առի այս նշանավոր կենտրոնատեղին (Անին - Կ. Մ.) բնականաբար պիտի ունենար «սեղանավորի», «լուսնայափոխի» եկամտաբեր զբաղմունքով պարապող մարդիկ, որ այժմ ճանաչելի են դառնում «շալակավորի» վերծանմամբ»¹⁷:

«Շալակավորի» հիշատակումն Արուճում, ընդ որում Անիի արծանագրությունից 73 տարի առաջ, վկայում է այստեղ առետրական կենտրոնի առկայության եւ մշտապես կատարվող դրամական գործարքների կամ դրամափոխության մասին, այլապես կարիք չէր լինի քսակավոր-դրամափոխներին հարկից ազատել թագավորական հատուկ հրամանով: Այնուամենայնիվ, ակներեւ է, որ Արուճը, որպես առետրական կենտրոն, չէր կարող համեմատվել Անիի կամ մեկ այլ խոշոր քաղաքի հետ, եւ հարց է ծագում, թե 10-րդ դարի 80-ական թվականներին ինչ գործ ունեին շալակավոր-դրամափոխներն այստեղ, որոնք եթե փոքրաթիվ լինեին, դժվար թե Բագրատունի թագավորի ուշադրությանն ու բարեհաճությանն արժանանային:

Մեր կարծիքով, Արուճում քսակավորների հայտնվելը պայմանավորված էր բնակավայրի աշխարհագրական դիրքով: Գտնվելով Դվին-Անի առետրական մայրուղու կենտրոնական մասում, Արուճը միայն քարավանային կանգառ չէր: Եթե Անիի ուղղությամբ հաջորդ քարավանատունը գտնվում էր Թալինում¹⁸, ապա Դվինի ուղղությամբ այլ քարավանատուն հայտնի չէ (հնարավոր է, որ առետրական հաջորդ հանգրվանը Վաղարշապատի մոտ եղած լինի) եւ, փաստորեն **Արուճը Արարատյան դաշտավայրից դեպի Շիրակ անցնող քարավանային ճանապարհի յուրօրինակ անցումային կե-**

¹⁷ Պ. Մուրադյան, Բնագրագիտական դիտարկումներ, էջ 176:

¹⁸ Հեռավորությունը Թալինի քարավանատնից մինչեւ Արուճի քարավանատուն այժմյան ճանապարհով կազմում է 24 կմ, իսկ հինում, նկատի ունենալով ճանապարհի ոլորանները, կարող էր կազմել մոտավորապես 30 կմ:

տի դեր է կատարել: Անին ու Դվինը նաեւ տարբեր քաղաքական միավորներ էին ներկայացնում: Դվինը գտնվում էր մահմեդական իշխողների՝ Դալլամցիների (դելմիկների), ապա Շադդադյանների ձեռքին¹⁹: Հետեւաբար Արուճը, որոշ իմաստով, առեւտրական անցակետի դեր ուներ, որտեղ, հավանաբար, երկու կողմից եկող առեւտրականները կատարում էին նախնական դրամափոխությունը, հետագա գործարքները դյուրությամբ իրականացնելու համար:

Հիշյալ ժամանակաշրջանում դրամափոխության գործի ծավալմանը կարող էր նպաստել դրամական շրջանառության ոլորտում տեղի ունեցած էական փոփոխությունը: Դրամագետ Խ. Մուշեղյանը նշում է. «10-րդ դարի վերջերին եւ հատկապես 11-րդ դարի սկզբից փոխվել էր Հայաստանի դրամական շրջանառության կազմը: Նախ արծաթե դրամների թարմ հոսքը նվազել էր, եւ նոր թողարկված արծաթ դրամները այլեւս չունեին արծաթի պարունակության նախկին բարձր որակը... Պղնձի խառնուրդով ցածրորակ արծաթ դրամները թողարկում էին Շադդադյանները 951-1096 թթ., որոնք 11-րդ դարում տեր էին դարձել Դվին եւ Գանձակ քաղաքներին...»²⁰: Հասկանալի է, որ առեւտրական ուղիներով իրականացվող դրամական հոսքերը եւ դրամական տարարժեք միավորները պիտի համապատասխանեցվեին տեղական շուկայի պահանջներին եւ այստեղ է, որ անելիք ունեին քսակավոր-դրամափոխները:

Այսպիսով, Արուճի տաճարի պատին Սմբատ Բ Բագրատունու թողած 987 թ. արձանագրության մեջ առկա «չալակաւոր» բառի նոր բացատրության շնորհիվ կարող ենք ասել, որ հիշյալ շրջանում այստեղ եղել է դրամափոխության շուկա (արդի «տարադրամի փոխանակման» վայրերի նախատիպը), եւ այդ գործը կատարող մարդիկ, որոնք մինչ այդ հարկ են վճարել, Սմբատ Բ թագավորի վճռով ազատվել են հարկից: Թագավորի այս քայլը (ինչպես եւ ավելի ուշ՝

¹⁹ Ա. Տեր-Ղեւոնդյան, Արաբական ամիրայությունները Բագրատունյաց Հայաստանում, Երեւան, 1965, էջ 164-177:

²⁰ Հայ ժողովրդի պատմություն, հ. 3, Երեւան, 1976, էջ 223-224:

Անհիում՝ Բագարատ Վիսկացու կողմից շալակավորների հարկի կիսով չափ կրճատումը) սոսկ բարեգործություն չէր: Մեր կարծիքով, Բագարատունի թագավորն արձակել է վերոնշյալ հրամանը (նկատենք՝ իր գահակալության 10-ամյակին) վաճառաշահ Անիին եկամուտ բերող առևտրականների գործը հեշտացնելու եւ դեպի մայրաքաղաք եկող ճանապարհը հրապուրիչ դարձնելու համար: Տեղին է հիշել, որ Անիի Մայր տաճարի շինարարությունը սկսած Սմբատ Բ թագավորը նախապես Յնդկաստանից բերել էր տվել «մեկ բյուր գանձով» գնած մի մեծ բյուրեղապակյա ջահ²¹: Այսինքն, թագավորը շատ լավ գիտակցում էր վաճառականության արժեքը: Յնարավոր է, որ առևտրական գործին նպաստելու նպատակով եւ արքունիքի խրախուսմամբ են կառուցվել նաեւ Անի եկող ճանապարհների քարավանատները:

Արուճի առևտրական եւ դրամական շրջանառության կենտրոն լինելը հաստատվում է նաեւ տեղում ուշագրավ դրամական գտածոներով, որոնց մեջ կան բյուզանդական, արաբական, «իլդեգիզյան», վրացական եւ այլ մետաղադրամներ²²: Դրանց մեջ մեծ թիվ են կազմում Քրիստոսի պատկերով բյուզանդական պղնձե դրամները (10-11-րդ դդ.), որոնք առաջնակարգ տեղ էին գրավում հայկական շուկայում: Յնարավոր է, որ այդ դրամների մի մասը հատվում էին Անի քաղաքում²³: Յետաքրքրական են նաեւ Արուճում

²¹ Մատթեոս Ուռհայեցի, Ժամանակագրություն (աշխարհաբար թարգմանությունը եւ ծանոթագրությունները Յ. Բարթիկյանի), Երեւան, 1991, էջ 162-163:

²² Արուճում գտնվել են այսպես կոչված «իլդեգիզյան» դրամներ՝ թողարկված Շենս ադ-դին Իլդեգիզի (1136-1173), Կըզըլ Արսլանի (1186-1191), Աբու-Բաքրի (1191-1211) անունով, նաեւ մի պղնձե դրամ, հատված Վրաց Թամար թագուհու եւ նրա ամուսին Դավիթ Սոսլանի անունով: Արուճում տարբեր տարիների գտնված 17 դրամից բաղկացած մի հավաքածու (8 «իլդեգիզյան», 7 բյուզանդական, 1 վրացական, 1 պարսկական) մենք 2008 թ. նվիրել ենք Յայաստանի պատմության պետական թանգարանին:

²³ Խ. Սուշեղյան, Դրամական շրջանառությունը Յայաստանում, Երեւան, 1983, էջ 216:

գտնված տարբեր ժամանակաշրջանների վերաբերող մահմեդական դրամները²⁴:

Հատկանշական է, որ արուճեցիներից ոմանք նյութական բավական խոշոր միջոցների տեր են եղել: Այսպես, 1193 թ. Արուճի ավագերեց Գեորգի թոռ Տրդատ քահանան գնել է Անիում երբեմնի զորեղ իշխան Ապլարիք Պահլավունու կառուցած Ս. Փրկչի եկեղեցին, նորոգել այն, իսկ արձանագրության մեջ նշում է. «...շինեցաք վերըստին **գմեր զանձագին հայրենիքս զՍուրբ Փրկիչս** շատ աշխատութեամբ եւ նորոգեցաք յառաջին պայծառութիւնն... շինեցաք սմա ժամանտունս...»²⁵: Իր մասին Տրդատը գրում է. «Ես Տրդատ քահանա, որդի Սոսթենէ քահանայի, թոռն Գեորգա աւագերիցո Արծոյ...»: Վիմագիր արձանագրություններում քիչ են դեպքերը, երբ հեղինակը (մանավանդ ոչ ազնվական) հիշատակում է նաեւ պապին, այն էլ նման մանրամասներով (Արուճի ավագերեց): Հարցը պարզվում է, երբ ծանոթանում ենք Տրդատի՝ Ս. Փրկիչ եկեղեցուն տված նվիրատվություններին, որից երեւում է, որ նրա կարողությունը ծագում էր արուճեցի պապից: Արձանագրության մեջ նշվում են եկեղեցուն տրված նվիրատվությունները՝ Արուճում գտնվող չորս այգի (Սաղար, Շլիկ, Կովարած, Բլար Խաչկա անուններով), մի արտ, տուն, (նաեւ զարդեղեն, սպասք եւ այլն):

Ուշագրավ երեւույթ է Արուճում գտնվող, հատուկ անուններով կոչվող բազմաթիվ այգիների հիշատակությունը Անիի եւ Շիրակի վանքերի վիմագիր արձանագրություններում, այգիներ, որոնք նույնպես առ ու ծախի, կամ նվիրատվության առարկա էին: Անիի ե-

²⁴ Արուճում գտնված մահմեդական դրամներից հատկապես արժեքավոր է Հայաստանի պատմության պետական թանգարանում պահվող 704 թ. Դվինում թողարկված Օմայան արծաթյա դրամը (Ա. Ջոիրաբյան, Դվինում թողարկված Օմայան դիրհեմ գտնված Հայաստանից, Հայկական ԽՍՀ-ում 1987-1988 թթ. դաշտային հնագիտական աշխատանքների արդյունքներին նվիրված գիտական նստաշրջանի զեկուցումների թեզիսներ, Երեւան, 1989, էջ 68):

²⁵ Դիվան հայ վիմագրության, պր. 1, Անի քաղաք, կազմեց Հ. Օրբելի, Երեւան, 1966, էջ 47:

կեղեցիների, Յոռոմոսի ու Յառիճի վանքերի 12-13-րդ դդ. արձանագրություններում պահպանվել է Արուճում գտնվող 14 այգու անունը²⁶: Հատկանշական է Անիում Տիգրան Յոռոմոսի կառուցած Գրիգոր Լուսավորչի եկեղեցու շինարարական արձանագրության մեջ (1215 թ.) թվարկված այգիների շարքում հիշված Արուճի այգու օրինակը. «...բազում հողեր գնած, այգի Ա (1) յերեսան, այգի Ա (1) յՕշական, այգի Ա (1) (ի) Կոշ էգի Ա (1) յԱրուճ որ Մազոտն կոչի, այգի Ա (1) Մրեն...»²⁷ եւ այլն: Այստեղ նախ Արուճի այգին բարբառային ձեւով անվանված է «էգի», եւ երկրորդ, ի տարբերություն մյուս բնակավայրերի այգիների, շեշտված է Արուճի այգու անունը՝ Մազոտն: Սա վկայում է, որ Արուճի այգիներն իսկապես բազմաքանակ էին եւ որպես կանոն, հատուկ անուններ ունեին:

Բնակավայրի տեղագրության վերաբերյալ հետաքրքիր տվյալ է պարունակում Յառիճի 1196 թ. արձանագրությունը, ուր նշվում է, որ վանքին է նվիրվել Արուճի **Վերին թաղում** գտնվող «Խաչկանց» այգին եւ հնձանը²⁸: Քանի որ Արուճի քարավանատունը գտնվում է բնակավայրից հյուսիս եւ ավելի բարձր դիրքում, Վերին թաղը պետք է հենց այդ կողմում եղած լինի: Կարելի է ենթադրել, որ բնակավայրի հարավում՝ ավելի ցածրադիր տեղում գտնվող հատվածն էլ կոչվել է Ներքին թաղ:

²⁶ Կ. Մաթեոսյան, Արուճ, էջ 34: Արուճի միջնադարյան այգիները տարածվում էին բնակավայրից շուրջ 1 կմ դեպի հյուսիս՝ մինչեւ քարավանատուն, դեպի արեւմուտք՝ Վանքածորից մինչեւ Շամիրանածոր, եւ դեպի հարավ՝ Աղբրի ձորի ափերով: Այդ տարածքում այժմ էլ կարելի է տեսնել 10-13-րդ դարերի առանձին կանգնած բազմաթիվ խաչքարեր, որոնք ժամանակին կանգնեցրել են այգիների տերերը: Խաչքարերից մեկի պատվանդանին արձանագրված են եղել Աղամ եւ Մովսես (Մուսես) քահանաների անունները եւ 1001 թվականը, իսկ մեկ այլ խաչքարի արձանագրության մեջ հիշվում է ոմն պարոն Սմբատը (Նույն տեղում, էջ 83-84):

²⁷ Դիվան հայ վիմագրության, էջ 62-63:

²⁸ «Եւ Աստուածատուր ետու զիմ հայրենի այգիս, որ յԱրուճ, ի Վերին թաղն՝ Խաչկանց այգին եւ զընծանն ետու ի սուրբ ուխտս Յառիճայ...» (Ղ. Ալիշան, Շիրակ, Վեներտիկ, 1881, 159):

ՆԵՐՔԻՆ ԹԱԼԻՆԻ ԱՌԱՋԱՑՈՒՄԸ

Եթե Արուճը Անի-Դվին քարավանային ճանապարհի հանգրվաններից մեկը լինելով ծաղկում ապրեց եւ ունեցավ դրամափոխության յուրօրինակ շուկա, ապա Թալինը նույնպիսի նպաստավոր պայմաններում գտնվելով վերափոխության ենթարկվեց: Մասնավորապես քարավանային ճանապարհի հյուսիսային կողմում գտնվող Թալինի բնակչության մի հատվածն անցավ ճանապարհի հարավային կողմը, հիմք դնելով Ներքին Թալինին, կամ, գուցե, նոր շունչ հաղորդելով հնուց ի վեր այստեղ եղած փոքրիկ բնակավայրին:

Ներքին Թալինը գտնվում է Թալինից շուրջ 4 կմ հարավ-արեւմուտք: Որոշ պարզաբանման կարիք ունի բնակավայրի անվան հարցը: 1979-ին Ներքին Թալինն անվանափոխվել է եւ կոչվել Դաշտադեմ²⁹: Բնակավայրի անվան կապակցությամբ գրականության մեջ շրջանառվում է նաեւ Քաղին կամ Քաղենի անունը, որը ծագում է Հովհաննես Դրասխանակերտցու հաղորդած մի տեղեկությունից: Խոսելով Սիոն Ա Բավոնեցու (767-775) կաթողիկոս դառնալու մասին՝ պատմիչն ավելացնում է, որ նրա օրոք, արաբական արշավանքի հետեւանքով տեղի է ունեցել Քաղինի, Արենի եւ Թալին գյուղաքաղաքի կոտորածը, որին զոհ է գնացել 700 եւ գերեվարվել 1200 մարդ³⁰:

Այդ տեղեկությունը Դրասխանակերտցուց քաղելով կրկնել են Ստեփանոս Տարոնեցի Ասողիկը, Սամվել Անեցին, Մխիթար Այրի-

²⁹ Բնակավայրի անվանափոխությունը հավանաբար արվել է երկու Թալինների անունների շփոթությունից խուսափելու համար: Դաշտադեմ անունով գյուղ է եղել Սասունում:

³⁰ «Յաւուրս սորա եղել կոտորումն Քաղինոյ եւ Արենոյ եւ գիւղաքաղաքին Թալնայ, յորում սպանան ոգիք իբրեւ եօթն հարիւր եւ գերեցան հազար երկերիւր» (Հովհաննես կաթողիկոս Դրասխանակերտցի, Հայոց պատմություն, էջ 110):

վանեցին, Կիրակոս Գանձակեցին³¹: Քաղին կամ Քաղենի տեղանունը որեւէ այլ առիթով չի հիշատակվում, հետեւաբար այսօր անհնար է պնդել, թե հնում այն Ներքին Թալինին է վերաբերել: Ավելին, Ներքին Թալինում եղած երկու արձանագրությունների մեջ բնակավայրը կոչվում է Թալին: Ներքին Թալինից շուրջ 1 կմ հարավ-արեւմուտք գտնվող Ս. Քրիստափոր վանքի բազմաթիվ վիմագրերում նույնպես ոչ մի անգամ չի նշվում Քաղին կամ Քաղենի անունը, մինչդեռ երկիցս հիշատակվում է Թալինը: Կարծում ենք, որ 8-րդ - դարի դեպքերի առնչությամբ հիշված Քաղինը Թալինի մոտ գտնվող մեկ այլ բնակավայր է եղել, սակայն ոչ Ներքին Թալինը, քանի որ այդ հաստատող ոչ մի ուղղակի փաստ հայտնի չէ:

Հնարավոր է, որ Ներքին Թալինում է եղել Աշոտ Դ-ի զորակայանը, որի տեղը 1021 թվականին տեղի ունեցած մի դեպքի առիթով պատմիչները նշում են հետեւյալ կերպ. «...ի յոտս Թալնայ»³² (Թալինի ստորոտում):

1174-ին Վրաց Գեորգի Գ թագավորը գրավել է Անին եւ գերեվարել Շադդադյան Շահնշահ ամիրային: Գահի իրավահաջորդ Սուլթանին (Անիի վերջին ամիրան էր) հաջողվել է ապաստան գտնել Ներքին Թալինի ամրոցում եւ հենց նույն թվականին նա հիմնովին նորոգել է այն, կառուցել նոր աշտարակներ: Այստեղ պահպանվել է Սուլթանի արաբերեն արձանագրություն, որով նա հայտնում է, թե կառուցել է ամրոցը 1174 թ. սեպտեմբերին³³:

³¹ Ասողիկը միայն Թալինի անունն է տալիս (Ստեփանոսի Տարօնեցույ Պատմութիւն, էջ 105): Երեք բնակավայրը նշում են Սամվել Անեցին (Անեցի, էջ 89), Մխիթար Այրիվանեցին (Մխիթար Այրիվանեցի, Պատմութիւն Հայոց, Մոսկուա, 1860, էջ 52) եւ Կիրակոս Գանձակեցին: Վերջինիս մոտ բնակավայրերից երկուսի անունը սխալ է տպագրված. «...կոտորունն եղեւ Քաղինաու, Մրենոյ, Թալնայ...» (Կիրակոս Գանձակեցի, էջ 72): Գրքին կցված «նկատված վրիպակների» մեջ առաջինն ուղղված է՝ «Քաղինու», իսկ «Արեն» անունը սխալմամբ Մրեն է կարդացվել (տպագրական, կամ ձեռագրերից եկող գրչական սխալ է):

³² Տե՛ս աստ էջ 102-103:

³³ А. Хачатрян, Корпус арабских надписей Армении, с. 46.

1176-ին վրացիներն Անին վերադարձրել են Շադդադյաններից և Սուլթանը տեղափոխվել է այնտեղ:

Ներքին Թալինի ամրոցն իր դերը պահպանել է նաև Ջաքարյանների ժամանակ: 13-րդ դ. սկզբին, կառուցվել են դղյակ-ամրոցի եւս երեք բուրգերը, միաժամանակ այն վերցվել է երկրորդ, ավելի ընդարձակ պարսպաշարի մեջ: Այստեղ պահպանվել է «Յովհաննես քարգործ յիշեցեք ի Քրիստոս»³⁴ արձանագրությունը: Նոր պարսպի շրջագծի ներսում հայտնված Ս. Սարգիս եկեղեցուն հարկ թողնելու մասին 1307 թ. մի արձանագրություն է գրել Իվանե Բ-ի որդի Աղբուղան, որը բնակավայրը համարում է իր սեփականությունը («թողի գին հայրենիք գեղս՝ **գԹալնայ** գինոյ խալեն...»)³⁵: Իսկ Ջաքարյանների կառուցած պարսպի մուտքի մոտ 2007-ին հայտնաբերված թերի պահպանված մի արձանագրության մեջ ընթերցվում է ոմն Գրիգորի անունը եւ դարձյալ Թալին տեղանունը³⁶:

Ներքին Թալինից շուրջ 1 կմ հարավ-արեւմուտք գտնվող Ս. Քրիստափոր վանքի արձանագրություններում նույնպես խոսվում է Թալինի մասին³⁷: Այստեղից կարելի է եզրակացնել, որ միջնադարում Ներքին Թալինը նույնպես Թալին է կոչվել:

Մեր կարծիքով Ներքին Թալինի առաջացման պատմության մեջ գործ ունենք միջնադարյան բնակավայրերի ընդարձակման մի սկզբունքի հետ, որը բնորոշ է հատկապես որոշակի ուղղությամբ

³⁴ Զ. Եղիազարյան, Ներքին Թալին գյուղի Ս. Քրիստափորի անվան վանքը, նրա վիմագիր արձանագրությունները եւ գյուղի մյուս հուշարձանները, «Էջմիածին», 1971, Ը, էջ 59:


³⁵ Զ. Եղիազարյան, նշվ. աշխ., էջ 64: Արձանագրության հեղինակի ինքնությունն ու թվականը ճշտում է Պ. Մուրադյանը (Պ. Մուրադյան, Հայաստանի վրացերեն արձանագրությունները, Երեւան, 1977, էջ 105):

³⁶ Արձանագրության միայն առաջին քարն է պահպանվել: Այժմ դրված է Ս. Սարգիս եկեղեցու մուտքի դիմաց, տեքստը չի հրատարակվել:

³⁷ Այստեղ 941 թվականի մի արձանագրության մեջ նշվում է. «...հրաման յԱստուծոյ ի վերա գիւղաքաղաքին Թալնա՝ նոր ուխտ եւ յիշատակ կատարեն միաբան(ք) սուրբ եկեղեցոյս...», Ոմն Քրիստափորի 950 թ. նվիրատվական արձանագրության մեջ դարձյալ հիշվում է Թալինը: (Զ. Եղիազարյան, նշվ. աշխ., էջ 63):

տարածվող այգիներ ունեցող վայրերին (օրինակ, Վանը՝ Այգեստան քաղամասով): Կամսարականների նստավայր բուն Թալինի այգիները տարածվում էին դեպի հարավ-արեւմուտք ընկած բերրի հողերը: Բագրատունյաց շրջանի տնտեսական վերելքի ժամանակ, այգիների տերերը բնակարաններ են կառուցում նաեւ այգեստաններում, եւ առաջանում է Ներքին Թալինը: Դրան մեծապես նպաստում է նաեւ Թալինի հսկա քարավանատան կառուցումը, որն Անի տանող մայրուղու կարելուր հանգրվաններից մեկն էր, մայրաքաղաքից մեկ օրվա անցման հեռավորությամբ³⁸: Թ. Թորամանյանը գրում է, որ քարավանատունը գտնվում էր «Հին եւ Նոր Թալինների ճանապարհի միջին կետի վրա»³⁹ եւ ավելացնում, որ միայն «Թալինի իջեւանի ծախքով կարելի էր չորս հատ եկեղեցի շինել»⁴⁰:

Թալինի քարավանատունը Հայաստանի միջնադարյան մյուս



³⁸ Թալինի քարավանատան ընդհանուր չափերն են 37x73 մ: Քարավանատան մասին հանգամանորեն տես Վ. Հարությունյան, Միջնադարյան Հայաստանի քարավանատներն ու կամուրջները, Երեւան, 1960, էջ 55-60:

³⁹ Թ. Թորամանյան, նշվ. աշխ., էջ 130:

⁴⁰ Նույն տեղում, էջ 36:

նման կառույցներից տարբերվում էր նրանով, որ երկու հյուրատուն-սրահների միջև ուներ մեծ բակ-վաճառանոց, որտեղ եղել են նաեւ կամարակապ կուղպակներ: Դա նաեւ շուկա էր Թալինի բնակիչների գյուղատնտեսական արտադրանքի համար:

Ներքին Թալինի ամրոցը, որ Կամսարականների ժամանակ ուղղանկյուն մի սրահ էր, 9-10-րդ դարերում մասամբ վերակառուցվեց, սակայն իսկապես դղյակ-ամրոց դարձավ Սուլթան Շադդադյանի 1174 թ. վերակառուցումից եւ շինությանը շուրջ 18 մ բարձրությամբ չորս աշտարակների կցումից հետո⁴¹: Ներքին Թալինի բնակիչների տները եղել են ամրոցի մոտ եւ դրանից հարավ գտնվող Գայլաձորի աջ ափին: Հարակից տարածքը ծածկված է եղել պտղատու այգիներով:

ՔԱՐԱՎԱՆԱՏՆԵՐԻ ԿԱՌՈՒՑՄԱՆ ԺԱՄԱՆԱԿԸ

Միջնադարյան Հայաստանի քարավանատներին նվիրված Վարազդատ Հարությունյանի աշխատության մեջ, ուր ներկայացվում են նաեւ Արուճի եւ Թալինի քարավանատները, դրանց կառուցման ժամանակի մասին ասվում է. «Ներկա աշխատության մեջ քննարկվող քարավանատները կամ ինչպես Հայաստանում նրանց անվանում էին՝ իջեւանները, իջեւանատները... վերաբերում են զարգացած ֆեոդալիզմի ժամանակաշրջանին՝ 12-14-րդ դարերին»⁴²: Արուճի եւ Թալինի քարավանատները 13-րդ դարի կառույցներ են համարվում ամենատարբեր հրատարակություններում⁴³: Քանի որ

⁴¹ Դղյակ-ամրոցի եւ այն շրջապատող Ջաքարյանների պարսպի շուրջը բավական մեծ պարագծով պարիսպներ է կառուցել Երեւանի պարսիկ խանը 1812 թվականին: Ներքին Թալինի ամրոցի ամրակայումը եւ մասնակի վերականգնումը սկսվել է 2005 թվականից: (Գ. Մ. Սարգսյան, Դաշտադենի ամրոցը, «Հայ արվեստ», 2007, թիվ 3-4, էջ 36-37):

⁴² Վ. Հարությունյան, նշվ. աշխ., էջ 12:

⁴³ Օ. Халпахчян, Гражданское зодчество Армении, Москва, 1971, с. 188-191, Հայ ժողովրդի պատմություն, էջ 903-905, Հայկական սովետական հանրագիտարան, հ. 2, Երեւան, 1976, էջ 152 եւ այլն:

այս քարավանատների կառուցման վերաբերյալ չկան ոչ վիճադիր արձանագրություններ, ոչ էլ պատմիչների վկայություններ, դրանց հիմնադրման ժամանակի մասին կարելի է դատել միայն շինարարական առանձնահատկություններից կամ հարակից տեղեկություններից ելնելով: Որքան մեզ հայտնի է, այս հուշարձանների շինարարական տեխնիկան հիմնավորապես չի համեմատվել այլ հուշարձանների հետ, որով հնարավոր լինել որոշել դրանց կառուցման ժամանակը:

Թալինի եւ Արուճի քարավանատների վերաբերյալ ուշագրավ դիտարկում է կատարել Ն. Տոկարսկին: Նա գրում է, որ Թալինի քարավանատունը կառուցվել է երկու փուլով, ավելի վաղ հիմնվել է արեւելյան մասնաշենքը, որը կառուցվածքով ու չափերով շատ մոտ է Արուճի քարավանատանը, որից հետո, դեպի արեւմուտք, կառուցվել են վաճառանոց-բակն ու մյուս մասնաշենքը⁴⁴: Ուսումնասիրողի կարծիքով այս քարավանատները կարող էին ստեղծված լինել «ընդհանուր հատակագծով»⁴⁵:

Սակայն Ն. Տոկարսկին, փորձելով որոշել այս քարավանատների կառուցման ժամանակը, դրանք համեմատում է նախկին Սուրմալուի գավառում, Արաքս գետի եւ Արարատ լեռան միջեւ գտնվող Ջորի քարավանատան հետ, որը մույնպես ներքուստ եռանակ է: Այն ունի շքեղ քանդակազարդված մուտք 13-րդ դարին բնորոշ հարդարանքով, որից ելնելով հեղինակն այս բոլոր երեք քարավանատները համարում է 13-րդ դարի կառույցներ⁴⁶:

Այսպիսի մոտեցումը գուցե ընդունելի կլիներ, եթե մենք կիսավեր քարավանատներից բացի ուրիշ ոչ մի տեղեկություն չունենայինք Արուճի եւ Թալինի վերաբերյալ: Սակայն այս դեպքում հատակագծային նմանությունը չի կարելի ժամանակի միակ որոշիչ հա-

⁴⁴ Н. Токарский, Архитектура Армении, IV-XIV вв., Ереван, 1961, с. 273.

⁴⁵ Սույն տեղում, էջ 274:

⁴⁶ Н. Токарский, Архитектура Армении, с. 274-275.

մարել⁴⁷: Քարավանատների չափերի համեմատությունը ցույց է տալիս, որ Արուճի (15x28,25 մ) եւ Թալինի (արեւելյան եռանավ հատված՝ 15x35 մ) սրահները համադրելի են, մինչդեռ Ձորում այն անհամեմատ մեծ է (25x65 մ)⁴⁸, որն ավելի ուշ կառուցված լինելու մասին է վկայում:

Արուճի քարավանատան պահպանված հատվածը շենքի հյուսիսարեւելյան մասն է, բայց 2007-ին կառույցը վերականգնվել է ամբողջ պարագծով: Երկայնական պատերը դրսից ունեն երեքական կիսակլոր բուրգեր հիշեցնող հավելումներ, որով կառույցը փոքրիկ ամրոցի տեսք է ստանում:

Քարավանատան պատերը շարված են միջին չափի քարերով,



⁴⁷ Այդպիսի մոտեցման դեպքում կարելի է, օրինակ, բոլոր խաչածեկ ենտորոնագմբեթ փոքր եկեղեցիները թվագրել 5-7-րդ դարերով, մինչդեռ հայտնի է, որ այդպիսի հորինվածքով բազմաթիվ եկեղեցիներ են կառուցվել նաեւ 9-13-րդ դարերում (Վ. Գրիգորյան, նշվ. աշխ., էջ 7):

⁴⁸ Վ. Հարությունյան, նշվ. աշխ., էջ 15:

ինչպիսի շարվածք տեսնում ենք նաեւ Արուճի Կաթողիկէի հյուսիսային պատի նորոգված հատվածում: Արձանագրության համաձայն նորոգումը կատարվել է 973 թվականին (պահպանվել են գործը նախաձեռնող Գորամի եւ մի այլ քարի վրա՝ Դավիթ վարպետի անունները)⁴⁹: 2007 թ. Արուճի քարավանատանն իրականացվեցին մասնակի պեղման աշխատանքներ: Դրանց շնորհիվ բացվեց քարավանատան մուտքի արեւելյան կողմի որմնասյունը, որի ստորին մասը մշակված է հնավանդ, պարզ օղակաձեւ ելուստով: Կառույցի հարավարեւմտյան անկյան մոտ բացվեց ընդհանուր պարագծից դուրս եկող մի նոր ուղղանկյուն սենյակ:

Արուճի քարավանատունը չունի դեկորատիվ հարդարանքի տարրեր կամ այլ մանրամասներ, որոնք վկայեն դրա 10-11-րդ դարերից ավելի ուշ կառուցված լինելու մասին: Մեր կարծիքով Արուճի քարավանատունը գոյություն ունէր արդեն 10-րդ դարի վերջերին, երբ Սմբատ Բ թագավորը տեղի Կաթողիկէ եկեղեցու պատին թողած արձանագրությամբ շաւակավոր-դրամափոխներին ազատում էր հարկից: Հասկանալի է, որ այդ մարդիկ իրենց դրամական գործարքները կատարում էին ոչ թէ միմյանց, այլ տարբեր տեղերից եկող վաճառականների հետ, իսկ վերջիններս պետք է իջեւանելու ապահով տեղ ունենային: Շատ հավանական է, որ այս նույն ժամանակաշրջանում է կառուցվել Թալինի քարավանատան առաջին մասնաշէնքը, որը չափերով նման է Արուճի քարավանատանը: Իսկ հետագայում, հավանաբար 13-րդ դարում, Թալինի քարավանատունն արեւմտյան կողմից ընդարձակվել է:

Արուճի եւ Թալինի Բագրատունյաց շրջանում ունեցած ծաղկման մասին վկայող վերը ներկայացված բազմաթիվ փաստերը մեզ բերում են այն համոզման, որ քարավանատները հենց այդ ժամանակի ծնունդ են: Չպետք է մոռանալ, որ Արուճի եւ Թալինի վրայով անցնող քարավանային ուղին Հնդկաստանից ու Պարսկաստանից

⁴⁹ Կ. Մաթեոսյան, Արուճ, էջ 60:

եկող եւ դեպի Սել ծովի ափերը հասնող միջազգային առեւտրական ճանապարհի մի հատվածն էր, ճանապարհ, որը Բագրատունյաց պետության զորացմանը եւ Անի մայրաքաղաքի արագ ծաղկմանը նպաստող կարեւորագույն գործոններից էր⁵⁰: Հիշենք նաեւ, որ դեռեւս Սմբատ Ա Բագրատունին (890-914) առեւտրական պայմանագիր ուներ Բյուզանդիայի հետ, որով ապահովվում էր նաեւ մահմեդական առեւտրականների մուտքը կայսրություն՝ Հայաստանի ճանապարհով⁵¹: Այդ ճանապարհի սպասարկմանն էին կոչված Անիի շրջանում Ախուրյան գետի վրա գցված բազմաթիվ լայնաթիչք կամուրջները, որոնք մեծ մասամբ Բագրատունյաց շրջանի շինություններ են⁵²: Արուճի եւ Թալինի քարավանատների կառուցումը նույնպես այդ ժամանակին պետք է վերագրել:

Ավելացնենք, որ Դվինից Անի ձգվող քարավանային ուղին բանուկ է եղել նաեւ Բագրատունյաց թագավորության անկումից (1045) հետո, իսկ Արուճն ու Թալինը ծաղկուն բնակավայրեր էին Ջաքարյանների շրջանում: Արուճում պահպանված, Կաթողիկե եկեղեցու նորոգմանը վերաբերող 15-րդ դարի սկզբներին գրված մի արձանագրություն⁵³ վկայում է բնակավայրի կայուն վիճակի մասին: Թալինի եւ Արուճի բնակչությունը տեղահանվել է 1604 թ. Շահ Աբասի կազմակերպած բռնագաղթի ժամանակ:

⁵⁰ Հայ ժողովրդի պատմություն, էջ 215, 229-230:

⁵¹ Հովհաննես Կաթողիկոս Դրասխանակերտցի, էջ 162-163:

⁵² Վ. Հարությունյան, նշվ. աշխ., էջ 71:

⁵³ Արձանագրությունը գրել է Խաչատուր վարդապետը՝ հայտնելով. «...ԵՍ ԽԱԶԱՅՏՈՒՐ ՎԱՐԴԱՊԵՏՍ ԵԿԻ ՅԱՐՈՒԹ ՆՈՐՈԳԵՑԻ ՁԵԿԵՂԵՑԻՍ...» (Վ. Մաթևոսյան, Արուճ, էջ 63): Արձանագրության մեջ հիշվում է Արարատյան երկրամասի կառավարիչ Սայաթ բեկը, որը մահացել է 1411 թ., հետեւաբար արձանագրությունը դրանից առաջ է գրված:

«ԻՄԱՍՏԱՍԵՐ» ՊԱՏՎԱՆՈՒՆՆ ԱՆԻՈՒՄ

Ստեփանոս Մանուկ Կարմիրվանեցու դպրոցին անդրադառնալով ու նրա շրջանավարտներ Ներսես Շնորհալուն, Իգնատիոս Շնորհալուն, Սարգիս Շնորհալուն եւ Բարսեղ Շնորհալուն թվարկելով, Մաղաքիա Օրմանյանը գրում է. «**Շնորհալի** մականունին կրկնումը նշանաւորագոյն աշակերտներուն վրայ, մտածել կու տայ թէ այդ կոչումը որոշիչ պատուանուն մը եղած է Շուղրի կամ Քէսունի Կարմիր վանքի աշակերտութեան մէջ, ինչպէս **Քերթող** պատուանունը Սիւնեաց դպրոցին (պար. 398), եւ **Իմաստասէր** պատուանունը Արագածոտնի դպրոցին (պար. 979) յատկացեալ մակդիր անունի պէս գործածեցան»¹: Իսկ Արագածոտնում «իմաստասէր» պատվանվան վերաբերյալ հղված տեղում², Գրիգորիս Արշարունու «փիլիսոփա» կոչվելը նշելուց հետո, ավելացնում է. «Փիլիսոփայ կամ Իմաստասէր պատուադիր մականունին Օծնեցիի ու ուրիշներուն ալ տրուած ըլլալը դիտելով, կը կարծենք թէ յատուկ դպրոցի մը սովորական մակդիր եղած էր, ինչպէս Սիւնեցիներու Քերթող մականունը: Իսկ այսպիսի դպրոց մը յարմար կըլլայ Քոթենաւորին հաստատած Արագածոտնի կամ Հառիճոյ վանքը կարծել, եթէ Երասխաձորի Արշարունեաց դպրոցն ալ (պար. 451) նոյն սովորութիւնը ունեցած չէ»³:

Եթէ Սյունյաց հին դպրոցի նշանավոր ներկայացուցիչների «Քերթող» մականուն կրելը հայտնի է, իսկ Քեսունի Կարմիր վանքի դպրոցի լավագոյն սաների «Շնորհալի» մականունով կոչվելն իրավամբ ենթադրել է տալիս, որ դա տեղի դպրոցին հատուկ պատվանուն էր, ապա դժվար է նույնը պնդել «Իմաստասէրի» առնչությամբ: Հայտնի է, որ Թեոդորոս Քոթենավորը (7-րդ դ.) դպրոց է ունե-

¹ Մ. Օրմանեան, Ազգապատում, Ա հատոր, Եջմիածին, 2001, էջ 1562-1563:

² Այն ոչ թե գրքի 979 այլ 579 ենթաբաժնում (պարագրաֆում) է: Վրիպակը կրկնվել է «Ազգապատումի» բոլոր հրատարակություններում:

³ Նույն տեղում, էջ 986-987:

ցել Արագածոտնի Ս. Աստվածածին վանքում: Նրա աշակերտներից են եղել Սահակ Գ Չորափորեցի (677-703) եւ Յովհաննէս Գ Օձնեցի (717-728) կաթողիկոսները: Օձնեցին կոչվել է նաեւ Իմաստասեր, սակայն ամենայն հավանականությամբ իր իմացության եւ գործերի շնորհիվ, որպէս «սիրօղ իմաստութեան, փիլիսոփայ»⁴, եւ ոչ որպէս Քռքենավորի դպրոցի աչքի ընկած շրջանավարտ:

Իմաստասեր կամ փիլիսոփա անվանումով են բնորոշվել տարբեր վայրերում ապրած նշանավոր վարդապետներ կամ գործիչներ: Ստեփանոս Օրբելյանը Թեոդորոս Քռքենավորի ուսուցիչ Սյունյաց Մաթուսաղա վարդապետի մասին գրում է. «...մեծ քերթողն եւ անյաղթ փիլիսոփայն Մաթուսաղայ... ուսեալ գքերթողութիւնն եւ վարժեալ ճարտասանականան, հմտացեալ փիլիսոփայական արհեստից, լի ամենայն իմաստութեամբ...»⁵: Խոսելով Բագրեւանդի Ատրներսեհ իշխանի մասին՝ Մատթեոս Ուռհայեցին գրում է. «...սա էր այր կորովի եւ յոյժ հանճարեղ, բանիբուն եւ իմաստասեր, ուսեալ ի մեծ Արգինա...»⁶:

Որեւէ ծանրակշիռ կռվան չունենք «Իմաստասեր» պատվանունը որոշակի դպրոցի առնչելու համար: Սակայն, մյուս կողմից, ակնհայտ է, որ այս կամ այն անձի համար «Իմաստասեր» բնորոշումը չէր տրվում որպէս սովորական մեծարական խոսք, առավել եւս, եթէ դառնում էր մականուն:

Անիի եւ նրա շրջանի հոգեւոր մշակույթի ուսումնասիրության ընթացքում պարզ դարձավ, որ «Իմաստասեր» պատվանունը տարածված է եղել նաեւ այստեղ: Ծանոթանանք այդ վկայությունների:

⁴ Նոր բառգիրք հայկազեան լեզուի, Վենետիկ, 1836, էջ 848:

⁵ Ստեփանոս Օրբելյան, Պատմութիւն նահանգին Սիսական, Տփղիս, 1910, էջ 112:

⁶ Մատթեոս Ուռհայեցի, Ժամանակագրություն, աշխարհաբար թարգմ եւ ծան. Զ. Բարթիկյանի, Երեւան, 1991, էջ 198:

Արիստակես Լաստիվերցին նշում է Սարգիս Ա-ի (992-1019) ժամանակ Անիի կաթողիկոսարանում գտնվող երեք նշանավոր վարդապետներին՝ գրելով. «Եւ էին յայն ժամանակի վարդապետք՝ Սարգիս եւ Տիրանուն եւ Յենովք, որ **կաթողիկոսարանին էին վարդապետք**»⁷: Մատթեոս Ուռհայեցին Տիրանունի մասին հավելյալ տվյալ է հաղորդում, երբ թվարկում է կաթողիկոս Պետրոս Ա Գետադարծի (1019-1054) 1046 թ. Անիից Արծն ուղեւորվելու ժամանակ նրան ուղեկցողներին. «Եւ էր զհետ տէր Պետրոսի նախնականն եւ լաւն ի բնաւից Բուլխար վարդապետն եւ ամենագովելին Խաչատուր դպրապետն... եւ **Տիրանուն Իմաստասէրն Կապանեցին**, Մխիթարիկն, Վարդան Սանահնեցին...»: Երկար անվանաշարքն ավարտելով պատմիչը գրում է. «Արդ այս ամենայն **վարդապետք եւ Իմաստասէրք** եւ հմուտք Յին եւ Նոր Կտակարանացն Աստուծոյ»⁸:

Փաստորեն Տիրանուն Կապանեցուն Ուռհայեցին կոչում է «Իմաստասէր» պատվանունով: Ցավոք այս գործչի մասին սույն հիշատակություններից բացի մեզ ուրիշ ոչինչ հայտնի չէ:

Տեւական ժամանակ Անիում բնակված հաջորդ գործիչը նշանավոր վարդապետ Յովհաննես Սարկավագն է⁹, որը նույնպես կոչվել է Իմաստասէր պատվանունով: Սարկավագը նրա մականունն էր, բայց այն, որ վարդապետը երբեմն նաեւ «Իմաստասէր» պատվանունով է կոչվել, երեւում է նրա երկերից մեկի վերնագրից՝ «**Յովհաննու Սարկաւագի Իմաստասիրի** եւ վարդապետի ասացեալ Բան իմաստութեան ի պատճառս զքօսանաց...»¹⁰, Սաղմոսարանի հիշա-

⁷ Արիստակիսի Լաստիվերցոյ Պատմութիւն (աշխատասիրությամբ Կ. Յուզբաշյանի), Երեւան, 1963, էջ 126 (այս եւ հաջորդ մեջբերումներուն ընդգծումները մերն են - Կ. Մ.):

⁸ Մատթեոս Ուռհայեցի, էջ 114, տե՛ս նաեւ Կ. Մաթեոսյան, Անի, Ս. Էջմիածին, 1997, էջ 41, 113:

⁹ Կ. Մաթեոսյան, Յովհաննես Սարկավագի գործունեությունն Անիում, «Էջմիածին», 2005, է-Ը, էջ 59-72:

¹⁰ Ա. Աբրահամյան, Յովհաննես Իմաստասերի մատենագրությունը, Երեւան, 1956, էջ 319:

տակարանից՝ «...մեծ իմաստասէրն **Յայոց**... Յովհաննէս մականուն Սարկաւագ»¹¹ եւ Սարկավագի սան Սամվել Անեցու ժամանակագրության հատվածներից:

Սամվել Անեցին մի քանի մեջբերում է անում Յովհաննէս Սարկավագի պատմական բովանդակություն ունեցող, այժմ կորած թղթերից: Սելջուկների գերիշխանության հաստատման մասին գրում է. «Ընթերցաք գրեալ **վարդապետին մեծի, որ Սարկաւագ վերակոչի անուանեալ**, զի ասէ թէ...»¹²: Հատվածի վերջում ավելացնում է. «Ձայսոսիկ նշանակաւ գրոյ եցոյց մեզ **Իմաստասէրն** մինչեւ ցՄելիքշահին, զոր յիւրում տեղւոջն գրեցից, սորին ձեռնտուութեամբ»: Շարունակելով պատմությունը եւ անդրադառնալով Մելիքշահին՝ նա կրկին մեջբերում է կատարում Յովհաննէս Սարկավագից, սակայն բավարարվելով միայն վարդապետի պատվանունը նշելով. «Ձի ասէ **Իմաստասէրն** աստուածային...»¹³:

Յայտնի չէ, թե արդյոք Յովհաննէս Սարկավագի Անիի դպրոցի շրջանավարտներից որեւէ մեկը կրել է «Իմաստասէր» պատվանունը: Սամվել Անեցու ժամանակագրության հրատարակության մեջ տեղ գտած մի հատվածում թվարկվում են Սարկավագի սաներից մի քանիսը՝ «...աշակերտ սորա Երեմիա... որ եւ Անձրեւ կոչեցաւ: Եւ ընկերք սորա տէր Խաչատուր եւ Գրիգոր եւ Յովհաննէս եւ Սամուէլ ամենեքեան սոքա Անեցիք»¹⁴: Թեեւ այդ հատվածը հեղինակային չէ, այլ հետագայում է մուծվել ժամանակագրության մեջ, սակայն թվարկված անձանց Յովհաննէս Սարկավագի սաներ եղած լինելը կասկած չի հարուցում:

¹¹ Ա. Աբրահամյան, Յովհաննէս Իմաստասերի մատենագրությունը, Երեւան, 1956, էջ 319, Յայերեն ձեռագրերի հիշատակարաններ, Ե-ԺԲ դր., էջ 157:

¹² Սամուէլի քահանայի Անեցոյ Յաւաքմունք ի գրոց պատմագրաց՝ յաղագս գիւտի ժամանակաց անցելոց մինչեւ ի ներկայս ծայրաքաղաքարեալ, յառաջաբանով, համեմատութեամբ, յաւելուածներով եւ ծանօթութիւններով Արշակ Տէր-Միքելեանի, Վաղարշապատ, 1893, էջ, 97:

¹³ Նույն տեղում, էջ 115:

¹⁴ Նույն տեղում, էջ 128:

Ժամանակագրությունից բացի Սամվել Անեցին գրել է նաեւ մի տոմարագիտական աշխատություն, որի վերնագրում հիշատակված պատվիրատուն նույնպէս «Իմաստասէր» պատվանունն է ունեցել. «Մեկնութիւն տունարի, զոր արարեալ է Սամուէլի քահանայի ի խնդրոյ **Ստեփանոսի Իմաստասիրի**»¹⁵: Աշխատությունը շարադրված է հարց ու պատասխանի ձեւով, ընդ որում՝ Անեցին օգտվել է Անանիա Շիրակացու Քննիկոն աշխատության տոմարագիտական բաժնից, երբեմն առանձին հատվածներ նույնությամբ արտագրելով: Թե ով է եղել Սամվել Անեցու այս երկի պատվիրատու Ստեփանոս Իմաստասերը, հայտնի չէ: Սակայն հեղինակը հավանաբար որոշ հիմք պիտի ունենար, որպեսզի ե՛ւ իր սիրելի ուսուցչին¹⁶, ե՛ւ այս Ստեփանոսին նույն պատվանունով կոչեր:

Անեցի հաջորդ իմաստասերը հիշատակվում է քաղաքի մոտ գտնվող Մաղասբերդ ամրոցում 1222 թ. թարգմանված երազահանի հիշատակարանում. «Զայս երազահանս ի տաճիկ յարապ գրէ ի հայ գիր մեկնեալ **Առաքել իմաստասէր արեղայն, որ մականուն Վառասեն...**»¹⁷: Այս վկայության մեջ «իմաստասերը» թերեւս ավելի շուտ բնութագրում է քան մականուն (Առաքելի մականունը «Վառ» էր): Մեկ այլ հիշատակարանում նա հետեւյալ կերպ է անվանվում՝ «արեղան **Անեցի**, որ անուն **Առաքել** ասէին...»¹⁸:

Անեցիները «փիլիսոփա» պատվանունով են մեծարել իրենց համաքաղաքացի գանձասաց Սարգիս վարդապետին, որի գանձե-

¹⁵ Ա. Գ. Աբրահամյան, Սամվել Անեցու տոմարական եւ տիեզերագիտական աշխատությունները, «Էջմիածին», 1952, Ա, էջ 3036:

¹⁶ Սամվել Անեցու՝ Հովհաննէս Սարկավագի նկատմամբ ունեցած ակնածալի վերաբերմունքը երեւում է ոչ միայն ժամանակագրության այն հատվածներից, ուր նա մեջբերումներ է կատարել ուսուցչի թղթերից, այլեւ այն փաստից, որ Անեցին իր որդուն անվանակոչել է Սարկավագ (այդ մասին տեղեկանում ենք Սամվել Անեցու թոռան՝ Խժկոնքում թողած արձանագրությունից):

¹⁷ ԺԳ դարի հայերեն ձեռագրերի հիշատակարաններ, կազմեց Ա. Մաթեոսյան, Երեւան, 1984, էջ 131:

¹⁸ Նույն տեղում, էջ 132:

րից մեկի խորագիրը հետեւյալն է. «Վեցերորդ աւուր քարոզ ասացեալ **Սարգիս փիլիսոփայի Տաւնկաց Անեցոյ** ի ծնունդն Քրիստոսի եւ ի յարութիւնն»¹⁹:

Այն, որ «Իմաստասէր» պատվանունը պահպանվել է նաեւ անեցիների սերունդների պատմական հիշողության մեջ, երեւում է Աբրահամ Կրետացու «Պատմութիւն Անի քաղաքին» երկից, որը թեւ ուշ շրջանի կրոնաբարոյախոսական բնույթի ստեղծագործություն է, սակայն պահպանել է ուշագրաւ մանրամասներ անիական կենցաղի մասին: Հեղինակն այստեղ անդրադառնալով Անիի վերջին Բագրատունի թագավորին, գրում է. «...Եւ կացին մնացին մինչեւ ի թագաւորութիւնն **Գագկայ-Յօհաննիսի Իմաստասիրի**»²⁰: Հեղինակը նույնացրել է Հովհաննես Սմբատին (1017-1041) եւ Գագիկ Բ-ին (1042-1044), քանի որ հետո գրում է, թե երբ թագավորը գնաց Կոստանդնուպոլիս, անեցի իշխանները «ապստամբելով ի թագաւորէն իւրեանց **Յօհաննիսէն Իմաստասիրէ**»²¹, իբրեւ թուղթ գրեցին կայսեր, որպէսզի նա այլեւս թույլ չտա Հայոց թագավորին Անի վերադառնալ: Այսպիսով, այս կարծեցյալ Գագիկ-Հովհաննես թագավորն էլ է կոչվել «Իմաստասէր»: Դա, թերեւ, զալիս է նրանից, որ եւ Հովհաննես Սմբատին, եւ Գագիկ Բ-ին պատմիչները ներկայացնում են որպէս գրասեր ու գիտուն անձնավորություններ:

Բերված վկայությունները տարբեր լինելով հանդերձ վկայում են, որ Անիում նշանավոր մարդկանց շրջանում տարածված է եղել «Իմաստասէր» պատվանունը:

¹⁹ Raymond H. Kévorkian, Armen Ter-Stepanian, *Manuscripts arméniens de la Bibliothèque nationale de France, Catalogue*, Paris, 1998, p. 170, Ա. Քյոշկերյան, Գանձասաց Սարգիս Անեցի, «Պատմա-բանասիրական հանդես», 1971, N 2, էջ 205:

²⁰ Աբրահամ կաթողիկոսի Կրետացոյ Պատմագրութիւն անցից իւրոց եւ Նատր-Շահին Պարսից, Վաղարշապատ, 1870, էջ 101:

²¹ Նույն տեղում, էջ 102:

ԱՔՐԱՀԱՄ ԿՐԵՏԱՑՈՒ

«ԱՆԻ ՔԱՂԱՔԻ ՊԱՏՄՈՒԹՅՈՒՆԸ»

1734-1737 թթ. Ամենայն Հայոց կաթողիկոս Աբրահամ Կրետացու գրական ժառանգության մեջ պահպանվել է մի փոքրածավալ երկ՝ «Պատմութիւն Անի քաղաքին» վերնագրով, որն առաջին անգամ հրատարակվել է 1870 թ. Վաղարշապատում, հեղինակի հիմնական պատմագիտական աշխատության («Աբրահամ կաթողիկոսի Կրետացոյ Պատմագիտութիւն անցիցն իւրոց եւ Նատր-Շահին Պարսից») վերջում՝ որպես հավելված: Ամբողջական վերնագիրն է՝ «Պատմութիւն Անի քաղաքին զոր գրեալ է Աբրահամու ռաբունապետի եւ Բանի սպասաւորի եւ Առաջնորդին Թրակիոյ»: Այստեղից երեւում է, որ հեղինակն այն գրել է Թրակիայի (Ռոդոսթո) առաջնորդ եղած ժամանակ, այսինքն՝ 1709-1734 թթ. ժամանակամիջոցում: Աբրահամ Կրետացու այս երկին տարբեր աշխատություններով անդրադարձել են Ն. Մառը, Ղ. Ալիշանը, Լեոն, Թ. Հակոբյանը, Վ. Միքայելյանը եւ այլք, Մ. Բրոսսեն այն թարգմանել է ֆրանսերեն:

Վաղարշապատյան հրատարակության համար հիմք է ծառայել Ս. Էջմիածնի մատենադարանի թիվ 1749 ձեռագիրը, որն այժմ պահվում է Մաշտոցի անվան Մատենադարանում 1781 թվահամարի տակ, ընդօրինակված 1756 թ. Ղրիմի Կաֆա քաղաքում: Ձեռագրում վերնագիրը փոքր-ինչ այլ է եւ վկայում է, որ հեղինակը երկը գրել է Կաֆայում՝ «Պատմութիւն Անի քաղաքին, զոր գրեալ է ի Կաֆայ, Աբրահամու ռաբունապետի եւ Բանի սպասաւորի եւ Առաջնորդին Թրակիոյ»: Ըստ երեւույթին հրատարակիչները նկատի ունենալով, որ մատյանն ընդօրինակվել է Կաֆայում, եւ որ Աբրահամի՝ երբեւէ այդ քաղաքում եղած լինելու մասին այլ տեղեկություններ չկան, վերնագրում եղած «ի Կաֆայը», ընդմիջարկություն համարելով, դուրս են թողել: Մինչդեռ երկի վերջաբանն այլ բան է հուշում: Այն կարելի է փաստեր է պարունակում հենց Կաֆայի պատ-

մության վերաբերյալ եւ ակներեւ է դարձնում, որ վերնագրում առկա, երկի գրության տեղի մասին նշումը ստույգ է:

Աբրահամ Կրետացու գրությունը թեւեւ վերնագրված է «Պատմութիւն Անի քաղաքին», սակայն սովորական ըմբռնմամբ պատմագիտական ստեղծագործություն չէ, այլ կրոնաբարոյախրատական գրույց՝ հյուսված երբեմնի ծաղկուն մայրաքաղաքի կործանման ու ամայացման փաստի շուրջը: Նյութի ընտրությունը պատահական չի եղել, քանի որ Կրետացին այն ներկայացրել է Կաֆայի հայությանը, այսինքն՝ Անիից գաղթածների սերունդներին: Հեղինակը նպատակ է ունեցել իր ժամանակակիցներին հեռու պահել հասարակական ամեն տեսակ արատներից ու բազմապիսի մեղքերից, որոնք ծնվում են հարստությունից, ցոփությունից, անխոհեմությունից եւ առաջանում այնտեղ, ուր բարեպաշտությունը տեղը զիջում է ընչաքաղցությանն ու ամբարշտությանը: Ահա այս խնդիրը Կրետացին լուծել է յուրովի՝ հենվելով անեցիների շրջանում պահպանված ավանդությունների վրա: Մնացած ամեն ինչ, այդ թվում պատմական բուն իրադարձությունները, որոշակի դեպքերն ու դեմքերը, հեղինակի համար երկրորդական նշանակություն ունեն:

Կրետացու երկը արժեքավոր է մի քանի առումով: Նախ, այն հանդիսանում է Անիի կործանումը քրիստոնեական աշխարհայացքի տեսակետից՝ որպես գործված մեղքի հատուցում ներկայացնող ստեղծագործություն, որի գաղափարաբանական արմատները հասնում են 11-րդ դար (Արիստակես Լաստիվերցի, Հակոբ Սանահնեցի, Հովհաննես Կոզեռն): Կրետացին առավելագույն զարգացման է հասցրել իր նախորդների այս տեսակետը քաղաքի անկման վերաբերյալ: Միեւնույն ժամանակ, ինչպես երեւում է որոշ հատվածներից, հեղինակը ծանոթ է եղել անեցիների միջավայրում պահպանված որոշ գրույցների ու ավանդությունների, որոնք օգտագործել է ըստ իր նպատակի: Հետաքրքիր է նաեւ, որ անեցիների մեղքերի բազմապատկումը (հասարակության բարոյազրկումը)

հեղինակը կապում է պետականության անկմանը հաջորդած՝ օտար (բյուզանդական) տիրապետության ժամանակաշրջանի հետ:

Պատմագիտական առումով հետաքրքրություն են ներկայացնում երկի վերջամասում տեղ գտած՝ Անիի գաղթականությանը, Կաֆայի պարսպաշինությանը վերաբերող տեղեկությունները:

Ստորել ներկայացնում ենք աշխարհաբար փոխադրությունը՝ համառոտ ծանոթագրություններով:

ԱՆԻ ՔԱՂԱՔԻ ՊԱՏՄՈՒԹՅՈՒՆԸ,
ՈՐ ԳՐԵԼ Է ԹՐԱԿԻԱՅԻ ԱՌԱՋՆՈՐԴ ԵՎ ԲԱՆԻ
ՍՊԱՍԱՎՈՐ ԱԲՐԱՀԱՄ ՐԱԲՈՒՆԱՊԵՏԸ ԿԱՖԱՅՈՒՄ

Մեծ եւ հռչակավոր էր Անի քաղաքը, որ գտնվում է Շիրակվան դաշտում, որ եւ մեր թագավորների աթոռն է եղել, որի բնիկ բնակիչները մեծափարթամ, հարուստ ու փափկասուն էին: Անին կառուցել է Շիրակ թագավորը¹ Բագրատունյաց ցեղից, որ Քետուրական² ծնունդ է, եւ սրանք, Պաղեստինում գերվելով Տիրան թագավորի ձեռքով, եկան Հայաստան ու սերեցին այն տոհմը, որ Բագրատունիներ է կոչվում: Այա Հայաստանի մարգապանությունից հետո Շիրակը՝ Բագրատունյաց տոհմից, ծաղկավետ եւ հացառատ Շիրակվան գավառում կառուցեց Անին՝ որպես գահանիստ իր թագավորության համար: Եվ այսպես ապրեցին մինչեւ Գագիկ-Հովհաննես իմաստասերի³ թագավորությունը:

Եւ այն ժամանակ Շիրակվանի Հովհաննես թագավորը գնաց Ստամբուլ՝ հույների թագավորի մոտ, նրան տեսնելու համար եւ հույների թագավորը պատրաստություն տեսավ եւ ընդունեց նրան մեծ փառքով եւ մեծարեց պալատում ու թագավորավայել թոշակ սահմանեց նրա համար: Եվ այսպես բազում օրեր ուրախացան:

Իսկ Անիի նենգ եւ տիրատյաց իշխանները, ըստ իրենց վաղեմի սովորության, զրեցին հունաց թագավորին, ապստամբելով իրենց՝ Հովհաննես իմաստասեր թագավորի դեմ: Նաեւ Անիի բերդի ոսկուց պատրաստված բանակին՝ նամակի հետ ուղարկեցին Կոստանդնուպոլիս: Եւ նամակով ու դեսպանի միջոցով խնդրեցին հույների թագավորին, որպեսզի այլեւս չթողնի Հայոց թագավորին վերադառնալու Անի՝ իր աթոռը, այլ նրա փոխարեն իր կողմից ուրիշ մարդ՝ ոստիկան ուղարկի Անի, որպեսզի հավերժ հնազանդվեն նրան: Հիմարները կարծում էին, թե հույներն ավելի լավ ու իրենց կամքին հարմար կլինեն, քան թե Հայոց թագավորը:

Երբ որ իր թագավորի կողմից հույն իշխանը եկավ Հայաստանը տիրելու եւ նստեց Ամիուն, սկսեց տառապեցնել մեր ազգը եւ բանի տեղ չդնել ո՛չ ժողովրդին, ո՛չ իշխաններին, մինչեւ որ շատ դառնացրեց բոլորին, իսկ նրա հաջորդը ավելի չար դուրս եկավ, քան առաջինը⁴: Եւ (անեցիները) սկսեցին միջոց փնտրել, մինչեւ որ կաշառքով, բազում ընծամերով ու աղաչանքով հազիվ հեռացրին հույնին՝ իր թագավորի հրամանով, եւ դրեցին ուրիշ մեկին, որին իրենք ցանկացան՝ անունով հայ եւ իրենց համապատասխանող⁵:

Եւ, այնուհետեւ, ամեն մեկն սկսեց իր սրտի ուզածն անել եւ օր-օրի բազմապատկեցին անհնարին չարությունները, հեքիաթ համարեցին առաքյալի ասածը, մտնելով յոթնապարիսպ Երիքովը⁶ ու կարծելով, թե այդպես կարող են ազատվել Աստծո բարկությունից, որ գալու էր:

Եւ, նախ, այնքան հպարտացան, մինչեւ որ սկսեցին չհավանել այլոց. ո՛չ մեծերին, ո՛չ փոքրերին, ո՛չ էլ անգամ միմյանց, այլ ամեն մեկը միայն իրեն հավանելով, ամբարտապան ընթացքով միշտ նույն վիճակում էր մնում:

Երկրորդը՝ նախանձն էր, որ ունեին միմյանց նկատմամբ՝ ընկերոջ առաջընթացի, թե՛ իմաստնաճալու, թե՛ ընթերցանության, թե՛ պճնվելու, թե՛ փառասիրության, թե՛ տներ կառուցելու կամ թե՛ ուրիշ այլ աշխարհական սնափառությունների դեպքում, տղամարդ թե կին ջանում էին ամեն ինչով ընկերոջից առաջ անցնել:

Երրորդը՝ առավել բարկությունն էր: Այնքան ինքնահաճ ու կամապաշտ էին դարձել, որ բնավ ուրիշներին չէին լսում. ո՛չ ծերերին եւ ո՛չ վարդապետներին, բայց միայն ամեն մարդ իր աչքին իմաստուն էր երեւում:

Չորրորդը՝ ծուլությունն էր համակել բոլորին, քանզի առանց աղախիմների ու ծառաների չէին մնում եւ հետիոտն եկեղեցի չէին գնում, ոմանք գրաստով էին գնում, ուրիշներն էլ գրաստից իջնել չէին ցանկանում, այլ ժամարարին եկեղեցուց դուրս էին կանչում,

Ավետարանը բարձրացնել տալով համբուրում եւ այդպես էլ նշխարը վերցնելով՝ գնում էին հանդեսների, թատրոն եւ ծիարչավարան:

Հինգերորդը՝ անչափ ազահությունը եւ ամենայն չարյաց արմատ՝ փողասիրությունը, քանզի այնքան ազահ էին, որ միմյանց բարիքն էին հափշտակում, նաեւ որք ու այրիներին էին զրկում. ժառանգությունն ու սեփականությունը կորզում ու իրենց վերցնում: Ջանում էին մեկը մեկից հարուստ լինել եւ ամբողջ կահկարասին, անոթներն ու սարքերը եւ հատկապես կանանց զարդերը, թե հնար կար, ամեն ինչ մաքուր ոսկուց էին պատրաստում:

Վեցերորդ՝ որկրամոլությամբ էլ էին շատ տարվել, քանզի երկիրը բարեբեր ու պարարտ էր եւ իրենք՝ մեծատուններ, ու օր-օրի տեսակ-տեսակ խորտակվելությամբ էին պարապում, ուտում եւ խմում զանազան ծաղկաբույր գինիներ՝ առակ-զրույցներով, երգ ու պարով, ուստի եւ աղբյուրի պես բխում էին պոռնկության մեղքերը:

Յոթերորդը՝ անհիշատակելի անբարոյականությունը, մանավանդ՝ ազգապղծությունը, որ զույքի ու սեփականության (ժառանգության) համար (աղջիկ կամ տղա) օտարին չէին տալիս, այլ իրենց մերձավորներին ըստ հին բարքերի:

Նաեւ բացահայտ եւ գաղտնի պոռնկությունը, որ կանանց բնական գեղեցկության պատճառով միշտ տարածված էր նրանց մեջ եւ դրանով էին զվարճանում առանց զղջալու: Ու նաեւ ուրախ էին զանազան չարությունների համար, մտքում կարծելով, թե հազար եւ մեկ եկեղեցիներով Աստված չի բարկանա մեզ վրա ու չի հիշի մեր մեղքերը, մոռանալով մարգարեի խոսքը, որ ասում է. «Որպիսի՞ տուն շինեցիք ինձ համար եւ որպիսի՞ հանգստյան տեղ. այս ամենն իմ ձեռքն արեց»⁷:

Եւ նրանք միշտ պարծենում էին եկեղեցիներով ու Աստծո համար բարեգործություն համարում, քանզի հազար եւ մեկ եկեղեցի ունեին եւ ամեն եկեղեցու մեկ ծիթհանք եւ մեկ այգի էին նվիրել՝ շեն մնալու համար⁸: Ահա այս պատճառով հպարտացան, անմտացան եւ ընկան կռապաշտության ու անձնապաշտության, ապա՝ ան-

հավատության եւ անօրինության մեջ, որին հետեւեց անզգամությունն ու լրբությունը ու սրանց հետ մատեն լկտիությունն ու հայհոյախոսությունը:

Ու այս ամենի վրա ավելացել էր մատեն օտարատյացությունը եւ բոլորովին չէին սիրում ուրիշներին, մինչեւ անգամ Աստծո հոգածությամբ եկող վարդապետներին ու խրատատուներին, որոնց բնավ չէին լսում ու չէին հավանում, այլ ծաղր ու ծիծաղի էին ենթարկում: Քանզի, ըստ պատմողների, երկու գրակալ ունեին. մեկը բարձր եւ մյուսը՝ կարճ: Ու երբ գալիս էր վարդապետ կամ քահանա, թե կարճահասակ էր՝ բարձր գրակալն էին դնում եկեղեցու առյանում, իսկ եթե բարձրահասակ էր՝ կարճն էին դնում: Եւ այսպես ծաղրում ու կատակում էին եւ անմիտ ծիծաղով ու քարոզողներին հեզնելով բարկացրին արարիչ Աստծուն: Եւ կամենում էր Տերն ամբողջովին վերացնել նրանց, բայց Աստծո ներողամտությունն այդ թույլ չէր տալիս: Քանզի Աստված չի ցանկանում մեղավորի մահը, այլ՝ նրա դարձն ու վերապրելը, եւ բուժումը չի տալիս առողջներին, այլ՝ հիվանդներին, որի համար էլ Հիսուսը եկավ ոչ թե արդարներին կոչելու, այլ՝ մեղավորներին:

Եւ քանի որ (Աստված) կամենում է, որ ամեն ոք ապրի եւ գաղեպի ճշմարտության ճանաչումը, ինչպես որ հմում էր, երբ կամենում էր ջրհեղեղով աշխարհը ողողել, մախ Նոյի միջոցով խրատեց, որ մարդիկ այդպիսի դառն մրուրը չըմպեն: Նույն կերպ եւ նինվեացիներին՝ մախ մարգարեի միջոցով զգուշացրեց ու, ապաշխարելուց հետո ներեց եւ պատուհասը վերացրեց: Նույն ձեւով եւ անեցիներին տեղյակ պահեց Հովհաննես վարդապետի միջոցով, որի մականունը Պլուզ⁹ է (որը Ներսեսի¹⁰ «Լույս անճառ» շարականն է գրել. «Հիշիր Տեր» շարականը եւս այս Հովհաննես վարդապետն է գրել):

Այս վարդապետը Սուրբ Հոգու ազդեցությամբ ելավ գնաց Անի՝ քարոզելու եւ խրատելու նրանց, որպեսզի դառնան մոլորությունից ու իրենց չար գործերից: Սրա համար Հովհաննես վարդապետը ե-

կալ հասալ Անի եւ գնալով Ավագ Եկեղեցին, գիշերեց այնտեղ, բայց ոչ ոք նրա անձի համար հոգ չտարալ եւ կամ մոտը չգնաց հարցովործի ու ողջունելու համար: Իսկ երբ լուսացալ, գնաց Եկեղեցի եւ (Ժամերգության Ժամանակ) հետին տեղը տվեցին նրան, եւ նա մնաց խոնարհությամբ, ապա հանգստի ժամին գնաց իր խուցը: Եւ բնալ ոչ ոք չգնաց նրա մոտ: Իսկ երեկոյան, երբ որ կերան, հղիացան ու հարբեցին, այն ժամանակ եկան վարդապետի մոտ եւ քանի որ հասակով կարճ էր, ուստի բարձր գրակալը դրեցին, որ երբ վեր ձգվի՝ ծաղրեն նրան: Իսկ նա, Սուրբ Հոգու շնորհիվ, բոլոր ընթերցվածները սերտած, առանց գրքի խոսում էր անսխալ ու ստույգ: Բայց եւ օր ու գիշեր խրատում էր մեծ հոգածությամբ, եւ նրանք բոլորովին չէին լսում ու մեղքերից չդարձան: Այդ պատճառով սաստիկ մահացություն սկսեց, քանզի աներեւութները, իբրեւ մարմնավոր երեւալով, բացահայտորեն խոցոտում էին մանուկներին՝ իրենց մայրերի գրկում, ոմանց՝ մահիճի մեջ, ոմանց՝ քնած, եւ ուրիշներին՝ արթուն, մինչեւ որ բնակչության երեք մասից մեկը մնաց:

Եւ երբ այս բոլոր հարվածները տեսան, փոքր-ինչ զգացվեցին, եւ քանի որ վարդապետը գնացել էր, հետեւից գնալով որոնեցին եւ գտնելով բերեցին ու պատվեցին եւ սկսեցին կեղծավորաբար «մեղա» ասել եւ խոստացան այնուհետեւ չմեղանչել:

Իսկ Հովհաննես վարդապետը սկսեց խրատել նրանց, զգուշացնել ու պատվիրել, ասելով. «Ձեր օգուտը դուք գիտեք, որոնեցեք լավը, որդյակներս, այսուհետեւ ձեր չարությունից իսպառ հրաժարվեք եւ ազգապղծություն մի արեք, որ Աստված հաշտվի ձեզ հետ»: Երբ այս լսեցին, շատ բարկացան, բռնությամբ վերցրին նրան ու բանտ դրեցին մի մութ ու գարշահոտ տեղ, ասելով. «Պատարագ արա եւ Աստծուն հաշտեցրու մեզ հետ, ինչպես որ ասում էիր, ապա թե ոչ, մեր ձեռքով կմեռնես»: Իսկ նա պատասխանեց եւ ասաց. «Ահա նորից բարկացրեցիք Աստծուն»: Բայց նրանք չէին լսում, եւ երկյուղից ճարահատ նա հանձն առալ պատարագ մա-

տուցել եւ դուրս գալով գնաց եկեղեցի: Եւ երբ թափորով դուրս եկավ խնկարկելու, այդ ժամանակ բուրվառից հուր դուրս եկավ եւ չորս հարյուր մարդ այրեց, ինչպես հնում Նադաբին ու Աբիուդին¹¹: Եւ իսկույն կրկին զղջալով՝ սուրբ վարդապետի ոտքերն ընկան եւ թողություն էին հայցում ու խոստանում ըստ ամենայնի մեղքերից դարձի գալ:

Եւ քիչ օրեր անցնելուց հետո կրկին սկսեցին այլ չարություններ գործել եւ պղծության ախտի մեջ թավալվել. տղամարդիկ կանանց էին տիրանում, եւ կանայք տղամարդկանց էին տրվում մոլեգին կրքով:

Այն ժամանակ կրկին Տերը բարկացավ եւ ուղարկեց չար գազաններ ու գայլերի նման այլակերպներ, որոնք գալիս էին գիշերով, մտնում տնից տուն եւ նորահարսներին ու փեսաներին, մանավանդ պատանիներին ու մանուկներին հափշտակելով տանում էին: Եւ (մարդիկ) կանուխ արթնանալով, տեսնում էին նրանց իրենց տներից դուրս, դռների առաջ հոշոտված, ոմանց՝ ձեռքը, ոմանց՝ ոտքը եւ ոմանց՝ գլուխը անդամահատված, իսկ ոմանք կիսամեռ ընկած էին դրսում արմաթաթախ ու դիվաթավալ:

Այդ ժամանակ ելան վարդապետին փնտրելու եւ նրան գտան մի գյուղում ու ոտքերն ընկան: Նրանց մեջ նաեւ մի կին կար, իր մինուճար որդու հետ, որը խոցոտված էր եւ գազանների կողմից անդամահատված: Լաց էր լինում կինը եւ աղաղակում վարդապետի առաջ ասելով. «Իմ հոգեւոր տեր, պահել էի քո բոլոր պատվիրանները եւ պիտի պահեմ մինչեւ մահ, ուրեմն օգնիր ինձ, քանզի (որդիս) մինուճար է»: Այդ ժամանակ վարդապետը, տեսնելով կնոջ հավատը, ինչպես քանանուհունը, Աստծո առաջ աղոթքի իջավ: Այն ժամանակ գազանները, որ հափշտակել էին տղայի մարմնի մասերը, բոլորի աչքի առաջ դրանք հետ բերեցին ու դրեցին վարդապետի առաջ: Եւ նա վերցնելով դրանք, դրեց ու շարեց ամեն մեկն իր տեղում ու սկսեց աղոթել առ Աստված, ասելով. «Տեր Հիսուս, ինչպես որ հարություն տվեցիր մինուճար որդուն Նային քաղաքում¹²,

նույն զորությամբդ եւ ողորմությամբդ էլ հարություն տուր սրան եւ կենդանացու, քանզի անմեղ է: Նաեւ թող մոտիկ եղողները տեսնեն Քո զորությունը եւ դառնան իրենց չարությունից»: Այն ժամանակ տղայի մարմինը «եռաց» եւ ոսկորը ոսկրին կպավ, եւ կենդանացավ ու հոգին ետ եկավ, ու հարություն առնելով ոտքի կանգնեց: Իսկ ովքեր շուրջբոլորն էին, երբ տեսան սքանչելագործությունը, ահից վարդապետի ոտքերն ընկան եւ մեղա էին կանչում: Ապա շտապով գնում բերում էին իրենց (հարազատների) դիակները վարդապետի առաջ ու աղաչում, որպեսզի հարություն տա:

Իսկ Յովհաննես վարդապետն աղոթք արեց եւ գոչելով ասաց. «Սրանցից ով որ անմեղ է, թող ապաքինվի, իսկ թե ոչ, թող Աստված դատաստան տեսնի ըստ իր կամքի»: Այն ժամանակ հանկարծակի նրանց վրա հարձակվեցին գայլերը եւ բոլորի աչքի առաջ պատառոտեցին շատերին, ու այս տեսնելով՝ մարդիկ ահից սարսափած ապշեցին եւ սկսեցին սաստիկ մեղա կանչել եւ հրաժարվել չար գործերից:

Բայց երեք ամիս անց մոռացան նախկին հարվածը եւ ասացին, թե այն պատահականություն էր, որ եղավ եւ ոչ թե մեր մեղքերի պատճառով էր: Ու կրկին սկսեցին մեղքերի մեջ թավալվել: Յովհաննես վարդապետը վերադարձավ եւ սկսեց քարոզել, ու երբ տեսան, որ կրկին հանդիմանում է իրենց, բարկացան եւ միմյանց ասացին, թե սա է մեր քայքայիչը: Եւ նենգ խորհուրդ հղացան՝ թմրեցնող լուծույթ խմեցնելով շշմեցրին նրան, ապա մերկացնելով սայլի մեջ դրեցին ու այսպես մերկ եւ խայտառակ քաղաքի մեջ շրջում ու փոքրից մեծ ծաղրում էին: Այնուհետեւ բերելով Ավագ եկեղեցու դռան մոտ՝ զամբյուղի մեջ դրած կախեցին, որ եկեղեցի մտնող-եկնողները տեսնեն: Եւ երբ սթափվեց թմրությունից ու զգաստացած՝ տեսավ իրեն այդ կերպարանքով, սկսեց հոգոց հանել ու դառնորեն լաց լինել: Եւ նրան իսկույն վար իջեցնելով բերով ծծեցին ու (քաղաքից) դուրս քշեցին ահաբեկելով եւ ասելով, թե այսուհետեւ

ոտք չդնես այստեղ եւ քեզ չտեսնենք, ապա թե ոչ՝ մեր ձեռքով անողորմաբար կմեռնես:

Եւ այս ամենը տեսնելով, Հովհաննես վարդապետը բարձրացավ մի բարձր բլրի վրա եւ անիծեց քաղաքը եւ ծուկնի գալով ասաց ու կրկնեց «Տեր, այլեւս երաշխավոր չեմ լինի (այս քաղաքի համար), այսուհետեւ ինչ որ կամենում ես, այնպես արա»: Եւ հանկարծ Աստծո սաստիկ բարկությունն իջավ ու սկսեց քաղաքը շարժել եւ պարիսպները տապալել: Այս տեսնելով, ամեն մարդ հապճեպորեն ու արագ-արագ ընթանալով, ամուր բռնելով ամեն մեկն իր ընտանիքի անդամների ու զավակների ձեռքերը, տարագիր դարձած հեռացավ՝ թողնելով քաղաքը, եւ եկեղեցիները, եւ ոսկեզօծ պալատները, եւ իրենց ծաղկավետ դաշտերը: Գնացին փախստականի պես, ճեղքելով կեսը դեպի Ջուղա¹³ եւ կեսը՝ Կասպից ծովի եզերքը, ոմանք՝ Վան եւ ուրիշները՝ Սիս, իսկ նրանք, որ անցան Կասպից ծովը, գնացին առընթեր նետողաց ազգին, որը մոգերից է¹⁴ եւ որին թաթար են ասում: Եւ թաթար խանից հրաման ստանալով, բնակվեցին Աղսարայ կոչվող վայրում, որն Աստրախանի մոտ է: Եւ շատ տարիներ չանցած՝ ճնշվելով նետողաց դաժանաբարո ազգից, պատվիրակ ուղարկեցին Կաֆայի լատին իշխանի մոտ, որը Ֆրանկ-Հիսար կոչվող բերդի մեջ էր եւ, պայման կապելով իշխանի հետ, հիմնովին գաղթեցին եկան Կաֆա, ոմանք՝ լեռնամիջի Ղրիմ, մյուսներն էլ անցան գնացին Լեհաստան եւ ուրիշներն էլ՝ Աքերման¹⁵:

Իսկ նրանք, որ Կաֆայում մնացին, սկսեցին եկեղեցիներ եւ վանքեր կառուցել, բայց որովհետեւ բոլորը չկարողացան բերդում տեղավորվել սրա փոքրության պատճառով, թաթարներն, ըստ իրենց բնիկ սովորության, գալիս ու հափշտակում էին նրանց որդիներին ու դուստրերին եւ տանում վաճառում: Եւ երբ մերոնք տեսան այս, մորից պայման կապեցին լատին իշխանի հետ եւ հին բերդին կից իրենց համար մոր բերդ կառուցելու իրավունք ձեռք բերեցին: Սկսեցին կառուցել շուրջ քառասուն տարի, մինչեւ ավարտեցին

մեծ պարիսպը եւ երեք տարի վայելեցին: Եւ երեք տարի անց (բերդը) թուրքը գրավեց:

Եւ իրենց Կաֆա գալու սկիզբը եղավ (Հայոց) 780 թվին (1331 թ.) եւ ըստ Կենարարի (Քրիստոսի ծննդյան)՝ հազար երեք հարյուր երեսունմեկին:

ԾԱՆՈԹԱԳՐՈՒԹՅՈՒՆՆԵՐ

1. Աբրահամ Կրետացին նման անստույգ տեղեկություն հայտնող միակ հեղինակն է: Հետաքրքիր է, որ Շիրակ անձնանուն հայ միջնադարյան աղբյուրներում ընդհանրապես չի հանդիպում: 14-րդ դարում հիշվում է մի «պարոն Շիրաք» (Մատենադարան, ձեռ. թիվ 7351):

2. Քետուրան Աբրահամի կինը դարձավ Սարայի մահից հետո եւ վեց զավակ ծնեց (Ծննդոց, ԻԵ, 1-3): Աբրահամ Կրետացին այս հիշատակությամբ ակնարկում է Բագրատունիների հրեական ծագման մասին ավանդությունը: Հետագա շարադրանքում նշված Հայոց Տիրան թագավորն իրականում Տիգրան Բ Մեծ (Ն.Ք. 96-55) թագավորն է:

3. Դատելով հետագա շարադրանքից, խոսքն Անիի վերջին գահակալ Գագիկ Բ -ի (1042-1045) մասին է:

4. Ակնարկվում են Անիի բյուզանդական առաջին կառավարիչներ Միքայել Իսսիտեսը եւ Կատակալոն Կեկավմենոսը:

5. Խոսքը Բագարատ Վիկացու մասին է: Ըստ Հովհաննես Սկիլիցեսի, Կոստանդին Դուկաս կայսրը «Անի է ուղարկում Բագարատ անունով ոմն հայազգի դուքս, որը խոստացել էր տեղի զորքերը եղածով ապահովել» (Հովհ. Սկիլիցես, Երեւան, 1979, էջ 211): Հավանաբար վերջինս քաջածանոթ էր Անիի կացությանը եւ կապերի մեջ էր քաղաքի ավագների հետ:

6. Քաղաք Հորդանանի մոտ, որն Աստծո շնորհիվ հեշտությամբ ընկավ հրեաների ձեռքն ու կործանվեց (Յեսու, 2, 1- 22):

7. Աստօծ խոսքերն են, որ հաղորդում է Եսայի մարգարեն (Եսայի, ԿԶ, 1-2):

8. Այն, որ Անի քաղաքի եկեղեցիներից շատերին ձիթհանք ու այգիներ են նվիրաբերված եղել, հայտնի է բազմաթիվ վիմագիր արձանագրություններից, բայց պատմիչներից ոչ մեկն այդ մասին չի գրում: Աբրահամ Կրետացու ժամանակ Անիի վիմագրերը չէին հրատարակված, եւ նա որեւէ գրավոր աղբյուրից չէր կարող այդ մասին իմանալ, ուստի մնում է եմթաղրել, որ այս մասին նա տեղեկացել է անեցիների սերունդների մեջ պահպանված ավանդազրույցներից:

9. Յովհաննես Երզնկացի (Պլուզ - կապուտաշյա) 1230-1293 թթ., նշանավոր գիտնական, մատենագիր, մեկնիչ, տաղերգու: 1268-ին վարդապետ է ձեռնադրվել, 1270-80-ական թվականներին Յայաստանի տարբեր վայրերում քարոզչությամբ է զբաղվել: Բազմարդյուն հեղինակ է, նաեւ հայտնի խրատախոս: Բացի Աբրահամ Կրետացուց, որեւէ այլ հեղինակի մոտ հիշատակություն չկա Յովհաննես Պլուզ Երզնկացու երբեւէ Անի գալու մասին: Սակայն հայտնի է, որ մեկ այլ Յովհաննես Երզնկացի վարդապետ 1340-1342 թթ. Անիում լինելով, այստեղից որոշ տոմարական աղյուսակներ է Երզնկա տարել (Կ. Մաթեոսյան, Անի, Ս. Էջմիածին, 1997, էջ 310, 363-364):

10. Յայոց կաթողիկոս Ներսես Մեծին նվիրված շարականի մասին է խոսքը: (Տե՛ս Գ. Յակոբյան, Շարականների ժանրը հայ միջնադարյան գրականության մեջ, Երեւան, 1980, էջ 273-281):

11. Նաղաբը եւ Աբիուղը Ահարոնի որդիներն էին, որ այրվեցին բուրվառից ելած կրակով (Ղեւտացոց, Ժ, 1-2):

12. Նկատի ունի այրի կնոջ միմուճար որդու հարությունը Նալին քաղաքում (Ղուկաս, Է, 11-16):

13. Բնագրում՝ «...ճեղքեալ կեսքն ի ճուղայ»: Ուշագրավ է, որ Ջուղա (ճուղա) տեղանունն, ըստ ժողովրդական ստուգաբանության, ծագում է «ճյուղ ա» ձեւից, իբրեւ՝ «Անիի մի ճյուղն ա»: Այս ավանդությունը տարածված է եղել հենց ջուղայեցիների շրջանում (Ա Այվազյան, Ջուղա, Երեւան, 1984, էջ 3-4): Չեռագրերի հիշատակա-

րաններում ջուղայեցիների մի մասի Անի-Շիրակից գաղթած լինելու վերաբերյալ որոշ տեղեկություններ են պահպանվել:

14. Այսինքն, մոգակրոն՝ հեթանոս:

15. Բնագրում՝ Աղքիրման: Երկի այս հատվածի սկզբնաղբյուրների եւ դեպքերի մանրամասների մասին տե՛ս Վ. Միքայելյան, Ղրիմի հայկական գաղութի պատմություն, Երեւան, 1964, էջ 69-82, 329, Ա. Աբրահամյան, Համառոտ ուրվագիծ հայ գաղթավայրերի պատմության, հ. Ա, Երեւան, 1964, էջ 122-125, 157-164:

ԱՆՃՆԱՆՈՒՆՆԵՐ ԵՆ ՏՈՒՃԱՆՈՒՆՆԵՐ

- Աբաս Բագրատունի թագ. - 10, 11, 23, 196
- Աբաս (պատարագ ստացող) - 78
- Աբեղյան Մանուկ - 173, 190, 191
- Աբլիաջ ամիրա - 192
- Աբրահամ Ա Կրետացի կթղ. - 6, 261, 262-265, 273
- Աբրահամ (Աստվածաշնչային) - 273
- Աբրահամ Բագնայրի վանահայր - 89, 91-93, 98
- Աբրահամ (Լոռեցի) - 76
- Աբրահամյան Ա. Ա. - 148
- Աբրահամյան Ա. Գ. - 170, 171, 180, 187
- Աբու Բաքր - 244
- Աբուլասվար Անիի ամիրա - 50, 51
- Աբուլասվար Դվինի ամիրա - 40, 115, 117, 126
- Աբուսահլ - 106
- Աբուսահլ թագ. - 13
- Ադամ - 176
- Ադամ քհ. - 246
- Ադոնց Նիկողայոս - 10, 148
- Ազիզ տիկին - 70, 74
- Աթանաս Տարոնացի - 173
- Ալեքս վաճառական - 92
- Աիխաթուն - 83
- Ալեքսիոս Ա կայսր - 183
- Ալիշան Ղեւոնդ - 59, 67, 98, 138, 140, 142, 156, 159, 180, 194, 196, 197, 214, 218, 221, 262
- Ալիշեր ամիրա - 226, 227
- Ալփասլան (Ալփ Արսլան) - 126, 127, 153, 156, 179-182, 184
- Ակինյան Ներսես - 60, 63, 101, 105, 106, 121, 126, 136, 138
- Ահարոն մագիստրոս - 107
- Աղբերոս - 93
- Աղբուղա (ծեռագիր փրկագնող) - 94
- Աղբուղա Ջաքարյան - 249
- Աճառյան Հրաչյա - 107
- Ամիրզա - 230-235
- Ամիր Երկաթ - 197
- Ամիր Հասան - 137
- Ամիր Սարգիս - 81
- Ամիր Սմբատ - 197
- Ամսալջան - 233
- Անանիա Ա Մոկացի կթղ. - 10, 12, 14, 17
- Անանիա Շիրակացի - 173, 175, 260
- Անանիա Հռոմոսի վանահայր - 194, 199
- Անանուն զրուցագիր - 217, 219
- Անաստաս Ակոռեցի կթղ. - 173
- Անդրեաս Հռոմոսի վանահայր - 194, 197, 199
- Անդրոնիկոս - 161, 162
- Աշոտ Ա Բագրատունի թագ. - 23
- Աշոտ Բ Երկաթ թագ. - 23, 111
- Աշոտ Գ Ողորմած թագ. - 10-13, 15, 23, 101, 112, 241
- Աշոտ Դ Բագրատունի թագ. - 22, 27, 28, 33, 35, 36, 39, 47, 73, 102, 103, 115, 117, 126, 135, 248
- Աշոտ Դսեղեցի - 197
- Աշոտ իշխանաց իշխան - 65
- Աշոտ մարզպան - 60-62
- Աշոտ Մսակեր - 239

- Ապիրատ - տե՛ս Գրիգոր Ապիրատ
Մագիստրոս
- Ապիրատ (եղբայր Բարսեղ Բ-ի) - 53,
56, 74, 77, 78, 137
- Ապիրատ (եղբ. Ն. Լամբրոնացու) - 125
- Ապիրատ (հայր Գրիգորիս վանահոր)
135
- Ապիրատ (հայր Շարափշահի) - 83
- Ապիրատ (հայր Ն. Շնորհալու) - 122-
124, 125, 134, 137
- Ապիրատյաններ - տե՛ս Հասանյաններ
- Ապլղարիպ Արծրունի - 165
- Ապլղարիպ (թոռ Գր. Մագիստրոսի)
136
- Ապլղարիպ Պահլավունի - 245
- Ապլղարիպ - (որդի Հասան Մագիս-
տրոսի) - 137
- Ապլջահապ (որդի Գր. Ապիրատի) -
113, 116, 118, 119, 121, 122, 124,
134, 136, 137, 139, 222
- Ապլջահապ (որդի Վասակի) - 124,
129, 137
- Ապուղամր Մագիստրոս - 74, 75, 78,
84, 136
- Ապուղամր (որդի Գրիգոր Ա եպս.-ի) -
88, 89, 94
- Ապուղամր (որդի Վահրամ Պահլա-
վունու) - 63
- Աջապահյան Միքայել եպս. - 7
- Առաքել (Բագնայրի միաբան) - 84, 99
- Առաքել (հայր Հովհաննեսի) - 96
- Առաքել Վառ Անեցի - 219, 228, 235,
260
- Առաքելյան Բաբկեն - 241
- Առյուծ - 95, 96
- Ասիլ - 95, 231
- Ասողիկ - տե՛ս Ստեփանոս Տարոնեցի
- Աստվածատուր (Բագնայր) - 85
- Աստվածատուր եպս. - 196
- Աստվածատուր (Հառիժ) - 202
- Ասուրաստան - 97
- Ավագ տիկին - 85
- Ավդալբեկյան Թադեոս - 87
- Ավետիս - 97
- Ավետիք Հռոմոնոսի վանահայր - 194,
199
- Ավետյաց Չեչկանց - 82
- Ատոմ Արծրունի - 43
- Ատտալիատես - 154, 155, 159
- Ատրներսեհ իշխան - 257
- Արագ Խաթուն - 230
- Արեւշատյան Սեն - 177
- Արիստակես Ա կթղ. - 21
- Արիստակես Լաստիվերցի - 11, 18,
20, 22, 24, 25, 31-34, 36, 39, 42-45,
166, 257, 263
- Արիստոտել - 177
- Արծրունիներ - 14,
- Արշակ - 85
- Արշակունիներ - 37, 142, 216
- Արտաշիր Օշականցի - 78
- Արքայություն - 76
- Բագարատ Վիսկացի - 241, 244, 273
- Բագրատ Դ Վրաց թագ. - 40, 223
- Բագրատունիներ - 9, 12, 14, 23, 36,
37, 111, 115, 116, 265
- Բակուրան - 137
- Բաղրամյան Հովհաննես - 155
- Բասմաջյան Կարապետ - 71, 78, 86,
87, 97

- Բարթիկյան Հրաչ - 27, 33, 37, 105, 152, 155, 159, 241
 Բարխուդարյան Սեդրակ - 99
 Բարսեղ Ա Անեցի կթղ. - 47-49, 53, 56, 113, 114, 123, 124, 126, 127, 129-135, 137, 172-174, 179, 223
 Բարսեղ Բ Անեցի եպս. - 52-57, 127, 137, 204, 223
 Բարսեղ Կեսարացի - 177
 Բարսեղ Յոռոմոսի վանահայր - 194, 199
 Բարսեղ Կեչառիսի վանահայր - 142, 147, 148
 Բարսեղ (միաբան Հառիճի) - 207
 Բարսեղ Շնորհալի - 256
 Բրոսսե Մարի - 155, 262
 Բուլխար վրդ. - 258

 Գագիկ Ա Բագրատունի թագ. - 10, 11, 15-17, 19, 21-26, 31, 60, 61, 102, 104, 105, 109, 138, 192, 239
 Գագիկ Աբասյան թագ. - 45, 66
 Գագիկ Բ Բագրատունի թագ. - 36-42, 45, 73, 120, 167, 222, 261, 273
 Գամաղիել վրդ. - 86, 98
 Գարեգին երեց - 89
 Գելան - 93, 99
 Գեորգ Ուռճացի վրդ. - 169
 Գեորգ (Գեորք) իշխան - 20, 108, 109, 110-113, 135, 137
 Գեորգ (Գորգ) քհ. - 104, 107
 Գեորգ Լոռեցի - 126
 Գեորգ Յոռոմոսի վանահայր - 194, 199
 Գեորգ (Մարգպետունի) - 112
 Գեորգ Ներսիսանց - 93

 Գեորգ վրդ. (Բագնայր) - 92, 93, 99
 Գեորգ քհ. - 245
 Գեորգի Ա թագ. - 24, 27, 31
 Գեորգի Գ թագ. - 248
 Գերսամ վրդ. - 79
 Գիշուկ - 76
 Գյուրպել - 163
 Գնտուն - 78
 Գոհարիկ - 96
 «Գողձախմատ» - 156, 158, 161
 Գող Վասիլ իշխան - 49, 156
 Գողիաթ - 132, 133
 Գոռ (Ենթադրյալ) - 112
 Գորամ - 254
 Գորգ Շիրակացի - 167
 Գորգիկ - 85
 Գրիգոր Ա Անիի եպս. - 74, 75, 78, 82, 84, 88, 89, 94, 98, 213
 Գրիգոր Ա Լուսավորիչ կթղ. 21, 37, 48, 52, 122, 123, 125, 129, 130, 140-142, 147, 151, 225
 Գրիգոր Ա Յոռոմոսի վանահայր - 194, 197, 199
 Գրիգոր Ակնագյուղեցի - 196
 Գրիգոր Անեցի - 176, 259
 Գրիգոր Ապիրատ Մագիստրոս - 20, 28, 47, 101, 102-122, 126-138, 143, 148, 157
 Գրիգոր Ապիրատ (որդի Հասան Մագիստրոսի) - 137
 Գրիգոր Արջո Առիճի վանահայր - 79
 Գրիգոր Բ Յոռոմոսի վանահայր - 197, 199
 Գրիգոր Բ Վկայասեր կթղ. - 37, 47, 48, 121, 124, 125, 129, 135, 137, 157, 172, 175

- Գրիգոր Գ Հռոմոսի վանահայր - 198, 199
- Գրիգոր Գ Պահլավունի կթղ. - 48-52, 122-125, 135, 137, 181, 187
- Գրիգոր Դ Տղա կթղ. - 52-54, 125, 136, 137, 157
- Գրիգոր Դարանաղեցի - 134
- Գրիգոր Ե Քարավեժ կթղ. - 54, 125, 137
- Գրիգոր Զ Ապիրատ կթղ. - 54, 55, 125, 137, 157
- Գրիգոր Է Անավարզեցի կթղ. - 149
- Գրիգոր իշխան (թոռ Գր. Ապիրատի) - 47, 53, 113, 118, 126-134, 137, 223
- Գրիգոր Թոքակերի որդի - 157
- Գրիգոր Խուլ - 157
- Գրիգոր Խուլցես - 94, 157, 231
- Գրիգոր Ծաղիկ - 73
- Գրիգոր (հայր Ամսայջանի) - 233
- Գրիգոր (հայր Գիշուկի) - 76
- Գրիգոր (Համգե) Պահլավունի - 60-62, 157
- Գրիգոր Հառիճեցի վրդ. - 176, 200, 201, 214, 215
- Գրիգոր Մագիստրոս Պահլավունի - 34, 35, 37, 38, 62, 65, 104, 104, 110, 111, 119, 121, 122, 126, 136, 138-148, 151, 155, 157, 176, 179
- Գրիգոր Մամիկոնյան - 237
- Գրիգոր Մանոնիկ - 157
- Գրիգոր Նազիանզացի - 177
- Գրիգոր (ոմն Բագնայրում) - 98
- Գրիգոր (ոմն Թալինում) - 249
- Գրիգոր ոսկերիչ - 197
- Գրիգոր (որդի Ազիզի) - 70, 74
- Գրիգոր (որդի Վահրամ Պահլավունու) - 63, 64
- Գրիգոր (պատարագ ստացող, 1262 թ.) - 90
- Գրիգոր Սյունիքի թագ. - 132
- Գրիգոր Սուփան - 157
- Գրիգոր վերակացու - 239
- Գրիգոր վրդ. (որդի Աբասի) - 157, 200, 209, 210, 214, 215
- Գրիգոր վրդ. (11-րդ դ.) - 240
- Գրիգորիս Արշարունի - 256
- Գրիգորիս կթղ. Եգիպտոսում - 122, 125
- Գրիգորիս վանահայր - 135
- Գրիգոր Պիխտ - 150-168
- Գրիգոր Տուսետորդի - 157, 202
- Գրիգոր քի. (հայր Սարգսի) - 82
- Գուրգեն թագ. - 106
- Դահմազ Ամթեցի - 196
- Դանիել Տիգրանակերտցի վրդ. - 194, 195, 199
- Դավիթ Անհաղթ - 177
- Դավիթ Անհողին թագ. - 17, 40
- Դավիթ գրիչ - 87, 99
- Դավիթ Դ Շինարար թագ. - 50, 186, 187, 189
- Դավիթ Թոռնիկյան եպս. - 49
- Դավիթ Կուրապաղատ - 60, 105
- Դավիթ Սոսլան - 244
- Դավիթ վարպետ - 254
- Դավիթ քի. - 208
- Դեոսկորոս - 35, 36
- Դինարիկ - 76
- Դիոգենես (Դեոթեն) տես Ռոմանոս Դ Դիոգենես
- Դիոնիսիոս Արիոպագացի - 177
- Դվալ - 69, 75

- Դուլուս - 91
- Ելխագի - 132, 133
- Ելտկուզ աթաբեկ - 224
- Եղիա Ալաշկերտցի վրդ. - 194, 199
- Ենովք վրդ. - 18, 258
- Եսայի մարգարե - 100, 273
- Եվսեբիոս Կեսարացի - 176, 177
- Երեմիա Անձրեւիկ - 176, 259
- Երեմիա Մարմաշենի վանահայր - 240
- Երեմյան Սուրեն - 216
- Եփրեմ եպս. - 143
- Զաքարե ամիրսպասալար - 56, 77, 80, 81, 200, 203, 204, 206, 210, 213, 227, 239
- Զաքարիա (որդի Շահնշահ Ա-ի) - 81, 90
- Զաքարիա Քանաքեռցի - 216, 218, 233
- Զաքարյաններ - 56, 74, 200, 203-206, 213, 227, 229, 234, 249, 255
- Զմրուխտ Խաթուն - 81
- Զորավար - 125
- Էբրիանոս - 92
- Էփրիկյան Ա. - 198
- Էփթիմ - 163
- Թագեր - 92
- Թագուհի - 82, 83
- Թագուհի (կին Բակուրանի) - 137
- Թադեոս (հայր Յովհաննեսի) - 96
- Թաթուլ (Տեկոր) - 22
- Թաթուլ (Բագնայր) - 97
- Թաճեր - 85
- Թաճեր (1262 թ.) - 89
- Թամամ - 92
- Թամար (կին Վահրամ հեջուբի) - 211, 212
- Թամար (պարոն) - 231
- Թամար Վրաց թագուհի - 244
- Թայիկ Թագուհի - 81, 82, 84, 89, 90
- Թանգուք - 230, 231
- Թեոդորոս Քոթենավոր - 256, 257
- Թետեց - 92
- Թիերի Ժան-Միշել - 194, 197
- Թոռնիկյաններ - 101, 126
- Թորամանյան Թորոս - 67-69, 194, 195, 216, 236, 250
- Իասիտես (Ասիտ) - 41, 273
- Իգնատիոս Յոռնոսցի - 80, 193
- Իգնատիոս Շնորհալի - 256
- Իշխան (որդի Վահրամ հեջուբի) - 211, 213
- Իսրայել գրիչ (Անիում) - 92
- Իսրայել գրիչ (Բագնայրում) - 92, 99
- Իվանե Ա Զաքարյան - 56, 80, 81, 200, 239
- Իվանե Բ Զաքարյան - 249
- Լեո - 195, 262
- Լեւոն Բ թագ. - 53-55
- Լիկոս - 136
- Լիպարիտ վրաց իշխան - 107
- Լիպարիտ Օրբելյան - 148
- Լոռիս-Մելիքով - 216
- Լորան Ժան - 153, 154, 156
- Լուսոտ Անեցի - 214
- Խաթուն (ղուստր Վահրամ Յեջուբի) -

- 211, 212
 Խամարտող - 86
 Խաչատուր Ա Յոռոմոսի վանահայր - 194, 199
 Խաչատուր Անեցի - 176, 259
 Խաչատուր Անտիոքի դուքս - տե՛ս Գրիգոր Պիխտ
 Խաչատուր Բ Յոռոմոսի վանահայր - 198, 199
 Խաչատուր դարապետ - 258
 Խաչատուր շինական - 91
 Խաչատուր վրդ. - 255
 Խաչեղբայր - 85
 Խաչերես Լոռեցի - 76
 Խաչերես (հայր Մամ Խաթունի) - 77
 Խաչերես (պատարագ ստացող) - 79
 Խաչերես (որդի Վարդի) - 84
 Խաչերյան Լեւոն - 62
 Խաչիկ Ա Արշարունեցի կթղ. - 14, 15
 Խաչիկ Բ Անեցի կթղ. - 38, 39, 42-46
 Խաչոտ (հայր Սարգսի) - 93
 Խաչոտ (միաբան Հառիճի) - 207
 Խաչոտ (նվիրատու Բագնայրի) - 95
 Խաչտուր - 93
 Խզիլ Արսլան - 224, 225
 Խոռաս ավագ - 80-82, 84, 90, 91
 Խոռաս կրտսեր - 90, 91, 92
 Խոռասյաններ - 81
 Խորեն - 85
 Խոցադեղ - 79
 Խոցադեղ (ազգական Ալեքսի) - 92
 Խուրթլու Խաթուն - 80, 197
 Խուրթ - 77
 Կանսարականներ - 238, 250, 251
 Կատա (պատարագ ստացող) - 79
 Կատակալոն Կեկավմենոս - 41, 107, 273
 Կատրամիդե (դուստր Աշոտ Դ-ի) - 117
 Կատրամիդե թագուհի - 15, 17, 19, 239
 Կարապետյան Սամվել - 78
 Կըզըլ Արսլան - 244
 Կիրակոս Գանձակեցի - 33, 59, 169, 183, 186, 190, 191, 219, 221, 148
 Կյուրեղ Ալեքսանդրացի - 177
 Կյուրեղ Երուսաղեմացի - 188
 Կյուրիկե Ա թագ. - 48
 Կյուրիկե (պատարագ ստացող) - 83
 Կյուրիկյաններ - 82, 210
 Կոստանդ Յոռոմյանց - 79
 Կոստանյան Կարապետ - 64, 142
 Կոստանդին Թ Մոմոմախ կայսր - 40, 120, 140, 142, 145
 Կոստանդին Ժ Դուկաս - 151, 273
 Կոստեր Ծմակեցի - 87
 Կութել - 83
 Կուկոր - 120
 Հագարբեկ - 90
 Հագարդեղ - 97
 Հագարյան Հ. - 206
 Հակոբ Սանահնեցի - 26, 29-32, 263
 Հակոբ Սյունյաց եպս. - 17
 Հակոբյան Թադեոս - 172, 262
 Հակոբյան Վազգեն - 10
 Համազասպ Ա Հառիճի վանահայր - 214, 215
 Համազասպ Բ Հառիճի վանահայր - 210, 214, 215
 Համավար (Համավոր) եպս. - 140, 141
 Համել - 97

- Հայկազն (Հայկազուն) - 36, 37, 142
 Հասան (եղբայր Բարսեղ Ա-ի) - 129, 137
 Հասան իբն Մուհամմադ - 238
 Հասան Կողբացի - 97
 Հասան (հայր Գր. Ապիրատի) - 104, 105, 108, 109, 111-115, 129, 136-138, 143, 148
 Հասան (հայր Պարսիմոյի) - 77
 Հասան Սագիստրոս - 53, 136, 137, 223
 Հասան (որդի Սմբատի) - 113, 114, 137
 Հասան (պատարագ ստացող) - 83
 Հասանյաններ (Ապիրատյաններ) - 47, 52, 56, 74, 101, 120, 126, 134, 136, 179, 234
 Հարկելոր - 97
 Հարությունյան Վարազդատ - 251
 Հեթում Կոռիկոսցի - 157
 Հեթումյաններ - 101, 113
 Հնդուբեկ (Հնտուպեկ) - 94
 Հոհան Շիրակացի - 11, 19, 61
 Հովհան - 163
 Հովասափ կրոնավոր - 206, 207
 Հովհաննես Ա Զոռոմոսի վանահայր - 193, 194, 199
 Հովհաննես Անեցի - 176, 259
 Հովհաննես Անիի եպս. - 94
 Հովհաննես Բ Զոռոմոսի վանահայր - 194, 199
 Հովհաննես Բջնիի եպս. - 142, 147, 149
 Հովհաննես Գ Զոռոմոսի վանահայր - 197, 199
 Հովհաննես գրիչ (Հառիճ) - 208-210
 Հովհաննես գրիչ (Հոռոմոս) - 208
 Հովհաննես Գ Օձնեցի կթղ. - 256, 257
 Հովհաննես Դ Զոռոմոսի վանահայր - 197, 199
 Հովհաննես Դ Ովայեցի կթղ. - 109
 Հովհաննես Ե Դրասխանակերտցի կթղ. - 112, 237, 247
 Հովհաննես Ե Զոռոմոսի վանահայր - 199
 Հովհաննես Երզնկացի Պլուզ - 268, 272, 274
 Հովհաննես Երզնկացի (14-րդ դ. կեսեր) - 274
 Հովհաննես Կոզեռն - 30, 34, 119, 155, 187, 263
 Հովհաննես Հառիճի վանահայր - 211, 212, 214, 215
 Հովհաննես (ոմն Բազմայրույն) - 98
 Հովհաննես Ոսկեբերան - 177
 Հովհաննես (որդի Առաքելի) - 96
 Հովհաննես (որդի Թադեոսի) - 96
 Հովհաննես քի. (որդի Կոստանդի) - 79
 Հովհաննես Սանահինի վանահայր - 210
 Հովհաննես Սարկավազ - 59, 131, 169-191, 201, 258, 259
 Հովհաննես Սկիլիցես - 31, 155, 158, 159, 166, 273
 Հովհաննես Սմբատ քազ. - 22, 23, 26-29, 31-40, 102, 109, 115, 116, 119, 120, 135, 136, 192, 201, 221, 222, 239, 261
 Հովհաննես Սյունյաց եպս. - 17
 Հովհաննես վրդ. (Հոռոմոս) - 197
 Հովհաննես քարզործ - 249
 Հովհաննիսյան Մ. - 220

- Հովսեփ գրիչ - 86, 99
 Հովսեփ (խաչեր քանդակող) - 94, 99
 Հովսեփ Ընծեցի - 30
 Հովսեփ Հռոմոսի վանահայր - 194, 199
 Հովսեփ վրդ. (Հաղբատ) - 100, 201
 Հովսեփ փակակալ - 89, 91, 98, 99
 Հովսեփյան Գարեգին - 138, 142-144, 148, 208
 Հռիփսիմյան կույսեր - 19, 20
 Հրահատ Կամսարական - 238
 Հրանուշ - 76

 Ղազար - 85
 Ղազար (հայր Ալեքսի) - 92
 Ղազար տանուտեր - 209
 Ղազարոս (Ավետարանական) - 77
 Ղարաչա ամիրա - 224, 225
 Ղարիբ Մագիստրոս - 74, 75
 Ղուկաս գրիչ - 208
 Ղուլյան Արտակ - 12

 Մաթեոսյան Արտաշես - 43
 Մաթուսաղա վրդ. - 257
 Մախազ - 217, 218, 221
 Մահմուդ - 180, 182
 Մաղազ Խաթուն - 230, 231
 Մամլան ամիրա - 60
 Մամ խաթուն - 77
 Մամախաթուն - 93
 Մամիկոնյաններ - 238
 Մամուզ - 83
 Մամքան - 83
 Մամքան (մայր Ապուղամրի) - 88, 89
 Մանանդյան Հակոբ - 128
 Մանասե գրիչ - 85, 99
 Մանկասար (Սաղունյան) - 197

 Մանկիկ երեց - 89
 Մանգտավազ Մշեցի - 86
 Մանուել Ա Կոմնենոս կայսր - 53
 Մանուել Բջնեցի - 110, 111
 Մանուչե Անիի ամիրա - 19, 47, 50, 118, 126-128, 133, 223
 Մառ Նիկողայոս - 262
 Մատթեոս ավետարանիչ - 93
 Մատթեոս Պողոսյան աբեղա - 200
 Մատթեոս Ուռեհայեցի - 10, 23, 26, 29-31, 35-37, 39, 43, 46, 47, 107, 108, 112, 114, 115, 119, 124, 132, 133, 150-156, 163, 164, 167, 184, 257, 258
 Մարգարե գրիչ - 79, 99, 207, 229
 Մարեմիկ - 137
 Մարգպանյան Հովհ. - 58, 80
 Մարիա թագուհի - 162
 Մարիամ արքայադուստր - 66
 Մարիամ (դուստր Ապիրատի) - 137
 Մարիամ երեցկին - 89
 Մարկոս գրիչ - 188
 Մելիք Աշրաֆ - 233
 Մելիք-Օհանջանյան Կարո - 169
 Մելիքշահ - 48, 132, 180-187, 259
 Մեհրեան շինական - 91
 Միխել (պատարագ ստացող) - 79
 Միրունյան Կ. - 171
 Միքայել Է Ղուկաս - 153, 157, 165
 Միքայել (որդի Ջորավարի) - 137
 Միքայելյան Վարդգես - 262
 Մլեհ իշխան - 136, 137
 Մլքեր - 84
 Մխիթար Այրիվանեցի - 59, 102, 105, 128, 169, 247
 Մխիթար Անեցի - 11, 28, 102, 103,

- 105, 107, 115, 116, 126, 128, 132,
176, 182, 184, 201, 208, 224
Մխիթար Բագնայրեցի վրդ. - 72, 99
Մխիթար Գոշ - 178
Մխիթար «Թորոսոնց» - 96
Մխիթար Հոռոմոսի վանահայր - 194, 199
Մխիթար (նվիրատու Բագնայրի) - 69, 75
Մխիթար (նվիրատու Հառիճի) - 211
Մխիթար Չեչկանց - 82, 219, 228, 235
Մխիթար ռայիս - 97
Մխիթարիկ - 258
Մխիթարյանց Աբել - 193, 214
Մնացականյան Ասատուր - 178
Մորիկ կայսր - 217
Մովսես Բ Եղիվարդեցի կթղ. - 173
Մովսես Եկեղեցապան - 238
Մովսես Խորենացի - 177
Մովսես քի. (Արուճ) - 246
Մովսես քի. (Բագնայր) - 80
Մովսիսյան Ա. - 172
Մրվան - 78
Մուքաֆյան Կլոդ - 46
Մուկաթլ - 73
Մունաջջիմ Բաշի - 117
Մուշեղյան Խաչատուր - 243
Մուրադյան Պարույր - 164, 213, 241,
242

Յայսմիկ - 97
Յովհաննես - տե՛ս Հովհաննես
Յորգա Ն. - 164, 165
Յուզբաշյան Կարեն - 23

Նաթանայել եպս. Հավուցթառեցի -
17, 108, 109, 229-233, 235
Ներսես Կամսարական - 237, 238
Ներսես Ա Մեծ կթղ. - 268, 274
Ներսես Գ Շինող կթղ. - 19
Ներսես Դ Շնորհալի կթղ. - 52, 93, 99,
122-124, 134, 137, 156, 256
Ներսես Ե Աշտարակեցի կթղ. - 198
Ներսես Լամբրոնացի - 53, 55, 125
Նիկեփոր Բրիեննիոս - 162
Նիկեփորիցես - 153
Նիկեփորոս Վոտանիատես - 153
Նունե - 131

Շադդադյաններ - 50, 51, 70, 126,
131, 172, 189, 200, 205, 214,
222-224, 226, 243, 248
Շահ Աբաս - 255
Շահ Արմեն - 225
Շահեր Կիրակոս - 97
Շահանդուխտ - 125
Շահխաթունյանց Հովհ. - 142
Շահնշահ Ա Ջաքարյան - 81, 90, 91,
206, 213, 214
Շահնշահ Գ Ջաքարյան - 94, 232, 233
Շահնշահ Շադդադյան - 248
Շապուհ Բագրատունի - 217
Շարափշահ - 82-84, 89, 90
Շեմս ադ-դին Իլդեգիզ - 244
Շերան (Շերանիկ) - 219, 228, 229, 235
Շիրաք (պարոն) - 273
Շրվանշահ Ջաքարյան - 94, 231-233
Շուշան իշխանուհի - 238

Չամչյան Միքայել - 112, 152, 155
Չորտուանել - 137

Պահլավունիներ - 36, 37, 52, 62, 66,
67, 75, 101, 113, 120, 122, 126,

- 135, 141, 179, 203
 Պարոն (որդի Գր. Խուցեսի) - 94, 95, 231
 Պարոն (որդի Գ. Ներսիսանցի) - 93
 Պարսիմո - 77
 Պետրոս Ա Գետադարձ կթղ. - 21, 22, 25-27, 29, 30, 32-45, 47, 72, 73, 102, 120, 143, 176, 187, 258
 Պետրոս Ա Յառնիճի վանահայր - 201, 208, 214, 215
 Պետրոս Ա Յոռնոնոսի վանահայր - 55, 79, 194, 199
 Պետրոս առաքյալ - 73
 Պետրոս Բ Յառնիճի վանահայր - 208, 215
 Պետրոս Բ Յոռնոնոսի վանահայր - 198, 199
 Պետրոս (որդի Պողոսի) - 97
 Պողոս առաքյալ - 73
 Պողոս Բագնայրի վանահայր - 95, 98, 100
 Պողոս երեց - 85
 Պողոս (հայր Պետրոսի) - 97

 Ջաջ - 197
 Ջոջիկ - 163

 Ռայբիկ գրիչ - 78, 99
 Ռատ Երեւանցի - 96
 Ռոմանոս Դ Դիոգենես - 153, 156-158, 161, 162
 Ռուբինյաններ - 113

 Սադունյաններ - 197
 Սահակ Գ Զորափորեցի կթղ. - 257

 Սահակ Պարթեւ - 131
 Սամվել Անեցի - 6, 10, 15, 19, 23, 36, 43, 50, 51, 58, 59, 108, 117, 123, 130, 150, 156, 169, 176, 180-187, 219-223, 229, 247, 259, 260
 Սայաթ բեկ - 255
 Սասնայ ավագ - 80, 81, 90-92, Սասնայ կրտսեր - 90, 91
 Սարա - 273
 Սարգիս Ա Անիի եպս. - 56, 77, 78, 137
 Սարգիս Ա Յոռնոնոսի վանահայր - 194, 196, 199
 Սարգիս Ա Սեւանցի կթղ. - 15-23, 25-27, 39, 104, 187, 257
 Սարգիս Անեցի վրդ. - 18, 38, 258
 Սարգիս ավագերեց Ծմակի - 82
 Սարգիս Բ Անիի եպս. - 89, 91
 Սարգիս Բ Յոռնոնոսի վանահայր - 194, 199
 Սարգիս Գ կթղ. - 196
 Սարգիս գրիչ (Բագնայր) - 95, 99
 Սարգիս կրոնավոր (Յոռնոնոս) - 197
 Սարգիս Կունդ - 176
 Սարգիս ճոն - 215
 Սարգիս (հայր Տիկնացտիկնոջ) - 120
 Սարգիս (միաբան Յառնիճի) - Սարգիս (նվիրատու Բագնայրի) - 97
 Սարգիս Շնորհալի - 256
 Սարգիս (որդի Գ. Ներսիսանցի) - 93
 Սարգիս (որդի Խաչոտի) - 93
 Սարգիս (որդի Վահրամ հեջուրի) - 211, 213
 Սարգիս (սուրբ) - 86
 Սարգիս վրդ. (Յոռնոնոս) - 197
 Սարգիս Տոնկաց Անեցի - 261
 Սարգիսյան Ներսես - 59, 71, 76, 79,

- 97, 197
 Սարգսյան Գագիկ - 104
 Սարի - 28, 115, 116
 Սարկավազ (նվիրատու Բազմայրի) - 96
 Սարկավազ (Ս. Անեցու որդի) - 260
 Սարչուկ - 182
 Սեդա Պահլավունի - 65, 66, 70, 72, 119
 Սեդա (Պարսիմոյի ազգական) - 77
 Սենեքերիմ Սյունիքի թագ. - 127, 128, 131, 132
 Սեն Մարտեն - 140
 Սերենոս (Սերինոս) - 222
 Սերոբ (Երեւանցի) - 96
 Սիմեոն Ա Բազմայրի վանահայր - 76, 78, 84, 98
 Սիմեոն Բ Բազմայրի վանահայր - 82-84, 92, 98
 Սիմեոն գրիչ - 88, 89, 90, 92, 99
 Սիմեոն Երեւանցի կթղ. - 37, 139
 Սիմեոն երեց - 97
 Սիոն Բավոնեցի կթղ. - 247
 Սիսման - 85
 Սիրվարդ - 79
 Սմբատ Ա Բագրատունի թագ. - 11, 23, 255
 Սմբատ Բ Բագրատունի թագ. - 11, 12, 14, 15, 19, 23, 239, 240, 243, 244, 254
 Սմբատ Բագրատունի (9-րդ. դ.) - 239
 Սմբատ (հայր Հասանի) - 113, 114, 137
 Սմբատ Մագիստրոս - 20, 58-67, 123
 Սմբատ պատրիկ - 66
 Սմբատ պարոն - 246
 Սմբատ Սպարապետ - 113, 116, 151
 Սողոմոն Հռոմոսի վանահայր - 194, 199
 Սոս - 78
 Սոսթենես Մարմաշենի վանահայր - 140, 145, 240
 Սոսթենես (միաբան Հռոմի) - 209
 Սոսթենես քհ. - 245
 Ստեփանոս Աղվանից կթղ. - 48
 Ստեփանոս Ա Հռոմոսի վանահայր - 194, 195, 199
 Ստեփանոս Բ Հռոմոսի վանահայր - 194, 199
 Ստեփանոս Գ Սեւանցի կթղ. - 13, 14
 Ստեփանոս Բազմայրի վանահայր - 73, 98
 Ստեփանոս գրիչ (Բազմայր) - 93, 99
 Ստեփանոս Իմաստասեր - 260
 Ստեփանոս Մանուկ - 256
 Ստեփանոս Տարոնեցի (Ասողիկ) - 11, 12, 14, 15, 17, 18, 23, 60-62, 187, 192, 247
 Ստեփանոս Օրբելյան - 13, 17, 102, 117, 128, 131, 132, 148, 149, 257
 Սուլթան Անիի ամիրա - 226, 248, 251
 Վահան Ա Սյունեցի կթղ. - 12-14
 Վահրամ Զաքարյան - 231
 Վահրամ (հայր Սմբատ Մագիստրոսի) 60-62, 65, 66
 Վահրամ հեջուբ (ամիրա) - 211-214

- Վահրամ (հորեղբ. Ն. Շնորհալու) - 122, 125
- Վահրամ Չեչկանց - 82, 83
- Վահրամ Պահլավունի - 20, 36, 60-65, 74, 75, 89, 103, 136, 140
- Վահրամ (որդի Գրիգոր Ա եպս.-ի) - 88
- Վաղթանգ իշխան - 240
- Վանական եպս. - 140, 141
- Վանենի - 137
- Վանինե - 137
- Վասակ, Անտիոքի դուքս - 136, 151, 162
- Վասակ (հորեղբ. Ն. Շնորհալու) - 122, 125, 137
- Վասակ Պահլավունի - 37, 65, 109, 121, 122, 139, 140
- Վասակ (որդի Գր. Ապիրատի) - 47, 113, 116, 118, 126-130, 133, 137, 139, 222, 223
- Վասակ (որդի Խոռասի) - 81
- Վասակ Սյունիքի թագ. - 17
- Վասիլ Բ կայսր - 17, 26, 31, 32, 33, 105, 110,
- Վասիլ (եղբայր Գրիգոր Գ-ի) - 50, 125, 137
- Վասիլ (որդի Ջորավարի) - 137
- Վասիլ (պանդոկատեր Անիում) - 73
- Վարդ - 84
- Վարդաշահ Աշնակցի - 97
- Վարդե տիկին - 92
- Վարդան Այգեկցի - 178
- Վարդան Արեւելցի - 9, 11, 19, 21, 23, 28, 31, 102, 126-128, 131, 150, 152, 163, 164, 167, 169, 218, 225-228
- Վարդան Հառիճի վանահայր - 207, 215
- Վարդան Սանահնեցի - 258
- Վարդան Օձնեցի վրդ. - 195, 199
- Վարդանյան Ռաֆիկ - 43
- Վարդանյան Վրեժ - 62, 124
- Վարդառյուծ - 85
- Վարդերես - 209
- Վեստ Սարգիս - 36, 118-120, 136, 137, 220-223
- Տալիթիա տիկին - 79
- Տեր-Ղեւոնդյան Արամ - 117
- Տեր-Միքեյլյան Արշակ - 150
- Տեր-Պետրոսյան Լեւոն - 25, 113, 150, 162
- Տիգրան Բ թագ. - 273
- Տիգրան Հոնենց - 88, 92, 246
- Տիկին - 93
- Տիկնացտիկին - 118, 119, 137
- Տիկնացտիկին (ղուստր Սարգսի) - 120
- Տիրամայր - 79
- Տիրան թագ. - 265
- Տիրանց - 85
- Տիրանուն Կապանեցի վրդ. - 18, 258
- Տոկարսկի Նիկոլայ - 252
- Տրդատ Ճարտարապետ - 14, 19
- Տրդատ քհ. - 245
- Տուղրիլ Բ - 182
- Տուղրիլ բեկ - 180, 182
- Տուտի - 240

Ուխտատուր - 240	Քրիստափոր վրդ. - 85, 86, 98
Փառանց - 82, 83	Քրիստոս - 18, 25, 34, 39, 66, 74, 77,
Փատլուն Անիի ամիրա - 51	80, 86, 89, 94, 111, 138, 141, 185,
Փատլուն Գանձակի ամիրա - 128	191, 201, 212, 215, 230, 244, 249,
Փիլարտոս Վարաժնունի - 164	268, 270
Փիլոն Ալեքսանդրացի - 177	Քույրիկ - 97
Քասունի Երվանդ - 154, 156	Օմայաններ - 245
Քատուրա - 265, 273	Օշին իշխան - 125
Քրիստափոր (Թալին) - 249	Օրմանյան Մաղաքիա - 13, 20, 22, 39,
Քրիստափոր (միաբան Հառիճի) - 209	43, 52, 55, 173, 192, 198, 256

Տեղանուններ

- Ագարակ - 96, 97
 Ադամա - 165
 Ախուրյան գետ - 19, 96, 216-218, 255
 Ակին - 97
 Ակնագյուղ - 196
 Աղբրի ձոր (Արուճ) - 246
 Աղթամար - 12, 14, 49
 Աղի աղբյուր - 92
 Աղսարայ - 271
 Աղվանք - 48, 54
 Ամանոս - 159
 Ամբերդ - 204, 223
 Այգեստան (Վան) - 250
 Այրարատ - 219
 Այրիվանք - 196
 Անդրիուն բերդ - 151, 152, 157
 Անի - 5, 6, 9-17, 19-21 եւ այլուր
 Անի-Շիրակ - 70, 166, 200, 274
 Անիի Աբուղամրենց Ս. Գրիգոր եկ. - 95
 Անիի Բեխենց վանք - 79, 207, 229
 Անիի Մայր տաճար (Կաթողիկե) - 12, 14, 15, 19, 20, 25, 36, 47, 50, 51, 68, 184, 189, 201, 241, 244, 268
 Անիի Ներքին բերդ - 222
 Անիի Ս. Առաքելոց եկ. - 53, 63, 75,
 Անիի Ս. Գրիգոր (Գագկաշեն) եկ. - 19
 Անիի Ս. Գր. Լուսավորիչ վանք (Տ. Դոնենցի) - 88, 246
 Անիի Ս. Դռիփսիմյանց եկ. - 19
 Անիի Ս. Սարգիս եկ. - 70
 Անիի Ս. Փրկչի եկ. - 245
 Անիի Փոքր Կաթողիկե - 11, 12
 Անիի «Քահանենց» եկ. - 95, 96
 Անիուն պարսպի դռներ.
 Ավագ դուռ - 16
 Գաղտ դուռ - 84
 Կարուց դուռ - 96
 Ջորդուռ - 96
 Անիուն տներ, կրպակներ եւ այլն.
 Թորոսանց կուղպակ - 82
 «Հատալրինիկ» ջրաղաց - 96
 Պիչարենց հյուրատուն - 87
 Սեւքթենց տուն - 83
 Վասիլի փնդուկ - 73
 Քարզգենա տներ - 82
 Անիուն փողոցներ.
 Բազազնոց - 77, 92
 Նալպանդնոց - 84
 Սառաճ փողոց - 83
 Ս. Առաքելոցի զուկակ - 75, 76
 Փողոցկտեր - 77, 82
 Անտառուտ - 204
 Անտիոք - 54, 128, 150-156
 Անտիոք (Իսավրիայի) - 153, 156, 163
 Աշնակ - 85, 90, 91, 97
 Աշոտոնց այգի - 78
 Առան - 128
 Առիճք - 97
 Աստրախան - 271
 Արագածոտն - 96, 204, 256
 Արագածոտնի Ս. Աստվածածին վ. - 257
 Արարատ լեռ - 252
 Արարատյան դաշտ - 160, 242
 Արարատյան մահանգ - 149, 255
 Արգինա - 12, 14, 15, 172, 257

- Արգիմայի Կաթողիկե եկ. - 14
 Արեն - 247, 248
 Արզականի Ս. Ստեփանոս եկ. - 104
 Արծն - 39, 42, 236, 258
 Արճեշ - 229
 Արշարունիք - 14, 219, 256
 Արջո Առիճ լեռ - 58
 Արջո Առիճ վանք - 5, 71, 75, 77, 79, 100, 216, 220
 Արուճ - 6, 202, 236-247, 251-255
 Արուճի Կաթողիկե եկ. - 237-240, 254, 255
 Աքերման - 272, 275
- Բագավան - 58
 Բագարան - 9, 58, 96
 Բագնայր - 5, 6, 20, 58-62, 64-69, 71-100, 119, 216
 Բագնայրի Ս. Աստվածածին եկ. - 67-69, 73, 76, 79, 82, 83, 85, 87, 89-94,
 Բագնայրի Ս. Գրիգոր եկ. - 70, 74
 Բագնայրի Ս. Երրորդություն եկ. - 71, 79, 80
 Բագնայրի Ս. Սիոն - 80
 Բագրեւանդ - 257
 Բասեն - 107
 Բերդի գլուխ - 104
 Բլար Խաչկա (այգի Արուճում) - 245
 Բյուզանդիա - 27, 33, 40, 106, 150, 167, 196, 255
 Բջնի - 35, 38, 109, 120, 139, 140-143, 145, 146, 148, 149
 Բուժական (Բուժան) - 140, 141, 146
- Գաբեղյանք - 219
 Գայլածոր (Ներքին Թալին) - 251
- Գայլառիճ գյուղ - 79
 Գանձակ - 128, 204
 Գարդման - 238
 Գետիկ - 206
 Գետոց վանք - 109
 Գլիձոր - 96
 Գյումրի - 200, 206
 Գողթ (Կոխթ) գյուղ - 109
- Դաշտաղեն - տե՛ս Ներքին Թալին
 Դարոյնք - 238
 Դվին - 10, 15, 28, 40, 41, 64, 109, 115, 117, 118, 135, 125, 225, 226, 227, 236, 242, 243, 247, 255
 Դրուց աշխարհ - 27, 28, 102, 115
- Եգիպտոս (Սյր) - 37
 Եդեսիա - 50, 151, 155
 Երասխ (Արաքս) - 76, 97, 252
 Երասխածոր - 219, 225, 227, 256
 Երեւան - 105, 109, 206, 246, 251
 Երզնկա - 274
 Երվանդաշատ - տե՛ս Մարմետ
 Երուսաղեն - 54
- Ջեյթուն - 228
 Ջոր - 252, 253
 Ջվարթնոց - 19
- Էջմիածին - տե՛ս Վաղարշապատ
 Էջմիածնի տաճար - 20
- Թալին - 6, 102, 103, 116, 206, 236, 237, 239-243, 247-255
 Թալինի Կաթողիկե եկ. - 238-240, 254
 Թալինի Ս. Աստվածածին եկ. - 237

- Թամիր - 96, 97
 Թավբլուր - 43, 45, 46
 Թեղենյաց այգի - 93
 Թեղենիս - 104
 Թեոդոսուպոլիս - 25
 Թլպաշար - 51
 Թրակիա (Ռոդոսթո) - 262, 265

 Իկոնիա - 51

 Լամբրոն - 165
 Լեհաստան - 271
 Լմբատավանք - 53, 204
 Լոռի - 48, 213

 Խաչեր - 104
 «Խաչին մարգ» հողամաս - 83
 Խաչկանց (այգի Արուճուն) - 246
 Խծկոնք - 5, 119, 123, 216, 220, 221, 260
 Խծկոնքի Ս. Սարգիս եկ. - 220, 221

 Ծամնդավ - 46
 Ծաղկունց գավառ - 140, 146
 Ծառաքար (Մաղասբերդ) - 6, 53, 119, 216-235, 260
 Ծառաքարի Ս. Գեւորգ եկ. - 220, 221
 Ծառաքարի Ս. Հովհաննես եկ. - 220
 Ծառաքարի Ս. Սեքենոս եկ. - 221, 222
 Ծմբո - 59, 62, 64
 Ծովք ամրոց - 50, 122, 134
 Ծմակ գյուղ - 82

 Կաղզվան - 133
 Կաղղուց գյուղ - 88, 89
 Կամրջաձոր - 21, 169
 Կապան - 128, 131

 Կասպից ծով - 271
 Կարին - 42
 Կարմիր վանք (Շիրակ) - 196
 Կարմիր վանք (Քեսուն) - 48-50, 256
 Կարնո դաշտ - 25
 Կարս - 9, 10, 11, 66
 Կաֆա - 262-265, 272, 273
 Կեչառիս - 20, 67, 103, 105, 107-109, 118, 120, 121, 123, 133, 134, 138-142, 145-149
 Կեչառիսի Ս. Գրիգոր եկ. - 104, 135, 138, 140, 141,
 Կեչառիսի Ս. Նշան - 141
 Կեչոր - 218, 224, 225, 234
 Կիլիկիա - 50, 52-55, 95, 125, 150, 152, 158, 160, 163, 165
 Կոշ - 204, 239, 246
 Կոշավանք - 239
 Կոստանդեանց (այգի Թալինուն) - 239
 Կոստանդնուպոլիս - 22, 24, 38-44, 160, 161, 198, 265, 265
 Կովարած (այգի Արուճուն) - 245
 Կոտայք - 104, 109
 Կունիրի - տես Գյումրի

 Հալեպ - 158-160
 Հաղբատ - 47, 48, 100, 114, 126, 129, 169-173, 183, 189-191, 196, 205, 207, 223, 229
 Հայաստան - 5, 15, 26, 42, 45, 46, 49, 52, 53, 55, 57, 87, 99, 105, 120, 121, 123, 127, 138, 172, 173, 192, 200, 203, 205, 219, 221, 236, 243, 250, 251, 255, 265, 265, 273
 Հայոց Տուն - 28, 37, 46, 48, 114, 130, 133, 188

- Հառիճ - 5, 6, 79, 200-214, 246
 Հառիճի Կաթողիկե (Ս. Աստվածածին)
 եկ. - 200, 202-204, 208
 Հառիճի Ս. Գրիգոր եկ. - 200, 202,
 204, 208, 214
 Հավուց թառ - 20, 108, 110, 111, 114,
 120, 123, 134, 229, 232, 235
 Հավուց թառի Կաթողիկե եկ. - 108,
 109, 135
 Հարունիե - 159
 Հարունիի դաշտ - 157, 159-161
 Հնդկաստան - 244, 254
 Հովհաննավանք - 233
 Հռոմոս - 5, 6, 27, 55, 56, 74, 79, 90,
 92, 99, 100, 192-199, 212, 213, 216,
 246
 Հռոմոսի Ս. Գեւորգ եկ. - 192, 193
 Հռոմոսի Ս. Շողակաթ եկ. - 192
 Հռոմոսի Ս. Հովհաննես եկ. - 192,
 193, 212
 Հռոմ - 140, 142
 Հռոմկլա - 52, 53, 55, 123
 Հորդանան - 273
 Զորավանք - 34
 Դրիմ - 262, 271
 Ելուտ (մարգ) - 83
 Մագուաց գյուղ - 80
 Մագուտն (այգի Արուճուն) - 246
 Մաղասբերդ - տես Ծառաքար
 Մաղարդավանք - 135
 Մանազկերտ - 153, 156, 161
 Մաստարա - 22
 Մարաշ - 152, 159
 Մարմաշեն - 5, 20, 37, 60-62, 75, 103,
 121, 123, 136, 140, 141, 145
 Մարմետ (Երվանդաշատ) - 76, 96, 97
 Մեծ Հայք - 28
 Միջագետք Հայոց - 38, 121, 136, 139
 Մսիս - 158, 165
 Մրեն - 5, 38, 216, 246, 248
 Մուլուքի հող - 93
 Նային ք. - 270, 274
 Ներքին Թալին - 247-251
 Ներքին Թալինի Ս. Սարգիս եկ. - 249
 Նիկիա - 141
 Նշենիկ - 151, 154
 Նորադուլիսիկ - 89
 Նորավանք - 88, 148
 Նորս - 89, 90
 Նփրկերտ - 106
 Շահկան հող - 97
 Շամիրամաձոր (Արունճ) - 246
 Շատիկ - 24
 Շիրակ - 7, 11, 12, 14, 21, 47, 94, 132,
 133, 150, 163, 166, 200, 202, 203-
 207, 213, 219, 236, 242, 245, 265,
 273
 Շիրակի Տուն - 31, 130, 151, 167
 Շիրակվան - 265
 Շիրակավան (Երազգավորս) - 9, 11,
 12, 83
 Շլիկ (այգի Արուճուն) - 245
 Շնջանկ - 82
 Շոկաթն - 140, 147
 Ովա գյուղ - 109

Պաղեստին - 265	Վերին թաղ (Արուն) - 246
Պապեռոն - 165	Վրաստան - 24, 50, 166
Պարսկաստան - 24, 166, 254	Վրկանից աշխարհ - 132, 133
Ջրծորիկ վանք - 92	Տայք - 30, 31
Ջուղա - 272, 274	Տաշիր - 17
Սաղար (այգի Արունում) - 245	Տարոն - 30, 121, 139, 142
Սամուսատ - 41	Տարսոն - 54, 160, 165
Սանահին - 35, 36, 180, 190, 205, 209, 210, 240	Տարսոնի դաշտ - 158, 159
Սանկտ Պետերբուրգ - 197	Տափկենց (այգի Բագարանում) - 96
Սասուն - 247	Տեկոր - 5, 107, 216
Սարդարապատ - 160	Տիգնիս - 91,
Սարվանդիքար (Սարվանդիկոն) - 158, 159	Տլուք - 50
Սեբաստիա - 33, 43-45	Տրապիզոն - 30, 31, 33, 228
Սելեկիայի լեռներ - 158	Տփղիս - 54
Սել լեռ - 156, 158, 159	Ուխտիք (Օլթի) - 225
Սել ծով - 31, 255	Ուղտանուտ այգի - 97
Սել քար բերդ - 42	Ուռընկար - 229
Սեւանի վանք - 13, 15, 34, 119, 155	Ուռհա - տես Եդեսիա
Սիս - 52, 54, 271	Ուրծ - 94
Սյունիք - 17, 54, 127, 128, 131, 132, 148, 256, 257	Փառիսոս - 169, 190
Սուրմառի - 222	Փարպի - 204
Վալտոլիվադի - 158	Փոքր Ասիա - 152
Վահանավանք - 132	Փոքր Հայք - 45
Վաղարշապատ (Էջմիածին) - 15, 19, 20, 193, 200, 232, 242, 262	Քաղին (Քաղենի) - 247, 248
Վան - 250, 271	Քաղկեդոն - 45
Վանքաձոր (Արուն) - 246	Քեղի (Գեղի) - 20, 108, 109, 112, 114, 135
Վասպուրական - 13, 30, 34, 35, 49, 140, 142, 146	Քեսուն - 48-50, 134, 175
Վարաժնունիք - 109	Քրիստափորի վանք - 248, 249
Վարդենց նորք այգի - 77, 85, 97	Օշական - 77, 78, 96, 97, 246
Վերի այգի (Աշնակ) - 91	Ֆրանկ-Հիսար - 271

ԲՈՎԱՆԴԱԿՈՒԹՅՈՒՆ

Երկու խոսք	5
Անին մայրաքաղաք եւ կաթողիկոսանիստ	9
Հազարամյա Բագնայրի վանքը	58
Գրիգոր Ապիրատ Մագիստրոսը եւ նրա տոհմը 11-րդ դարում	101
Գրիգոր Մագիստրոս Պահլավունու արձանագրությունը Կեչառիսում	138
Գրիգոր Պիստ Շիրակացի	150
Հովհաննես Սարկավագի գործունեությունն Անիում	169
Հռոմոսի վանահայրերը	192
Հառիճի վանքի պատմությունից	200
Անի քաղաքը եւ Ծառաքար-Մաղասբերդը 11-14-րդ դդ.	216
Դվին-Անի ճանապարհի Արուճ եւ Թալին հանգրվանները	236
«Իմաստասէր» պատվանունն Անիում	256
Աբրահամ Կրետացու «Անի քաղաքի պատմությունը»	262
Անձնանուններ	276
Տեղանուններ	289